

Ս.Մ. ԿՐԿՅԱՇԱՐՅԱՆ

**ՀԻՆ ՀԱՅԱՍՏԱՆԻ
ՊԵՏԱԿԱՆ ԿԱՌՈՒՑՎԱԾՔԸ
(Մ.Թ.Ա. VI - Մ.Թ. IV ԴԴ.)**

Ս. Մ. ԿՐԿՅԱՇԱՐՅԱՆ

ՀԻՆ ՀԱՅԱՍՏԱՆԻ
ՊԵՏԱԿԱՆ ԿԱՌՈՒՑՎԱԾՔԸ

(Մ.Թ.Ա. VI - Մ.Թ. IV ԳԳ.)

947.925 « 639 » ✓

Հ. Հ. ԳԻՏՈՒԹՅՈՒՆՆԵՐԻ ԱԶԳԱՅԻՆ ԱԿԱԴԵՄԻԱ
ՊԱՏՄՈՒԹՅԱՆ ԻՆՍՏԻՏՈՒՏ

Ս. Մ. ԿՐԿՅԱՇԱՐՅԱՆ

ՀԻՆ ՀԱՅԱՍՏԱՆԻ
ՊԵՏԱԿԱՆ ԿԱՌՈՒՑՎԱԾՔԸ

(Մ.Թ.Ա. VI - Մ.Թ. IV ԴԴ.)

A II
90350



ԵՐԵՎԱՆ - 2005

ՀՏԴ 941 (479.25)
ԳՄԴ 63.3 (2Հ)
Կ - 858

ԸՆԹԵՐՑՈՂԻՆ

Սույն աշխատությունն ավարտված է եղել ավելի քան երեք տասնամյակ առաջ, որի համար Հ. Հ. Գիտությունների Ազգային Ակադեմիայի Պատմության Ինստիտուտը հեղինակին շնորհել է պատմական գիտությունների դոկտորի աստիճան: Տարբեր պատճառներով նրա հրատարակությունը կասեցվել է, և այժմ այն ներկայացվում է գիտական հասարակայնության ուշադրությանը: Գրված լինելով ավելի քան 30 տարի առաջ, աշխատության մեջ արտացոլված է այդ ժամանակի պատմագիտական տերմինաբանությունը, որը մենք որոշել ենք թողնել անփոփոխ, ինչը ավելի ճիշտ կարտացոլի այդ ժամանակի պատմագիտական մտքի մակարդակը և պատկերացումները:

Ս.Մ.Կ.

Գիրքը հրատարակվում է Հ.Օ.Ֆ.ի «Ա. Պերպերեան» ֆոնդի
հովանավորությամբ

Ս.Մ. ԿՐԿՅԱԾԱՐՅԱՆ

Կ - 858 Հին Հայաստանի պետական կառուցվածքը -
(մ.թ.ա. V - մ.թ. IV դդ.) - Եր. - Լուսակն, 2005

Գրքի սրբագրիչ, ինչպես նաև հունարեն,
գերմաներեն և ռուսերեն տեքստերի մեքենագրող՝
ԴՈՐԱ ՍԱԶԱՅԱՆ

Հայերեն տեքստի մեքենագրող և էջադրող՝
ՄԱՐՕ ՄԱՆԱՎԵԱՆ

0503020913
Կ $\frac{\quad}{0150 (01) - 2005}$ 2005 ԳՄԴ 63.3 (2Հ)

ISBN 99941-48-03-6

© Ս.Մ. Կրկյաշարյան, 2005 թ.

© «ԼՈՒՄԱԿՆ» Հրատարակչություն

ՆԵՐԱԾՈՒԹՅՈՒՆ

Հին Հայաստանի պետական կառուցվածքի հարցը սերտորեն առնչվում է Հայկական լեռնաշխարհում պետականության առաջացման նախադրյալների, հայկական առաջին պետության առաջացման և պետական հաստատությունների հետագա զարգացման հարցերի հետ: Հայ ժողովրդի պատմության համար կարևորագույն նշանակություն ունեցող այս հարցերը պատմագրության մեջ ըստ էության իրենց բավարար լուծումը դեռևս չեն ստացել: Այսպիսի վիճակը պիտի վերագրել, առաջին հերթին այն բանին, որ մեզ հասած մատենագրական աղբյուրները, լինեն դրանք հայկական թե օտարալեզու, խիստ ժլատ, շատ դեպքում նույնիսկ ծայր աստիճան շփոթ ու կասկածելի, եթե չասենք՝ հակասական, տվյալներ են հաղորդում հայկական պետության առաջացման և Հայաստանում տիրող պետական կարգերի մասին: Հին Հայաստանին վերաբերող տվյալների կցկտոր ու խառնաշփոթ վիճակը հնարավորություն չի ընձեռել ուսումնասիրողներին Հայաստանի հնագույն շրջանի թեկուզ և քաղաքական պատմությունը հանգամանորեն շարադրելու, ուր մնաց թե երկրի ընդհանուր սոցիալ-տնտեսական հարաբերություններին և պետական կառուցվածքին վերաբերող հարցերը բավարար չսփով լուսաբանելու:

Ընդհանրապես հին Հայաստանի պատմության վերաբերյալ սկզբնաղբյուրները զանազանատիպ են թե՛ իրենց բնույթով, թե՛ ըստ գրության ժամանակի: Հին Հայաստանին վերաբերող վկայությունները ցաք ու ցրիվ սփռված են մ.թ.ա. V դարի պատմիչ Հերոդոտոսից մինչև մ.թ. VI դարում ապրած բյուզանդական մատենագիր Պրոկոպիոս Կեսարացին (չհաշված X դարի բյուզանդական բառարանագիր Սուիդասին, ինչպես նաև հնագույն մատյաններից տեղեկություններ քաղած մի շարք բյուզանդական տարեգիրներին) ընկած ավելի քան հազար տարի ընդգրկող ժամանակահատվածում ապրած հունա-հռոմեական մի շարք հեղինակների երկերում: Հայաստանին և հայերին առնչվող նյութերը պրպտելիս, հաճախ հարկադրված ենք լինում քրքրելու

անտիկ հեղինակների ոչ միայն պատմական երկերը, այլև անտիկ բնագետների, աշխարհագրագետների, բարոյախոսների, մինչև իսկ գեղարվեստական խոսքի վարպետների գործերը:

Հունա-լատինական գրավոր աղբյուրները, ընդհանուր առմամբ, ունեն անժխտելի մի առավելություն: Նրանց հեղինակների ճնշող մեծամասնությունը առավել կամ պակաս չափով ժամանակակից են իրենց նկարագրած իրադարձություններին և կամ օգտվել են այդ իրադարձությունների մասին գրած ավելի վաղ հեղինակների գործերից: Անտիկ հեղինակների երկերի այդ արժանիքը, սակայն, հասնում է նվազագույնի այն դեպքում, երբ արդեն խոսքը վերաբերում է Հայաստանի ներքին պատմությանը առնչվող հարցերին: Անժխտելի է, որ նրանց ուշադրության կենտրոնում եղել է հունա-հռոմեական աշխարհը, որից դուրս գտնված բոլոր երկրները դիտվել են որպես բարբարոսական: Հետևաբար, նրանք խիստ պատահականորեն, դեպքից դեպք են գրում Հայաստանի մասին, որը, հանդիսանալով այդ աշխարհի ծայրամասերից մեկը, չէր կարող նրանց լուրջ ուշադրության առարկան դառնալ: Հայաստանի մասին նրանք, ընդհանրապես, գրել են քաղաքական որևէ իրադարձության կամ հունա-հռոմեական աշխարհի արքաների ու զորա-հրամանատարների նվաճողական արշավանքների կապակցությամբ: Ուստի և օտարալեզու այդ սկզբնաղբյուրները շոշափում են, գլխավորապես, Հայաստանի արտաքին քաղաքական պատմության հարցերը, ուշադրություն չդարձնելով երկրի ներքին կյանքի վրա¹: Հասկանալի է, որ դրանցում պահպանված կցկտուր տեղեկությունները բոլորովին էլ բավական չեն հին Հայաստանի սոցիալ-քաղաքական պատմությունը շարադրելու համար:

Չնայած այն բանին, որ պայմանավորված լինելով հայկական գրերի գյուտի հետ, մեր ազգային մատենագրությունը պետք է երևան գար միայն մ.թ. V դարում և դրանից հետո, երբ դեռևս ութ դար առաջ կազմավորված հայկական ինքնուրույն պետականությունն արդեն վերացել էր և նրա մասին մեր նախնիները միայն հուշեր և զրույցներ էին պահպանել, երբ հեթանոսական

(1) *Բացառություն են կազմում Քսենոփոն Աթենացու «Անաբասիս» (Κύρου ἀνάβασις) և «Կյուրոպեդիա» (Κύρου παιδεία) ինչպես և Ստրաբոնի «Աշխարհագրություն» (Γεωγραφικά) երկերը:*

Հայաստանի գրավոր հուշարձանները (եթե այդպիսիները գոյություն են ունեցել երբևիցե), քրիստոնեության, որպես պետական կրոնի, ընդունումից հետո, համարյա ամբողջապես ոչնչացվել էին, այնուամենայնիվ, հին Հայաստանի ներքին, սոցիալ-տնտեսական հարաբերությունների պատմությունն ուսումնասիրելիս, անգնահատելի են մեր անդրանիկ պատմագիրների, առանձնապես Ագաթանգեղոսի, Փավստոս Բուզանդի և Մովսես Խորենացու մատյանները: Հակառակ իր վարքագրական բնույթին, Ագաթանգեղոսի երկը պատմագիտական մեծ արժեք է ներկայացնում հին Հայաստանի տեղագրության, երկրում տիրող նախարարական կարգերի, հաշվական դիցաբանության և պաշտամունքային կենտրոնների, ինչպես նաև երկրի ներքին կյանքի այլ բնագավառների ուսումնասիրման համար²: Փավստոս Բուզանդի մատյանում ևս, որտեղ թեպետև շարադրված են ընդամենը 55 տարվա դեպքերը, սկսած Խոսրով Կոտակի (332-338 թթ.) թագավորությունից մինչև Հռոմի և Պարսկաստանի միջև Հայաստանի առաջին բաժանումը (387 թ.), պահպանված են արժեքավոր տեղեկություններ հայոց թագավորի և հայ նախարարների փոխհարաբերությունների, ինչպես նաև տարբեր գործակալությունների մասին³:

Սակայն հայ մատենագիրներից մեզ համար միշտ էլ անփոխարինելի մնում է Մովսես Խորենացին: Մեր ազգային մատենագիրներից միայն պատմահայրն է, որ Հայաստանի կապակցը ված պատմությունը շարադրելիս հնագույն ժամանակներից մինչև հայ Արշակունյաց թագավորության անկումը, աշխատել է պատմական ժամանակագրության մեջ հանգամանորեն տալ հայկական թագավորության առաջացման պատմությունը, նկարագրել Հայաստանի պետական կարգը, տեղեկություններ հաղորդել Հայաստանի պետական կառուցվածքի մասին⁴: Սակայն, ինչպես նոր նշեցինք, հայկական պետականության առաջացման և պետական համապատասխան հաստատությունների ստեղծման

(2) *Ագաթանգեղոսի մասին եղած լիակատար մատենագիտությունը տես Հ. Անասյան, Հայկական Մատենագիտություն, Կ. Ա, Երևան, 1959, էջ 151-213:*

(3) *Փավստոս Բուզանդի հրատարակությունների մատենագիտությունը տես «История Армении Фавстоса Бузанда», Ереван, 1953, էջ 233-237:*

(4) *Մովսիսի Խորենացուց Պատմութիւն Հայոց, Տիպիս, 1913, գիրք Բ:*

Ժամանակաշրջանից հայ պատմիչին ամբողջ հարյուրամյակներ են բաժանում: Եթե այս նկատումանն ավելացնենք նաև ոչ պակաս նշանակություն ունեցող այն հանգամանքը, որ Խորենացու ապրած տարիներին հայոց աշխարհը կորցրել էր իր ինքնուրույն պետականությունը և քաղաքական անկախությունը, և գուցե պետական մի շարք հաստատություններ վերացել էին կամ ձևափոխվել բյուզանդա-պարսկական նվաճողների շահերին համապատասխան, ապա մեզ համար ավելի քան պարզ կլինի, որ նաև, մեր մյուս մատենագիրների նման, չէր կարող բացարձակապես ճշգրիտ և սպառիչ պատկերացում ունենալ հին Հայաստանի պետական կարգի և պետական կառուցվածքի մասին: Հետևաբար, նշված հարցերին անդրադառնալիս, պատմահայրը ամեն անգամ հարկադրված էր դիմելու իրենից առաջ գոյություն ունեցած և իրեն մատչելի հնագույն աղբյուրներին՝ մատենագրական թե վիմագիր: Իսկ այդ աղբյուրները, իր իսկ Խորենացու վկայությամբ, բացառապես օտարաբան էին: Մովսես Խորենացու օգտագործած բազմաթիվ աղբյուրների թվում նշանակալից տեղ են գրավում նաև սերնդե սերունդ ավանդված ազգային բանավոր գրույցները, որոնք, սակայն, շատ դեպքերում չէին համապատասխանում օտար գրավոր աղբյուրների վկայություններին և ստացել էին վիպական երանգավորում: Անտիկ հեղինակների մատյաններից օգտվելիս, Մովսես Խորենացին աշխատել է Հայաստանի և հայերի մասին նրանց հաղորդած տվյալները հաշտեցնել մեր ազգային գրույցներում և բանավոր պատումներում պահպանված հիշատակությունների հետ, բոլոր դեպքերում նախապատվությունը տալով վերջիններին: Այստեղից էլ, գլխավորապես, բխում են պատմահոր տվյալների մասնակի անճշտությունները և շեղումները հատկապես Հայաստանի արտաքին քաղաքական պատմությանը վերաբերող վկայություններում: Առավել ստույգ և արժանահավատ են երկրի ներքին, սոցիալ-տնտեսական պատմությանը վերաբերող Խորենացու հաղորդած տեղեկությունները: Այդ ստուգության կորագիծը առավել բարձրանում է, պատմահոր ապրած ժամանակաշրջանին մերձենալուն համընթաց:

Ահա թե ինչու Հայաստանի հնագույն ժամանակաշրջանի պատմությանը վերաբերող Մովսես Խորենացու հաղորդած տրվյալներից օգտվելիս, դրանք ստուգելու, ճշգրտելու կամ լրացնելու համար ամեն անգամ կարիք է զգացվում դիմելու օտարա-

բան հեղինակների երկերում հայերի և Հայաստանի մասին պահպանված գուգահեռ և առնչակից հաղորդումներին, մանավանդ որ այդ հեղինակների մի մասը, իր իսկ պատմահոր հավաստիացումներին համաձայն, եղել են Խորենացու աղբյուրները: Այդ հեղինակների ճնշող մեծամասնությունը, սակայն, անձնապես չի եղել Հայաստանում, ուստի և նրանք գրել են Հայաստանի մասին սոսկ իրենց լսածների կամ ավելի վաղ հեղինակների երկերում այդ մասին կարդացածի հիման վրա⁵: Նույնիսկ Հերոդոտոսի նման հեղինակը, որն իր պատմական երկը շարադրելու համար նյութեր ու տպավորություններ քաղելու նպատակով շրջագայել է բազմաթիվ երկրներ, մեր կարծիքով, չի եղել Հայաստանում: Մեր այս ենթադրությունը հիմնված է բոլորովին էլ Հայաստանին չվերաբերող Հերոդոտոսի մի վկայության վրա, որը, սակայն, անուղղակի կերպով ցույց է տալիս, որ առաջին պատմագիրը ինքը չի այցելել Հայաստան: Նկարագրելով հին եգիպտացիների կենցաղը, նա գրում է, որ «նրանք միակ ժողովուրդն են, որոնք իրենց անասունների հետ ապրում են նույն հարկի տակ»⁶: Եթե նա իսկապես այցելած լիներ Հայաստան, ապա Քսենոփոնի նման նա ևս կտեսներ, որ այդ ժամանակ հայկական գյուղերում էլ մարդիկ իրենց ընտանի կենդանիների հետ ապրում էին միևնույն տանը⁷: Ինչքան էլ որ մեզ համար գայթակղիչ թվա Հետոդոտոսի՝ Հայաստան այցելած լինելու ենթադրությունը, այնուամենայնիվ, քանի որ ինքն այդ մասին ոչ մի հիշատակություն չունի, մենք մեզ իրավունք չենք վերապահում նրան վերագրելու այն, ինչ վկայված չէ նրա պատմության մեջ: Ուստի և չհիմնավորված պիտի համարել սկադ. Հ.Հ. Մանանդյանի կարծիքը, երբ գրում է. «Ավելի քան հավանական է, որ նա (Հերոդոտոսը – Ս.Կ.) ևս, ինչպես և Քսենոփոնը, նույնպես անձամբ եղել էր Հայաստանում և արմենների ու նրանց երկրի մասին գրել էր, գլխավորապես, այն, ինչ որ ինքը տեսել էր կամ

(5) Տես Ս.Մ. Կրկյաշարյան, Հին Հայաստանի և Փոքր Ասիայի քաղաքների պատմության գրվագներ, Երևան, 1970, էջ 9-31, որտեղ հանդամանորեն խոսվում է օտարերկրյա այդ հեղինակների մասին:

(6) Herodoti Historiae, II, 36.

(7) Xenophontis Expeditio Cyri (այսուհետև՝ Anabasis), գիրք IV, գլ. 5, 26:

լսել էր իր ճանապարհորդությունների ընթացքում»⁸: Այս տեսակետից երջանիկ բացառություն են կազմում անտիկ հեղինակներից Քսենոփոնը և Ստրաբոնը, որոնք անձամբ եղել են Հայաստանում, հետևաբար, հայերի ու նրանց երկրի մասին գրել են հիմնականում այն, ինչ իրենք տեսել են կամ տեղում լսել⁹: Դեռ ավելին: Ստրաբոնը չի բավարարվել այդքանով: Նա օգտվել է իրենից առաջ Հայաստանով անցած և հայերի ու նրանց երկրի մասին գրած նախորդ հեղինակների գործերից, ինչպիսիք եղել են Ալեքսանդր Մակեդոնացու ուղեկիցներ Կյուրսիլոս Փարսալացին և Մեդիոս Լարիսացին¹⁰:

Հերոդոտոսի և Քսենոփոնի հաճախապատասխան երկերը, սակայն, մեզ քիչ բանով կարող են օգնել հայկական թագավորության պետական կառուցվածքն ուսումնասիրելու գործում, քանի որ դրանք գրվել են այն ժամանակ, երբ Հայկական լեռնաշխարհը գտնվում էր Աքեմենյան Պարսկաստանի տիրապետության տակ և հայերը դեռևս չէին կարողացել ստեղծել իրենց ինքնուրույն պետականությունը, թեպետև Քսենոփոնն իր «Կյուրոսի դաստիարակությունը» (Κύρου παιδεία) պատմական վեպում հանգամանալից կերպով խոսում է արմենների թագավորի և նրա ընտանիքի, ինչպես նաև «պատվավոր արմենների» մասին¹¹: Այնուամենայնիվ, այս երկու խոշորագույն պատմագիրների վկայություններն անփոխարինելի են հայկական պետականության առաջացման սոցիալ-տնտեսական ու քաղաքական նախադրյալներն ուսումնասիրելու համար, քանի որ դրանք միակն են ամբողջ մատենագրության մեջ, որ նյութեր են հաղորդում այդ հարցի վերաբերյալ:

Հայաստանի հնագույն այդ շրջանի պատմությունն ուսումնասիրելիս, հնարավոր չէ անուշադրության մատնել Հերոդոտոսի այն եզակի վկայությունները, որոնք վերաբերում են Հայ-

(8) Հ.Հ. Մանանդյան, Քննական տեսությունն հայ ժողովրդի պատմության, Կ. Ա, Երևան, 1944, էջ 382: Հ. Մանանդյանի այս ենթադրությունը, մեր կարծիքով, հիմնված է իր իսկ Հերոդոտոսի այն հավատարմացման վրա, թէ ինքը անցել է «արքունի ճանապարհով», որի մի հատվածը, ինչպես հայտնի է, ձգվում էր հայկական Մոփքի միջով:

(9) Ս.Մ. Կրկյաշարյան, նշվ. աշխ., էջ 10-11 և 20-22:

(10) Strabo, XI, 14, 12 (C. 530).

(11) Xenophontis Cyropaedia, III, 1, 1-43; III,2, 1-26.

կական լեռնաշխարհի և Բաբելոնի միջև գոյություն ունեցած առևտրական հարաբերություններին, հաշերի զեն ու զրահին, Աքեմենյանների զանձարանին մուծած նրանց հարկերի չափին և այլն¹²:

Նախահելլենիստական ժամանակաշրջանի Հայաստանի պատմությունն ուսումնասիրելիս, առանձին ուշադրության են արժանի Քսենոփոնի հանրահայտ երկերը՝ «Կյուրոսի դաստիարակությունը» (Κύρου παιδεία) և «Անաբասիսը» (Κύρου ἀνάβασις): Սրանցից առաջինը իսկական պատմական երկ չհանդիսանալով հանդերձ (այն առավելապես բարոյախոսական-քաղաքական վեպ է), արժեքավոր տեղեկություններ է բովանդակում Աքեմենյան Պարսկաստանի տիրապետության տակ գտնված մ.թ.ա. VI դարի Հայաստանի քաղաքական և սոցիալ-տնտեսական կյանքի, ինչպես նաև հետաքրքիր գրույցներ այդ ժամանակ Հայկական լեռնաշխարհում ապրող ցեղերի մասին¹³: Գալով Քսենոփոնի «Անաբասիս» երկին, ապա Հայաստանին վերաբերող դրա հատվածները¹⁴, գրված լինելով ականատեսի գրչով (հիշենք, որ 10 հազար հելլեն վարձկանների նահանջի ճանապարհի մի զգալի մասն անցնում էր Հայկական լեռնաշխարհի միջով), բոլոր ուսումնասիրողների համար եղել են ամենահուսալի սկզբնաղբյուրը պարսկական սատրապի գերիշխանության տակ գտնված Հայաստանի սոցիալ-տնտեսական և քաղաքական պատմությունը շարադրելիս:

Մեզ համար առանձնապես արժեքավոր է նաև Հայաստանին սահմանակից Պոնտական Ամասիա քաղաքում ծնված հույն մատենագիր Ստրաբոնի (մ.թ.ա. 64-մ.թ. 20) պատմա-աշխարհագրական բնույթի հանրահայտ «Աշխարհագրություն» (Γεωγραφικὰ) երկը, որում լայնորեն օգտագործված են ոչ միայն հեղինակի անձնական դիտողությունները և տպավորությունները

(12) Herodot., I 72, 180, 194; III, 93, 94; V, 49, 52; VII, 73, 79.

(13) Xenoph., *Cyrop.*, II, 1,6; 4,9-32; III 1,1-43; 2,1-31; 3,1-5; 3,36; VIII 4,24:

Հայերեն թարգմանությունը տես Քսենոփոն, Կյուրոսապատում. Ֆրանսերենից թարգմ. Աշոտ Մուրադխանյան, Թեհրան, 1971:

(14) Xenoph., *Anabasis*, III, 5,5-18; IV, 1,1-28; 2,1-26; 3,1-34; 4,1-22; 4,1-36; 6,1-27; 7,1-27; V, 5,1; 5,16-17; 6,36; VII 8,25: *Հայերեն թարգմանությունը տես Քսենոփոն, Անաբասիս, բնագրից թարգմանեց և ծանոթագրեց՝ Սիմոն Կրկյաշարյան, Երևան, 1970:*

իր ճանապարհորդություններից, այլև մեզ հայտնի երկերը այնպիսի հեղինակների, ինչպիսիք են Հերոդոտոսը, Պլինիոսը և այլն¹⁵, ինչպես նաև այլ հեղինակների (Երատոսթենես, Հիպպարքոս, Արտեմիդորոս Եփեսացի, Թեոփանես Միտիլենացի, Մեդիոս Լարիսացի և ուրիշներ)¹⁶ մեզ չհասած գործերը: Ստրաբոնի այս երկը իր ժամանակի չափանիշով պատմա-աշխարհագրական և ազգագրական մի յուրատեսակ հանրագիտարան է, որում, իմիջիայլոց, արժանահավատ վկայություններ կան ոչ միայն հանրահայտ պետականության վաղագույն շրջանի, այլև Հայաստանին հարևան մյուս երկրների (Պարսկաստան, Ատրոպատեն, Ալբանիա, Իբերիա, Պոնտոս, Կապադովկիա, Ասորիք) պատմության մասին, որոնց հետ հայերն ունեցել են սերտ քաղաքական և մշակութային հարաբերություններ դեռևս հնագույն ժամանակներից սկսած:

Մեզ համար որոշակի արժեք են ներկայացնում հույն պատմիչ Դիոդորոս Սիկիլիացու (մ.թ.ա. շուրջ 90-20 թթ.) «Պատմական գրադարան»ում (Βιβλιοθήκη Ἱστορικὴ) պահպանված և մեր պատմության հնագույն շրջանին վերաբերող առանձին հատվածներ, որոնք դեռևս հայագիտության մեջ պատշաճ ուշադրության չեն արժանացել: Մեր սույն ուսումնասիրության մի շարք հատվածներ բացառապես հիմնված են Դիոդորոսի հղորդած այդ վկայությունների վրա¹⁷:

Թեպետև իր բնույթով հոռոմայեցի հեղինակ Գայոս Պլինիոս Ավագի «Բնության պատմությունը» (Naturalis Historiae) ուղղակիորեն պատմական բովանդակություն ունեցող երկ չէ, սակայն դրանում կա եզակի մի տեղեկություն Հայաստանի Իդարի վարչական բաժանման մասին, որի պատմագիտական արժեքը դրժվար է գերազնահատել¹⁸:

Հայկական և Պոնտական թագավորությունների կարևորագույն շրջաններից մեկի՝ Տիգրան Բ-ի և Միհրդատ Զ Եվպատորի (մ.թ.ա. Իդարի առաջին կեսը) փոթորկալից պատմությունն առաջին հերթին ուսումնասիրում ենք Պլուտարքոսի և Ապպիանոսի

(15) Strabo, XI, 14,13 (c. 531); XI, 14,16 (c. 533); XIV, 2,29 (C. 683).

(16) *Նույն աեղում*, I, 3,1 (c. 47); II, 1,11 (c.71); II, 1,29 (c.82); XI, 14,8 (C.529)

և այլն:

(17) Diodori Bibliotheca Historica, vol. I-V, Lipsiae, 1866-1868.

(18) C. Plinii Secundi Naturalis Historiae, Paris, 1883, VI, 9.

հաղորդած արժեքավոր տեղեկությունների հիման վրա: Հույն պատմիչ և բարոյախոս Պլուտարքոսը (46–123 թթ.) հեղինակն է անտիկ աշխարհի հայտնի ուսման ու քաղաքական գործիչների կենսագրությունների (*Βίοι παράλληλοι*)¹⁹, որոնց առանձին հատվածները, շատ դեպքերում, մեր միակ գրավոր աղբյուրներն են մ.թ.ա. I դարի Հայաստանի և նրան հարևան երկրների պատմության ուսումնասիրման համար: Պլուտարքոսի երկերից օգտվելիս, սակայն, երբեք չի կարելի մոռանալ հեղինակի արիստոկրատական ծագումը, բացահայտ հոռմեասեր կողմնորոշումը, բարոյախոսական շեշտված նպատակադրումը, ինչպես նաև նրա բացասական վերաբերմունքը ժողովրդական զանգվածների սոցիալական շահումների և Հռոմին հակադրվողների նկատմամբ: Նույնը պիտի ասել նաև Ապպիանոս Ալեքսանդրիացու մասին (մ.թ. II դ.), որի «Հոռմեական պատմության» 12-րդ «Միհրդատական» գրքում ընդարձակ կերպով նկարագրված են Միհրդատի և Տիգրանի պատերազմները Հռոմի դեմ, Տիգրանակերտի կառուցումը, ինչպես նաև հայոց թագավորի որդիների բանասրկությունները իրենց հոր՝ Տիգրան Մեծի դեմ: Նույնքան կարևոր են այդ երկի 11-րդ «Միրիական» գրքում Հայաստանի, հատկապես Տիգրան Բ-ի նվաճումների և գործունեության մասին Ապպիանոսի հաղորդած եզակի տեղեկությունները²⁰:

Հին Հայաստանի, ինչպես և Պոնտոսի թագավորության պետական կառուցվածքն ու քաղաքական պատմությունն ուսումնասիրողի համար անփոխարինելի է մ.թ.ա. I դարի հույն հռետոր, փիլիսոփա և մատենագիր, Տիգրան Մեծի արքունիքում ապրած և նրա թագավորության պատմությունը գրած Մետրոդորոս Ալեպսացու երկի կորուստը²¹:

Մինչև վերջին դարակիզբը Առաջավոր Ասիայի հելլենիստական, ինչպես նաև Հռոմի տիրապետության ժամանակաշրջանի պատմությունը ուսումնասիրվել ու շարադրվել է, հիմնականում, գրավոր պատմողական աղբյուրների տվյալների հիման վրա: Սակայն, այն բանից հետո, երբ վերջին հարյուրամյակում նշված տարածքի վրայ հայտնաբերվեցին մեծ քանակությամբ

(19) Plutarchi Vitae parallelae, vol. 1-4, Lipsiae, 1914-1939.

(20) Appiani Alexandrini Historia Romana, I-II, Lipsiae, 1879.

(21) Strabo, XIII, 1,55; C. Plin., Nat. Hist., XXXIV; Plutarchi Vitae, Lucullus, XXII, 3-6.

հունարեն վիմական արձանագրություններ²², արդեն բավական չէ այդ երկրների պատմությունն ուսումնասիրել հենվելով բացառապես պատմողական աղբյուրների վկայությունների վրա: Այժմ արդեն հելլենիզմի պատմությունն ուսումնասիրողի տրամադրության տակ եղած վիմական արձանագրությունները, բոլոր դեպքերում, օգնում են լուսաբանելու այդ շրջանի սոցիալ-տնտեսական ու քաղաքական պատմության կարեվորագույն հարցերը:

Դժբախտաբար, հին հայկական քաղաքների սիստեմատիկ հնագիտական պեղումները դեռևս վեջերս են սկսվել (այն էլ՝ միայն Խորհրդային Հայաստանի տարածքի վրա) և, կարծում ենք, որ դրանք նորանոր արձանագրություններ կտան, որոնց ուսումնասիրությունը նոր լույս կարող է սփռել մեր ժողովրդի հնագույն շրջանի պատմության վրա: Այսուհանդերձ, պատմական Հայաստանի տարածքի վրա տարբեր ժամանակներում, բոլորովին պատահական կերպով, հայտնաբերվել են, հելլենիստական Արևելքի մյուս երկրների հետ համեմատած, ոչ մեծաթիվ, շուրջ երկու տասնյակ արձանագրություններ արամեերեն, հունարեն և լատիներեն, որոնք անմիջականորեն վերաբերում են Հայաստանի հելլենիստական շրջանի պատմությանը²³: Դրանք հարազատ վավերագրեր են և ժամանակակից աղբյուրներ այն

(22) Այդ արձանագրությունները ի մի հավաքելու և հրատարակելու շնորհակալ գործը կատարել է գերմանացի գիտնական Վ. Դիտենբերգերը (W. Dittenberger, *Orientalis Graeci Inscriptiones Selectae*, vol. I-II, Lipsiae, 1903-1905. այսուհետև՝ OGIS): Նորագյուտ հունարեն արձանագրությունների մասին տես «Revue des études grecques» հանդեսի համարներում:

(23) Հայաստանում հայտնաբերված այդ արձանագրությունները տարբեր ժամանակներում հրատարակվել են առանձին հետազոտողների կողմից, իսկ վերջերս ամփոփված են К.В. Тревср. Очерки по истории культуры древней Армении, М.-Л., 1953 աշխատության մեջ: Արամեերեն մի արձանագրություն հրատարակել է Գ.Ա. Տիրացյանը (Արտաշես Ա-ի արամեատառ նորագյուտ արձանագրությունը, ՏեղձԳԱձԳ, 1957, Նո 10, էջ 108): Արամեերեն երկու արձանագրություն հրատարակել է Ա.Գ. Փերիխանյանը (А.Г.Периханян, Арамейская надпись из Гарни, ՊԲՀ, 1964, Նո 3, էջ 123-138): Նույնի, Арамейская надпись из Зангезура, ՊԲՀ, 1965, Նո 4, էջ 107-128): Լատիներեն արձանագրություն հրատարակել է Բ.Ն. Առաքելյանը (Լատիներեն արձանագրություն Արտաշատից, ՊԲՀ, 1967, Նո 4): Բոլորովին վերջերս արամեերեն երկու արձանագրություն հրատարակեց Գ.Հ. Կարախանյանը (Արամեերեն երկու արձանագրություններ, ՊԲՀ, 1971, Նո 3, էջ 274-276): Այս վերջին

դեպքերի և իրավիճակի, որոնց դրանք վերաբերում են: Այս առավելությամբ կողքին, սակայն, այդ արձանագրություններն ունեն երկու ակնառու թերություն՝ մեծ մասամբ թերատ են, վատ պահպանված և չափազանց դժվար է դրանց ճիշտ թվագրումը:

Հայաստանում հայտնաբերված անտիկ շրջանին վերաբերող այդ արձանագրություններից բոլորը չէ, որ այս կամ այն չափով արժեք են ներկայացնում հին Հայաստանի սոցիալ-տնտեսական ու քաղաքական պատմության հետ առնչված հարցերը լուսաբանելու համար: Այդ արձանագրություններից պատմաբանի համար առավել արժեքավոր են Արմավիրի, Գառնիի, Ապարանի, Տիգրանակերտի հունարեն, ինչպես նաև վերջերս Հայաստանում հայտնաբերված արամեերեն մի շարք արձանագրությունները, որոնց ուսումնասիրությունը որոշակի լույս է սփռում հին Հայաստանի ոչ միայն սոցիալ-քաղաքական, այլև մշակույթի պատմության վրա: Ուստի և բոլորովին պատահական չափիտի համարել այն դրական երևույթը, որ հիշյալ արձանագրություններով զբաղվել ու զբաղվում են համաշխարհային ճանաչում գտած այնպիսի գիտնականներ, ինչպիսիք են Կ. Ֆ. Լեման-Հաուպտը, Մ.Ի. Ռոստովցևը, Յ. Մարկվարտը, Հ. Մանանդյանը, Կ.Վ. Տրեվերը, Լ. Ռոբերը և ուրիշներ²⁴: Ամենայն հավանականությամբ, այդ արձանագրություններից մի քանիսը, ինչպես Գառնիի հունարեն արձանագրությունը և Արտաշեսի անունը

արձանագրությունների գլխական մեկնությունը տես A. Perikhanian, Les inscriptions araméennes du roi Artachés, "Revue des études arméniennes", nouvelle serie, tome VIII, 1971, էջ 169-174: Վերջին տարիներին հայտնաբերված վերահիշյալ արձանագրությունները լավագույն երաշխիքն է այն բանի, որ Սովետական Հայաստանում սկսված հնավայրերի պեղումները մեզ կտան Հայաստանի հին շրջանի պատմությանը վերաբերող վիճակն նոր ավյալներ:

- (24) C.F. Lehmann-Haupt, Eine griechische Inschrift aus der Spätzeit Tigranokertas, "Klio", VIII (1908), s. 447-520; М.И. Ростовцев, Апаранская греческая надпись царя Тиридата, СПб., 1911; J. Markwart, Südarmenien und die Tigrisquellen, Wien, 1930, էջ 134-135: Հ.Հ. Մանանդյան, Արմավիրի հունարեն արձանագրությունները նոր լուսաբանություն, Երևան, 1946: Նույնի, Գառնիի հունարեն արձանագրությունը և Գառնիի հեթանոսական տաճարի կառուցման ժամանակը, Երևան, 1946: Я.А. Манандян, Новые заметки о греческой надписи и языческом храме Гарни, Известия АН Арм. ССР, Общественные науки, 1951, № 4; К.В. Тревер, Очерки ..., էջ 99-288:

կրող արամներեն արձանագրությունները, դեռևս մեկ և կես հազարամյակ առաջ ծառայել են որպես սկզբնաղբյուր Մովսես Խորենացու²⁵։ Այդ մտքին է հանգեցնում ուսումնասիրողին Գառնիում կառուցված հռչակապ հուշարձանների մասին պատմահոր հաղորդած տեղեկությունների զարմանալի համընկնումը Գառնիի արձանագրության բովանդակությանը, ինչպես նաև վերոհիշյալ արամներեն արձանագրությունները կրող կոթողների ձևի համընկնումը Խորենացու տված նկարագրության հետ։

Անցյալում մի շարք անվանի հայագետներ հմտալից աշխատություններ են հեղինակել հին Հայաստանի պատմության վերաբերյալ, ընդհանրապես. բայց բոլոր դեպքերում պատմագիտության մեջ հայ հասարակության սոցիալ-տնտեսական կյանքի ուսումնասիրությունը մնում էր համարյա խոպան, քանի որ նախասովետական հայագետներն իրենց ուշադրությունը գերազանցապես բևեռել էին երկրի քաղաքական պատմության վրա, այն էլ շարադրելով իբրև թագավորների և ռազմական գործողություններ վարած զորահրամանատարների պատմություն։ Երջանիկ բացառություն է պրոֆ. Ն. Ադոնցը, որը էական ներդրում ունի հին, հատկապես մարգալանական Հայաստանի հասարակարգի ուսումնասիրման գործում։

Այսուհանդերձ, սխալ կլիներ պնդել, թե այս ուղղությամբ հայագետները ոչինչ չեն արել։ Դեռևս անցյալ հարյուրամյակում Մխիթարյան միաբաններից Ղ. Ինճիճյանը, առաջին անգամ, փորձեց ուսումնասիրել հին Հայաստանի պետական կարգը։ Իր աշխատության մեջ նա ամենայն մանրամասնությամբ թվարկում է հայ իրականության մեջ նկատված պետական պաշտոնները և հաստատությունները (թղեջխ, նախարար, իշխան, նահապետ, տանուտեր, հազարապետ, սպարապետ, սեպուհ, ոստանիկ և այլն), ամեն անգամ վկայակոչելով հայկական մատենագրական աղբյուրների տվյալները, սակայն առանց պատմագիտական անհրաժեշտ մեկնաբանության։ Այս առումով նրա աշխատությունը կարելի է համարել սկզբնաղբյուրներից վերցրած վկայու-

(25) Մովսես Խորենացի, Բ, գլ. Բ, ծգ. Հմմտ. Հ. Մ. Բարթիկյան, Գառնիի հուշարձաններն արձանագրություններ և Մովսես Խորենացին, ՊԲՀ, 1965, Նո 3, էջ 229-234։ Գ. Խ. Սարգսյան, Հելլենիստական դարաշրջանի Հայաստանը և Մովսես Խորենացին, Երևան, 1966, էջ 185-190։

թյունների հավաքում և դասդասում²⁶:

Հետագայում մի աշխատանք կատարել է նաև վրացի կովկասագետ Ի. Ջավախովը, առանձին ուսումնասիրությունն ակնարկելով հին Վրաստանի և հին Հայաստանի պետական կարգին: Ցավոք, այս վերջին աշխատությունը ևս այսօր չի կարելի բավարար համարել, քանի որ դրա հեղինակը նույնպես սահմանափակվում է գրավոր աղբյուրներում հանդիպող սոցիալական մի շարք տերմինների (թագավոր, տանուտեր, տուն, տոհմ, սեպուհ և այլն) սոսկ բանասիրական վերլուծությամբ: Թեպետ Ի. Ջավախովը իր ուսումնասիրության Հայաստանին վերաբերող հատվածում հենվել է բացառապես Փավստոս Բուզանդի, Եղիշեի և Ղազար Փարպեցու տվյալների վրա, շրջանցելով նույնիսկ ամենակարևոր աղբյուրը՝ Մովսես Խորենացուն, այսուհանդերձ նրա որոշ դիտողությունները կարող են մեզ համար օգտակար լինել²⁷:

Ն. Ադոնցը հայագետներից առաջինն էր, որը Հայաստանի ֆեոդալական կարգերի ուսումնասիրությունը դրեց իրական, լուրջ գիտական հիմքի վրա: Առաջին անգամ նա տվեց Հայաստանի վաղ ֆեոդալական հասարակության սոցիալ-իրավական կառուցվածքի գիտական խոր վերլուծությունը²⁸: Ն. Ադոնցը, սակայն, իր ամբողջ ուշադրությունը քեռեռել էր հարցի քաղաքական և իրավական կողմի վրա, չփորձելով բացահայտել նախարարական կազմակերպության առաջացման և հետագա զարգացման սոցիալ-տնտեսական ակունքները: Միաժամանակ անհրաժեշտ ենք համարում նշել, որ մեծ հայագետը հիմնականում նպատակադրված է եղել պատկերելու, ինչպես աշխատության վերնագիրն է ազդարարում, Հուստինիանոս կայսեր ժամանակ Հայաստանում տիրող դրությունը: Դեպի նախորդ դարերը նրա կատարած անխուսափելի անդրադարձումները կրում են, առավելապես, պատմա-աշխարհագրական, տեղագրական բնույթ: Այս անսարքեզում Ն. Ադոնցի սկսած գործը լրացնելու ուղղությանը մեծ աշխատանք կատարեցին Հ.Հ. Մանանդյանը, Խ.

(26) Դ. Ինճիբեան, Հնախոսութիւն աշխարհագրական Հայաստանեայց աշխարհի, Հ. Բ, Վենետիկ, 1835:

(27) И. Джавахов, Государственный строй древней Грузии и древней Армении, С.П.б., 1905.

(28) Н. Адонц, Армения в эпоху Юстиниана, С.П.б., 1908.



Սամվելյանը, Ս.Տ. Երեմյանը, Բ.Ն. Առաքելյանը, Գ.Խ. Սարգրսյանը, Ա.Գ. Փերիկիսանյանը, Գ.Ա. Տիրացյանը, Հ. Ժամկոչյանը և մի շարք խորհրդահայ պատմաբաններ:

Այսպես, Հ. Մանանդյանն իր «Ֆեոդալիզմը հին Հայաստանում» ընդհանրացնող աշխատության մեջ ուսումնասիրել է նախարարական տերությունների ներքին կազմակերպությունը և կառուցվածքը, ինչպես նաև նախարարների և թագավորի փոխհարաբերությունները: Հ. Մանանդյանն առանձնապես զգաղվել է հին Հայաստանի նշուխական բարիքների ստեղծողների, անմիջական արտադրողների դրությամբ²⁹:

Խորհրդային իշխանության տարիներին լույս են տեսել հին Հայաստանի սոցիալ-տնտեսական կյանքի տարբեր կողմերին նվիրված մի շարք արժեքավոր ուսումնասիրություններ: Առանձին ուշադրության է արժանացել Հայաստանում ստրկության և ստրկատիրական հասարակարգի գոյության հարցը: Այս առնչությամբ էլ առաջացել են բուռն վեճեր: Այժմ արդեն որոշակիորեն ուրվագծվել է երկու հակադիր տեսակետ: Ուսումնասիրողներից ոմանք գտնում են, որ Հայաստանում ստրկությունը, որպես երևույթ, նկատելի է, բայց այն չի եղել տիրապետող և չի կատարել արտադրության մեջ գերիշխող դեր. հետևաբար, չի կարելի խոսել Հայաստանում ստրկատիրական հասարակարգի գոյության մասին³⁰: Վերջին տասնամյակներում, սակայն, ավելի ու ավելի հաստատվում է Ս.Տ. Երեմյանի առաջադրած այն տեսակետը, թե հին Հայաստանը ևս անցել է ստրկատիրական հասարակարգի պատմափուլը, թեպետև ստրկատիրությունը մեր

(29) Հ.Հ. Մանանդյան, *Ֆեոդալիզմը հին Հայաստանում (Արշակունիների և մարզպանության շրջան)*, Երևան, 1934: Այս ուսումնասիրության մեջ հեղինակը հանրագումարի է բերել մինչ այդ իր իսկ հրատարակած մի շարք հոդվածներում արժարժված հարցերը:

(30) Նույն տեղում՝ Я.А. Манандян, Актуальные вопросы историографии древней Армении, «Историк марксист», 1940, № 6; Նույնի՝ Проблемы общественного строя доаршакидской Армении, «Исторические записки», 1945, № 15. Խ. Սամուելյան, Ստրկությունը հին Հայաստանում, ՀՍՄՀ Պատմության և գրականության ինստիտուտի «Տեղեկագիր», № 2, Երևան, 1937: Նույնի, Հին հայ իրավունքի պատմություն, Հ. 1, Երևան, 1957: Նույնի, Հայ ժողովրդի ֆեոդալական շրջանի պատմության պերիոդիզացիայի հարցի շուրջը, Տեղ. ՀԳԱՀԳ, 1951, № 8, էջ 23-46:

երկրում ունեցել է այլ բնույթ, քան հունա-հռոմեական աշխարհում³¹: Այս վերջին տեսակետն էլ շարադրված է ՀՍՍՀ ԳԱ Պատմության ինստիտուտի հրատարակած հայ ժողովրդի պատմության ութհատորյակի առաջին հատորում, ինչպես նաև բուհական ու դպրոցական ձեռնարկներում³²:

Վերջին տասնամյակներին հին Հայաստանի պատմության առանձին հարցերից առավել ուշադրության է արժանացել քաղաքների և քաղաքային կյանքի պատմությունը. հարց, որը բոլորովին անտեսվել էր նախախորհրդային պատմագրության մեջ: Այս հարցի ուսումնասիրման սկիզբը դրեց Հ.Հ. Մանանդյանը, 1930թ. ռուսերեն հրատարակած իր «Հայաստանի քաղաքների և առևտրի մասին հին ժամանակների համաշխարհային առևտրի կապակցությամբ (5-րդ դ. մ.թ.ա. - 15-րդ դ. մ.թ.)» մեծագրությամբ, որի առաջին գլուխները վերաբերվում են Հայաստանի հնագույն քաղաքների պատմությանը³³: Մեծագրության մեջ հավաքված ու մշակված փաստերի առատության շնորհիվ այդ գիրքը միշտ էլ մնում է իբրև անհրաժեշտ ձեռնարկ ընդհանրապես հայ ժողովրդի պատմությունն ուսումնասիրողի համար: Սակայն Հայաստանում քաղաքների առաջացումն ու քաղաքային կյանքի զարգացումը Հ. Մանանդյանը դիտում է երկրի ներքին առաջընթացից, արտադրողական ուժերի զարգացումից կտրված: Նա գտնում է, որ հայկական քաղաքները եղել են սուկ Հայաստանի վրայով անցնող տարանցիկ առևտրի կենտրոններ, որի շնորհիվ էլ նրանք առաջացել ու զարգացել են:

(31) С.Т. Еремян, Основные черты общественного строя Армении в эллинистическую эпоху, *Տեղ. ՀԳԱՀԳ*, 1948, № 11; *Նույնի*, О рабстве и рабовладении в древней Армении, ВДИ, 1950, № 1. Գ.Խ. Սարգսյան, Հին Հայաստանի սոցիալ-տնտեսական զարգացման ուղիները մասին, *Երևան*, 1962: *Իրենց մի շարք աշխատություններում նույն տեսակետն են պաշտպանել նաև Բ. Առաքելյանը, Ա. Արրահամյանը, Ա. Փերիխանյանը, Հ. Ժամկոչյանը, Գ. Տիրացյանը և ուրիշներ:*

(32) Հայ Ժողովրդի պատմություն, հ. 1, *Երևան*, 1971: Հայ Ժողովրդի պատմություն (Ձեռնարկ միջնակարգ դպրոցների համար հ. 1, *Երևան*, 1956: Հայ Ժողովրդի պատմություն (լուսահայան ձեռնարկ), հ. 1, *Երևան* 1963:

(33) Я.А. Манандян, О торговле и городах Армении в связи с мировой торговлей древних времён (V в. до н.э. - XV в. н.э.), *Երևան*, 1930, 2րդ հրատ. *Երևան*, 1954.

Հին Հայաստանի ստրկատիրական հասարակության հարցերն ուսումնասիրելիս, ակադ. Ս.Տ. Երեմյանն իր աշխատություններում ուշադրություն է դարձրել նաև հայկական հնագույն քաղաքների առաջացման հարցին: Հին Հայաստանի քաղաքների առաջացումը նա իրավամբ դիտում է հայկական հասարակության զարգացման ընդհանուր հետնախորքի վրա, ցույց տալով, որ Հայաստանում քաղաքների երևան գալը պատմական երկարատև պրոցեսի արդյունք է: Հայաստանում քաղաքների հետագա զարգացմանը դրականորեն նպաստել է Առաջավոր Ասիայում հելլենիստական պետությունների առաջացումը, որի հետևանքով ստեղծվեցին նպաստավոր պայմաններ միջազգային առևտրական փոխանակության համար և քաղաքները դարձան արհեստների և տարանցիկ առևտրի կենտրոններ: Ս.Տ. Երեմյանը, ուսումնասիրելով հին Հայաստանի քաղաքների սոցիալ-տնտեսական կառուցվածքը, հանգել է այն ճիշտ եզրակացության, թե այդ ժամանակաշրջանի հայկական քաղաքի սոցիալ-տնտեսական կառուցվածքը վերարտադրում էր հելլենիստական քաղաքի ընդհանուր պատկերը³⁴:

Գ.Խ. Սարգսյանն իր «Տիգրանակերտ» մենագրության մեջ³⁵ հիմնականում ուշադրություն է դարձրել հին Հայաստանի քաղաքային համայնքի ուսումնասիրման վրա: Ուսումնասիրելով Արևելքի նախահելլենիստական շրջանի քաղաքների սոցիալ-տնտեսական իրավիճակը, նա գտնում է, որ այդ քաղաքները դեռևս նախկինում ունեցել են իրենց ներքին ինքնավարության օրգանները և վաչելել են որոշակի առանձնաշնորհումներ տրված հին արևելյան տերությունների արքաների կողմից: Այս հետնախորքի վրա էլ լուսաբանելով Տիգրանակերտ քաղաքին վերաբերող նյութերը, Գ. Սարգսյանը համոզիչ կերպով ցույց է տալիս, որ հայկական քաղաքներում ևս կազմակերպված էին իրական և

(34) С.Т. Еремян, Основные черты общественного строя Армении в эллинистическую эпоху, *Տեղ. ՀԳԱՀԳ*, 1948, № 11; Նույնի, О рабстве и рабовладении в древней Армении, ВДИ, 1950, № 1. Նույնի, Развитие городов и городской жизни в древней Армении, М., 1953 (автореферат докт. дисс.)

(35) Г.Х. Сарксян, Тигранакерт. Из истории древнеармянских городских общин, М., 1960.

պոտենցիալ ստրկատերերի համայնքներ, որոնք հալոց թագավորի սոցիալական կարևոր հենարաններից էին IV դ. կենտրոնախույս նախարարների դեմ նրա մղած պայքարում. պայքար, որը նշանավորում էր Հայաստանում աստիճանական անցումը ավատական կարգերին:

Հայաստանի հնագույն քաղաքների պատմությունը զբաղեցրել է նաև մեզ: Այդ հարցին նվիրված մեր մենագրության մեջ ցույց է տրված, որ հելլենիստական քաղաքներն, ընդհանրապես, առաջացել են հիմնականում երկու եղանակով. 1) Արևելքի հին քաղաքներին և ռազմաստրատեգիական ու տնտեսական կարևորություն ունեցող բնակավայրերին հելլենիստական միապետները շնորհել են հունական պոլիսի կարգավիճակ: 2) Իրենք՝ թագավորները կառուցում էին նոր քաղաքներ: Այդ քաղաքները նրանց անհրաժեշտ էին որպես վարչական, ռազմական և տնտեսական հենարաններ Արևելքի ընդարձակ տարածությունները յուրացնելու և վերահսկելու համար: Կենտրոնական իշխանության ուժեղացումով կամ թուլացումով այդ քաղաքների արտոնությունները համապատասխանաբար սահմանափակվում էին կամ ընդարձակվում³⁶: Մենք նշել ենք, որ մ.թ.ա. III—մ.թ. II դդ. Հայաստանում մի շարք քաղաքների առաջացումը պատահական երևույթ չէր: Այն օրինաչափ հետևանքն էր արդեն դարեր առաջ սկսած հայկական էթնիկական տարրերի համախմբման գործընթացի, որը բացել էր Հայաստանի համար տնտեսական, քաղաքական և մշակութային զարգացման ժամանակաշրջան³⁷: Ս.Գ. Փերիխանյանը հատուկ ուսումնասիրության է ենթարկել հայկական հեթանոսական տաճարներն ու տաճարային տնտեսությունները: Նա բացահայտել է Փոքր Ասիայի և հին Հայաստանի տաճարների և տաճարային տնտեսությունների ծագումը և կազմավորումը, դրանցում տիրող սոցիալ-տնտեսական հարաբերությունները, երկրի տնտեսական կյանքում տաճարների ունեցած դերը, ինչպես և թագավորական իշխանության հետ նրանց ունեցած փոխհարաբերությունները, որոնք ընդհանուր գծերով նման են եղել թագավորական իշխանության հետ քաղաքների

(36) Ս.Մ. Կրկյաշարյան, Հին Հայաստանի և Փոքր Ասիայի քաղաքների պատմության դրվագներ, Երևան, 1970, էջ 43-78:

(37) Նույն տեղում, էջ 85:

ունեցած փոխհարաբերություններին³⁸:

Հին Հայաստանի սոցիալ-տնտեսական պատմությունն ուսումնասիրելիս հայագետներն անդրադարձել են նաև Հայաստանում հողային հարաբերությունների և գյուղական համայնքի հարցերին: Հենվելով մեր վաղ միջնադարյան աղբյուրների տրվյալների վրա, Հ. Մանանդյանը գտնում է, որ հին Հայաստանում գոյություն է ունեցել գյուղական համայնք և համայնական հողատիրություն, որ մ.թ. V-VII դդ. Հայաստանում նկատվող համայնական կարգերի շատ երևույթներ իրենց արմատներով հասնում են նույնիսկ մինչև Արտաշեսյան թագավորության շրջանը, որ Քսենոփոնի նկարագրած հայկական գյուղը ինքնին տոհմական համայնք է³⁹: Այս հարցում նա համերաշխ է Ն. Ադոնցի տեսակետին: Մեծ հայագետը փորձել է ցույց տալ նաև այդ համայնքի ներքին կառուցվածքը: Անդրադառնալով հողի սեփականատիրության հարցին, Հ. Մանանդյանը նշում է, որ հողի գերագույն սեփականատերը ոչ թե սուվերեն թագավորն էր, այլ յուրաքանչյուր նախարարական տիրույթ կազմում էր տվյալ նախարարի լիակատար ժառանգական սեփականությունը⁴⁰:

Ս.Տ. Երեմյանը ևս ուսումնասիրելով հայկական մինչֆեոդալական գյուղական համայնքը, գտնում է, որ այն կազմված էր արյունազգակցական ընտանիքներից, որ այստեղ գոյություն ուներ կոլեկտիվ հողային սեփականություն, մասնավոր հողօգտագործման առկայությամբ: Գյուղացի-համայնականները համայնքի հետ կապված էին հողից օգտվելու ժառանգական իրավունքով, որից զրկված էր տվյալ համայնքին չպատկանող մարդը: Համայնականները կոլեկտիվ կերպով էին հարկվում և կոլեկտիվ կերպով էլ կատարում իրենց պարհակները, որոնք շարունակաճում էին, իսկ համայնականը աստիճանաբար ընկնում էր ստրկական վիճակի մեջ, համալրելով ստրուկների շարքերը⁴¹:

(38) А.Г. Периханян, Храмовые объединения Малой Азии и Армении (IV в. до н.э. - III в. н.э.), М., 1959.

(39) Հ.Հ. Մանանդյան, Դիտողություններ շինականների դրուսթյան մասին մարզպանության շրջանում, Երևան, 1925: Նույնի, Ֆեոդալիզմը հին Հայաստանում, Երևան, 1934:

(40) Հ.Հ. Մանանդյան, Ֆեոդալիզմը հին Հայաստանում, էջ 316:

(41) С.Т. Еремян, Рабовладельческое общество в древней Армении, (автореферат), 1953, էջ 15 և հաջ.:

Գ. Սարգսյանը նոր փաստարկներով հիմնավորելով Ս. Երեմյանի վերոհիշյալ դրույթը, ավելացնում է, որ Արևելքի երկրներում գյուղական համայնքը եղել է ոչ միայն մասնատիրական տնտեսություններում աշխատող ստրուկների կազմը համալրելու աղբյուր, այլև ինքնին հանդիսացել է անմիջական ստրկատիրական շահագործման օբյեկտ⁴²: Նույնպիսի տեսակետ է զարգացնում նաև Գ. Տիրացյանը «Անաբասիս» գրքում զետեղված իր «Անաբասիսը և Հայաստանը» հոդվածում⁴³:

Վերջին տարիներին հայագետներն առանձին ուշադրություն են դարձնում ուրարտական պետության անկումից հետո Հայկական լեռնաշխարհում առաջին հայկական պետական կազմավորումների առաջացման, ինչպես նաև դրանք գլխավորած արքայատոհմերի հարցին: Ս. Երեմյանն ու Գ. Տիրացյանը ցույց են տվել, որ դեռևս Ուրարտական թագավորության վերջին շրջանում, ուրարտական պետականության ընդերքում կոնսոլիդացում էին հայ-արմենական էթնիկական տարրերը, նախադրյալներ ստեղծելով հայկական թագավորության կազմավորման համար⁴⁴: Այդ տեսակետները ամփոփված են Պատմության ինստիտուտի հրատարակած «Հայ ժողովրդի պատմություն» ութհատորյակի առաջին հատորում⁴⁵:

Վերջին տասնամյակներում Հայաստանում առանձին թափ են ստացել հնավայրերի սիստեմատիկ պեղումները: Մեր ուսումնասիրության մեջ արժարժվող հարցերի առնչությամբ առանձին հետաքրքրություն ներկայացնում են Գառնիի ամրոցի տարածքի, Արմավիրի և պատմական Արտաշատի պեղումները: Գառնիի պեղումների մասին պարբերական մամուլում լույս են տեսել մի շարք հոդվածներ, իսկ ընդհանուր արդյունքները ամփոփված են առանձին պրակներում: Մեզ համար հատուկ նշանակություն

(42) Գ.Խ. Սարգսյան, Հին Հայաստանի սոցիալ-տնտեսական զարգացման ուղիների մասին, Երևան, 1962, էջ 51:

(43) Անաբասիս, էջ 235-236:

(44) Ս.Տ. Երեմյան, Հայկական առաջին պետական կազմավորումները (մ.թ.ա. VII-VI դդ.), ՊԲՀ, 1963, նո 3: Գ.Ա. Տիրացյան, Հին Հայկական պետության առաջացումը, ՊԲՀ, 1966, նո 4, էջ 83-103: Г.А. Тирация, Некоторые аспекты внутренней организации армянской сатрапии, ՊԲՀ, նո 2:

(45) Հայ ժողովրդի պատմություն, հ. 1, 1971, էջ 423-463:

ունեն I և II պրակները, որոնք վերաբերում են Գառնիի անտիկ շրջանին⁴⁶: Արմավիրի պեղումների արդյունքները թեպետև չեն ամփոփված առանձին պրակի մեջ, սակայն գիտական պարբերականներում հրատարակված առանձին հոդվածները և գիտական հաշվետվությունները հին շրջանին վերաբերող որոշակի նյութեր են պարունակում: Ինչ վերաբերում է Արտաշատի վերջերս սկսված պեղումներին, ապա դեռևս հրապարակի վրա չունենք պեղումների արդյունքները ամփոփող ուսումնասիրություններ և հանգամանալից հաշվետվություններ, իսկ ընթացիկ մամուլում երևացած լրագրային հաղորդումները միայն շատ ընդհանուր պատկեր են ներկայացնում:

Հատնաբերված հնագիտական նյութերը հաճախ լրացնում են և հաստատում գրավոր աղբյուրների տվյալները, իսկ վերջիններիս չգոյության դեպքում՝ ուսումնասիրողի համար մնում են միակ և անփոխարինելի սկզբնաղբյուր:

(46) Բ.Ն. Արաքեյան, Գարնի I, Երևան, 1951; Գարնի II, Երևան, 1957.

ԳԼՈՒԽ ԱՌԱՋԻՆ

ՀԱՅԿԱԿԱՆ ՊԵՏԱԿԱՆՈՒԹՅԱՆ ՏԱՐՐԵՐԻ ԱՌԱՋԱՅՈՒՄԸ ԱՔԵՄԵՆՅԱՆ ՏԻՐԱՊԵՏՈՒԹՅԱՆ ԺԱՄԱՆԱԿԱՇՐՉԱՆՈՒՄ

Հայկական ինքնուրույն պետականության առաջացումը և հետագա զարգացումը սերտորեն պայմանավորված է եղել պատմական երկու կարեվորագույն գործոններով, մեկը ներքին, մյուսը՝ արտաքին: Առաջինը՝ Հայաստանի բնական-աշխարհագրական սահմաններում հայկական էթնիկական տարրերի համախմբման հետևանքով սկսած և աստիճանաբար իր ավարտին հասնող հայ ժողովրդի կազմավորման պատմական բարդ ու երկարատև պրոցեսն էր, երկրորդը՝ Ալեքսանդր Մակեդոնացու բանակի հարվածների տակ, առանց այն էլ քայքայման ու կործանման եզրին հասած, Աքեմենյան Պարսկաստանի վերջնական փլուզման հետևանքով երկրի քաղաքական անկախությունն ձեռք բերելու հանգամանքն էր: Հայկական էթնիկական տարրերի համախմբումն, ըստ երևույթին, սկսվել էր դեռևս նախորդ դարերում: Հայկական լեռնաշխարհում կազմավորված Ուրարտական թագավորության ժամանակ, երբ Արմե-Շուպրիա երկրում համեմատաբար ուժեղ պետական միավորում կազմած հայարմենական ցեղերը հարկատու էին ուրարտացիներին: Դեռևս դարեր առաջ սկսած հայկական ցեղակից տարրերի համախմբման պատմական այդ կարևոր պրոցեսը պիտի առավել ևս ուժեղանար մ.թ.ա. VI դարի սկզբին, ուրարտական թագավորության թուլացման և վերջնական կործանման կապակցությամբ:

Անտիկ հեղինակների, հատկապես Հերոդոտոսի ու Քսենոփոնի, երկերում հետաքրքիր մի շարք տեղեկություններ են հաղորդվում հայկական հասարակության ներքին զարգացման մասին մ.թ.ա. VI-V դարերում, երբ Արմենիան գտնվում էր Աքե-

մենյան Պարսկաստանի տիրապետութեան տակ որպէս այդ տերութեան սատրապութիւն: Իսկ ի՞նչ էր իրենից ներկայացնում ինքը՝ Աքեմենյանների պարսկական տերութիւնը:

Հելլենիստական աշխարհի սոցիալ-տնտեսական պատմութեան ուսումնասիրմանը նվիրված իր կոթողային եռահատոր աշխատութեան մեջ Մ.Ի. Ռոստովցևը ճիշտ կերպով նկատում է, որ Աքեմենյան Պարսկաստանը «երբեք չի կազմել սոցիալ-տնտեսական մի բնական միավոր: Այս փաստը լավ հայտնի էր Պարսկական կայսրութեան մեծ կազմակերպիչներին՝ Կյուրոսին ու Դարեհին, և այն արտացոլվել է տերութեան բաժանման մեջ իր պարսկական կորիզին և զանազան սատրապութիւններին, որոնցից յուրաքանչյուրն ուներ իր ուրույն էկոնոմիկական և հասարակական դեմքը»¹:

Խոսելով Աքեմենյանների տերութեանը նախորդած Մեդական թագաւորութեան մասին, ակադ. Հ.Հ. Մանանդյանը ևս նշում է, որ այն «կենտրոնացած ու միասնական պետութիւն չէր, այլ, պարզապէս, համադաշնակցութիւն էր նվաճված ու հպատակեցված ցեղերի ու երկրների, որոնք պարտավոր էին իրենց նոր տերերին տուրք վճարել և նրանց գորք տալ պատերազմների ժամանակ: Մեդացիների գերիշխանութեանը ենթարկված ժողովուրդներն ու երկրները պահպանում էին իրենց ներքին ինքնուրույն կազմակերպութիւնը»²:

Այս վերջին հանգամանքն էլ հիմնական պատճառն է դառնում Մեդական թագաւորութեան կարճատև գոյութեան: Սրան հաջորդած պարսկական տերութիւնը ժառանգեց ոչ միայն իր նախորդի տիրույթները, այլև նրան հատուկ թուլութիւնները:

Աքեմենյանների ընդարձակածավալ տերութեան կազմի մեջ մտնող երկրները գտնվում էին հասարակական, տնտեսական և քաղաքական, ինչպէս նաև մշակութային զարգացման տարբեր աստիճանների վրա: Նրա սահմաններում ընդգրկված էին մի կողմից Միջին Ասիայի և Իրանական սարահարթի նահապետական կենցաղով ապրող ցեղեր, մյուս կողմից՝ Փոքր Ասիայի և

(1) M.I. Rostovtzeff, The social and economic history of the hellenistic world (այսուհետև՝ SEHWW), Oxford, 1941, էջ 77:

(2) Հ.Հ. Մանանդյան, Քննական տեսութիւն հայ ժողովրդի պատմութեան, Կ. Ա, Երևան, 1944, էջ 37:

Փյունիկիայի հունական և փյունիկյան առափնյա վաճառաչահ խոշոր քաղաքներ և Միջագետքի ու Եգիպտոսի հնագույն, զարգացած մշակույթի հասարակություն: Այս երկրները մինչև Աքեմենյան տերության կործանումն էլ մնացին իրարից մեկուսացած, ինքնավար, իրենց ներքին ինքնավարությամբ և չկազմեցին մի միասնական սոցիալ-տնտեսական ու քաղաքական միավոր:

Մեդական և, հետագայում, Աքեմենյան տերության քաղաքական գերիշխանության տակ իրենց ինքնուրույն ներքին կազմակերպությունը պահպանող երկրների թվում էր, անկասկած, նաև Հայկական լեռնաշխարհը՝ Արմենիան: Այսպիսի եզրահանգման են հայագետներին բերել Հերոդոտոսի և Քսենոփոնի արժանահավատ վկայությունները արմենների և Արմենիայի մասին:

Անհիմն կլինե՞ր ժխտել, որ Քսենոփոնի «Կյուրոպեդիա» երկը առավելապես իրատական, բարոյա-քաղաքական պատմավեպ է, քան իսկական պատմական երկ, որի գլխավոր հերոսը, Կյուրոսը, իդեալական միապետի կերպարն է, դաստիարակված Քսենոփոնի ուսուցիչ, հույն փիլիսոփա Սոկրատեսի սկզբունքներով, այնպես, ինչպես դրանք հասկանում էր ինքը՝ Քսենոփոնը: Մեզ համար, սակայն, կարևորն այն է, որ հույն մատենագիրն իր այս երկը շարադրելիս ուրիշների մոտ չհանդիպող, հետաքրքիր պատումներ է հաղորդում Կյուրոսի և արմենների բասիլևսի (βασιλεύς)՝ թագավորի փոխհարաբերությունների մասին: Այդ տվյալների ուսումնասիրությունից կարելի է հանգել այն անվիճելի եզրակացություն, թէ այդ ժամանակ արմեններն արդեն վայելելիս են եղել քաղաքական որոշ ինքնուրույնություն: Հ. Մանանդյանն իրավամբ նշում է, որ «վեպի այս մասում Քսենոփոնին կարող էին աղբյուր ծառայած լինել տեղական ավանդությունները և հիշողությունները, որոնց նա հնարավորություն ուներ ծանոթանալու իր և հույն գործերի հայտնի նահանջի ժամանակ, Արմենիայի միջով 401-400 թ. (նախքան մեր թվ.)»³: Այս կապակցությամբ խորհրդային հայտնի արևելագետ Ի.Մ. Դյակոնովը ևս գրում է. «Համարյա ոչինչ չի տալիս մեզ Քսենոփոնի «Կյուրոպեդիան»: Իրական դեպքերն ... այնքան են աղավաղված, ենթարկվելով գրական-բարոյախոսական խնդիրներին,

(3) Հ. Հ. Մանանդյան, նշվ. աշխ., էջ 39:

որ հիմնվել «Կյուրոպեդիայի» վրա չի կարելի: Բացառությու-
ն են կազմում, հավանաբար, հայ-մեդական հարաբերու-
թյուններին վերաբերող տվյալները»⁴:

Սոցիալ-տնտեսական ու քաղաքական ինչպիսի՞ պատկեր-
ուներ Արմենիան Քսենոփոնի այդ երկի տվյալներով: Մ.թ.ա. VI
դարի առաջին կեսին արմենական ցեղերն արդեն համախմբվելով
կազմած են եղել մի պատկառելի ցեղային միություն: Այդ ցե-
ղային միության գլուխ կանգնած է եղել թագավոր-առաջնորդը,
բասիլևսը (βασιλευς), որը հպատակ էր և դաշնակից Մեդական
թագավորությանը, վերջինիս վճարելով տարեկան տուրք և
պատերազմական արշավանքների ժամանակ մեդական թագա-
վորին տրամադրելով պատկառելի քանակությամբ զորք՝ 4000
հեծելազոր և 20000 հետևակ⁵: Որպես լրացում Քսենոփոնի այս
հաղորդումներին, տեղին է հիշատակել Ստրաբոնի հայտնի
վկայությունն այն մասին, թե Աքեմենյանների տիրապետու-
թյան շրջանում Հայաստանի սատրապը պարսից արքայից արքային
ուղարկում էր տարեկան 20 հազար մորուկ Միհրական տոնների
համար (τοῖς Μιθρακίνοισι)⁶: Թշնամու դեմ պատերազմ վարելու
դեպքում արմենների բասիլևսը, Քսենոփոնի պատմելով, կարող
էր շարժման մեջ դնել մինչև 8000 հեծելազոր և 40 հազար
հետևակ, իսկ նրա նյութական հարստությունը հասնում էր
ավելի քան 3 հազար տաղանդի⁷: Հատկանշական է, որ մի շարք
անգամներ Քսենոփոնը պարսից զորագլուխ Կյուրոսի բերանով
խոսում է արմենների երկրի սահմանների, ինչպես նաև կա-
ռուցուած ամրությունների մասին⁸: Բասիլևս-առաջնորդ, ավելի
քան պատկառելի բանակ և բավականաչափ հարստություն, ինչ-
պես նաև երկրի որոշակի սահմաններ, հավանաբար պայմանա-
վորված էթնիկական տարաբնակեցմամբ, — ահա այն հիմնական
տարրերը, որոնց առկայությունն անկասկած է դարձնում այն,
որ արմենների երկիրը մարական, հետագայում նաև պարսկական,
տիրապետության ժամանակ վայելում էր քաղաքական ներքին
լայն ինքնավարություն:

(4) И. М. Дьяконов, История Мидии от древнейших времён до конца IV
века до н.э., М.-Л., 1956, стр. 414.

(5) Xenoph., Cyrop., II, 4, 12.

(6) Strabo, XI, 14, 9 (с. 530).

(7) Xenoph., Cyrop., III, 1, 33.

(8) Նույն տեղում, II, 1, 6: 4, 16: 4, 21:

Այս առնչութեամբ խիստ արժեքավոր է հույն-պարսկական պատերազմների մասին Հերոդոտոսի հաղորդումների այն հատվածը, որը վերաբերում է արմենների մասնակցութեանը Հելլադայի դեմ պարսկական զորքի արշավանքին: Այնտեղ, իմիջիայլոց, ասված է, թէ «արմենները ... զինված էին փոյուզիացիների նման և այս երկուսի առաջնորդն էր Արտոքմեսը (Արտաշեսը — Մ.Կ.), որն ամուսնացած էր Դարեհի աղջկա հետ»⁹: Գաղտնիք չէ, որ մ.թ.ա. V դարի սկիզբին Հունաստան արշաված պարսկական հսկայական բանակը հեռու էր միատարր և միաձույլ լինելուց: Խառնիճաղանճ այդ բանակը հավաքագրված էր Աքեմենյան Պարսկաստանին ենթակա տարբեր ցեղերով բնակեցված երկրներից, ըստ առանձին սատրապությունների, իսկ այդ սատրապություններից յուրաքանչյուրի հիմքում, որպես վարչական միավորի, ընկած էր էթնիկական սկզբունքը, միաժամանակ, սակայն, հաշվի էին առնված բնական-աշխարհագրական սահմանները: Սրանից պիտի եզրակացնել թէ արմենները, որոնք առանձին հիշատակվում են պարսկական բանակի կողմում, հավաքագրված էին առանձին սատրապությունից և, փոյուզիացիների հետ միասին, ունեին իրենց առանձին հրամանատարին, հանձին Դարեհ Ա Վշտապսի փեսայի, Արտոքմեսի:

Էթնիկական սկզբունքով է հավաքագրված եղել նաև Դարեհ Գ Կողոմանոսի զորքը, երբ վերջինս պատերազմ էր մղում Ալեքսանդր Մակեդոնացու դեմ: Դիողորոսն, օրինակ, գրում է, որ «Դարեհն իր զորքերը ըստ ազգությունների ճակատելուց հետո, ինքը ևս անցավ Ալեքսանդրի դիմաց և բանակը շարժեց թշնամու դեմ»¹⁰: Մղված ճակատամարտին մասնակցել են նաև արմենները, որոնց առաջնորդները, ինչպես վկայում է Արրիանոսը, եղել են Օրոնտեսը և Միթրաուտեսը (Ὀρόντης καὶ Μιθραύστης)¹¹: Դեռևս Քսենոփոնը, նկարագրելով պարսկական զահի հավակնորդ Կյուրոս Կրտսերի և Արտաքսերքսես Բ Մենմոնի միջև մ.թ.ա. 401 թ. Կունաքսայի մոտ տեղի ունեցած ճակատամարտը, իր հերթին նույնպես նկատում է, որ պարսկական

(9) Herodot., VII, 73: Հմմտ. նաև Herodot., VII, 60 և 67; Xenoph., Cyrop., V, 3, 38-39; Xenoph., Anabasis, I, 8, 9; Arrian, Anabasis, III, 3, 11.

(10) Diodori Bibliotheca Historica, XVII, 58, 1.

(11) Arrian., Anabasis, III, 8, 5.

գորքերը «առաջ էին շարժվում բաժանված ըստ ազգությունների»¹²:

Աղբյուրների վկայություններից կարելի է հետևել, թե Աքեմենյան տերության յուրաքանչյուր սատրապությունում, պատերազմի ժամանակ հավաքված զորքերից բացի, կային նաև կանոնավոր զորամասեր, որոնք գտնվում էին մշտական ռազմական ծառայության մեջ: Սրանց պարտականությունն էր պաշտպանել սատրապության սահմանները հնարավոր արշավանքներից, ինչպես նաև, տեղավորված լինելով բերդերում և ամրոցներում, հեռևել երկրում անդորրության և կարգի պահպանման: Այս երևույթը լավագույնս նկատվում է Հայաստանում. այդ մասին կան ականատես Քսենոփոնի տվյալները: «Լուսաբացին, – վկայում է հույն պատմիչը, – գետի այն կողմը նրանք (հելլենները – Ս.Կ.) նկատեցին սպառազինված հեծյալների, որոնք պատրաստ էին խոչընդոտելու գետանցը, իսկ հեծյալներից վերև, բլուրների վրա շարվել էին հետևակ զորքեր, որոնք պետք է արգելեին հելլեններին Արմենիա դուրս գալ: Սրանք Օրոնտասի և Արտոխասի արմեններն էին և մարդերն ու խալդայները վարձկան»¹³: Շարունակության մեջ նույնպիսի մի վկայության մենք հանդիպում ենք նաև Արևմտյան Արմենիայի հյուսիսարևոս Տիրիբազոսի մասին¹⁴:

Քսենոփոնի վերոհիշյալ առաջին վկայությունը տարբեր կարծիքների տեղիք է տվել: Բանն այն է, որ Քսենոփոնի այս նախադասությունից պարզ չի երևում, թե արդյո՞ք ե՛լ արմենները, ե՛լ մարդերը, ե՛լ խալդայները վարձկաններ էին, թե՞ «վարձկան» բառը վերաբերում է միայն խալդայներին կամ մարդերին ու խալդայներին միասին: Մ.Ի. Մաքսիմովայի ռուսերեն թարգմանությամբ¹⁵ բոլորը, նույնիսկ արմենները վարձկաններ են, իսկ ուրիշների թարգմանություններում այդ բանն այդպես էլ պարզ չի հասկացվում: Մենք կարծում ենք, որ Քսենոփոնի վկայությամբ, վարձկաններ են եղել միայն խալդայները, որովհետև

1) Արմենիան պարսկական տիրապետության տակ գտնվող

(12) Xenoph., Anabasis, I, 8, 9: Քսենոփոն, Անաբասիս, թարգ. Ս.Մ. Կրկյաշարյանի, Երևան, 1970, էջ 28:

(13) Նույն տեղում, էջ 89: Xenoph., Anabasis, IV, 5, 3-4.

(14) Xenoph., Anabasis, IV, 4, 18: Քսենոփոն, Անաբասիս, էջ 94:

(15) Ксенофонт, Анабасис, М.-Л., 1951, էջ 102:

առանձին սատրապուլթյուն էր և արմենները պարտավոր էին զորք հատկացնել սատրապին, տվյալ դեպքում՝ Օրոնտասին. հետևաբար, նրանք չէին կարող վարձկան լինել և 2) հաջորդ նախադասությամբ Քսենոփոնը նշում է, թե «խալդայները ազատ էին», հետևաբար, նրանք պարտավոր չէին ծառայելու պարսկական բանակում: Այս հանգամանքը Քսենոփոնը մատնանշում է նաև մեկ այլ առիթով¹⁶: Այս նույն կարծիքին է եղել նաև Հյուբշմանը¹⁷, անորոշ վերապահումներով՝ Հ.Հ. Մանանդյանը¹⁸, իսկ Յ. Մարկվարտը ենթադրում է, որ վարձկան եղել են ոչ միայն խալդայները, այլև մարդերը¹⁹: Այս կարծիքը պաշտպանում է նաև Գ.Ա. Տիրացյանը իր վերջին ուսումնասիրություններից մեկում²⁰:

Վերջին ժամանակներս հայագիտության մեջ արտահայտվում է այն տեսակետը, թե Ուրարտական թագավորության անկումից անմիջապես հետո, մ.թ.ա. V դարի սկզբին, Հայկական լեռնաշխարհում ստեղծվել է Երվանդունիների հայկական պետությունը²¹: Հին Հայաստանում առաջացած վաղագույն պետական կազմավորումների հարցով հիմնականում զբաղվել են ակադ. Ս.Տ. Երեմյանը և Գ.Ա. Տիրացյանը: Նրանց տեսակետները ամփոփված են ՀՍՍՀ ԳԱ Պատմության ինստիտուտի հրատարակած «Հայ ժողովրդի պատմություն» ութհատորյակի առաջին հատորում²²:

Ս.Տ. Երեմյանը գտնում է, որ հայկական առաջին պետու-

(16) Xenoph., Anabasis, V, 5, 17: Քսենոփոն, Անաբասիս, էջ 122:

(17) M.H. Hübschman, Die altarmenischen Ortsnamen, Strassburg, 1904, էջ 190 և 207:

(18) Հ.Հ. Մանանդյան, Քննական տեսություն հայ ժողովրդի պատմության, Երևան, 1944, ԳԱ, էջ 68-69:

(19) J. Markwart, Die Entstehung und Wiederherstellung der armenischen Nation, Berlin, 1919, S. 17.

(20) Г.А. Тирацян, Некоторые аспекты внутренней организации армянской сатрапии, ՊԲՀ, Նո 2 ՊԲՀ, 1972, Նո 2, էջ 110-111:

(21) Հայ ժողովրդի պատմություն (բուհական ձեռնարկ), Գ. 1, Երեվան, 1963, էջ 120-128: Գ.Ա. Տիրացյան, Հին Հայկական պետության առաջացումը, ՊԲՀ, 1966, Նո 4, էջ 83-102: Հայ ժողովրդի պատմություն, Գ. 1, Երևան, 1971, էջ 435-443: Ի.Լ. Գանիելյան, Հայաստանի մ.թ.ա. VII-VI դդ. պատմությունից, «Լրարբեր հասարակական գիտությունների», 1974, Նո 11, էջ 72-86:

(22) Հայ ժողովրդի պատմություն, Գ. 1, Երևան, 1971, էջ 423-443:

Թյունը կազմավորվել է դեռևս մ.թ.ա. VII դարի վերջին Արմե-
Շուպրիայում, իսկ մ.թ.ա. VI դարի սկզբին դրան զուգահեռ
կազմավորվում է Երվանդունիների հայկական պետությունը։ Այս
երկու պետությունները շուտով միավորվում են և կազմում մեկ
միասնական հայկական թագավորություն։ Ս.Տ. Երեմյանի ձևա-
կերպումները, սակայն, ոչ բոլոր դեպքերում են հստակ։ Նա
գրում է, որ «Ուրարտական թագավորության կործանումից հետո
(այսինքն՝ VI դ. սկիզբ) մարական գերիշխանության և հայկական
ցեղային միությունների քաղաքական հեգեմոնիայի իրադրու-
թյան մեջ, ավարտվեց հայ ժողովրդի կազմավորման պրոցեսը,
որի հիման վրա երևան եկան հայկական առաջին պետական
կազմավորումները»²³։ Հետևաբար, սա պատմական մի պրոցես
էր, որն սկսվել էր Ուրարտուի կործանումից հետո և հայկական
պետությունը չէր կարող առաջանալ ավելի վաղ՝ VII դարում։
Հատկանշական է, որ Ս.Տ. Երեմյանը որպես հայկական պետու-
թյան գոյություն փաստ VI դարում նշում է այն, որ Հեկատեոս
Միլետացին հիշատակում է արմեններին²⁴։ Բայց այդ դեռ քիչ
բան է ասում, քանի որ հելլեն հեղինակները հիշատակում են
բազմաթիվ այլ ցեղերի ու ժողովուրդների ևս, որոնք, սակայն,
պետություն չէին ստեղծել տակավին։

Արմե-Շուպրիան պետություն համարելու հարցում հիրա-
վի առավել զգուշ է Գ.Ա. Տիրացյանը, համարելով, որ Արմե-
Շուպրիայի հասարակությունը կանգնած էր պետականության
ստեղծման շեմին, բայց նա ևս գտնում է, որ մ.թ.ա. VI դարի
սկզբին Հայաստանում կազմավորվել էր Երվանդունիների պե-
տությունը²⁵։ Հաջորդ էջերում մենք դեռևս կանդորառնանք
Երվանդունիների հարստության հարցին։ Այստեղ բավարարվենք
նշելով, որ սկզբնաղբյուրներում պահպանված կցկտուր տվյալ-
ները դեռևս մեզ չեն տալիս այն հաստատուն հիմքը պնդելու,
թե մ.թ.ա. VI դարի սկզբին ստեղծվել էր հայկական անկախ պե-
տություն։ Այդպիսին, մեր հաստատ համոզմամբ, ստեղծվեց միայն
մ.թ.ա. IV դարի վերջին տասնամյակներից սկսած, երբ, օգտվելով
ստեղծված բարենպաստ քաղաքական պայմաններից, Հայաստանի
սատրապ Օրոնտես-Երվանդը իրեն հայտարարեց Հայաստանի

(23) Նույն տեղում, էջ 423:

(24) Նույն տեղում, էջ 435:

(25) Գ.Ա. Տիրացյան, նշվ. աշխ., էջ 92 և հաջ.

Թագավոր, որով և ստեղծվում է անկախ մի պետութիւն, որն իրար հաջորդած երեք արքայատոհմերի — Երվանդունի, Արտաշեսյան, Արշակունի — գահակալութեան պայմաններում հարատեւեց մոտ յոթ և կես հարյուրամյակ:

Ինչո՞ւ, թեպետեւ հասունացել էին երկրում սոցիալ-տնտեսական որոշակի պայմաններ անկախ պետութիւն ստեղծելու համար, այնուամենայնիվ, մ.թ.ա. VI դարում այն այդպես էլ չստեղծվեց: Պատճառը կարող է մեկը լինել. դրան խանգարեցին գոևտ արտաքին քաղաքական հանգամանքներ, որոնք դանդաղեցրին հայկական հասարակութեան զարգացման բնականոն ընթացքը: Ուրարտուի անկումից հետո մինչև Երվանդունիների թագավորութեան հաստատումը (մ.թ.ա. IV դ.) հայերը, սկզբում, մի քանի տասնամյակ, որպես «դաշնակիցներ», այնուհետև՝ որպես հպատակներ, ենթարկվել են նախ մարական, հետագայում՝ նրանց հաջորդած Աքեմենյան թագավորների տիրապետութեանը:

Բացի անտիկ հեղինակների պատմողական երկերից, Հայաստանի պատմութեան հնագույն այս շրջանի համար մեզ հասել է կարևորագույն, իր տեսակի մեջ եզակի մի սկզբնաղբյուր: Այդ՝ Բեհիստունի Ժայռի վրա՝ ներկայիս Քիրմանշահ քաղաքից ոչ հեռու, Դարեհ Ա-ի թողած եռալեզվյան (հին պարսկերեն, էլամերեն և ակկադերեն) սեպագիր հայտնի արձանագրութիւնն է, Աքեմենյան արքայից արքայի Monumentum Ancyranum-ը, որի շուրջ հրատարակվել են պատմագիտական և բանասիրական բազմաթիվ ուսումնասիրութիւններ²⁶:

Այս հսկայական արձանագրութիւնը (ավելի քան 300 տող) նվիրված է պարսկական տերութեան մեջ մ.թ.ա. 522-521 թթ. ծայր առած խռովահուլազ անցքերին: Օգտվելով Կյուրոս Մեծի հաջորդ Կամբյուսեսի (529-522 թթ.) բացակայութիւնից (նա գտնւրվում էր Եգիպտոսում), մեղացի Գառամատոս մոզը իրեն հայտարարեց պարսից տերութեան թագավոր: Սա իրեն ներկայացրել էր որպես Բարդիա՝ Կամբյուսեսի եղբայրը, մինչդեռ իրական Բարդիային Կամբյուսեսը սպանել էր տվել դեռևս եգիպտական

(26) Բեհիստունյան արձանագրութիւնը նվիրված ուսումնասիրութիւնների հանգամանակից վերլուծութիւնը տես M.A. Дандамаев, Иран при первых Ахеменидах, М., 1963 ուշագրավ աշխատութեան մեջ, որտեղ հրատարակված է նաև ամբողջ արձանագրութեան ուղեկցական թարգմանութիւնը:

արշավանքի չմեկնած: Լսելով այս խռովութեան մասին, Կամբոյուսեսը շտապում է վերադառնալ Եգիպտոսից, սակայն ճանապարհին վախճանվում է: Աքեմենյան տոհմից Վշտասպի որդի Դարեհը, իր վեց զինակիցների աջակցութեամբ, տապալում է ինքնակոչ Գաղմատային, սպանում նրան և իրեն հայտարարում թագավոր: Նույն թվականին էլ Դարեհի դեմ, նրա տերութեան տարբեր ծայրերում, բռնկվում են խոշոր ապստամբութեւո՞ւններ, որոնց ընթացքը և ճնշումը նկարագրված են Բեհիստունյան արձանագրութեւո՞ւնում:

Մեր նպատակադրումից դուրս է հանգամանորեն զբաղվել այս արձանագրութեւո՞ւնի ամբողջ բովանդակութեւո՞ւմբ: Մենք, բնականաբար, կսահմանափակվենք արձանագրութեւո՞ւնի սոսկ այն հատվածներին անդրադառնալով, որոնցում առանձնապես խոսք է լինում Արմենիայի մասին: Ավելորդ չենք համարում ստորև տալ Դարեհի արձանագրութեւո՞ւնի մեզ հետաքրքրող հատվածների հայերեն թարգմանութեւո՞ւնը, որը կատարել ենք Մ.Ա. Դանդամաևի հրատարակաց աշխատութեւո՞ւնից²⁷:

1ին սյունակ, տող 12-18

«Դարեհ թագավորն ասում է. — Ահա այն երկրները, որոնք շնորհվեցին ինձ Ահուրամազդայի ողորմածությամբ (և) ես նրանց թագավորն եմ — Պարսկաստան, Էլամ, Բաբելոնիա, Ասորեստան, Եգիպտոս, ծովափնյա (երկրներ), Լիդիա, Հոնիա, Մեդիա, Արմինա, Կասպոգոկիա, Պարթիա, Դրանգիանա, Արեյա, Քոքեզ, Բակտրիա, Սոգդիանա, Գանդահար, Սկյութիա, Սաստագիդիա, Արաքոսիա, Մակա — ընդամենը 23 երկիր: . . . Ահուրամազդայի ողորմածությամբ (նրանք) ինձ են ենթարկված»:

2րդ սյունակ, տող 29-63

«Դարեհ թագավորն ասում է. — Դադարշիշ անունով հային, իմ ստրուկին, ես ուղարկեցի Արմինա: Ես նրան այսպես

(27) Մ.Ա. Դանդամաևը նշում է, որ ուղևորեն թարգմանութեւո՞ւնը կատարված է L.W. King and R.C. Thompson, The sculptures and inscriptions of Darius the Great on the rock of Behistun in Persia, London, 1907 հրատարակութեւո՞ւնի հիման վրա, միաժամանակ հաշվի են առնված G. Cameron-ի տեղում կատարած վերջին ստուգումների արդյունքները (M.A. Дандамаев, նշվ. աշխ., էջ 462):

ասացի. — «Գնա, կոտորիր ապստամբ զորքը, որն իրեն իմը չի համարում»: Դրանից հետո Դադարշիշը մեկնեց: Երբ նա եկավ Արմինա, ապստամբները համախմբվեցին (և) դուրս եկան Դադարշիշի դեմ ճակատամարտ տալու: Արմինայի Ջուզախիս փայրում նրանք ճակատամարտ տվեցին: Ահուրամագդան ինձ օգնեց: Ծնորհիվ Ահուրամագդայի, իմ զորքը գլխովին ջախջախեց ապստամբ զորքին: Թուրավահարա ամսի ութերորդ օրը (21 մայիս, 521 թ.)²⁸ նրանք ճակատամարտ տվեցին»:

«Դարեհ թագավորն ասում է. — Ապստամբները երկրորդ անգամ համախմբվեցին և դուրս եկան Դադարշիշի դեմ ճակատամարտ տալու: Նրանք ճակատամարտ տվեցին Արմինայում Տիգրա բերդի մոտ: Ահուրամագդան ինձ օգնեց: Ծնորհիվ Ահուրամագդայի, իմ զորքը գլխովին ջախջախեց ապստամբ զորքին: Թուրավահարա ամսի տասնութերորդ օրը (31 մայիս 521 թ.) նրանք ճակատամարտ տվեցին»:

«Դարեհ թագավորն ասում է. — Ապստամբները երրորդ անգամ համախմբվեցին (և) դուրս եկան Դադարշիշի դեմ ճակատամարտ տալու: Արմինայում Ուհյամա բերդի մոտ նրանք ճակատամարտ տվեցին: Ահուրամագդան ինձ օգնեց: Ծնորհիվ Ահուրամագդայի, իմ զորքը գլխովին ջախջախեց ապստամբ զորքին: Թաշգարշիշ ամսի իններորդ օրը (21 հունիս, 521 թ.) նրանք ճակատամարտ տվեցին: Հետո Դադարշիշը հնազանդվելով իմ հրամանին՝ մնաց Արմինայում, մինչդեռ ես իմ նիզակը ուղղում էի դեպի Մեդիա»:

«Դարեհ թագավորն ասում է. — Այնուհետև Արմինա ուղարկեցի Վահուսիսա անունով մի պարսկի, իմ ստրուկին և ասացի նրան. — «Գնա, կոտորիր ապստամբ զորքին, որն իրեն իմը չի համարում»: Դրանից հետո Վահուսիսան մեկնեց: Երբ նա հասավ Արմինա, ապստամբները համախմբվեցին (և) դուրս եկան Վահուսիսայի դեմ ճակատամարտ տալու: Իզալա երկրում, Ասորեստանում նրանք ճակատամարտ տվեցին: Ահուրամագդան ինձ օգնեց: Ծնորհիվ Ահուրամագդայի, իմ զորքը գլխովին ջախջախեց ապստամբ զորքին: Անամակա ամսի տասնհինգերորդ օրը (31 դեկտեմբեր, 522 թ.) նրանք ճակատամարտ տվեցին»:

«Դարեհ թագավորն ասում է՝ — Ապստամբները երկրորդ

(28) Ամասթվեյը բերված են ըստ Կյոնիգի հաշվումների. տես Fr. König, Relief und Inschrift des Königs Darius I, Leiden, 1938, էջ 43-51:

անգամ համախմբվեցին (և) դուրս եկան Վահուսիսայի դեմ ճակատամարտ տալու: Առուտարա երկրում, Արմինայում, Արանք ճակատամարտ տվեցին: Ահուրամագդան ինձ օգնեց: Շնորհիվ Ահուրամագդայի, իմ գործը գլխովին ջախջախեց ապստամբ գործին: Թուրավահարա ամիսը վերջանում էր (Յունիս, 521), երբ Արանք ճակատամարտ տվեցին: Հետո Վահուսիսան հնազանդը-վելով իմ հրամանին, մնաց Արմինայում, մինչդեռ ես իմ Արգակը ուղղում էի դեպի Մեդիա»:

Յրդ սյունակ, տող 77-83

«Արախա անունով մի մարդ, հայ, Խալդիտայի որդին, ապստամբեց Բաբելոնում: Դուրալա երկրից նա խաբում էր ժողովրդին այսպես. — «Ես նաբուքոդոնոսորն եմ, նաբոնիդի որդին»: Այդ ժամանակ բաբելոնացիները ապստամբություն բարձրացրին իմ դեմ և անցան այս Արախայի կողմը: Նա գրավեց Բաբելոնը և Բաբելոնում դարձավ թագավոր»:

Թե՛ արտասահմանյան և թե՛ սովետական բոլոր ուսումնասիրողները, սկսած Յ. Մարկվարտով և վերջացրած Մ.Ա. Դանդամակով, անդրադառնալով արձանագրության այս հատվածներին, համամիտ են այն բանում, որ Արմենիայում Դարեհի տիրապետության դեմ ապստամբություն բարձրացնողները եղել են արմենական ցեղերը (ըստ ակադ. Գր. Ղափանցյանի՝ հայասական ցեղերը), որոնց, մինչ այդ, իրեն էր ենթարկել պարսից կյուրոս թագավորը²⁹: Բացառություն է միայն ակադ. Վ.Վ. Ստրուվեն, որն այս հարցին նվիրված իր հատուկ հոդվածում փորձ է անում առաջին անգամ ժխտել վերոհիշյալ տեսակետը և հայտնում է այն ենթադրությունը, թե Հայաստանում Դարեհի դեմ ապստամբություն բարձրացրածները եղել են ոչ թե արմենական, այլ, հավանաբար, սակասարմավական ցեղերը, որոնք VI

(29) J. Markwart, Die Chronologie des Kambyses und der Lüdenkönige und der altpersische Kalender, "Phililogus", Suppl. X, 1905, s. 167; F.H. Weissbach, Zur Neubabylonischen und Achämenidischen Chronologie "Zeitschrift der Deutschen Morgenländischen Gesellschaft", Bd. 62, 1908, ss. 638 f.f.; Հ.Հ. Մանանդյան, Քննական տեսություն ..., հ. Ա, էջ 48-53; Գր. Капанцян, Хаяса-колыбель армян, Ереван, 1948, М.М. Дьяконов, История Мидии ..., стр. 359; М.А. Дандамаев, *նշվ. աշխ.* էջ 225, ծան. 424: Հայ ժողովրդի պատմություն, հ. 1, Երևան, 1971, 1971, էջ 447-450:

դարում մ.թ.ա. ներխուժել էին Հայկական լեռնաշխարհ և, ըստ երևույթի, երկրից դուրս էին քշել արմեն Դադարչիչին³⁰:

Վ.Վ. Ստրուկենն այսպիսի ենթադրությունն հայտնում է, ելնելով մի շարք նկատառումներից, որոնցից կարևորագույնները հետևյալներն են. — 1) Բեհիստունյան արձանագրության այն հատվածում, որտեղ Դարեհ արքան թվարկում է իր դեմ ապստամբություն բարձրացրած երկրները, հիշատակված է Արմենիան: Այս առնչությունը նշենք, որ արձանագրության այս հատվածը շատ է քայքայված և պահպանվել է միայն էլամերեն տարբերակում, որտեղ կարդացվում է Mysaria երկրի անունը: Այդ երկիրը Վ.Վ. Ստրուկենն նույնացնում է Եգիպտոսի հետ, մինչդեռ Յ. Մարկվարտը և Ֆր. Կյոնիգը այն նույնացնում են Արմենիայի հետ³¹: 2) Արձանագրության համապատասխան հատվածներում հիշատակված չկա այն մասին, թե Արմենիայում ապստամբել են հատկապես արմենական ցեղերը, ինչպես նաև չի հիշատակված ապստամբների առաջնորդի անունը, այն ժամանակ, երբ մյուս բոլոր դեպքերում Դարեհը հիշատակում է տեղերում ծագած ապստամբության ղեկավարների անունները: Յ. Վեյսբախը, սակայն, ենթադրում է, որ Արմենիայում ապստամբածներին գլխավորում էր Արախան, որը հետագայում, ապստամբության ճնշումից հետո, փախավ Բաբելոն և այնտեղ գլխավորեց բաբելոնացիների նոր ապստամբությունը³²: Վեյսբախի այս հետաքրքիր ենթադրությունը հավանական է համարում նաև Մ.Ա. Դանդամաևը³³: 3) Ծագած ապստամբությունը ճնշելու համար Դարեհն ամեն անգամ ապստամբների դեմ ուղարկում է իր մերձավոր գինակիցներին՝ զորքի հետ միասին, մինչդեռ արմեն Դադարչիչին և, այնուհետև, պարսիկ Վահուստային Արմենիայի ապստամբների դեմ ուղարկում է առանց զորքի: Հանգուցյալ ակադեմիկոսը, երևի, պատշաճ ուշադրություն չի դարձրել Դարեհի արձանագրության այն բառերին, թե «չնորհիվ Ահուրամազդայի իմ զորքերը (ընդգծումը մերն է - Ս.Կ.) գլխովին չախջախեցին ապստամբ զորքին»: Մեր ընդգծած «իմ զորքերը»

(30) В.В. Струве, Новые данные истории Армении, засвидетельствованные Бехистунской надписью, *Տեղ ՀԳԱՀԳ*, 1946, № 8, էջ 31:

(31) J. Markwart, *նշվ. աշխ.*, Fr. König, *նշվ. աշխ.*:

(32) F.H. Weissbach, *նույն տեղում*:

(33) М.А. Дандамаев, *նույն տեղում*:

արտահայտութիւնը չի կարելի հասկանալ այլ կերպ, քան որպէս վկայութիւն այն մասին, թե Դարեհը ե՛լ Դադարչիչին ե՛լ Վահումիսային Արմենիա ուղակելով, նրանց տրամադրել էր «իր զորքերը»: Ուստի կարծում ենք, որ Վ.Վ. Ստրուվեի վերոհիշյալ վերջին դիտողութիւնը հիմնավորված չէ: Այս բոլորից բացի, ակադ. Վ.Վ. Ստրուվեի ենթադրութեան օգտին չի խոսում նաև Բեհիստունյան արձանագրութեան ամբողջ բնույթը: Ինչպէս հայտնի է, արձանագրութիւնը նվիրված է Դարեհի գահակալման առաջին տարում տերութեան զանազան մասերում նրա իշխանութեան դեմ ծայր առած ապստամբութիւններին և այդ ապստամբութիւնների ճնշմանը: Իսկ Արմենիայում ծագած ապստամբութիւնը այդ ապստամբութիւնների կարևոր օղակներից մեկն էր և իր բնույթով, անշուշտ, հար և նման մյուսներին:

Այն, որ պարսկական տիրապետութեան դեմ Արմենիայում ծագած ապստամբութիւնն ուներ կազմակերպված բնույթ և ընդունել էր խոշոր չափեր, վեր է ամեն կասկածից: Ուսումնասիրողները միանգամայն իրավացի կերպով կասկածում են Դարեհ արքայի հավաստիացումներին այն մասին, թե իր ուղարկած զորավարներն անընդմեջ հինգ անգամ ջարդել են ապստամբներին Արմենիայում: Ընդհակառակը, այն հանգամանքը, որ Դարեհը ստիպված է եղել երկու տարբեր զորավարների հրամանատարութեան տակ հինգ անգամ զորք ուղարկել Արմենիայի ապստամբների դեմ, որոնք, դուրս մղելով իրենց երկրից «արքայից արքայի» զորքերին, նույնիսկ առաջ էին շարժվել մինչև Ասորեստան, անկասկած ցույց է տալիս, որ նրանք են եղել ճակատամարտում հաղթող կողմը և միայն վերջին՝ հինգերորդ արշավանքից հետո, պարսիկ Վահումիսային հաջողվում է ենթարկել ապստամբներին³⁴: Բեհիստունյան արձանագրութեան ամբողջ բովանդակութեանից դժվար չէ հետևեցնել, որ արմենների երկրում ծագած ապստամբութիւնը ուժեղագույններից է եղել, քանի որ այն ճնշելու համար անհրաժեշտ է եղել հինգ անգամ արշավել նրանց դեմ: Արմենների ապստամբութիւնը ճնշելուն նկատելի չափով պետք է նպաստեր արմենական վերնախավի մի մա-

(34) Հ.Հ. Մանանդյան, նշվ. աշխ., էջ 51, Հ.Հ. Ժամկոչյան, Հայաստանը նախնադարյան-համայնական հասարակութեան և ստրկատիրութեան շրջանում, Երևան, 1961, էջ 143-145:

սի (Դադարչիչ) անցումը պարսիկների կողմը: Այնուամենայնիվ Մ.Մ. Դյակոնովը իրավացի է, երբ նշում է, որ Բեհիստունյան արձանագրությունը լուծում է Արմենիայի նկատմամբ պարսիկների տարած լրիվ հաղթանակի մասին և ավելացնում. «Ըստ երևույթին, այս երկիրը լրիվ չէր նվաճված Դարեհի թագավորության առաջին տարիներին»³⁵:

Դարեհի նախորդների օրոք Պարսկական պետությունը տուժում էր կենտրոնական իշխանության թուլությունից, միասնական վարչական կարգի բացակայությունից և հարկահանության անկանոնությունից:

Վերականգնելով և ընդարձակելով իր նախորդների թագավորությունը, հրով ու սրով իր դեմ ծագած ապստամբությունները ճնշելուց և իր իշխանությունը ամրապնդելուց հետո, Դարեհը անհրաժեշտ համարեց ձեռնարկելու մի շարք վարչա-տնտեսական ռեֆորմներ, Աքեմենյան նորաստեղծ տերության հետագա գոյությունը և հզորացումը ապահովելու նպատակով³⁶: «Արքայից Արքայի» կիրառած բարեփոխումներից կարևորագույնը, անկասկած, այն էր, որ նա մտցրեց ընդարձակածափալ թագավորության կառավարման նոր, կայուն սխեմա, որի հիմքում ընկած էր ռազմական ուժով միավորված ամբողջ տերության բաժանումը վարչական խոշոր միավորների՝ սատրապությունների, սատրապների՝ փոխարքաների գլխավորությամբ³⁷:

Վարչական տեսակետից Դարեհն իր տերությունը բաժանեց քսան մարզերի՝ սատրապությունների³⁸, ըստ որում այդ բաժանման ժամանակ հաշվի առնելով գլխավորապես բնական-աշխարհագրական սահմանները, ինչպես նաև էթնիկական սկզբունքը:

Սատրապներին նշանակում էր ինքը՝ արքայից արքան, որպես կանոն, պարսկական ազնվականության բարձր ներկայա-

(35) М.М. Дьяконов, Очерк истории древнего Ирана, М., 1961, էջ 20:

(36) М.М. Дьяконов, նշվ. աշխ., էջ 91-92:

(37) Սատրապ (σατράπης) հին պրսկ. xšatrapa բառի հունարեն ձևն է և նշանակում է տեղապահ, աշխարհապահ) հմմտ. Փալոտոս Բուզանդ, «Հայոց Պատմություն», թարգմանություն, ներածություն և ծանոթագրություններ սկսող. Սո. Մալխասյանի, Երևան, 1947, էջ 322, ծանոթ. 73): М.М. Дьяконов, նշվ. աշխ. էջ 91-92:

(38) Herodot., III, 89-98:

ցուցիչները միջից, իր հավատարիմ մերձավորներին ու ազգակիցներին³⁹: Նշանակովի սատրապի իշխանությունը, շատ դեպքերում, ժամանակի ընթացքում վերածվում էր ժառանգական իշխանության: Այսպես, Փոքր Ասիայում Դասկիլեյան (հետագայում՝ Բյուլթանիա) սատրապության գլուխ կանգնած էր ինքնակոչ Գառմատայի դեմ մղած պայքարում Դարեհի վեց զինակիցներից մեկի՝ Արտաբազոսի տոհմը: Աքեմենյանների փեսա Տրսասպեհենսը ստացել էր Փոքր Ասիայի ծովափնյա հունական քաղաքների սատրապությունը: Որպես սատրապի, Հայաստանում իրենց իշխանությունը ամրացրել էին Օրոնտեսյան (Երվանդունի) տոհմի ներկայացուցիչները, իսկ Միհրդատ Պոնտացին հետագայում պարծենում էր, որ ինքը սերում է յոթը պարսիկներից մեկի տոհմից: Նա պատասխանատու էր նաև սատրապության ներսում կարգ ու կանոնի պահպանման:

Իրեն ենթակա սատրապության սահմաններից ներս ստորապն ուներ ռազմական լիակատար իշխանություն, ընդհուպ մինչև իր համար գործեր հավաքելը⁴⁰: «Արքայից արքայի» ձեռնարկած ռազմական արշավանքների ժամանակ սատրապը գլխավորում էր իր սատրապությունից հավաքագրած զորքը⁴¹: Սատրապը պարտավոր էր նաև ապահովելու ամենամյա տուրքերի և կայուն հարկերի գանձումը հօգուտ արքայից արքայի և վարելու դատական գործերը սատրապության ներսում⁴²: Բացի այդ, գերագույն այս պաշտոնյան իրավունք ուներ իր սատրապության ներքին շրջանառության կարիքների համար արծաթ և պղինձ դրամ հատել, մինչդեռ ամբողջ տերություն մեջ ոսկի դրամ հատելու իրավունքը «արքայից արքան» վերապահում էր բացառապես իրեն⁴³:

Աքեմենյան Պարսկաստանի սատրապները, «արքայից արքայի» այդ ամենակարող ծառաները, ինչպես նշում է պրոֆ. Ն. Ադոնցը, սովորական պաշտոնյաներ կամ կառավարիչներ չէին: Նրանք, ստանալով սատրապության կառավարումը, փաստորեն

(39) М.М. Дьяконов, *նույն տեղում*:

(40) Xenoph., Anab., I, 1,6-11; IV, 3,3-4: Անաբասիս, էջ 8 և 89:

(41) Diodor., XVII, 58, 1:

(42) Հայ Ժողովրդի պատմություն, հ. 1, Երևան, 1971, էջ 445:

(43) М.М. Дьяконов, *նույն տեղում*:

այն ամրացնում էին իրենց, պաշտոնի հաջորդական ժառանգումով: Այս առումով սատրապությունն ուներ ոչ միայն քաղաքական, այլև սոցիալական գործոնի նշանակությունն⁴⁴:

Դարեհի կարևոր միջոցառումներից մեկն էլ այն էր, որ նա ավելի ևս ամրապնդեց պարսկական բանակը, որը դեռևս կյուրոս Մեծի ժամանակ իշխանության ամենահուսալի հենարանն էր: Դարեհի թագավորության տարիներին երկրի ներսում կարգավորվեցին նաև հաղորդակցության ճանապարհները, կառուցվեց հայտնի «արքայական ճանապարհը», որը, սկսած Շոշ քաղաքից, արևմտյան ուղղությամբ կտրում–անցնում էր երկիրը մինչև փոքրասիական Սարդես սատրապանիստ քաղաքը, տերության կենտրոնական մարզերը անմիջականորեն կապելով առափնյա քաղաքներին⁴⁵: Այդ ճանապարհի մի զգալի հատվածն անցնում էր հարավային Հայաստանի վրայով: Դարեհի մտցրած դրամական միասնական սխեմայի և ծավալած ճանապարհաշինությունը նկատելի չափով նպաստեցին առևտրի կարգավորմանը երկրում և տնտեսական առաջընթացին:

Աքեմենյանների տիրապետության նկատմամբ տեղական հպատակ բնակիչների հարաբերությունները որոշվում էին նրանով, որ վերջիններս պարտավոր էին հնազանդ մնալ, հարկ վճարել, զորահավաքի ժամանակ ներկայանալ զինվորական ծառայության և հոգալ սատրապի ու նրա պալատի, ինչպես նաև սատրապության սահմաններում տեղավորված «արքայից արքայի» կայազորների կարիքները⁴⁶:

Իրանագետ Մ.Մ. Դյակոնովը նշում է, որ սոցիալ–տնտեսական զարգացման տեսակետից Աքեմենյան Պասկաստանին ենթակա բոլոր երկրները կարելի է բաժանել երկու խմբի: Մի խմբին պատկանում էին Իրանի, Միջին Ասիայի և ծայրամասային մյուս մարզերի լայնարձակ տարածությունները, որտեղ դեռևս տիրապետող էր բնատնտեսությունը և կային նահապետական ու տոհմային կարգերի շատ մնացորդներ: Մյուս խմբին պատկանում էին տնտեսապես զարգացած և առավել կարևորություն ներկայացնող Առաջավոր Ասիայի սատրապությունները,

(44) Н. Адонц, Армения в эпоху Юстиниана, էջ 437:

(45) М.М. Дьяконов, *նույն տեղում*, էջ 93: Հայ ժողովրդի պատմություն, Կ. 1, Երևան, էջ 445:

(46) И.Г. Дройзен, История эллинизма, т. I, М., 1890, էջ 33:

որոնք տալիս էին Աքեմենյան թագավորների եկամուտների հիմնական զանգվածը և հանդիսանում էին պետութային սիրտը: Այս սատրապություններից պարսից արքաներն ամեն տարի ստանում էին կրկնապատիկ և եռապատիկ ավելի հարկ, քան ամբողջ մնացած իրենց տիրույթներից: Մ.Մ. Դյակոնովը այս երկրորդ խմբին պատկանող առավել զարգացած սատրապություններից է համարում նաև Արմենիան⁴⁷: Գերմանացի հելլենիստ Յ. Դրոյզենը ևս Արմենիան դասում է պարսկական տերութային կարևոր սատրապությունների թվին⁴⁸: Այն, որ Արմենիան Աքեմենյանների տերութային կարևոր սատրապություններից մեկն էր, կարելի է եզրակացնել նաև այն բանից, որ Աքեմենյան վերջին արքայից արքա Դարեհ Գ Կողոմանոսը, Հուստինոսի վկայութայամբ, թագավոր դառնալուց առաջ եղել էր Արմենիայի սատրապը⁴⁹:

Այս տեսակետը պիտի համարել ընդունելի, քանի որ Քսենոփոնի նման հավաստի և լավատեղյակ հեղինակը վկայում է, որ «Արմենիան մեծ երկիր է ու հարուստ»⁵⁰: Քսենոփոնի այս խոսքերը հաստատվում են Հայկական լեռնաշխարհի վրայով հելլեն վարձկանների նահանջը նկարագրող ամեն մի էջով: Ավելի քան 10 հազար զորք, իր բազմահազար բեռնակիրներով ու ստրուկներով հանդերձ, վերադարձի ճանապարհին, Արմենիայով անցնելիս, առատորեն գտնում է ամեն տեսակի բարիք ու բարեհաջող հասնում է Սև ծովի ափերը:

Ինչպես վերևում նշեցինք, Դարեհ Ա-ը սատրապներ նշանակեց իր մերձավոր գիւնակիցներին ու ազգականներին: Հետագայում այդ սատրապների սերունդներն էլ ժառանգաբար իրենց ձեռքում պահեցին սատրապի պաշտոնը: Աքեմենյանների տիրապետութային շրջանում Արմենիայում սատրապի պաշտոնը, եթե բացառենք մեզ հայտնի Դարեհ Գ Կողոմանոսին, թվում է, թե ժառանգաբար վարել են պարսկական Օրոնտեսների տոհմի ներկայացուցիչները, որոնց վերջին շառավիղները, օգտվելով քաղաքական բարենպաստ պայմաններից, մ.թ.ա. IV դարի վերջին

(47) М.М. Дьяконов, *н.з.в. а.з.в.* էջ 113-114:

(48) И.Г. Дройзен, *н.з.в. а.з.в.* էջ 1911

(49) M. Juniani Justini Epitoma historiarum Philipicarum Pompeii Trogi, Lipsiae, 5, 17: Քսենոփոն, Անաբասիս, էջ 81:

(50) Xenoph., Anabasis, III, 5, 17: Քսենոփոն, Անաբասիս, էջ 81:

տասնամյակներից սկսած, դառնում են հայկական առաջին անկախ պետութեան թագավորներ (Երվանդունիների թագավորութուն): Այս հանգամանքը բավականաչափ պարզ կերպով արտացոլված է ինչպես հին հունական, այնպես էլ մեր ազգային մատենագրութեան մեջ: Համառոտակի անդրադառնանք մեզ հայտնի փաստերին:

Օրոնտեսը (Երվանդ.) որպես Արմենիայի սատրապ առաջին անգամ հիշատակված է Քսենոփոնի «Անաբասիս» երկում: Հույն մատենագիրը հաղորդում է, թե Արմենիան, «որին իշխում էր Օրոնտասը, մեծ էր ու հարուստ»⁵¹: Սա մ.թ.ա. 401-400 թթ. էր: Այնուհետև մատենագրական տվյալներն այս մասին խզվում են մինչև մ.թ.ա. 330-ական թվականները, մինչև Ալեքսանդր Մակեդոնացու արշավանքները:

Փոքրասիական Գրանիկոն գետի մոտ 334 թ. և Իսոսի հարթավայրում (Կիլիկիա) 333 թ. կրած իր պարտութուններից հետո, Ալեքսանդրին դիմադրավերու համար Աքեմենյան վերջին արքայից արքան, Դարեհ Գ Կողմանոսը, 331 թ. Բաբելոնում կենտրոնացնում է հսկայական բանակ, հավաքագրված իր տերութեան բոլոր այն սատրապութուններից, որոնք դեռևս մնացել էին իր իշխանութեան տակ: Յուրաքանչյուր սատրապութեան գործ ներկայանում էր իր առանձին հրամանատարով: Արմենական գործերը ներկայանում են Օրոնտեսի և Միթրաուստեսի գլխավորութեամբ: Շուտով սկսած Գավղամեդայի (Նինվեի ավերակների մոտակայքում) ճակատամարտում, որտեղ Դարեհ Գ-ի խառնիճաղանճ բանակը գլխովին ջախջախվեց, հայկական զորքերը, կապաղադովկիացիների հետ միասին, դասավորված էին ձախ թևում⁵²:

Օրոնտեսը դարձյալ հիշատակվում է որպես Հայաստանի տիրակալ 317 թ.⁵³: Այս Օրոնտեսը, ինչպես ճիշտ նկատել են Յ. Դրոյզենը և ակադ. Հ.Հ. Մանանդյանը, 331 թ. Գավղամեդայի վերոհիշյալ ճակատամարտին մասնակցած Հայաստանի սատրապ Օրոնտեսն է, որը դրանից հետո ևս շարունակում էր իշխել Հայաստանում⁵⁴:

(51) Xenoph., Anabasis, III, 5, 17: IV, 3,4:

(52) Arriani De expeditione Alexandri, Lipsiae, 1873, III, 8,1:

(53) Polyaei Strategematon IV, 8,6: Diodor., XIX, 23:

(54) И.Г. Дройзен, История эллинизма, т. II, М., 1893, էջ 75: Հ.Հ. Մանանդյան, Քննական տեսութուն ..., Կ. Ա., էջ 96-97:

Օրոնտեսների տոհմի վերջին ներկայացուցչի մասին կարևոր հիշատակություն հանդիպում ենք Ստրաբոնի մոտ, որը, ի լրացումն մյուս հեղինակների, հաղորդում է, որ այս Օրոնտեսը հին պարսկական ամենահայտնի յոթը տոհմերից մեկի տոհմապետ Հյուդառուեսի շուռավիղն էր⁵⁵:

Հայաստանի սատրապ Օրոնտեսները մեծ հեղինակություն են վայելել ոչ միայն Աքեմենյան Պարսկաստանի արքունիքում, այլև, հավանաբար, Աքեմենյանների պետություններից հետո, հաղթանակած հունա-մակեդոնացիների գորահրամանատարների շրջանում, քանի որ, ինչպես վկայում է Դիոդորոսը, Ալեքսանդր Մակեդոնացու անձնական քարտուղար Եվմենեսը հրամանատարների գորափողովում հրապարակում է մի նամակ, որն իբր ստացել էր Արմենիայի սատրապ Օրոնտեսից, դրանով իսկ մեծ տպավորություն գործելով գորականների վրա⁵⁶:

Օրոնտեսների կամ Երվանդունիների իշխանությունը, ըստ երեվույթին, ամուր արմատներ էր գցել Հայաստանում, քանի որ՝ 1) Աքեմենյանների իշխանության տապալումից հետո սատրապ Օրոնտեսը հռչակվում է Արմենիայի թագավոր: 2) Երվանդյան թագավորների մասին անհերքելի պատմական դեպքերի արձագանքը հանդիսացող մի շարք կարևոր գրույցներ մեզ հասել են Մովսես Խորենացու «Հայոց Պատմության» միջոցով⁵⁷: 3) Հայաստանում Արտաշեսյան թագավորության հիմնադիրը իր արամեատառ արձանագրություններում իրեն անվանում է «Երվանդական», այսինքն՝ Երվանդունի⁵⁸:

Հայաստանում Երվանդյանների տիրապետության մասին մենք, մատենագրական տվյալներից բացի, ունենք նաև վիմագրական մեծարժեք մի վկայություն: Մեր խոսքը Երվանդունիների թագավորության մայրաքաղաք Արմավիրում հայտնաբեր-

(55) Strabo, XI, 14, 15:

(56) Diodor, XIX, 23:

(57) Մովսես Խորենացի, Բ, 15-16:

(58) Գ.Ա. Տիրացյան, Մովսես Խորենացու «Հայոց Պատմության» և Ստրաբոնի «Աշխարհագրության» մի քանի տվյալներ Հայաստանի ն.մ.թ. 3-2րդ դարերի պատմության մասին, ԲՄ, 1962, նո 6: Հայ ժողովրդի պատմություն, 4. 1, Երևան, 1971, էջ 528-530:

ված հունարեն արձանագրություններից մեկի մասին է, որտեղ ուղղակի հիշատակված է թագավոր Երվանդի անունը՝ Եբրոնտես (ΒΑΣΙΛΕΥΣ Ε(Β)ΡΟΝΤΗΣ) ձևով: Այս Երվանդ-Եբրոնտեսը, անկասկած, Մեծ Հայքի թագավորն է Օրոնտեսների տոհմից և ոչ թե Իրերխայի ինչ-որ թագավոր⁵⁹:

Պակաս կարևոր փաստարկ չէ նաև այն, որ Արտաշես Ա-ից մեզ հասած արամեատառ արձանագրություններում հայոց թագավորն իրեն անվանում է «Երվանդական», այն է՝ Երվանդունի⁶⁰:

Վերևում ամբողջ շարադրվածից պարզ է դառնում, որ Հայկական լեռնաշխարհում մ.թ.ա. VI-IV դդ. հասարակության սոցիալ-տնտեսական և քաղաքական զարգացումը հասել էր այնպիսի աստիճանի, երբ արդեն ստեղծվել էին բոլոր անհրաժեշտ նախադրյալները ինքնուրույն պետականության առաջացման համար⁶¹: Պատմական այդ պրոցեսի ավարտմանը, սակայն, մեծապես խոչընդոտում էր օտարերկրյա քաղաքական լուծը: Հայկական լեռնաշխարհի ընակիչները, ինչպես տեսանք, VI դարում, նույնիսկ երկու անգամ ապստամբել էին, քաղաքական ազատություն ձեռք բերելու նպատակով, սակայն նրանց փորձերը դաժանորեն ճնշվեցին և արմենները մոտ երկու հարյուրամյակ մնացին Աքեմենյան «արքայից արքայի» գերիշխանության տակ: Այնուամենայնիվ մ.թ.ա. IV դարի վերջին տասնամյակներին ստեղծվեցին արտաքին և ներքին բարենպաստ պայմաններ հայկական ինքնուրույն պետականության առաջացման համար: IV դարի 30-ական թվականներին սկսվեց հունա-մակեդոնական էքսպանսիան դեպի Արևելք, Ալեքսանդր Մակեդոնացու գլխավորությամբ: Տաղանդավոր երիտասարդ զորավարին հաջողվեց երեք ճակատամարտում վերջնականապես ջախջախել վերջին Աքեմենյան Դարեհ Գ կոտոմանոսի զորքերին: Դրանով վերջ տրվեց

(59) Այսպիսի չհիմնավորված սխալ ենթադրություն է հայտնում Ա.Գ. Բոկշանինը (А.Г. Бокшанин, Парфия и Рим, ч. I, М., 1963, էջ 224):

(60) К.В. Тревэр, Очерки по истории культуры древней Армении, т. I, М.-Л., 1953, էջ 162-174: Գ.Ա. Տիրացյան, Արտաշես Ա-ի արամեատառ նորագյուտ արձանագրությունը: Տեղ. ՀԳԱՀԳ, 1957, նո. 10, էջ 108 և հաջ.: Ա.Գ. Периханян, Арамейская надпись из Зангезура, ՊԲՀ, 1965, նո. 4:

(61) Տես նաև Գ.Ա. Տիրացյան, նշվ. աշխ.:

պարսկական քաղաքական տիրապետութեանը Մերձավոր Արևելքում: Առաջավոր Ասիայի մյուս ժողովուրդների հետ միասին հայերը ևս թոթափեցին Աքեմենյանների տիրապետութեան լուծը: Մյուս կողմից՝ հաղթականորէն առաջ շարժվող Մակեդոնացին չմտավ Հայկական լեռնաշխարհ: Ճիշտ է, նա, լսելով Սպերի ոսկու հանքերի մասին, այնտեղ զորքով ուղարկեց իր հրամանատարներից Մենոնին, բայց սա անհաջողութեան մատնեց և, ինչպես հաղորդում է Ստրաբոնը, սպանվեց տեղաբնիկների կողմից⁶²: Այսպիսով, Հայաստանը մեխանիկորեն գտնվեց անկախ վիճակում և այնտեղ իբրև սատրապ իշխող Օրոնտես-Երվանդը իրեն հայտարարեց հայոց թագավոր: Հայաստանում հաստատվում է Երվանդունիների թագավորութունը: Այս առնչութեամբ էլ անհրաժեշտ ենք համարում համառոտակի անդրադառնալ Երվանդունիների թագավորական հարստութեան առաջացման հարցին, քանի որ, մեր կարծիքով, այն իր ճիշտ լուծումը չի գտել հայագիտութեան մեջ:

(62) Strabo, XI, 14, 9 (c.529):

ԳԼՈՒԽ ԵՐԿՐՈՐԴ

ԵՐՎԱՆԴՈՒՆԻ ԹԱԳԱՎՈՐԱԿԱՆ ՀԱՐՍՏՈՒԹԵԱՆ ՄԱՍԻՆ

Հակառակ արտաքին աղբյուրների հաղորդումներին, ինչպես նաև Հայաստանում վերջերս հայտնաբերված վիճակաճանապարհագրությունների ավելի քան պարզորոշ տվյալներին, Մովսես Խորենացու «Հայոց Պատմութեանը» հայտնի են Հայաստանում տիրած միայն երկու հարստությունները. — 1) Հայկյան կամ Հայկազունի տոհմ, որն իբր իշխել է նախասկզբնական ժամանակներից մինչև Վահե Վահունին, որին պատմահայրը համարում է Ալեքսանդր Մակեդոնացու ժամանակակից (մ.թ.ա. 330–320-ական թվականները). 2) Արշակունի թագավորներ՝ սկսած Վաղարշակից մինչև Արտաշես վերջինը, երբ վերացավ Հայաստանում Արշակունիների թագավորությունը (428 թ.): Իսկ այս հարստությունների միջև ընկած շուրջ երկուհարյուրամյա ժամանակահատվածի համար Խորենացին խոստովանում է, որ իրեն հայտնի է, թե ո՞վքեր են իշխել Հայաստանում: Ահա պատմահոր խոսքերը. «Սա (Վահե – Ս.Կ.) ընդվզեալ՝ մեռանի յԱղեքսանդրէ Մակեդոնացուց: Յայսմ հետէ մինչև ցթագաւորութիւնն Վաղարշակայ ի Հայս՝ ոչ ինչ ճշմարտագոյն ունիմ պատմել քեզ. քանզի շիրտի իմն ամբոխից լեալ՝ այր վարամբ ելանէին տիրել աշխարհիս¹»:

Խորենացու մատչանի առաջին գիրքը գրեթե ամբողջապես նվիրված է Հայկազյան տոհմի պատմությունը, որտեղ գերազանցում են դիցաբանական–առասպելական տարրերը: Այսուհանդերձ, պատմահոր մոտ հայկազյանների շարքում դասված մի քանի թագավորներ (Տիգրան, Արտավազդ), պատմական անձնավորություններ են:

(1) Մովսես Խորենացի, Ա լր:

Խորենացու մշակած այս սխեման հայագետների կողմից անվերապահորեն ընդունվում էր, ընդհուպ մինչև XIX դարը: Նույնիսկ օտարաբան սկզբնաղբույրների այնպիսի գիտակ, ինչպիսին էր Միքայել Չամչյանը, իր «Պատմութեան» մեջ համարյա նույնութեամբ հետևում էր Խորենացու շարադրանքին²: Ճիշտ է, նա իրավացիորեն մատնանշում է օտար, հատկապես հռոմեական աղբյուրների միտումնավորութունը, սակայն արտաքին պատմիչների նկատմամբ իր քննադատութեան ընթացքում Չամչյանն, ընկնելով հակառակ ծայրահեղութեան մեջ, օտարաբան հեղինակներից մեր պատմութեանը վերաբերող այն հատվածներն է վերցրել միայն, որոնք համաձայնվում էին հատկապես Խորենացու պատմութեան հետ, քանի որ վերջինիս նա համարում է ստուգագույնը բոլորից³: Ուստի Չամչյանը, հետևելով Խորենացուն, նշում է, որ Հայկից հետո մինչև Վահե թագավորը Հայաստանում եղել է «Հայկազանց հարագատ իշխանութիւն», իսկ այնուհետև «ընդ կուսակալութեամբ այլոց՝ մինչ ցարչակունեաց տէրութիւն»⁴:

Անհրաժեշտ ենք համարում նշել, որ պատմահայր Խորենացին Հայկազյան տոհմը չի համարում թագավորական, այլ Հայկին ու նրա հետնորդներին պարզապես անվանում է նահապետներ: Սա, մեր կարծիքով, արտացոլում է պատմական այն ժամանակաշրջանը, երբ հայկական ցեղերը սկսում էին արդեն միավորվել և հասել էին սոցիալ-տնտեսական ու քաղաքական զարգացման այն մակարդակին, որը պատմագիտութեան մեջ հայտնի է որպես ռազմական դեմոկրատիայի շրջան: Ուստի մեզ բոլորովին պատահական չի թվում այն, որ, ըստ Խորենացու, Հայկի հետնորդներից Զարմայր նահապետը ժամանակակից է Տրոյական պատերազմին⁵ և սուրճվում է վաղ հելլենական ու խալդայի այն ժամանակ, երբ հունական հասարակութեան սոցիալ-տնտեսական ու քաղաքական կազմակերպութեան ձևը հայտնի է որպես ռազմական դեմոկրատիա:

Խորենացու մոտ հայոց առաջին թագավորը Սկայորդի Պարույրն է, որից սերածների թվում են Երվանդ Սակավակյացը

(2) Մ. Չամչեան, Պատմութիւն Հայոց, հ. Ա, Վենետիկ, 1784:

(3) Նույն տեղում, էջ 35-40:

(4) Նույն տեղում, էջ 31:

(5) Մովսէս Խորենացի, Ա, լբ:

և սրա որդի Տիգրան Երվանդյանը, որոնց պատմահայրը նույնպես հիշատակում է որպես հայոց թագավորներ⁶:

Օտար, առանձնապես անտիկ, աղբյուրներին հանգամանորեն ծանոթանալը հայագետների առաջ անհետաձգելի հարց դրեց՝ ստուգել խորենացու հաղորդած տվյալները այդ աղբյուրների վկայութուններով և վերանայել նրա մատյանի հիման վրա կազմված Հայաստանում երբևէ իշխած հարստությունների սխեման, քանի որ անտիկ հեղինակները, որոնց մի զգալի մասը անմիջականորեն ժամանակակից են իրենց նկարագրած դեպքերին, բողոքովին այլ պատկեր են ուրվագծում, քան խորենացին⁷:

Նախքան առաջ անցնելը նշենք, որ Հ. Գաթրճյանը հիշատակում է Արտաշեսին (նրա մոտ՝ Արտաշատ - Մ.Կ.) և Զարեհին, սակայն նրանց համարում է ոչ թե որևէ մէկ արքայատոհմի պատկանող թագավորներ, այլ Սելևկյան Անտիոքոս Մեծի՝ Մագնեսիայում կրած պարտությունից հետո և վաղարշակի գահակալումից առաջ համապատասխանաբար Մեծ Հայքի և Փոքր Հայքի կուսակալներ⁸:

Ա.Մ. Գարագաշյանը թեպետև հանդես եկավ խորենացու խստագույն քննադատությամբ, փորձելով ժխտել նրա հավաստիությունը, այսուհանդերձ վերոհիշյալ հարցում չկարողացավ հաղթահարել պատմահոր ազդեցությունը: Եվ դա այն դեպքում, երբ նա ընդհանրապես նախապատվությունը տալիս է օտարաբան, հատկապես հունական աղբյուրների հաղորդած տեղեկություններին: Ա.Մ. Գարագաշյանը հայ ժողովրդի պատմության հին շրջանը բաժանում է նախապատմական և պատմական ժամանակների, նշելով, որ առաջին շրջանում Հայաստանում առաջացել է Արարատյան թագավորությունը, որը գոյություն է

(6) Մովսես խորենացի, Ա, իր-լր:

(7) Լ.Փ. Շահինյանը խորենացու ժամանակագրական համակարգին նվիրված իր ուսումնասիրություններում անվերապահորեն ընդունում է խորենացու սխեման և պնդում, թե Հայաստանում չեն եղել ո՛չ Երվանդունիներ, ո՛չ էլ Արտաշեսյաններ, որ վերջիններս պատկանել են Արշակունի տոհմին (Լ.Փ. Շահինյան, Պարսիկ Արշակունիների հարստության հաստատման թվականը ըստ խորենացու, ՊԲՀ, 1966 Նո 1, էջ 155-172: Նույնի՝ Ինչպիսին է Մովսես խորենացու «Հայոց Պատմության» ժամանակագրական համակարգը, ԲՄ, Նո 8, 1967, էջ 21-58 և այլ գործեր):

(8) Յովսէփ Գաթրճեանց, Տիեզերական պատմութիւն, Վիեննա, Հ. Ա, 1849, էջ 581:

ունեցել մինչև Աքեմենյան Դարեհ Ա-ի կողմից Հայաստանի նվաճվելը: ԱՄ. Գարագաշյանը այնուհետև գրում է, որ Սելևկյանների ժամանակ Հայաստանում «հարյավ արդարև նոր Արարատյան թագավորութուն մը, ի մոխրո հին Արարատյան թագավորության, Արշակունյաց թագավորութուն անվամբ»⁹:

Դժվար է նկատել, որ ԱՄ. Գարագաշյանը չգիտե ո՛չ երվանդունիներին, ո՛չ իսկ Արտաշեսյաններին որպես առանձին թագավորական հարստութուն և մ.թ.ա. Ուրարի սկզբին Հայաստանում Արտաշեսի հաստատած տերութունը համարում է Արշակունյաց թագավորութուն: Նույն տեսակետն է նա կրկնում տարբեր առիթներով¹⁰: Այնուամենայնիվ թվում է, թե Գարագաշյանը ինչ-որ տարբերութուն ղնում է Արտաշեսի և Տրդատ Ա. Արշակունու հետնորդների միջև, երբ խոսելով հայոց թագուհի էրատոյի մասին, նրան համարում է «վերջինն ի ցեղեն Արտաքսիասա, որով կմարի Արտաքսիասյան հարստութունը»¹¹: Ըստ երևույթին, ԱՄ. Գարագաշյանը Արտաշեսին և Տրդատին համարում է միևնույն Արշակունի հարստության տարբեր ճյուղերի ներկայացուցիչներ:

Այն, որ վերոհիշյալ թագավորական երկու տոհմերի միևնույն՝ Արշակունի հարստության պատկանելը հիրավի կասկածներ է առաջացրել Ա. Գարագաշյանի մոտ, երևում է նաև նրա հեռակյալ դատողութուններից. «... Արշակունի կնշանակե արքունի, թագավորական, հայերեն Արշակ անունեն, որ ... կնշանակե արքա ... Դիտողության արժանի է, որ մեր պատմության մեջ ուրիշ մը Արշակ կոչված չենք գտներ: Հայք արիական բառով արշակունի կոչեցին հին Արարատյան թագավորական ցեղը»¹²: Այս դիտողութունը, սակայն, բավական չի եղել, որպեսզի Ա. Գարագաշյանը հանգեր Արտաշեսյան և Արշակունի թագավորների տարբեր արքայատոհմերի պատկանելու տեսակետին:

Ի դեպ, հետաքրքիր է նշել, որ վրաց պատմական ավանդութունը ևս Արտաշեսյաններին համարում է նույնպես Արշա-

(9) ԱՄ. Գարագաշյան, Քննական Պատմութուն Հայոց, մասն Բ, Թիֆլիս, 1895, էջ 190:

(10) Նույն տեղում, էջեր 1, 81, 83, 195 և այլ:

(11) ԱՄ. Գարագաշյան, Քննական Պատմութուն Հայոց, մասն Բ, Թիֆլիս, 1895, էջ 190:

(12) ԱՄ. Գարագաշյան, Քննական Պատմութուն Հայոց, մասն Ա, էջ 83:

կունի թագավորներ: Այդ մասին ակադ. Ս.Տ. Երեմյանը գրում է. «Արդեն վրացական թագավորության սկզբնավորության շրջանից իսկ (մ.թ.ա. III-II դ.դ.) վրացական Փառնավազյան («Փառավազեանք») դինաստիան հաճախ էր խնամիական կապերով կապվել հայկական թագավորական տների հետ: ... Նյութերի ուսումնասիրությունը ցույց է տալիս, որ մ.թ. 1-ին թվականից Վրաց աշխարհի (Իբերիայի) թագավոր է հռչակվում Ադերկը (չուրջ 1-27 թթ.), որը Տիգրան Բ-ի ժամանակակից, Արտաշեսյան տոհմից սերված վրաց Արտակ թագավորի (66-65 թթ.) թոռնորդին էր: Ադերկից սկսած վրացական գահի վրա վերստին բազմում են, հավանաբար, մոր կողմից, հայկական Երվանդունի-Արտաշեսյան դինաստիայի ներկայացուցիչները և նշանակալից է, որ հետևելով հայկական պատմական ավանդությանը, վրացական ավանդական պատմությունն այս դինաստիան անվանում է “Արշակունյան”»¹³:

Հայ պատմագիտության մեջ, ինչքան մեզ հայտնի է, առաջին անգամ Գ. Խալաթյանցն էր, որը որոշակիորեն տարանջատեց Արշակունիներին և Հայաստանում նրանց նախորդած գահակալներին: Նա գրում է. «... Պարթև Արշակունիների հարստությունը, հակառակ Խորենացու և նրա աղբյուրի՝ կեղծ-Ագաթանգեղոսի կամ Մար-Աբասի հաղորդման, կարող էր Հայաստանում հաստատվել միայն Տիգրանից և Տիգրանյաններից հետո¹⁴»: Իր այս տեսակետը առավել պարզ դարձնելու համար Գ. Խալաթյանցը նույն էջում տողատակի ծանօթագրության մեջ նշում է, որ Փավստոսի մոտ Տիգրանի Արշակունի անվանվելը պետք է հասկանալ Հայաստանի թագավորական հարստության իմաստով, քանզի «արշակ» նշանակում է «թագավոր» և ոչ թե Տիգրանի պարթև Արշակ Ա-ից սերած լինելու իմաստով:

Հայաստանում թագավորական երկու տարբեր հարստության առկայությունն առանձնապես շեշտված է Ն. Ադոնցի մոտ, որը Արշակունյաց հարստությանը նախորդած գահակալներին անվանում է Տիգրանյաններ՝ Տիգրան Մեծի անունից: Նա գրում է. «Արշակունիների հանդես գալուն նախորդած շրջանը արտաքին տեսակետից կարելի է անվանել Աքեմենյան, իսկ ներքին

(13) Հայ ժողովրդի պատմություն, 4. 1, Երևան, 1971, էջ 716:

(14) Г. Халатяни, Армянские Аршакиды в «Истории Армении» Моисея Хоренского, ч. I, М., 1903, էջ 5:

տեսակետից՝ Տիգրանյան, այն հարստության անունով, որից սերում էին Արտաքսիասը և Ջարիադրիսը և նրանց հռչակավոր հետնորդ Տիգրան Երկրորդը»¹⁵: Ն. Ադոնցը նույն այս պարբերությունը կցել է հետևյալ տողատակի ծանոթագրությունը, որն ունի բացառիկ նշանակություն : «Սովորաբար կարծում են, թե Հայաստանում մինչարշակունյան թագավորական հարստությունն իր սկիզբն առնում է Արտաքսիասից ու Ջարիադրիսից: ... Չենք կասկածում, որ Արտաքսիասի տոհմը ծագում է Ափղահակի ժամանակակից Տիգրանից: ... Տիգրանի հարստության առաջին հայտնի ներկայացուցչի անունով և հռչակավոր նվաճող Տիգրան Մեծի պատվին մինչարշակունյան շրջանը անվանում ենք Տիգրանյան»¹⁶:

Ն. Ադոնցը այս հարցին դարձյալ անդրադառնալով, ավելի որոշակի գրում է. «Մեր հրայի սկզբում, ավելի ճիշտ՝ ՅՅ թվակալին, Տիգրան Դ-ի մահվամբ հատվեց Հայաստանում Տիգրանյանների հարստությունը»: Այս տողերին կցած իր ծանոթագրության մեջ Ն. Ադոնցը տալիս է երկու հարստություններին՝ Տիգրանյաններին (իմա՝ Արտաշեսյաններին) և Արշակունիներին պատկանող գահակալների ցուցակը¹⁷:

Պրոֆ. Լեոն ևս իր «Հայոց Պատմություն» մեջ պարզորոշ սահմանագատում է Արտաշեսյաններին ու Արշակունիներին և առանձին-առանձին փորձում է սալ դրանցից յուրաքանչյուրի պատմությունը: Հայաստանում Արշակունյաց հարստության հիմնադիր Տրդատ Ա-ին նա համարում է «չարունակող այն մեծ գործի, որ արտաշեսյան հարստության իսկական փառքն է կազմում»¹⁸:

Հունա-հռոմեական հեղինակների համապատասխան վկայություններից բացի, Արտաշեսյանների և Արշակունիների՝ տարբեր արքայատոհմերի պատկանած լինելու տեսակետի օգտին խոսում են նաև հետևյալ փաստարկները. — 1) Արտաշեսյանների թագավորության ժամանակ, Հայաստանում սահմանված էր դահակավման խիստ ժառանգական կարգ¹⁹, այսինքն՝ թագավորի

(15) -Н. Адонц, Армения в эпоху Юстиниана, էջ 389-390:

(16) Նույն տեղում, էջ 390:

(17) Նույն տեղում, էջ 427-428:

(18) Լեո, Երկեր 10 հատորով, հ. 1, Երևան, 1966, էջ 352:

(19) Հայ ժողովրդի պատմություն, հ. 1, Երևան, էջ 667:

մահից հետո գահն անցնում էր նրա ավագ որդուն. մինչդեռ Արշակունիների օրոք այն ժառանգական չէր առնվազն մինչև մ.թ. Ո դարի վերջը: 2) Արտաշեսյան թագավորներն, ընդհանրապես, հատել են իրենց սեփական դրամը²⁰, մինչդեռ Հայաստանի Արշակունի թագավորներից և ոչ մեկը չի դիմել այդ քայլին: 3) Արտաշեսյանները հաճախ ռազմական ընդհարումներ են ունեցել պարթև Արշակունիների հետ և այդ դարերում Հայաստանի և պարթևական Պարսկաստանի միջև դիվանագիտական-քաղաքական պայքարն անպակաս է եղել, մերթ խուլ, մերթ բացահայտ, մինչդեռ հայ և պարթև Արշակունիների միջև մղված պայքարի և հակամարտության ոչ մի հավաստիացում դեռևս հայտնի չէ:

Կարելի է նշել փաստարկները հաստատող նաև հետևյալ նկատառումները: Հիմքեր կան ենթադրելու, որ Արտաշեսյանները տոհմակից են եղել Մոսիքի հայ թագավորներին²¹, իսկ այս վերջիններս բոլորովին էլ Արշակունիներ չէին: Այնուհետև՝ խորենացու մոտ ևս I դարում նկատելի է հայկական գիտաստիանների ինչ-որ խզում, անջատում, որը պատմահայրը արհեստականորեն միացրել է, բայց մնացած հատվածը լրացնելով Աբգարի պատմությամբ²²:

Վերևում ամբողջ շարադրվածից պարզ երևում է, որ նախախորհրդային հայագետներից և ոչ մեկը չի անդրադարձել հնագույն ժամանակներում Հայաստանում գահակալած մի երրորդ, ոչ պակաս կարևոր արքայատոհմի, Երվանդունիների պատմությանը: Ն. Ադոնցի մոտ նկատելի է այն, որ նա Տիգրանյանների (նույնն է թե՛ Արտաշեսյանների) գահակալությունը ճիշտ կերպով բաժանում է երկու շրջանի, մ.թ.ա. VI դար և II-I դարեր, չանդրադառնալով, սակայն, IV-III դարերում Արտաշեսյաններին նախորդած Երվանդունիների թագավորության հարցին:

Մեկ այլ առիթով Ն. Ադոնցը նշում է, թե հայկական մարզերից Փոքր Հայքը առաջինն էր, որ Աքեմենյան տերության փլատակների վրա ձեռք բերեց քաղաքական անկախություն և կառավարվում էր իր հայրենի թագավորների կողմից, դեռևս Մոսիքում՝ Ջարեհի և Արաքսի հովտում՝ Արտաշեսի թագավորու-

(20) Նույն տեղում, էջ 693-698:

(21) Նույն տեղում, էջ 512-514 և 542-550

(22) Մոսիսես խորենացի, Բ, իդ-լգ:

թյունների առաջացումից շատ առաջ²³: Շարադրանքից դժվար է նկատել, որ Ն. Ադոնցը անգիտանում է Հայաստանում գահակալած Երվանդունի հարստությունը: Լեոն նույնպես չգիտի Երվանդունի արքայատոհմի մասին

Հետևաբար, խորհրդահայ պատմագրության նվաճումներից պիտի համարել այն, որ առկա սկզբնաղբյուրների մանրակրկիտ ուսումնասիրության հիման վրա վեր հանվեց Աքեմենյան Պարսկաստանի լուծը թոթափելուց հետո Հայաստանում հաստատված Երվանդունիների թագավորության քաղաքական և, մասամբ, սոցիալ-տնտեսական պատմությունը: Այս հարցում առաջին երախտիքը պատկանում է ակադ. Հ.Հ. Մանանդյանին²⁴: Այնուհետև Երվանդունիներին անդրադարձել և անդրադառնում են սովետահայ և արտասահմանյան պատմաբաններ՝ ակադ. Ս.Տ. Երեմյանը, Կ.Վ. Տրեվերը, Գ.Ս. Սարգսյանը, Գ.Ա. Տիրացյանը, Կ. Թումանովը, Հ. Ժամկոչյանը և ուրիշներ²⁵: Ի դեպ նշենք, որ նրանք Ուրար-

(23) Н. Адонц, *նշվ. աշխ.*, էջ 86:

(24) Հ.Հ. Մանանդյան, *Քննական տեսություն ...*, հ. Ա, էջ 104:

(25) С.Т. Еремян, Основные черты общественного строя Армении в эллинистическую эпоху, ИАНАОН, 1948, № 11, стр. 42; его же, Развитие городов и городской жизни в древней Армении, ВДИ, 1953, № 3, стр. ?; К.В. Тревер, Очерки по истории культуры древней Армении, т. I, М.-Л., 1953, стр. 120; Г.Х. Сарксян, Тигранакерт. Из истории древнеармянских городских общин, М., 1960, стр. 30-31; С.М. Крисяшарян, Возникновение городов в Армении во II веке до н. э. -III в. н. э., «Научные доклады высшей школы. Исторические науки», 1961, № 4, стр. 150-151.

Գ.Ա. Տիրացյան, Երվանդունիները Հայաստանում, Տեղ. ՀԳԱՀԳ, 1958, Նո, 4, էջ 61 և հաջ.: Նույնի՝ Հին Հայկական պետության առաջացումը, ՊԲՀ, 1986, Նո 4, էջ 83 և հաջ.: Հ. Ժամկոչյան, Հայաստանը նախնադարյան համայնական հատարակության և ստրկատիրության շրջանում, Երևան, 1961, էջ 174 և հաջ.: Գ.Ս. Սարգսյան, Հելլենիստական դարաշրջանի Հայաստանը և Մոփսես խորենացին, Երևան, 1966, էջ 71-82 և հաջ.: Ս.Մ. Կրկյաչարյան, Դիտողություններ հին Հայկական տաճարային քաղաքների առաջացման մասին, Տեղ. ՀԳԱՀԳ, 1963, Նո 9, էջ 55-60: Նույնի՝ Հին Հայաստանի և Փոքր Ասիայի քաղաքների պատմության դրվագներ, Երևան, 1970, էջ 62-66 և 122-129: Հայ Ժողովրդի պատմություն, հ. 1, Երևան, 1971, էջ 435-442 և 503-520: Ժ.Գ. Էլչիբեկյան, Երվանդունիների ծագման հարցի շուրջը, ՊԲՀ, 1971, Նո 2, էջ 107-115: С Toumanoff. The Orontids of Armenia (Studies in Christian Caucasian History, Georgetown, 1963.

տուրի անկումից անմիջապես հետո, մ.թ.ա. VI դարի առաջին կես-
 տում Հայաստանում իշխած տիրակալներին համարում են Եր-
 վանդունիներ. այս տեսակետին անցյալում տուրք ենք տվել նաև
 մենք²⁶. մինչդեռ, ինչպես տեսանք, Ն. Ադոնցը նրանց անվանում
 է Տիգրանյաններ և այդ տարիները համարում է Արտաշեսյան-
 ների գահակալման առաջին շրջան: Մեր կարծիքով, առավել ճիշտ
 է Ն. Ադոնցի տեսակետը: Փորձենք հիմնավորել մեր այս կար-
 ծիքը:

Տեսնենք, թե վերոհիշյալ ուսումնասիրողները աղբյուրնե-
 րից ի՞նչ տվյալ են ունեցել ենթադրելու, որ մ.թ.ա. VI դարի
 առաջին կեսին Հայաստանում հաստատվել է Երվանդունիների
 իշխանությունը: Ըստ էություն միայն մեկ տվյալ Երվանդ Սա-
 կավակյացի հիշատակությունը խորենացու մատյանում մեջ բեր-
 ված արքայացանկերից մեկում, իբրև մարաց Աժդահակ թագա-
 վորի ժամանակակից²⁷: Այնուհետև այս Երվանդը ոչ մի տեղ չի
 հիշատակվում նույնիսկ խորենացու մոտ, բացի Վարդգեսավանի
 հիմնադրման մասին գրույցից²⁸: խորենացու պատմելով, Երվանդ
 Սակավակյացին հաջորդել է Տիգրան Երվանդյանը: Հայագետ-
 ներն այն կարծիքին են, թե իրենց հաջողվել է Քսենոփոնի
 «Կյուրոպեդիա» երկում գտնել խորենացու այս հաղորդման հաս-
 տատումը: Իրոք, Քսենոփոնը, խոսելով այդ նույն ժամանակա-
 շրջանի մասին, հաճախ է հիշատակում հայոց թագավորին, սա-
 կայն առանց նրա անունը տալու և նրա Տիգրան անունով որդուն:
 Եւ ահա, Քսենոփոնի թողած բացը հայագետները լրացնում են
 խորենացու վկայություն հիման վրա, որից էլ ելնելով, Քսենո-
 փոնի տվյալների մեջ փոխադարձաբար տեսնում են խորենացու
 վկայություն հաստատումը և ենթադրում, որ այդ ժամանակից է
 Հայաստանում հաստատվում Երվանդունիների հարստությունը,
 որի ներկայացուցիչները հետագայում ևս, Աքեմենյանների տի-
 րապետություն շրջանում, շարունակում են իշխել Հայաստանում
 իբրև արքայից արքայի սատրապներ: Եթե այս տեսակետին են
 Ս. Երեմյանը, Հ. Ժամկոչյանը և, նրանց հետևելով, Ժ. Էլշիբեկ-

(26) Ս.Մ. Կրկյաշարյան, Հին Հայաստանի և Փոքր Ասիայի քաղաքների պատ-
 մությունը գրվագներ, էջ 88:

(27) Մովսես խորենացի, Ա, իր:

(28) Նույն տեղում, Բ, կե:

յանը²⁹, ապա Գ. Տիրացյանը Երվանդունիներ համարելով VI դարի Հայաստանի տիրակալներին և թե՛ Աքեմենյան տիրապետության ժամանակ Հայաստանում իշխած սատրապներին, այնուամենայնիվ, առկա փաստերի մեջ իրավացիորեն հակասություններ տեսնելով, չի պնդում այդ երկու Երվանդյանների միևնույն հարստության պատկանելու տեսակետի վրա³⁰:

VI դարի սկզբին Հայաստանում Երվանդունիների հարստության գոյությունը մասին ենթադրություններ, մեր կարծիքով, լուրջ հարցականի տակ դնող փաստարկներն ավելի շատ են, քան դրա օգտին խոսողները:

1. Խորենացու մոտ Երվանդի «Սակավակյաց» մականունը, ինքնին վկայում է այն մասին, թե նրա գահակալությունը կարճատև է եղել և կամ, ավելի ճիշտ, նա կարճ կյանք է ունեցել³¹: Մինչդեռ «Կյուրոպեդիա»յում բազմիցս հիշատակված հայոց թագավորը բոլորովին էլ երիտասարդ չէ և արդեն ունի ամուսնացած որդի: Ուստի դժվար է «Սակավակյաց» Երվանդին նույնացնել ամուսնացած Տիգրանի տարեց հոր հետ:

2. Երվանդ-Օրոնտաս անունը քաջ հայտնի է Քսենոփոնին³² և նա «Կյուրոպեդիա»յում բազում անգամ խոսելով հայոց թագավորի մասին, գեթ մեկ անգամ կտար այդ անունը, եթե իրոք սա կրած լիներ Երվանդ անունը:

3. Խորենացու մոտ Երվանդ Սակավակյացը հիշատակվում է միայն արքայացանկում և թագավորական նոր, այն էլ երկրում առաջին, հարստության հիմնադրին արժանի ոչ մի գործ չի

(29) Հ. Ժամկոչյան, Հայաստանը նախնադարյան-համայնական հասարակության շրջանում, Երևան, 1951 էջ 174 և հաջ.: Հայ ժողովրդի պատմություն, հ. 1, Երևան, էջ 435-441: Ժ. Էլչիրեկյան, Երվանդունիների ծագման հարցի շուրջը, էջ 107-115:

(30) Գ.Ա. Տիրացյան, Երվանդունիները Հայաստանում, էջ 69: Նույնի՝ «Անարատիսը» և Հայաստանը (Անարատիս գրքում), էջ 228-230:

(31) «Սակավակյաց» բառին մեր տված այս մեկնությունը փորձում է ժխտել է. Դանիէլյանը իր հրատարակած հոդվածում (Հայաստանի մ.թ.ա. VII-VI դդ. պատմությունից. «Լրաբեր հաս. գիտ.» 1974, Նո 11, էջ 89 ծանոթ. 74), պնդելով, որ «սակավակյաց» Խորենացու մոտ այս դեպքում նշանակում է կյանքում քչով բավարարվող, սակավապետ: Այս բռնագրությունը բացատրության նպատակն է կասկածի տակ դնել մեր տեսակետը Երվանդյանների մասին:

(32) Անարատիս, էջ 23, 24, 34, 47, 54, 75, 81 և այլն:

կատարում: Խորենացին իր շարադրանքի ընթացքում մոռանում է նրան, բացի Վարդգեսավանի առնչությամբ նկատված հիշատակումից: Դեռ ավելին, պատմահայրը իր մատյանի երկրորդ գրքում ամբողջ երեք գլուխ հատկացրել է Հայոց թագավորներից Արտաշես Տիեզերակալի գործերը նկարագրելուն³³: Ճիշտ է, Արտաշեսին վերագրված գործերի մի զգալի մասը իրականում կատարված են Կյուրոս Մեծի, Դարեհի և Քսերքսեսի կողմից. բայց մեզ համար այս դեպքում կարևորն այն է, որ Խորենացու Արտաշեսի գործունեությունը ծավալվում է Կյուրոս Մեծի (559-529 թթ.), Լյուդգիայի թագավոր Կրեսոսի (560-546 թթ.) և աթենացի օրենսդիր Սոլոնի (638-559 թթ.) միջավայրում, Վլ դարի կեսերին, այն է՝ նույն այդ ժամանակ, երբ Հայաստանում, ըստ Խորենացու արքայացանկի, պետք է թագավորեր Երվանդ Սակավակյացը: Կյուրոսը, Սոլոնը և Կրեսոսը շատ հաստատուն նստած են Վլ դ. կեսերին, ուստի և նրանց ոչ մի կերպ հնարավոր չէ տեղաշարժել և մոտեցնել Խորենացու Արտաշես Տիեզերակալին. մնում է միակ տրամաբանական ելքը՝ Արտաշես Տիեզերակալին տանել Վլ դար և ենթադրել, որ այդ ժամանակ Հայոց թագավորի և Տիգրանի հոր անունը եղել է ոչ թե Երվանդ, այլ Արտաշես. հիշեցնենք, որ Խորենացու մոտ այս Արտաշեսի որդին նույնպես կրում է Տիգրան անունը³⁴: Այս դեպքում մնում է բացատրել Խորենացու մոտ Տիգրանի «Երվանդյան» մականունը, որն անպայման գալիս է Հայոց վիպասանքից: Բացատրություն բանալին մենք տեսնում ենք Արտաշես Ա-ի վերջերս հայտնաբերված արամեաստառ արձանագրություններում, որոնցում Արտաշեսն իրեն անվանում է «Երվանդական» (իմա Երվանդունի): Այս երևույթին հայագետների տված մեկնաբանությունը մեզ թվում է միանգամայն համոզիչ³⁵: Հելլենիստական մի շարք երկրների (Պոնտոս, Կապադովկիա, Կոմմագենե), միապետներ, իրենց թագավորական իշխանությունը առավել շուք և հեղինակություն հաղորդելու նպատակով, իրենց հայտարարում էին Աքեմենյաններ-

(33) Մովսես Խորենացի, Բ, Ժա-Ժգ:

(34) Նույն տեղում, Ժա և Ժդ:

(35) Գ.Ա. Տիրացյան, Մովսես Խորենացու «Հայոց Պատմություն» և Ստրաբոնի «Աշխարհագրություն» մի քանի տվյալներ Հայաստանի ն.մ.թ. 3-2րդ դդ. պատմության մասին, ԲՄ, 1962, նո 6: Հայ ժողովրդի պատմություն, Կ. 1, Երևան, 1971, էջ 528-530:

րից սերած: Այդ քայլին դիմել է նաև Արտաշեսը, որը իրեն անվանելով Երվանդական, դրանով իսկ ցանկացել է իր ծագումը բխեցնել Աքեմենյաններից, քանի որ, աղբյուրների վկայությամբ³⁶, Օրոնտեսը հետնորդն էր Հյուդաունեսի, որը Դարեհի զինակից վեց մեծատոհմիկ պարսիկներից մեկն էր:

Մեր կարծիքով, հիմնավորված չէ նաև այն տեսակետը, թե Արմենիան Աքեմենյանների տերության սատրապություններից մեկը դառնալուց հետո, այնտեղ իբրև սատրապ մնաց հայոց թագավոր Երվանդը: Հավանական է, որ Արմենիայի սատրապ նշանակված լիներ պարսիկ Օրոնտեսների (Երվանդների) տոհմից: Նույնքան հավանական է, որ նրա կողքին երկրում շարունակում էր բարձր իշխանություն ունենալ նախկին թագավորը, իսկ հետագայում, նրա հետնորդը: Թվում է, թե հնարավոր է հունական աղբյուրներում տեսնել այս վերջիններիս «Արտաշես» անունը:

Այսպես, Քսենոփոսի «Անաբասիս»ում Հայաստանի սատրապ Օրոնտասի կողքին հիշատակվում է նաև Արտուխասը (ΑΡΤΟΥΧΑΣ), որը, հավանաբար, զորավար էր³⁷: Մեր կարծիքով, Արտուխաս անունը նույնն է՝ ինչ Արտաշեսը: Տվյալ փամանակի հատուկ անունների մեջ սովորական է ու - ա հնչյունափոխությունը (Ուրմե-Արմե, Ուրարտու-Արարատ, Երեբունի-Երևան): Հույները X (խ) տառը արտասանում են հայերեն շ-ի մոտ և պատահական չէ, որ եվրոպական լեզուներում այդ տառը տառադարձվել է ch-ով: Ինչ վերաբերում է Արտուխաս անվան -աս (ΑΣ) վերջավորության, ապա այն հունարենում բացարձակապես նույնական է -ես (-ης) վերջավորության հետ: Այսպիսով, Արտուխաս անունը լրիվ նույնանում է Արտաշես անվան հետ:

Եվս մի փաստարկ: Հերոդոտոսի վկայությամբ, Քսերքսեսի պարսկական բանակում գտնվող «արմենները զինված էին փոյուզացիների նման: ... Սրանց երկուսի առաջնորդն էր Արտոքմեսը (ΑΡΤΟΧΜΗΣ), որն ամուսնացած էր Դարեհի դստեր հետ»³⁸: Մեզ հավանական է թվում, թե ΑΡΤΟΧΜΗΣ անվան Μ (Մ) տառը պետք է լինի Σ (Ս): Այս երկու տառերի տարբերությունը, ինչպես հեշտ է նկատել, հորիզոնական կամ ուղղահայաց յինելու մեջ է, ուստի և ձեռագրերում դրանք կարող էին

(36) Strabo, XI, 14, 15:

(37) Xenoph., Anabasis, IV, 3,4.

(38) Herodot., VII, 73.

հեշտությամբ շփոթվել արտագրողների կողմից, մանավանդ, որ Տ տառը շատ հնում գրվել է նաև M ձեվով³⁹: Եթե այդպես է, ապա կարելի է կարդալ ΑΡΤΟΧΣΗΣ – Արտոքսես–Արտաշես:

Այս ամենը նշելուց հետո, մեզ թվում է, թե V-IV դ.դ. Արմենիայի սասորապ Օրոնտեսները տոհմակցական ոչ մի կապ չունեն նախապես Հայաստանում տիրած հարստության հետ: Հետևաբար, Երվանդունիների թագավորական հարստությունը առաջացել է ոչ թե մ.թ.ա. V դարում, այլ Աքեմենյանների լուծը թոթափելուց հետո IV դարի վերջին քառորդում, իսկ մ.թ.ա. VI դ. Հայաստանում եղել է մեկ այլ հարստություն, որը կարելի է անվանել Արտաշեսյան (կամ Տիգրանյան՝ ըստ Ն. Ադոնյի): Այս հարստությունն ընդհատվում է Աքեմենյանների տիրապետության ու Երվանդունիների թագավորության (չուրջ 320-190 թթ.) ժամանակ: Արտաշես Ա-ը, մեր կարծիքով, տապալելով Երվանդ վերջինին, վերականգնում է VI դարի հայկական հարստությունը:

(39) Տես Μεγάλη Ἑλληνική ἐγκυκλοπαιδεία Παύλου Δρανδάκη, τόμος IV, Ἀθήναι, «Ἀλφάβητος» μωλι տակ, էջ 108-111, աղյուսակ 1 և 4:

ԳԼՈՒԽ ԵՐՐՈՐԴ

ՀԱՅԱՍՏԱՆԸ ՀՈՒՆԱ-ՄԱԿԵԴՈՆԱԿԱՆ ԷՔՍՊԱՆՍԻԱՅԻ ՏԱՐԻՆԵՐԻՆ

Արևելյան Միջերկրականում և Փոքր Ասիայում գերիշխանություն հաստատելու ուղղությունը հելլենական աշխարհի և Աքեմենյան Պարսկաստանի միջև փոփոխական հաջողություններով շուրջ 170 տարի մղված պայքարն իվերջո ավարտվեց հելլենական աշխարհի հաղթանակով:

Հունական մայր ցամաքի քաղաք-պետությունները, պոլիսները, իր իշխանություն տակ միավորելուց հետո, մ.թ.ա. 334 թվականին իր ոչ մեծաթիվ, բայց լավ կազմակերպված բանակով Փոքր Ասիայի հյուսիս-արևմտյան ափը դուրս գալով, երիտասարդ Ալեքսանդր Մակեդոնացին դեռևս չէր նպատակադրվել մինչև հեռավոր Հնդկաստան արշավելու: Նրա սկզբնական նպատակը, անկասկած, շատ ավելի համեստ էր: Նա ծրագրել էր պարսկական տիրապետությունից սպառազրել Փոքր Ասիայի հունական գաղութ-քաղաքները և դրանք մայր Հունաստանի հետ միավորել մեկ միասնական ֆեդերացիայի մեջ՝ իր գլխավորությամբ: Սակայն, դեպքերը բոլորովին չնախատեսված ընթացք ստացան: Աքեմենյանների ավելի քան երկուհարյուրամյա հսկայածավալ տերության անսպասելի արագ փլուզումը գլխապտուշյա հաջողություններից ոգևորված Ալեքսանդրի մտքում ծնեց ամբողջ Արևելքը նվաճելու գաղափարը: Եվ նախանձելի ինքնավստահությամբ նա ձեռնամուխ եղավ այդ գաղափարի կենսագործմանը: Կարճ ժամանակում Աքեմենյանների տերության նախկին սատրապությունները, մեկը մյուսի ետևից, նվաճվեցին Մակեդոնացու կողմից և 331 թվականին արդեն պարսկական տիրապետությունը Առաջավոր Ասիայում փոխարինվել էր հունա-մակեդոնական տիրապետությամբ:

Ստեղծվեց Ալեքսանդր Մակեդոնացու նույնքան լայնածա-

վալ կայսրությունը, որը տարածվում էր Հոնիական ծովի ափերից մինչև Փենջաբ և Բալկաններից ու Սև Մովի հարավային ափերից մինչև Եգիպտոս ու կարմիր ծով: Այս կայսրությունը, սակայն, գոյություն ունեցավ շատ կարճ ժամանակ և այն սկսեց քայքայվել ու մասնատվել իր հիմնադրի մեռնելու առաջին իսկ օրից, նույն արագությամբ, ինչ ստեղծվել էր: Մակեդոնացի երիտասարդ աշխարհակալը ժամանակ չէր ունեցել իր հաջորդների մասին մտածելու, երբ վրա հասավ նրա հանկարծակի մահը Բաբելոնում (323 թ.), որից հետո, մինչև 301 թ., նրա զորապետների, այսպես կոչված դիադոնների, այսինքն՝ ժառանգորդների միջև սկսվեց երկարատև պատերազմների շարանը կայսրության ժառանգության շուրջ, որն ավարտվեց Իպսոսի ճակատամարտով ու նորաստեղծ տերության մասնատումով:

Ավելի քան երկու տասնամյակի այս ժամանակահատվածում մղված մի շարք պատերազմների հետևանքով Մակեդոնացու կայսրության սատրապությունները մի քանի անգամ բաժանվեցին ու վերաբաժանվեցին նրա զորահրամանատարների միջև ու ձեռքից ձեռք անցան: Առավել հայտնի են Բաբելոնում (323 թ.), Տրիպարադիստում (321 թ.) և Իպսոսի ճակատամարտից հետո (301 թ.) սատրապությունների տեղի ունեցած բաժանումները, որոնց մասին կան արժանահավատ տեղեկություններ մեզ հասած սկզբնաղբյուրներում: Տրիպարադիստում զորահրամանատարների միջև գոյացած համաձայնությունը, կայսրության արևելյան սատրապությունները բաժին էին ընկնում Սելևկոս Նիկատորին: Բայց Սելևկոսի տերության ապագա հիմնադիրը միայն քսան տարի անց, Իպսոսի վճռական ճակատամարտից հետո, որի ժամանակ սպանվեց Արևելքում միահեծան իշխանության ձգտող Անտիգոնոս Միակնին, կարողացավ վերջնականապես հաստատվել իրեն բաժին ընկած երկրամասերում:

Քաղաքական ու սոցիալ-տնտեսական ցնցումներով հարուստ Ալեքսանդր Մակեդոնացու և նրա հետնորդների ժամանակաշրջանի պատմությունը լայնորեն արտացոլվել է ինչպես ժամանակակից, այնպես էլ հետագա պատմիչների երկերում: Դրանցում տրված է ոչ միայն հունամակեդոնական էքսպանսիայի, այլև այդ ընթացքում նվաճման առարկա դարձած երկրների պատմությունը: Այդ պատմիչների երկերում պահպանված տվյալները հնարավորություն են տալիս ընդհանուր պատկերացում կազմելու նաև այդ ժամանակաշրջանի Հայաստանի պատմու-

Թյան մասին:

Արդ, ինչպիսի՞ն էր Հայաստանի քաղաքական դրուժյունը այս փոթորկալից տանամյակների ընթացքում:

Ակադ. Հ.Հ. Մանանդյանը միանգամայն իրավացի կերպով նշում է, որ Մակեդոնացու մահից հետո, նրա զորահրամանատարների միջև բաժանված սատրապուլթյունների մեզ հասած ցուցակներից «և ոչ մեկում չի հիշատակված Արմենիան՝ ոչ Մեծ Հայքը, ոչ էլ Փոքր Հայքը»¹

Այս առթիվ անհրաժեշտ ենք համարում մեջ բերել Դիոդորոսի համապատասխան վկայությունները. «Պերդիկասը վերցընելով գերագույն հրամանատարությունը և խորհրդի նստելով մյուս հրամանատարների հետ, Լագոսի որդի Պողոմեոսին ավեց եգիպտոսը, Լաոմեդոն Միտիլենացուն՝ Սիրիան, Փիլոտասին՝ Կիլիկիան և Պիթոնին՝ Մեդիան, իսկ Եվմենեսին՝ Պափագոնիան և Կապադովկիան և սրանց սահմանակից բոլոր երկրները, որոնցով Ալեքսանդրը, ժամանակի բացառման պատճառով, չկարողացավ անցնել Դարեհի դեմ պատերազմելիս. Անդրգոնոսին ավեց Պամփյուլիան և Լյուկիան և մեծ կոչված Փուլոգիան. այնուհետև, Ասանդրոսին ավեց Կարիան, Մենանդրոսին՝ Լյուդիան, Լեոննատոսին՝ Հելլեսպոնտոսյան Փուլոգիան: ... Նույնպես որոշվեց Ասիայի մյուս սատրապուլթյուններին ձեռք չտալ, այլ զրանք թողնել նախկին կառավարիչների իշխանության տակ. նույնպես թույլ ավեց, որ Տաքսիլեսը և Պորոսը տեր մնան իրենց թագավորություններում, ինչպես կարգադրել էր դեռևս Ալեքսանդրը: Պիթոնին նա ավեց Տաքսիլեսի և մյուս թագավորների (տիրուլթյուններին) սահմանակից սատրապուլթյունը. իսկ ... Պարոպանիսադե երկիրը հանձնեց Օքսյուարտես Բակարիացուն, որի դստեր՝ Հուքսանեին ամուսնացել էր Ալեքսանդրը: Սիբյուրափոսին ավեց Արաքոսիան և Կեդրոսիան, Ստասանոր Սոլիացուն՝ Արիան և Դրանգինեն, Փրատափեոնեսին՝ Պարթյունեան և Հյուբկանիան, Պակեստեսին՝ Պերսիսը, Տլեպոլեմոսին՝ Կարմանիան, Ատրուպատեսին՝ Մեդիան, Արքոնին՝ Բարելոնիան, Արկեսիլատոսին՝ Միջագետքը»²:

Այս ցուցակից հետևում է, որ Հայաստանը նվաճված չի եղել մակեդոնացիների կողմից: Այս տեսակետը ավելի հիմնավոր-

(1) Հ.Հ. Մանանդյան, Քննական տեսություն ..., Կ. Ա, էջ 93:

(2) Diodor., XVIII, 3, 1-3: Հմմտ. Diodor., XVIII, 39, 5-7:

րելու համար, Հ.Հ. Մանանդյանը վկայակոչում է Միհրդատ VI Պոնտացուն վերագրված հետևյալ ճառը, որը պահպանված է Հուստինոսի մոտ:

«Ինքը, – ասում է իր ճառում Միհրդատը, – թագավոր է այնպիսի երկրների, որոնք ոչ միայն հավասար են Հռոմեական պետությանը, այլև կարող են դեմ հանդիման կանգնել նույնիսկ Մակեդոնական պետությանը: Իր հպատակ ժողովուրդներից և ոչ մեկը չի կրել օտար իշխանություն. նրանք միշտ հնազանդվել են միայն իրենց տեղական թագավորներին: Եթե ցանկանում են, թող քննության առնեն Կապպադովկիան կամ Պափլագոնիան, Պոնտոսը կամ Բյուլթանիան, նմանապես և Մեծ Հայքը կամ Փոքր Հայքը: Այդ ժողովուրդներից և ոչ մեկին ձեռք չէին տվել ոչ ինքը Ալեքսանդրը, որ նվաճել էր ամբողջ Ասիան, ոչ էլ որևէ մեկը նրա հաջորդներից կամ հետնորդներից»³:

Որ Միհրդատ Պոնտացու այս խօսքերը համապատասխանում էին պատմական իրականությանը, հետևում է նաև Ստրաբոնի մի հետաքրքիր վկայությունից այն մասին, թե Փոքր Հայքը, Ծոփքի նման, «միշտ ունեցել է իր բնիկ իշխաններին, որոնք մերթ Մեծ Հայքին են բարեկամ եղել, մերթ ինքնուրույն ...»⁴:

Աղբյուրներում կան նաև այնպիսի վկայություններ, որոնց հիման վրա կարելի էր, ընհակառակը, կարծել, որ Հայաստանը նվաճված եղել է Ալեքսանդրի կողմից: Այսպես, վկայություն է պահպանվել, թե Մակեդոնացին Միթրինեսին նշանակել է Արմենիայի սատրապ: Պլինիոս Ավագն, իր հերթին, հաղորդում է, թե մակեդոնացիները իրենց արշավանքի ժամանակ անցել են «նաև Արմենիայի, Իբերիայի, Ալբանիայի վրայով, հաղթահարելով Տավրոսից բացի, նաև Կովկասի լեռնաշղթան»⁵: Միթրինեսի մասին եղած վկայության մենք կանդորդառնանք քիչ հետո. ինչ վերաբերում է Պլինիոս Ավագի հաղորդման, ապա գիտություն մեջ իրավացիորեն նշված է, որ հռոմայեցի մատենագիրը «Կովկասը պարզապես շփոթում է Պամիրի (Պարոպամիս-Կովկասի) հետ»⁶:

(3) Justini Epitoma Historiarum Philippicarum Pompeii Trogi, XXXVIII, 7.

(4) Strabo, XII 3, 28: Հմմտ նաև՝ Strabo, XI, 14, 15:

(5) C. Plinii Naturalis Historiae, IV, 10.

(6) Հայ ժողովրդի պատմություն, հ. 1, Երևան, 1971, էջ 502:

Գավգամելայի ճակատամարտում (331 թ.) հունա-մակեդոնական զորքերի տարած հաղթանակով վերջնականապես վճռվեց Աքեմենյանների երկուհարյուրամյա տերության բախտը: Այդ ճակատամարտը նոր էր ավարտվել, երբ պարսիկ Միթրինեսը, Փոքր Ասիայի պարսկական սատրապության կենտրոն Սարդես բերդաքաղաքի կայսրի նախկին պետը, Ալեքսանդր Մակեդոնացուց ստացավ Հայաստանի սատրապությունը որպես հատուցում այն բանի համար, որ նա, առանց մարտի, վերջինիս հանձնել էր Սարդես բերդաքաղաքը⁷: Բայց, քանի որ սկզբնաղբյուրները ոչինչ չեն հիշատակում Ալեքսանդրի կողմից Հայաստանի նվաճման մասին, ապա հիրավի պիտի ենթադրել, որ հիշյալ Միթրինեսի նշանակումը որպես Հայաստանի սատրապ, կրում էր գուտ ձևական բնույթ:

Մակեդոնացու այս ակտն, անկասկած, հետապնդում էր սուավելապես պրոպագանդիստական-քաղաքական նպատակ, պարսկական սատրապներին և տեղական իշխաններին իր կողմը դրավելու համար: Այս առնչությամբ Ի. Դրոյզենը նկատել է տայիս, որ «Ալեքսանդրի կողմն անցնողների թիվն աճում է հատկապես այն ժամանակից, երբ Միթրինեսն ստացավ միշտ կարևոր համարվող Արմենիայի սատրապությունը»⁸:

Հ. Մանանդյանը նշելով, որ Միթրինեսի մասին անտիկ պատմագիրների երկերում պահպանված «այս անորոշ վկայությունը հիմք է ծառայել բանասերներին ու պատմագիրներին ենթադրելու, որ արդեն Ալեքսանդր Մակեդոնացու ժամանակ արմենական երկրները ենթարկվել են մակեդոնական իշխանության և կառավարվում էին նրա կուսակալների ձեռքով: Գիտնականներից ոմանք էլ... ենթադրում են, որ Միթրինեսը կուսակալ էր նշանակվել միայն Փոքր Հայքի», նկատում է, որ «այս ենթադրությունները պարզապես չհիմնավորված կռահումներ են, որ չեն կարող հաստատուն համարվել: Ավելի հավանական է գերմանական գիտնական Բեյտխի կարծիքը, ... որ Միթրինեսին չէր հաջողվել, ըստ երևույթին, տիրել Հայաստանին, որովհետև 317 թվին, իբրև բուն Հայաստանի կառավարիչ, հիշատակվում է աղբյուրների մեջ Օրոնտաս Երվանդը»⁹:

(7) Տես Arrian., III, 16,5; Curtius Rufus, V, 1, 44; Diodor., XVII, 64,6.

(8) И.Г. Дройзен, История эллинизма, т. I, М., 1890, էջ 191.

(9) Հ. Մանանդյան, Քննական տեսություն ..., հ. Ա, էջ 92-93:

Հ. Մանանդյանը անհավաստի է համարում նաև Կուրտիոս Ռուֆոսի (VI, 3, 3) մեջ բերած Ալեքսանդր Մակեդոնացուն վերագրված ճառը, որ իբր նա արտասանել է Պարթևաստանում և «որի մեջ Մերձավոր Արևելքի հյուսիսային շրջանները՝ Կապպադովկիան, Պափլաղոնիան և Արմենիան՝ մատնացույց են արված որպես նվաճված երկրներ»¹⁰:

323 թ. Ալեքսանդրի մահից անմիջապես հետո, Բարելոնում տեղի ունեցած նրա տերութային առաջին բաժանման ժամանակ ոչինչ էլ չէր հասել Մակեդոնացու հավատարիմ քարտուղար Եվմենես Կարդիացուն: Այդ իսկ պատճառով, զորահրամանատարների ժողովում որոշվեց նվաճել Կապպադովկիան, Պափլաղոնիան և Սև Ծովի հարավ-արևմտյան ափերը և դրանք, որպես առանձին սատրապուլթյուն, հանձնել Եվմենեսին¹¹:

Այս որոշումը իրագործելու նպատակով, 322 թ. մակեդոնացիները, արշավելով Կապպադովկիա, նվաճեցին այն և, գերի վերցնելով, մահապատժի ենթարկեցին երկրի տիրակալ, արդէն ծերունի Արիարաթեսին, որը նախկինում Աքեմենյանների սատրապն էր այնտեղ: Այժմ Կապպադովկիայում սատրապ հաստատվեց Եվմենեսը:

Այս իրադարձությունների ժամանակ էլ, որպես սատրապ, Արմենիա ուղարկվում է իրեն Աքիլլեսի տոհմից սերած համարող Նեոպտոլեմոսը¹²: Ի. Դրոյզենը ենթադրում է, որ Նեոպտոլեմոսը հաջորդել է Միթրինեսին, բայց ըստ երևույթի, նա իշխել է Հայաստանի միայն մի մասի վրա¹³: Մեր կարծիքով, սակայն, ավելի հիմնավոր է Հ.Հ. Մանանդյանի տեսակետը, թե Նեոպտոլեմոսը ուղարկված է եղել տիրելու Փոքր Հայքին, որը «ոչ թե առանձին սատրապուլթյուն էր, ... այլ արևելյան մասն էր Եվմենեսին տրված Կապպադովկյան սատրապուլթյան, և Նեոպտոլեմոսին էին հանձնարարել գրավել այդ շրջանը»¹⁴:

Մեկ այլ առիթով Ի. Դրոյզենը այս Նեոպտոլեմոսին համարում է «Կապպադովկիայի սահմանակից Հայաստանի սատրապ»:

(10) Նույն տեղում:

(11) Plutarchi Eumenes, III, 3.

(12) Plut., Eumenes, IV.

(13) И.Г. Дройзен, История эллинизма, т. II, М., 1893, стр. 11/ примеч. 64:

(14) Հ.Հ. Մանանդյան, նշվ. աշխ., էջ 94:

րապ¹⁵»։ Այս դեպքում եթե Կապպադոկիային սահմանակից Հայաստան ասելով հասկանանք Փոքր Հայքը, ապա միանգամայն պարզ է, որ երկու գիտնականների տեսակետները համընկնում են։ Սկզբնաղբյուրների մանրակրկիտ ուսումնասիրությունից դժվար չէ եզրակացնել, որ Նեոպտոլեմոսը չէր կարող բուն Հայաստանի սատրապը եղած լինել։

Այսպես, Դիոդորոս Սիկիլիացին վկայում է, որ երբ մ.թ.ա. 322 թ. սկզբին մակեդոնական զորքերը արշավեցին Կապպադոկիա, երկրի ծերունագարդ թագավոր Արիարաթեսը նրանց դեմ դուրս եկավ 30 հազար հեռևակով և 15 հազար հեծյալներով, սակայն պարտվելով, գերի ընկավ և մահապատիժի ենթարկվեց¹⁶։ Նրա որդին, որը նույնպես կոչվում էր Արիարաթես, փախաւ Հայաստան և որոշ ժամանակ հետո «վերցնելով արմենների Արդոատես թագավորից զորք, սպանեց մակեդոնացիների զորապետ Ամյունտասին, մակեդոնացիներին անհապաղ դուրս վտարեց երկրից և վերագրավեց իր հայրենի իշխանությունը»¹⁷։

Հ.Հ. Մանանդյանը միանգամայն իրավացի կերպով նկատում է, որ «Դիոդորոսի այս վկայության մեջ հիշատակված «արմենների թագավոր Արդոատեսը» համարվելու է, ամենայն հավանականութամբ, ոչ թե Փոքր Հայքի թագավոր, ինչպես ենթադրում են Ռեյնաքը և ուրիշները, այլ Մեծ Հայքի»¹⁸։ Հիշյալ Արդոատեսը (Ἀρδοάτης)¹⁹, որը առանց վախենալու հունա-

(15) И.Г. Дройзен, *нзվ. աշխ.*, էջ 49:

(16) Diodor., XVIII, 10, 1-5:

(17) Նույն տեղում, 19, 4-5:

(18) Հ.Հ. Մանանդյան, *նзվ. աշխ.*, էջ 97-98:

(19) Ձեռագրերի Ἀρδοάτης անունը բանասերները համարում են աղճատված։ Թ. Ռեյնաքը (T. Reinach, *Mitridate Eupator*, Paris, 1890, էջ 31, ծան. 8) այն ուղղելով կարդում է Ἀρταουάσδης (Արտավազդ), իսկ Թ. Մարկվարտը (J. Markwart, *Untersuchungen zur Geschichte von Eran*, Heft I, Göttingen, 1896, էջ 27, ծան. 123) և Հ. Մանանդյանը (*նзվ. աշխ.*, էջ 98) առաջարկում են այն կարդալ Ἀρτοάσδης (Օթոնտիս - Երուսնգ), նրան իրավացիորեն համարելով Մեծ Հայքի թագավոր։ Ի. Դրոյզենը ևս Գավգամելայում արմենական զորքերի հրամանատար՝ սատրապ Օրոնտեսին նույնացնում է Դիոդորոսի հիշատակած արմենների թագավոր Արդոատեսի հետ (И.Г. Дройзен, *История эллинизма*, т. II, М., 1893, стр. 11/ примеч. 64: 1893, էջ 311): Մեր կարծիքով, բացառված չէ, որ Ἀδοάτης գրությունը Օթոնտիս-ի աղավաղված ձևն է, եթե

մակեդոնացիների թշնամությունից, ապաստան էլ շնորհել Արիարաթեսին, չէր կարող Կապպադոկիայի անմիջական հարևան Փոքր Հայքի թագավոր եղած լինել: Պարզ է, որ նա պիտի եղած լինել ավելի հեռավոր և հզոր երկրի թագավոր և պետք է ունենար բավական պատկառելի զորք²⁰, որով կարող լինել ապահովել իր մոտ ապաստանած Արիարաթեսի անվտանգությունը և հետագայում օգնել նրան վերանվաճելու իր հայրենի թագավորությունը:

Եվս մի փաստարկ հոգուտ այն բանի, որ Նեոպտոլեմոսը ուղարկվել էր որպես սատրապ միայն Փոքր Հայքի, պիտի համարել այն, որ Դիոդորոսը և Պոլիենոսը, նկարագրելով մի քանի տարի անց (317 թ.) տեղի ունեցած քաղաքական իրադարձությունները, որպես բուն Հայաստանի սատրապ հիշատակում են Օրոնտեսին, որը հանդիսանում էր Պարսկաստանի Պերսիս նահանգի մակեդոնացի սատրապ Պեկեստոսի բարեկամը²¹:

Այս Օրոնտեսը, ամենայն հավանականությամբ, մեծ հեղինակություն էր վայելում մակեդոնացի զորապետների շրջանում, քանի որ Կապպադոկիայի սատրապ Եվմենեսը զորապետների ժողովի ժամանակ, վերջիններիս համոզելու նպատակով, նրանց ցույց է տալիս ստորական գրերով (ΣΥΓΓΡΑΜΜΑΤΩΝ) գրված մի նամակ, որն ինքն իբր ստացել էր Արմենիայի սատրապ

նկատի առնենք մանավանդ, որ Դիոդորոսի այս հասկածը մեզ հասել է ոչ թե ուղղակի, այլ միջնորդաբար, բյուզանդական Փոտիոս պատրիարքի «Գրադարան»ում: Միաժամանակ, սակայն, դժվար կլինել Գալգամելայում արմենական զորքերի հրամանատար սատրապ Օրոնտեսին նույնացնել այս Արդոտոսի հետ, քանի որ առաջինը հիշատակվում է 331 թ., իսկ երկրորդը՝ 250-ական թթ. դեպքերի առնչությամբ (տես Beloch, Griechische Geschichte. Dritte Band, erste Abteilung, Strassburg, 1904, էջ 166-168; H. Bengston, Die Strategie der hellenistischen Zeit, II, München, 1944, էջ 77-78: Հ.Հ. Մանանդյան, Քննական աեսություն ..., Կ. Ա., էջ 98-99), դեպքեր, որոնք իրարից անջատված են ավելի քան 70 տարով:

(20) J. Sandalagian, Histoire documentaire de l'Arménie, II, Rome, 1907, էջ 409:

(21) Diodor., XIX, 23: Polyaei Strategematicon, IV, 8, 3.

Օրոնտեսից²²:

Հունա-մակեդոնական էքսպանսիայի տարիների Հայաստանին վերաբերող սկզբնաղբյուրների տարաբնույթ վկայություններին ծանոթանալիս, աչքի է զարկում այն, որ անսիկ պատմագիրները հաճախ շփոթել են Փոքր Հայքը, Մոսիքը և Մեծ Հայքը, դրանք բոլոր դեպքերում անվանելով «Արմենիա» ընդհանուր անունով: Դա, մեր կարծիքով, պիտի դիտել իբրև հետևանք այն բանի, որ հելլեններին հայանի «Արմենիա» սատրապությունը, որն ընդգրկում էր ամբողջ Հայկական լեռնաշխարհը, Աքեմենյան տերության կործանումից հետո վերածվեց հայկական անկախ թագավորության, որտեղ գահակալեց Օրոնտես-Երվանդը իբրև թագավոր: Հայկական անկախ պետության կազմավորումը կարևորագույն երևույթ էր հայ ժողովրդի պատմական զարգացման դարավոր ճանապարհին: Այն արդյունք էր, մասամբ, երկրի բնականոն զարգացմանը խոչընդոտող Աքեմենյանների գերիշխանության տապալման, բայց առավել ևս՝ Հայաստանի հասարակության արդեն ներքին հասունացման: Երևույթ, որն օրինաչափ էր և ընդհանուր Առաջավոր Ասիայի համար, քանի որ այստեղ ևս նույն այդ ժամանաշրջանում ձևավորվում են մի շարք անկախ պետություններ²³:

Երվանդունիների հայկական թագավորության էթնիկական հիմքը հայ ժողովուրդն էր, որի կազմավորման հազարամյա պատմաշրջանն արդեն իր ավարտին էր հասել: Երվանդունիների պետության առաջացումը պատմագրության մեջ հիրավի դիտվում է որպես հայ ժողովրդի կազմավորման «ավարտված պրո-

(22) Diodor., XIX, 23. նույն Դիոդորոսը մեկ այլ առիթով խոսում է ասորերեն գրերով (συνίοις γράμμασι) կառարված մի արձանագրության մասին: Նա պատմում է, որ Բեհիստունյան ժայռի վրա (τό Βαγίστανον ὄρος) Շամիրամը պատրաստել տվեց իր քանդակը, որի տակ փորագրեց ասորերեն գրերով արված արձանագրություն (Diodor., II, 13, 102): Պարզ է, որ այստեղ խոսքը վերաբերում է Դարեհ Ա-ի Բեհիստունյան հայտնի արձանագրությանը (Հմմտ.՝ М.А. Дандомаев, Иран при первых Ахеменидах, էջ 18), և Դիոդորոսը սեպագրերը համարում է ասորերեն գրեր: Այս առիթով հետաքրքիր է նշել, որ Մովսես Խորենացին ևս (Ա, Ժգ) վանում պահպանված ուրարտական սեպագիր արձանագրությունները սխալմամբ վերագրում է Շամիրամին: Այդ նշանակում է, որ արդեն վաղուց մուռացված սեպագրերը համարվում էին ասորական գրեր:

(23) Հայ ժողովրդի պատմություն, հ. 1, Երևան, էջ 503:

ցեսի քաղաքական ձևավորման մի նոր փուլ»։ Այդ պետութւյան տնտեսական հիմքը երկրագործութւյան, անասնապահութւյան և արհեստագործութւյան զարգացման համեմատաբար բարձր այն մակարդակն էր, որին հասել էր հայկական սասորապութւյունը և որի մասին վկայում են հնագիտական նորահայտ նյութերով հաստատվող Քսենոփոնի «Անաբասիսի» տվյալները։ Ինչ վերաբերում է այդ պետութւյան տարածքային հիմքին, ապա այն, հիմնականում, դարձյալ համընկնում էր սասորապութւյան սահմաններին։ Երվանդունիների հայկական պետութւյունն իր կազմավորման սկզբնական շրջանում ընդգրկում էր Մեծ Հայքը, Աղձնիքը, Ծոփքը և Կոմմագենեն²⁴։

Սակայն շուտով, ներքին (Հայկական լեռնաշխարհի տարբեր մասերի տնտեսական անհավասարաչափ զարգացումը) և արտաքին (Սելևկյան թագավորների չղաղարող օտնձգութւյունները) անբարենպաստ հանգամանքների պատճառով, Երվանդունիների միասնական պետութւյունը տրոհվեց և III դարում առաջացան հայկական առանձին իշխանութւյուններ Մեծ Հայքում, Ծոփքում և Փոքր Հայքում, որոնց անջատ-անջատ գոյատևումը շարունակվեց մինչև մ.թ.ա. I դարի սկիզբը, մինչև հայկական միասնական թագավորութւյան առաջացումը Տիգրան Բ-ի ժամանակ։

Այս երեք իշխանութւյուններից ամենակարևորը, անշուշտ, և ամենաուժեղը պիտի որ Մեծ Հայքը լիներ, որը հետագայում դարձավ Առաջավոր Ասիայի հզորագույն պետութւյուններից մեկը և երկար ժամանակ, խուսանավելով երկու հզոր հակառակորդների՝ Հռոմի և Պարթև Արշակունիների միջև, հանդիսացավ այդ շրջանի քաղաքական կարևորագույն գործոններից մեկը։

Ալեքսանդր Մակեդոնացու նվաճումների, ինչպես նաև նրա մահից հետո նորաստեղծ կայսրութւյան ասիական մեծագույն մասը ժառանգողների՝ Սելևկյանների պատմութւյունն ուսումնասիրողները հիրավի նշում են, որ արմենական վերոհիշյալ երեք իշխանութւյունները համեմատաբար անկախ են եղել քաղաքականապես և երբեք լիովին չեն ենթարկվել հունա-մակեդոնացիներին։

Ճիշտ է, Ստրաբոնը նշում է, որ «Արմենիային տիրել էին

(24) Նույն տեղում, էջ 507-508։

պարսիկները և նրանցից հետո մակեդոնացիները»²⁵, իսկ Ապպիանոսն էլ իր հերթին հաղորդում է, որ Սելևկոսը, «սիրել էր Միջագետքին, Արմենիային, Կապպադովկիային» և այլն²⁶, բայց պիտի ենթադրել, որ արմենական երկրները միայն ձևականորեն ընդունել էին Սելևկյան թագավորների գերիշխանությունը:

Այսպիսի ենթադրությունը հիմնված է մի շարք փաստերի վրա: Բավարարվենք նշելով այդ փաստերից մի քանիսը միայն: Մենք արդեն խոսել ենք այն մասին, որ երբ հունա-մակեդոնացիները նվաճեցին Կապպադովկիան, այդ երկրի թագաժառանգ Արիարաթեսը չի վարանում Հայաստան փախչելու և ռազմական օգնություն հայցելու հայոց Արդոտատես թագավորից: Այնուհետև, Մեմնոն Հերակլեսցին ևս հաղորդում է, որ Բյուլթանիայում ծայր տուած գահակալական կռիվների պատճառով, մահացած Նիկոմեդես թագավորի որդիներից Զիաեյասը, մոտավորապես մ.թ.ա. 260 թվականին, ապստան է գտնում արմենների թագավորի մոտ, որի անունը, դժբախտաբար, չի հիշատակում պատմագիրը²⁷: Նույնպիսի մի դեպք հիշատակում է նաև Պոլիենոսը: Նա գրում է, որ Անտիոքոս Հիերաքսը, ապստամբելով իր գահ բարձրացած եղբոր՝ Սելևկոս Կալլինիկոս թագավորի դեմ (չուրջ 240 թ.), պարտվում է և Միջագետքի վրայով փախչում է Արմենիա, ապաստանելով Արտաբեսի (Ἀρταβῆς = Արշամ՝ կամ Արշակ) մոտ²⁸:

Վերջապես, ինչպես մեկ այլ աւնչունությամբ նշել ենք մեր նախորդ ուսումնասիրություններից մեկում, «Հայաստանում քաղաքների առաջացման ընդհանուր պլոցեսի ուսումնասիրությունը առավել ևս մեզ համոզում է այն բանում, որ Հայաստանը չէր նվաճվել Սելևկյանների կողմից: Հայաստանում չի հանդիպում և ոչ մի քաղաք, որը կառուցված լիներ Ալեքսանդր Մակեդոնացու կամ նրա հետնորդների կողմից, այն դեպքում, երբ նրանք ձգտում էին ծավալուն քաղաքաշինություն միջոցով

(25) Strabo, XI, 14, 15 (c.531).

(26) Appian, Syc., 55.

(27) Memnonis Historiae Heracleae Ponti, Lipsiae, 1816, XXII. Այստեղ նշենք, որ պատմագրություն մեջ փորձ չի արվել որոշելու Մեմնոնի հիշատակած արմենների թագավորի անունը: Մեր կարծիքով, նա նույն Արդոտատեսն է, որի մասին խոսք եղավ վերևում:

(28) Polyae., 17.

իրենց համար սոցիալ-տնտեսական ամուր հենարան ստեղծել նվաճված երկրներում»²⁹:

Միանգամայն իրավացի է Հ.Հ. Մանադյանը, երբ գրում է. «Պետք է ասել, որ Սելեկյանների իշխանությունը չէր կարողացել հիմնավորապես հաստատել նաև արմենական այսրեփրատյան երկրներում: Նրանց գերիշխանությունն այս լեռնային ու դժվարամատչելի երկրում, ընդհանրապես, ավելի անվանական էր, քան իրական: Ճանաչելով Սելեկյան թագավորներին իբրև գերագույն պետ՝ Մեծ Հայքը, ըստ երևույթին նաև Ծոփքը՝ պահպանել էին իրենց ներքին ինքնուրույնությունը և կառավարվում էին բնիկ իշխանների ձեռքով, որոնք սկզբնաղբյուրների մեջ անվանվում են երբեմն թագավորներ»³⁰: Այսուհանդերձ, չի կարելի ժխտել Սելեկյան պետության ուժեղ ազդեցությունը նորաստեղծ հայկական թագավորությունների պատմական գարգացման վրա, քանի որ, այնուամենայնիվ, III դ. վերջին, Անտիոքոս Գ-ի արևելյան արշավանքի հետևանքով, Հայաստանը, թեև կարճ ժամանակով, հպատակվեց Սելեկյաներին³¹:

Սկզբնաղբյուրներում պահպանված ծայր սատիճան կցկրտուր վկայությունների հիման վրա փորձենք, շատ ընդհանուր գծերով, ուրվանշել Հայկական լեռնաշխարհում առաջացած վերոհիշյալ երեք իշխանությունների քաղաքական պատմությունը մինչև այն ժամանակը, երբ Տիգրան Բ-ին հաջողվեց առավելագույն չափով միավորել հայկական էթնիկական տարրերով բնակեցված հողերը:

Մենք նկատեցինք, որ Ալեքսանդր Մակեդոնացու դեպի Արևելք կատարած հաղթական արշավանքների անմիջական, մերձավորագույն հետևանքը Հայաստանի համար եղավ օտարերկրյա՝ Աքեմենյան Պարսկաստանի երկղարյա լծի տապալումը: Մյուս կողմից, սակայն, Ալեքսանդրի հունա-մակեդոնական զորքերը չհասան Հայաստան: Ուստի և երկիրը, թողթափելով օտար տիրապետությունը, մեխանիկորեն գտնվեց քաղաքական անկախ վիճակում: Կասկածից վեր է, որ Ալեքսանդրը փորձեց նվաճել Հայկական լեռնաշխարհը ևս, բայց այդ բանը նրան չհաջողվեց,

(29) Ս.Մ. Կրկյաշարյան, Հին Հայաստանի և Փոքր Ասիայի քաղաքների պատմության դրվագներ, Երևան, 1970, էջ 106:

(30) Հ.Հ. Մանանդյան, Քննական տեսություն ..., Կ. Ա, էջ 102:

(31) Հայ ժողովրդի պատմություն, Կ. 1, Երևան, 1971, էջ 519:

քանի որ Ստրաբոնը վկայում է, թե լսելով Սպերի (Συσπυρίτις) ոսկու հանքերի մասին, «Ալեքսանդրը այնտեղ ուղարկեց Մենոնին զորքով, բայց սա խեղդամահ արվեց տեղացիների կողմից»³²:

Այս հարցի շուրջ մեր պատկերացումները չի կարող փոխել Պլինիոս Ավագի այն հաղորդումը, որ իբրև Ալեքսանդր Մակեդոնացին հաղթահարել է նաև Կովկասի լեռնաշղթան: Պարզ է, որ տվյալ դեպքում Պլինիոսը Կովկասը շփոթում է Պարոպամիս-Կովկասի (այժմ՝ Պամիր) հետ: Նույնը պիտի ասել նաև Մովսես Կաղանկատվացու «Աղվանից աշխարհի պատմության» մեջ հանդիպող այն հաղորդման մասին, թե Ալեքսանդր Մակեդոնացին մի շարք ցեղերի (գարգարներ, կամիհիքներ, հեփթաղներ) գերեվարելով, բերում և բնակեցնում է Կովկասի մեծ լեռան շուրջը³³:

Մենք դեռևս քիչ բան գիտենք մ.թ.ա. III դարի Փոքր Հայքի թեկուզ և քաղաքական պատմության մասին: Դեռևս Աքեմենյանների տիրապետության ժամանակ Փոքր Հայքը, հնագույն ժամանակներից հայկական ցեղերով բնակեցված այդ երկրամասը, որը Եփրատ գետով բաժանված էր Մեծ Հայքից, հավանաբար կազմելիս է եղել Մեծ Հայքից անջատ վարչական առանձին միավոր: եզրահանգում, որը բխում է Կուրտիոս Ռուփոսի մի վկայությունից: Գավգամելայի ճակատամարտը նկարագրելիս նա, խմբիչայլոց, խոսում է նաև հայերի մասնակցության մասին և Մեծ Հայքի կողքին հիշատակում է նաև Փոքր Հայքը³⁴: Ուսումնասիրողներն այն կարծիքին են, որ Ռուփոսի այս վկայությունն իր հաստատումը գտնում է Արրիանոսի այն հաղորդման մեջ, թե հայերի առաջնորդներն էին Օրոնտեսը և Միթրաոտեսը³⁵: այստեղից էլ ենթադրում են, թե Օրոնտեսը եղել է Մեծ Հայքի

(32) Strabo, XI, 14, 9 (C-529).

(33) C. Plinii Naturalis Historias, VI, 10: Մովսեսի Կաղանկատուացույ Պատմութիւն Աղուանից աշխարհի, Ա, իէ:

(34) Curtius Rufus, Historiae Alexandri Magni, Lipsiae, 1816, IV, 12.

(35) Arrian, III, 8,5.

կառավարիչը, իսկ Միթրաուտեսը՝ Փոքր Հայքի³⁶: Չբացառելով այսպիսի ենթադրությունների հավանականությունը, մենք ուզում ենք այն միտքը արտահայտել, որ հիշյալ գորահրամանատարներից մեկը առաջնորդում էր հայկական յոթհազարանոց հեծելազորը, իսկ մյուսը՝ հայկական 40 հազարանոց հետևակը:

Փոքր Հայքը, գտնվելով Կապպադովկիայի հետ անմիջական հարևանություն մեջ, շատ ավելի կանուխ ընդգրկվեց Ալեքսանդր Մակեդոնացու հաջորդների գիադոխների շահագրգռությունների ոլորտի մեջ: Մ.թ.ա. 322 թ., Կապպադովկիան նվաճելուց հետո, հունա-մակեդոնացիները փորձեցին սիրանալ նաև Փոքր Հայքին: Այդ նպատակով Նեոպտղեմոսը նույն թվականին մի գործառնությամբ ուղարկվում է Փոքր Հայք, բայց հաջողություն չի ունենում: Ի վերջո, Եվմենեսին հաջողվում է նվաճել այս երկրամասը: Սակայն մեզ հասած կցկտուր տեղեկություններից կարելի է հետևյալն, թե մակեդոնացիների իշխանությունն այստեղ այնքան էլ հաստատուն չի եղել: Բացառված չենք համարում, որ Աքեմենյան տերությունից փլատակների վրա, օգտվելով մակեդոնացի զորահրամանատարների միջև ծագած երկարատև երկպառակություններից, Փոքր Հայքը իր հարևանների՝ Կապպադովկիայի և Պոնտոսի նման, մ.թ.ա. III դարում ձեռք էր բերել քաղաքական անկախություն: Այդ իսկ պատճառով կարծում ենք, որ միանգամայն իրավացի է ակադ. Հ.Հ. Մանանդյանը, երբ գրում է. «Ի նկատի ունենալով, որ Փոքր Հայքը գտնվում էր Կապպադովկիայի ու Պոնտոսի միջև՝ կարելի է վստահորեն հետևյալն՝ որ տեղական թագավորությունների հաստատումից հետո այս երկրներում՝ նպատակովոր պայմաններ էին ստեղծվել ինքնաբերաբար նաև Փոքր Հայքի քաղաքական ազատագրման և հետագա ինքնուրույն պարզացման համար»³⁷:

Փոքր Հայքի քաղաքական պատմությունը վերաբերող առաջին հավաստի տեղեկություն համար մենք պարտական ենք

(36) Վերջերս իր մի հոդվածում Լ.Փ. Շահինյանը փորձում է հիմնավորել հակառակը, թե՛ Օրոնտեսը Փոքր Հայքի կառավարիչն էր եղել, իսկ Միթրաուտեսը, որին Լ. Շահինյանը նույնացնում է խորենացու մոտ հիշատակված վահեի հետ, Մեծ Հայքի (Լ.Փ. Շահինյան, Մովսես խորենացու «Պատմության» մեջ հիշատակվող վահեի մասին, ՊԲՀ, 1973, նո 4, էջ 172-178):

(37) Հ.Հ. Մանանդյան, Քննական տեսություն ..., հ. Ա, էջ 99:

մ.թ.ա. II դարի հույն խոշորագույն մատենագիր Պոլիբիոսին: Նրա հաղորդած տեղեկությունը վերաբերում է այն ժամանակահատվածին, երբ Հռոմը և նրա դաշնակից ու կամակատար Պերգամոնի թագավոր Եվմենես Բ-ը Մագնեսիայի ճակատամարտում (190 թ.) և դրան հետևած Ապամեայի հաշտության պայմանագրով (189 թ.) խորտակիչ հարված հասցրին Առաջավոր Ասիայի խոշորագույն հելլենիստական տերության, Սելևկյան թագավորության, որը մինչ այդ դարձել էր Հռոմի գլխավոր ախոյանը: Դրանից հետո Սելևկյան թագավորները դադարեցին փոքրասիական գործերում որևէ չափով կարևոր դեր խաղալուց: Մյուս կողմից, սակայն, դեռևս Արևմուտքում կարթագենի դեմ զբաղված Հռոմը չէր կարողացել հաստատուն ոտքերով կանգնել Փոքր Ասիայում և, ընդհանրապես, Արևելքում: Ստեղծված բարենպաստ իրադրությունից, բնականաբար, շտապեցին օգուտ քաղել Պերգամոնի, Բյութանիայի, Պոնտոսի, Հայաստանի և Կապպադովկիայի տիրակալները և փորձեցին ընդարձակել իրենց տերության սահմանները հարևան երկրամասերի, առաջին հերթին, Սելևկյանների տիրույթների հաշվին: Նրանց այսօրինակ ձգտումները չէին կարող փոխադարձ թշնամություն չառաջացնել փոքրասիական վերոհիշյալ պետութայունների միջև: Քաղաքական հակասությունների այս հողի վրա Փոքր Ասիայում առաջանում են երկու հակադիր կողմից, որոնց միջև ի վերջս պատերազմը դառնում է անխուսափելի: Պատերազմն սկսեց Պոնտոսի թագավոր Փառնակեսը (190-169 թթ.), դաշնակցելով Միհհրդատի հետ, որը Պոլիբիոսի մոտ անվանված է σατραπης τῆς Ἀρμενίας (Արմենիայի սատրապ): Այստեղ, անկասկած, խոսքը վերաբերում է Փոքր Հայքին, քանի որ Պոլիբիոսի հետագա շարադրանքի ընթացքում հիշատակվում է Ἀρταξίας ὁ τῆς πλείστης Ἀρμενίας ἄρχων (Արտաքսիասը՝ Արմենիայի մեծագույն մասի տիրակալը): Փառնակես Պոնտացին և Փոքր Հայքի սատրապ Միհհրդատը փորձում են գրավել իրենց հարևաններին՝ Կապպադովկիայի և Պափլագոնիայի հողերը, բայց հաջողութուն չեն ունենում: Մի կողմից միացյալ ուժերով նրանց դեմ դուրս են գալիս Կապպադովկիայի Արիարաթես Դ և Պերգամոնի Եվմենես Բ թագավորները, մյուս կողմից՝ Հռոմը, չցանկալանլով կողմիցիաներից մեկի կամ մյուսի ուժեղացումը, միջամտում է գործին և ստիպում կողմերին դադարեցնել սկսված պատերազմը և կնքել հաշտություն (179 թ.), որին մասնակից են դարձվում

նաև Փոքր Հայքի սատրապ Միհրդատը և Մեծ Հայքի տիրակալ Արտաշեսը: Ահա թե այդ մասին ինչ ենք կարդում Պոլիբիոսի մոտ:

«Հանկարծակի և դաժան հարձակման ենթարկված լինելով, Փառնակեսը պատրաստ էր ընդունելու ամեն մի առաջարկուստի նա դեսպաններ ուղարկեց Եվմենեսի ու Արիարաթեսի մոտ: Եվմենեսն ու Արիարաթեսը լսելով նրանց, իրենք ևս իսկույն իրենց դեսպաններին ուղարկեցին Փառնակեսի մոտ, և այս բանը երկուստեք բազմիցս կրկնվելով, հաշտություն կնքվեց հետևյալ պայմաններով. թող մշտական խաղաղություն լինի մի կողմից Եվմենեսի, Պրուսիասի (Բյութանիայի թագավոր - Ս.Կ.) և Արիարաթեսի, մյուս կողմից Փառնակեսի և Միհրդատի միջև: Փառնակեսը և ոչ մի ձևով չպէտք է արշավի Գալատիայի վրա և գալատների հետ նախկինում նրա կնքած բոլոր պայմանագրերը պետք է համարվեն անվավեր: Նմանապես նա պետք է հեռանա Պոփլագոնիայից, այնտեղից դաղթեցրած բնակիչներին ետ վերադարձնելով: Նրանց հետ միասին նա պետք է ետ վերադարձնի նաև գեներերը, նետողական մեքենաները և ռազմական այլ գործիքներ: Նա պետք է ետ վերադարձնի Արիարաթեսին՝ նրանից գրաված հողերը կառույցներով հանդերձ և պատանդներին...: Որոշվեց նաև, որ Փառնակեսը պետք է առանց փրկագնի վերադարձնի ռազմագերիներին և փախստականներին: Բացի այն փողերից ու գանձերից, որ հաիշտակել էր (Պոփլագոնիայի թագավոր) Մորդիոսից և Արիարաթեսից, նա պետք է հիշյալ թագավորներին վճարի նաև 900 տաղանդ, 300 տաղանդ էլ Եվմենեսին իբրև պատերազմական ծախսերի հատուցում: Որոշվեց նաև, որ Արմենիայի սատրապ Միհրդատը պետք է վճարի 300 տաղանդ, որովհետև սա, դրժելով Եվմենեսի հետ կնքած դաշինքը, պատերազմեց Արիարաթեսի դեմ: Այդ դաշինքին մասնակից դարձվեցին Ասիայի իշխաններից (δυναστών) Արտաշեսը, Արմենիայի մեծագույն մասի տիրակալը և Ակուսիլոքոսը ...»³⁸:

Անդրադառնալով այս հատվածում հիշված դեպքերին, Հ.Հ. Մանանդյանը նկատում է, որ «Պոլիբիոսի մոտ Փոքր Հայքի այս Միհրդատը, ինչպես տեսնում ենք, անվանված է սատրապ, այ-

(38) Polyb., XXVI, 6' 1-12.

սինքն՝ կուսակալ: Այս վկայությունից կարելի է թերևս հետևանքներ, որ Միհրդատը 180 թվականի պատերազմի ժամանակ չէ եղել անկախ թագավոր, այլ հպատակված է եղել, հավանորեն, Պոնտոսի կամ գուցե մի այլ հարևան թագավորի գերագույն իշխանությանը»³⁹: Մեր կարծիքով, այս Միհրդատը չէր կարող Պոնտոսի Փառնակես թագավորին հպատակ սատրապներից եղած լինել, եթե ի նկատի ունենանք այն, որ Պոլիբիոսի վերոհիշյալ վկայության մեջ նա, որպես առանձին կողմ, հիշատակված է Փառնակեսի հետ միասին: Առավել հավանական է, որ նա պետք է ենթակա լիներ Պերգամոնի Եվմենես թագավորի ռեսերիմ թշնամի Սելևկյանների գերագույն իշխանությանը: Նա պատերազմին մասնակցել է, ըստ երևույթին, Սելևկյան թագավորի անմիջական թելադրանքով և օժանդակութեամբ:

Վերջերս, ոչ առանց հիմքի, նույնիսկ այն տեսակետն է հայտնվել, թե այս Միհրդատը Անտիոքոս Գ-ի քրոջ՝ Անտիոքիսի որդին էր, որի մասին նույն Պոլիբիոսը (VIII, 25) խոսում է Ծոփքի կապակցութեամբ: սրա հայրը, հավանաբար, Երվանդունի էր, ուստի և դեռ մոտիկ անցյալում Սելևկյան արքունիքը նրան հարմար թեկնածու էր համարում Ծոփքի հայկական թագավորության գահի համար⁴⁰:

Միհրդատի հպատակությունը Սելևկյաններին (կամ մեկ ուրիշ թագավորի) իբրև սատրապի, կրում էր համարյա անվանական բնույթ, որքանով որ Փոքր Հայքի կուսակալներն իրենց հերթին տիրապետում էին հարևան մի շարք ցեղերի վրա և հանդիսանում էին տեղական իշխանավորներ: Այսպիսի եզրակացությունն անմիջականորեն բխում է Ստրաբոնի հետևյալ ուշագրավ հաղորդումից. «Փոքր Հայքը բավականին բարբեր երկիր է: Ինչպես Ծոփքում, այստեղ ևս իշխել են բնիկ դինաստիաներ, որոնք մյուս հայերին մերթ բարեկամ էին, մերթ նրանցից անկախ: Նրանց տիրապետության տակ էին նաև տիրաբեռները և խաղաղայնությունը, այնպես որ նրանց իշխանությունը տարածվում էր մինչև Տրապեզունտ»⁴¹:

Ինչքան մեզ հայտնի է, անտիկ հեղինակներից առաջինը Ստրաբոնն է, որ իր «Աշխարհագրության» մեջ տարբեր առիթ-

(39) Հ.Հ. Մանանդյան, Քննական տեսություն ..., Կ. Ա, էջ 123, ծան. 1:

(40) Հայ Ժողովրդի պատմություն, Կ. 1, Երևան, 1971, էջ 522:

(41) Strabo, XII, 3, 28 (C. 555).

ներով խոսում է առանձին-առանձին հայկական երեք իշխանությունների՝ Մոփքի (Σωφρονή), Մեծ Հայքի և Փոքր Հայքի մասին, և առաջին անգամ օգտագործում է Փոքր Հայք (Μικρὸν Ἀρμενίᾳ) արտահայտությունը: Սակայն ցավոք պիտի նշել, որ Փոքր Հայքի մասին հույն աշխարհագետի հաղորդած վկայությունները գերազանցապես վերաբերում են իր իսկ հեղինակի ապրած ժամանակահատվածին և անմիջապես դրան նախորդած տասնամյակներին: Այդ իսկ պատճառով դրանք համարյա ոչինչ չեն տալիս մեր ուսումնասիրած շրջանում այս երկրի քաղաքական պատմությունը շարադրելու համար: Այս տեսակետից միակ արժեքավոր տեղեկությունը մնում է դարձյալ Պոլիբիոսի վերոհիշյալ հատվածը, որի հիման վրա կարելի է եզրակացնել, թե Փոքր Հայքի տիրակալները ձգտել են, օգտվելով հարևան երկրների՝ Պոնտոսի ու Կապպադովկիայի թագավորների մշտական հակամարտություններից, պահպանել իրենց քաղաքական ինքնուրույնությունը: Մ.թ.ա. II դարի վերջին Փոքր Հայքը դադարեց գոյություն ունենալուց որպես ինքնուրույն պետություն այն բանից հետո, երբ Միհրդատ 2 Պոնտացին, օգտվելով իր համար ստեղծված միջազգային բարենպաստ պայմաններից, այն միացրեց իր թագավորությունը (չուրջ 115 թ.): Իսկ մ.թ.ա. 66 թվականին հռոմեական զորավար Պոմպեոսը, Տիգրան Բ-ին և Միհրդատ Պոնտացուն հաղթելուց հետո, Փոքր Հայքը վերածեց Հռոմին ենթակա իշխանություն, այն հանձնելով Գալատիայի թագավոր Դեյոտարոսին: Պատմական հանգամանքների բերումով, հայկական ցեղերով բնակեցված այս երկիրը չմտավ հայկական միացյալ թագավորության կազմի մեջ:

* * *

Հայկական բարձրավանդակի մեկ ուրիշ հարավ-արևմուտյան ծայրամասում ևս, որը հունական աղբյուրներից հայտնի է (Σωφρονή) (Մոփենե), իսկ հայ մատենագիրներու մոտ՝ Մոփք (Մոփաց աշխարհ) անունով, ամենաուշը մ.թ.ա. III դարի կեսերին, առաջացել էր ոչ մեծ հայկական թագավորություն:

Նորագույն ուսումնասիրությունները պարզել են, որ Երվանդունիների հայկական թագավորությունից մ.թ.ա. III դարի 60-ական թվականներին անջատվում են նրա արևմտյան մարզերից Կոմմագենեն ու Մոփքը, կազմելով առանձին մի պետու-

թյուն, որտեղ թագավորում են նույնպես Երվանդունի տոհմի ներկայացուցիչները⁴²: Պատմական անժխտելի այդ փաստի լավագույն վկայություններն են Անտիոքոս Ա. Կոմմագենացու՝ Նեմրոդ լեռան հունարեն արձանագրությունները⁴³. դրանք որոշակի տվյալներ են հաղորդում նաև Երվանդունի թագավորների հերթականության մասին⁴⁴: Ծոփք-Կոմմագենեի այդ միացյալ թագավորությունից, իր հերթին, շուտով անջատվում է Կոմմագենեն, ըստ երևույթին ենթարկվելով Սելևկյաններին, և այդ պետության կազմում մնում է միայն Ծոփքը: Այս անջատումը, թերևս, տեղի է ունեցել Ծոփք-Կոմմագենեի Արշամ (ՊՐՏՄԱՄ) թագավորի մահից հետո, շուրջ 220 թ.⁴⁵:

Ծովաց աշխարհը «գտնվում էր Եփրատ գետի ձախ սահին և պարունակում էր իր մեջ վերին Տիգրիսի և ստորին Արածանիի վրայ գտնվող երկրամասերը»⁴⁶: Սկզբնաղբյուրներում խառնաշփոթ են Ծոփքի մասին մեզ հասած, առանց այն էլ չափազանց աղքատիկ, տեղեկությունները: Հ.Հ. Մանանդյանն, անշուշտ, իրավացի է նկատելով, որ Արմենիայի մասին «երրորդ դարից սկսած (մեր թվ. առաջ) աղբյուրների վկայությունները վերաբերում են... բացի Փոքր Հայքից ու Մեծ Հայքից, նաև Ծոփքին»⁴⁷:

Ինչպես հետևում է աղբյուրների ուսումնասիրությունից, Ծոփքում նույնպես, Հայկական լեռնաշխարհի մյուս հատվածների նման, իշխանությունը գտնվել է տեղական իշխանների ձեռքին, որոնք միայն ձևականորեն են ճանաչել Սելևկյան թագավորների գերիշխանությունը: Նրանց հպատակությունը Սելևկյաններին, հավանաբար, արտահայտվում էր տարեկան որոշ հարկ վճարելու և պատերազմական գործողությունների ժամանակ օժանդակ գործեր տրամադրելու մեջ: Սելևկյանների նկատմամբ

(42) Г.А. Тирациян, Страна Коммагена и Армения, *Տեղ ՀԳԱՀԳ*, 1956, նո 3: Հայ Ժողովրդի պատմություն, հ. 1, Երևան, 1971, էջ 510-515:

(43) Humann und O. Puchstein, Reisen in Kleinasien und Nordsyrien, Textband, Berlin, 1890.

(44) Г.А. Тирациян, նույն տեղում: Ժ.Գ. էլէիբեկյան, Երվանդունիների ծագման հարցի շուրջը, ՊԲՀ, 1971, նո 2, էջ 100-110: Հայ Ժողովրդի պատմություն, հ. 1, Երևան, 1971, էջ 510-513:

(45) Նույն տեղում:

(46) Հ.Հ. Մանանդյան, Քննական տեսություն ..., հ. Ա, էջ 103:

(47) Նույն տեղում:

Հպատակութեան նույնպիսի հարաբերութիւններ պետք է որ ունեցած լինեին նաև հայկական մշուս երկու իշխանութիւնները՝ Մեծ Հայքը և Փոքր Հայքը:

Ալեքսանդր Մակեդոնացու կայսրութեան ասիական տիրութիւնների մեծագույն մասը ժառանգած Սելևկյանների թագավորութիւնը մ-թ-ա. III դ. կեսերին ապրում էր քաղաքական որոշակի ճգնաժամ, որն, ի դեպ, շարունակվեց մինչև այդ տերութեան վերջնական անկումը: Իրենց տերութեան արևելյան մարզերում Սելևկյանները, իրենց պետութեան կազմավորման սկիզբից ևեթ, տարածքային նշանակալից կորուստներ ունեցան: Այսպես, շուրջ 250 թվականին, անջատվելով, նրանց տիրապետութիւնից դուրս եկավ Բակտրիան, որտեղ մակեդոնացի փոխարքա Դիոդոտոսը իրեն հայտարարեց անկախ թագավոր: Նույն ժամանակ, Պարթևաստանում ապստամբել էին պարթևական ցեղերը ապարն թափառական ցեղի առաջնորդ Արշակի գլխավորութեամբ: Սրանք պարտութեան մատնելով Սելևկոս Բ Կալլինիկոսի զորքերին, 248/7 թվականին հիմք դրեցին պարթև Արշակունիների հզոր թագավորութեանը, որը հետագա դարերում կարևորագույն դեր խաղաց Մերձավոր Արևելքի երկրների, այդ թվում նաև Հայաստանի, քաղաքական կյանքում: Մինչև այդ, արդեն Սելևկյանները կորցրել էին իրենց փոքր-ասիական տիրութիւնները՝ Բյութանիան, Պերգամոնը, Պոնտոսը և Կապպադովկիան, որտեղ կազմվել էին առանձին թագավորութիւններ, իսկ Փռյուզիայում հաստատվել էին Եվրոպայից Դարդանելի նեղուցների վրայով Փոքր Ասիա անցած գալլական ցեղերը՝ գալաաները և հիմնել Գալատիայի թագավորութիւնը: Այնուհետև շուրջ 240 թվականին, Սելևկյանների արքունիքում ծայր է առնում դահակալական կռիվ մահացած Անտիոքոս Բ-ի երկու որդիների՝ արդեն թագավոր հռչակված Սելևկոս Բ Կալլինիկոսի և վերջինիս դեմ ապստամբած Անտիոքոս Հիերաքսի միջև: Այս վերջինս էլ, ինչպես հաղորդում է Պոլիենոսը, ճակատամարտում պարտութիւն կրելուց հետո, Միջագետքի վրայով անցնում է Արմենիա (հավանաբար Տոփք) և ապաստան գտնում թագավոր Արշամի (Ἀρσάβης) մոտ⁴⁸:

Ամենայն հավանականութեամբ, այդ նույն տարիներին է, որ օգտվելով Սելևկյանների թագավորութեան մեջ հետզհետե

(48) Polyæn., IV, 17.

խորացող քաղաքական ճգնաժամից, վերոհիշյալ Արշամը, որը մինչ այդ հանդիսանում էր Ծոփք-Կոմմագենեի տիրակալ, հրաժարվում է Սելևկյանների հպատակութունից և իրեն հայտարարում է անկախ թագավոր: Կարևորագույն այդ դեպքերի արտացոլումը մենք տեսնում ենք այն փաստի մեջ, որ հիշյալ Արշամը հատել է դրամ՝ «Թագավորի Արշամի» (ΒΑΣΙΛΕΩΣ ἈΡΣΑΜΟΥ) վերտառությամբ:⁴⁹ Հավանաբար, նույն այս Արշամն է, որ հելլենիստական մյուս թագավորների օրինակին հետևելով, իր համար կառուցել է թագավորանիստ Արշամաշատ (Ἀρσάμοσσατα, Arsamosata)⁵⁰ քաղաքը: Պոլիբիոսի հաղորդման համաձայն, Արշամի հաջորդ Քսերքսեսը (Շավարշ?) նույնպես համարվել է թագավոր, քանի որ հելլեն մատենագիրը, խոսելով այդ մասին, օգտագործում է «Քսերքսեսի թագավորության ժամանակ» (βασιλεύοντος Ξερόξου) արտահայտությունը: Պոլիբիոսի այս հաղորդման բացառիկ շահեկանությունից ելնելով, անհրաժեշտ ենք համարում այն թարգմանաբար մեջ բերել ամբողջությունամբ, քանի որ այն որոշ չափով լույս է սփռում Ծոփքի քաղաքական պատմության վրա:

«Քսերքսեսի թագավորության ժամանակ, — գրում է Պոլիբիոսը, — Արմոսատա քաղաքում, որը գտնվում է այսպես կոչված Գեղեցիկ դաշտում եփրատի և Տիգրիսի միջև, Անտիոքոս թագավորը քաղաքը պաշարելով վերցնելու մտադրությամբ բանակել էր նրա մոտ: Տեսնելով (Անտիոքոս) թագավորի պատրաստությունները, Քսերքսեսը նախ փորձեց փախուստի միջոցով փրկվել, բայց քիչ ժամանակ անց նա զղջաց, վախենալով, որ մայրաքաղաքը թշնամու ձեռքն ընկնելու դեպքում ինքը կարող է կորցնել ամբողջ թագավորությունը: Ուստի, դեսպաններ ուղարկելով Անտիոքոսի մոտ, հայտնեց, որ ցանկանում է բանակցություն մեջ մտնել նրա հետ: Անտիոքոսի հավատարիմ ընկերները խորհուրդ չէին տալիս թագավորին ձեռքից բաց թողնել պատանուն, այլ համոզում էին, որ քաղաքը գրավելով, իշխանությունը հանձնի Միհրդատին, որը նրա քեռորդին էր: Բայց

(49) M. Ernest Babelon, Les rois de Syrie, d'Arménie et de Commagène, Paris, 1890, p. CXCIII.

(50) Արշամաշատ քաղաքի մասին տես՝ Ս.Մ. Կրկյաշարյան, Հին Հայաստանի և Փոքր Ասիայի քաղաքների պատմության դրվագներ, Երևան, 1970, էջ 100-111:

Թագավորը չլսեց նրանցից ոչ մեկին, իր մոտ հրավիրեց պատանուն, հաշտվեց նրա հետ և նույնիսկ զիջեց նրան հարկի մեծագույն մասը, որը պարտավոր էր իրեն վճարել (Քսերքսեսի) հայրը: Այնուհետև, ստանալով Քսերքսեսից 300 տաղանդ և հազար ձի և հազար ջորի լծասարքով, նա վերադարձրեց նրան ամբողջ իշխանութունը և նրան ամուսնացրեց իր Անտիոքիս քրոջ հետ»⁵¹:

Ինչպես դժվար չէ նկատել, Պոլիբիոսի այս հաղորդումը վերաբերվում է Անտիոքոս Գ-ի (223-187 թ/թ.) արևելյան արշավանքի ժամանակին, որի անմիջական նպատակն էր՝ վերականգնել Արևելքում Սելևկյանների խախտված հեղինակությունը: Պոլիբիոսի վկայությունից ավելի քան պարզորոշ երևում է, որ Ծոփքի թագավոր Քսերքսեսի նախորդը՝ Արշամը, հրաժարվել էր Սելևկյաններին տուրք վճարելուց, նշանակում է՝ դուրս էր եկել նրանց գերիշխանության տակից: Ուստի և Անտիոքոս Գ-ը ստիպված է լինում մեծ գորքով արշավելու Ծոփք և կրկին իրեն հպատակեցնելու այդ երկիրը⁵²:

Անտիոքոսի այս արշավանքը Սելևկյանների համար ունեցավ բավականին բարեհաջող վախճան: Հետևաբար, բացառված չէ, որ հենց այդ ժամանակ էլ Սելևկյան թագավորին հաջողվեց ժամանակավորապես իրեն ենթարկել Հայկական լեռնաշխարհի մի զգալի հատվածը և այն բաժանելով երկու մասի, դրանցից մեկի, Ծոփքի վրա որպես ստրատեգոս (στρατηγός), այսինքն՝ ռազմավարչական իշխանությամբ օժտված կառավարիչ, կարգեց Զարեհին (Ζαρεάδρις - Զարիադրիս) և մյուսի՝ Մեծ Հայքի վրա՝ Արտաշեսին (Ἀρταξιάς - Արտաքսիաս): Այս երկու կառավարիչներն էլ, հավանաբար, հանդիսանում էին տեղական իշխաններ և Անտիոքոսը իր այս ակտով սոսկ հաստատում էր իրերի արդեն իսկ ստեղծված դրուժությունը:

Պատմելով այս դեպքերի մասին, լավատեղյակ Ստրաբոնը վկայում է, որ «Հայաստանին նախ տիրեցին պարսիկները, հետո մակեդոնացիները (Սելևկյանները - Ս.Կ.), որոնք նվաճել էին

(51) (Polyb., VIII, 25, 1-6.

(52) Այս նույն դեպքերի մասին հիշատակում է նաև մ.թ. VI դարի բյուզանդական պատմիչ Հովհաննես Անտիոքացին, որը հնագույն աղբյուրների հիման վրա գրել է տիեզերական պատմություն մինչև իր օրերը: այն մեզ հասել է հատվածաբար (տես Joh. Antioch., frag. 53, հրատ. K. Müller, Fragmenta historicorum graecorum, IV S. 557.

Ասորիքը և Մեդիան: (Հայաստանում) վերջին իշխողն էր Օրոնտեսը, շառավիղը յոթը պարսիկներից մեկի Հյուղարնեսի: Այնուհետև երկիրը բաժանվեց երկու մասի՝ հռոմայեցիների դեմ պատերազմ մղած Անտիոքոս Մեծի ստրատեգոսների՝ Արտաքսիասի և Ջարիադրիսի կողմից և իշխում էին սրանք թագավորի հանձնարարութեամբ⁽⁵³⁾:

Հպատակութեան այս դրութիւնը, սակայն, երկար չի տևում: Արմենական այս երկու իշխանները, օգտվելով այն հանգամանքից, որ Անտիոքոս Մեծը 190 թվականին Մագնեսիայի վճռական ճակատամարտում ծանր պարտութիւն կրեց հռոմայեցիներից, իրենց հայտարարեցին անկախ և վերականգնեցին՝ մեկը Ծոփքի, մյուսը Մեծ Հայքի թագավորութիւնը: Ամենայն հավանականութեամբ, Ջարեհն ու Արտաշեսը իրար բարեկամ և դաշնակից են եղել և միասնական ուժերով նրանց աստիճանաբար հաջողվել է ընդարձակել իրենց թագավորութեան սահմանները, քանի որ Սարաբոնը, խոսելով նրանց նվաճումների մասին, չի առանձնացնում, այլ միացնում է դրանք և դիտում որպէս միասնական մի երևույթ: «Պատմում են, թե, — գրում է Սարաբոնը, — Արմենիան, որը նախապէս փոքր էր, աճեց Արտաքսիասի և Ջարիադրիսի ձեռքով, որոնք նախկինում Անտիոքոս Մեծի ստրատեգոսներն էին, իսկ հետագայում, նրա պարտութիւնից հետո, թագավորեցին սա՛ Ծոփքի, Ակիսենեսի և Օղոմանտիսի⁵⁴ և մի քանի այլ գավառների վրա, նա էլ՝ Արտաշատի շրջակայքին: Երկուսն էլ աճեցին, շրջակա ազգերից հողեր նվաճելով: Մարերից կասպիանեն, Փավնիտիսը և Բասորոպեղան, Իբերներից՝ Պարիադրոս լեռան ստորոտները և Խորգենեն և Գոգարենեն, որ ընկած է Կուրի մյուս կողմը, Խալիբներից ու Մոսինոյկներից կարենիտիսը և Դերքսենեն, որոնք Փոքր Հայքի սահմանակից են կամ նույնիսկ նրա մասն են կազմում, կատարներուց Ակիլիսենեն

(53) Strabo, XI, 14, 15 (C. 531).

(54) Հ. Աստուրյանը (Քաղաքական վերաբերութիւններ ընդմեջ Հայաստանի և Հռոմի, Վենետիկ, 1912, էջ 19) գտնում է, որ Acisene = Հանձիթ: Ակադ. Հր. Աճառյանը առաջարկում է Ἀκισυνῆς ուղղել Ἀνθισυνῆς իսկ Ὀδομαντιδος ուղղել Ὀρομαντιδος, վկայակոչելով Պողոմեոս կալվաքոսին, որը Հայաստանի գավառներից մեկը կոչում է Ὀρομανδος (տես՝ Օտար աղբյուրները հայերի մասին. Ստրաբոն. քաղեց և թարգմանեց՝ Հ. Աճառյան, Երևան, 1940, էջ 57):

և Անտիտավրոսի շրջանը, Ասորիներից՝ Տամոնիտիսը⁵⁵, այնպես որ բոլորը միալեզու դարձան»⁵⁶: Ստրաբոնի այս վկայությունը պարզ կերպով ցույց է տալիս նաև այն, որ դեռևս նախորդ դարերում սկսած հայկական էթնիկական տարրերի համախմբման և հայ ժողովրդի կազմավորման պատմական պրոցեսը Արտաշեսի և Ջարեհի ժամանակ թևակոխել էր իր եռուն շրջանը և հանգել վերջնական ավարտին:

Ա. Ի. Բոլտուովայի կարծիքով, չի կարելի հայկական հողերի միավորումը վերագրել միայն Արտաշեսին ու Ջարեհին: «Ձի կարելի վստահ լինել, — գրում է նա, — որ Ստրաբոնի թվարկած բոլոր մարզերը... միավորված լինէին Արտաքսիասի և Ջարիադրիսի օրով: Ըստ երևույթին, այդ մարզերի մի մասի միացումը պետք է վերագրել նրանց հետնորդերին»⁵⁷, Դժվար է, սակայն, համաձայնվել հեղինակի այս տեսակետի հետ, քանի որ մեզ հասած սկզբնաղբյուրներում ոչ մի ակնարկ չկա այդ մասին: Ընդհակառակը, Ստրաբոնի ամբողջ պատմածը Արտաքսիասի մասին հաստատվում է Արտաշեսի շուրջ ստեղծված հայկական ավանդույթյան տվյալներով, որոնք պահպանվել են Մովսես Խորենացու մատյանում: Պատմահոր մոտ Արտաշեսը պատկերված է որպես մեծ աշխարհակալ («Վկայությունք տիեզերակալու թեանն Արտաշիսի...») ⁵⁸: Դրանից բացի, միայն Արտաշեսի ժամանակ միջազգային քաղաքական իրադրությունը Մերձավոր

(55) Ն. Ադոնյը իրավացի կերպով մերժում է ԴԱՐՈՆՏԻՍ (Տարոն) ընթերցումը. «Քսենոփոնի նկարագրությունից երևում է, որ այս շրջանը հայերի ձեռքին էր արդեն հույների նահանջի ժամանակ 400 թ.: Այլևի ճիշտ է կարգալ ԴԱՐՈՆՏԻՍ = Տմորիք» (Н. Адонц. Армения в эпоху Юстиниана, էջ 395, ծան. 2): Նման կարծիքի են եղել նաև Վ. Տոմաշևիկը (Ստոուն և Տիգրիսի աղբերաց սահմանները, թարգմ. Հ.Բ. Պիլեգիլիճյանի, Վիեննա, 1896, էջ 11-12) և Գ. Մարկվարտը (J. Markwart, Eransahr, էջ 170) և Հ. Աստուրյանը (տես Հ. Աստուրյան, նշվ. աշխ., էջ 20): Սակայն մեզ ավելի հավանական է թվում Ս.Տ. Երեմյանի ենթադրությունը, թե դա պետք է լինի ԴԱՐՈՆՏԻՍ = թման, կորովաց աշխարհում (Ս.Տ. Երեմյան, Հայաստանը ըստ «Աշխարհացույցի», Երևան, 1963, էջ 53):

(56) Strabo, XI, 14, 5 (С. 528):

(57) А.И. Болтунова, Греческие надписи Армавира, «Արմֆանի տեղեկագիր», 1942, Նո 1-2, էջ 49:

(58) Մովսես Խորենացի, Բ, ժա-ժգ:

Արևելքում եղել է առանձնապես բարենպաստ հայկական ցեղերով բնակեցուած երկրամասերի միավորման համար:

Հայկական ցեղերով բնակեցված մարզերի միավորումը մեկ տիրակալի իշխանության տակ այդ ժամանակաշրջանում առավել ևս նպաստում էր տնտեսական և մշակութային կապերի ամրապնդմանը երկրի ներսում, իսկ քաղաքական միավորումն էլ իր հերթին արագացնում էր հայկական էթնիկական տարրերի կոնսոլիդացումը: Այս տեսանկյունից նայելով, Ստրաբոնի վերոհիշյալ վկայության մեջ մեզ համար առանձնապես արժեքավոր է նրա այն հաղորդումը, թե Արտաշեսի և Ջարեհի նվաճումներից հետո այդ երկրները «բոլորը միալեզու դարձան» (ὄσπε πᾶντας ὁμογλώττους εἶναι):

Հատկանշական է, որ այսպիսի ընդհանրացնող ընդորոշման մենք չենք հանդիպում ոչ մեկ ուրիշ երկրի մասին ոչ իր Ստրաբոնի, ոչ իսկ մեկ այլ հեղինակի մոտ:

Որպեսզի ճիշտ հասկանանք, թե հույն աշխարհագրագետի մոտ ի՞նչ առումով է օգտագործված մեզ համար բացառիկ կարևորություն ունեցող «միալեզու դարձան» արտահայտությունը, ստիպված ենք նորից դիմելու հենց իրեն՝ Ստրաբոնին: Խոսելով Հայաստանին հարևան Աղվանքում ապրող 26 ցեղերի մասին, որոնցից ամեն մեկն ուներ իր լեզուն, նա չի օգտագործում «ցեղ» կամ «ժողովուրդ» և կամ «թագավորություն» նշանակող որևէ բնորոշում, այլ ուղղակի գրում է. «նախապես ամեն մի լեզուն ուներ իր թագավորը, իսկ լեզուները 26 էին»⁵⁹: Կասկածից վեր է, որ այս դեպքում Ստրաբոնի մոտ «լեզու» (γλῶττα) տերմինը հոմանիշ է էթնիկական միավորի հասկացողության:

Նույնպիսի եզրակացություն կարելի է հանգել վրացական տարեգիր Լեոնտի Մուրելու մի հաղորդումից: Պատմելով Բարբլոնի աշտարակաշինության մասին, նա նշում է, որ «աշխարհը բաժանվեց յոթանասուն լեզուների և յոթանասուն իշխանավորների և յուրաքանչյուր լեզվի վրա կարգեցին իրենց թագավո-

(59) «Πρότερον δὲ καὶ καθ' ἑκάστην γλῶτταν ἰδίᾳ ἐβασίλευοντο ἑκαστοί. Γλῶτται δ' εἰσὶν ἕξ καὶ εἴκοσιν» (Strabo, XI, 4, 6, C. 503). К.В. Тревер, Очерки по истории и культуры Кавказской Альбании, М.-Л., 1959, стр. 59.

րին»⁶⁰: Այստեղ ևս, մեր կարծիքով, «լեզու» բնորոշումը վերաբերում է էթնիկական միավորին:

Նկատենք, որ նույնպիսի առումով է օգտագործված նաև «խօսք» բառը Մովսես Խորենացու հետևյալ հատվածներում.

«Քանզի այս Բագարատ նախաձեռն ընծայ ըստ կամաց մատոյց զինքն Վաղարշակայ յառաջ քան զպատերազմունսն Արշակայ ընդ Մակեդոնացիսն, և սա ի դրան արքունի: Իսկ ի ծայրս հայերէն խօսից կողմնակալ իշխան բիւրոց և հագարաց յարեմտից կուսէ»⁶¹:

«Եւ յարեւելից կողմանէ, զեզերը հայկական խօսիցս, կողմնակալս բիւրաւորս զերկուս ի ցեղից տանց նահապետութեանց, զՄիտակեանսդ և որ ի Կաղմեայ տանէն ...»⁶²:

Աղվանքի ցեղերին վերաբերող Ստրաբոնի վերոհիշյալ հաղորդման, Լեոնտի Մոսկվելու, ինչպես նաև Խորենացու այս վկայությունների ուշադիր քննարկումից հետո դժվար չէ եզրակացնել, թե «միալեզու դարձան» ասելով աշխարհագետ Ստրաբոնը հասկանում է այն, որ բոլորը արդեն դարձել էին մի ժողովուրդ: Հետևաբար կարելի է վստահորեն ասել, որ հայ ժողովրդի կազմավորման երկարամյա պրոցեսն արդեն հիմնականում իր ավարտին էր հասել Արտաշեսի և Ջարեհի թագավորության ժամանակ:

Ի դեպ նշենք, որ Հրանդ Արմենը իր «Մեծն Տիգրան» գրքում, անդրադառնալով Ստրաբոնի վերոհիշյալ վկայությանը, գրում է. «Արտաշեսի օրով ազգային գաղափարը կսկսեր ձև և գույն ստանալ: ... Արտաշես կուզեր ... բաժան-բաժան հայ խումբերն կամ ցեղերն կուռ ամբողջություն մը կազմել: Այս գերակշիռ մտածումն էր, որ տուն տված ըլլալու էր թագավորի լեզվական բարեկարգության հռչակավոր հրովարտակին, որով հայերեն լեզուն պարտադիր կըլլար ամենուն, և պետք էր տարածվեր բոլոր մյուս գավառաբարբառներու և լեզուներու տեղ»⁶³:

Ստրաբոնի «միալեզու դարձան» արտահայտության վերաբերյալ մեր կատարած դիտողություններից հետո, դժվար չէ

(60) Վկայությունը մեջ է թերված И. Джавахов, Государственный строй древней Грузии и древней Армении, СПб., 1905 Վրբից, էջ 23:

(61) Մովսես Խորենացի, Բ, գ:

(62) Նույն տեղում, Բ, ը:

(63) Հրանդ Արմեն, Մեծն Տիգրան, Կահիրե, 1957, էջ 16:

տեսնել, որ Հրանդ Արմենի դատողությունները Արտաշեսի «լեզվական բարեկարգության հռչակավոր հրովարտակի» մասին առարկայազուրկ են, արդյունք հեղինակի վառ երևակայությանը և չունեն պատմական որևէ հիմք: Ավելացնենք, որ հրովարտակով հնարավոր չէ լեզու ստեղծել ու պարտադրել: Արտաշեսի թագավորության մեջ ընդգրկված բնակչությունը միալեզու դարձել էր պարզապես այն պատճառով, որ երկրի բոլոր մարզերում բնակչության էթնիկական հիմքը միատարր էր, բաղկացած հայերից:

Ինչպես դժվար չէ նկատել, Մեծ Հայքի և Մոսիքի թագավորությունների սահմանների ընդարձակման ընթացքը նկարագրելիս, Ստրաբոնը ոչ միայն չի տարանջատում հայկական էթնիկական տարրերով բնակեցված մարզերի միավորման ուղղությամբ Արտաշեսի և Ջարեհի ունեցած հաջողությունները, այլ ընդհակառակը, դրանք դիտում է որպես մեկ միասնական պատմական երևույթ: Նկատի ունենալով այս կարևոր հանգամանքը, մենք հակված ենք ենթադրելու, որ Մեծ Հայքի թագավոր Արտաշեսի և Մոսիքի թագավոր Ջարեհի հարաբերությունները եղել են դաշնակցային⁽⁶⁴⁾ և նրանք գործել են փոխադարձ համաձայնությունով: Հավանաբար մինչև վերջինիս մահը (չուրջ 163 թ.), որից հետո Արտաշեսը փորձում է իր արդեն ընդարձակված թագավորությանը միացնել նաև Մոսիաց երկիրը:

Հայաստանի բաժանումը երկու մասի չէր բխում երկրի անտեսական ու քաղաքական շահերից: Այդ բանը ձեռնտու էր միայն օտարերկրյա տիրապետողներին: Իրենց գերիշխանություն տակ գտնվող երկրները մասնատելու և դրանց ներքին ուժեղացումը խանգարելու համար, դեռևս Աքեմենյանները Արմենիան բաժանել էին երկու սատրապություն: Նրանց օրինակին հետևեցին նաև Սելևկյան թագավորները: Այդպիսի բաժանումը, սակայն, բոլորովին չլ էր համապատասխանում արդեն քաղաքական անկախություն ձեռք բերած երկրի շահերին: Մոսիքը և Մեծ Հայքը միացնելու անհրաժեշտությունը քաջ գիտակցում էր Արտաշեսը՝ «Հայաստանի մեծագույն մասի տիրակալը»: Մոսիքի թագավոր Ջարեհի մահվամբ Արտաշեսի համար հարմար առիթ էր ներկայանում պատմական խոշոր նշանակություն ունեցող

(64) Տես նաև Հայ ժողովրդի պատմություն, հ. 1, Երևան, 1971, էջ 542-544:

այդ ակտը իրականացնելու համար: Չարեհի որդի Մերուժանը չկարողանալով պաշտպանել իր հայրենի Մոփքի թագավորությունը Արտաշեսի կատարած արշավանքից, ստիպված է լինում փախչել Կապպադովկիա և խնդրել թագավոր Արիարաթես Ե-ի (163-130/թ.թ.) միջամտությունը: Վերջինս, անհանգստանալով Մեծ Հայքի հզորացումից, այն կանխելու նպատակով, օգնում է Մերուժանին վերագրավելու իր գահը⁶⁵: Այսպիսով, առժամանակ խափանվում է Հայաստանի երկու հատվածները միավորելու ուղղությամբ Արտաշեսի կատարած այս փորձը:

Որպես Մոփքի վերջին թագավոր, աղբյուրներում հիշատակվում է Չարեհի տոհմից Արտանեսը, որին հաղթելուց հետո, Տիգրան Բ-ը իր թագավորությանը միացնում է նաև Մոփքը: «Իսկ Չարիադրիսի շառավիղն էր, — գրում է Ստրաբոնը, — Արտանես Մոփացին, որն իշխում էր (Արմենիայի) հարավային և մանավանդ հարավ-արևմտյան մասերում: Սրան տապալեց Տիգրանը և ինքը դարձավ բոլոր այդ երկրների տերը»⁶⁶:

* * *

Աքեմենյանների կործանումից հետո, Հայկական լեռնաշխարհում առաջացած երեք տերություններից ամենանշանակալից եղել է Մեծ Հայքի թագավորությունը, որի հիմնական կորիզը հանդիսանում էր Արարատյան դաշտավայրը: Ինչպես նշել ենք, Մեծ Հայքում իշխանությունը ժառանգաբար գտնվում էր Երվանդունիների ձեռքին, որոնք, Փոքր Հայքի ու Մոփքի իշխանների նման, միայն ձևականորեն էին ճանաչում Սելևկյան թագավորների գերիշխանությունը: Սկզբնաղբյուրների առկա վիճակը ծայր աստիճան անբավարար է մ.թ.ա. III դարի Մեծ Հայքի քաղաքական պատմության մասին հաստատ որևէ բան ստելու համար: Բացառված չէ, սակայն որ III դարի երկրորդ կեսին Երվանդունիները Հայաստանում զգալի չափով թուլացել էին: Օգտվելով նրանց թուլացումից, հավանաբար հարևան իրերները և Ատրպատականի թագավորը նվաճել էին Հայաստանի մի

(65) Հմմտ. Polyb., XXXI, 15 a; Diodor., XXXXI, 22.

(66) Strabo, XI, 14, 15 (C. 531).

չարք գալառներ⁶⁷, քանի որ, ինչպես տեսանք, Արտաշեսն, իրեն թագավոր հռչակելուց հետո, ստիպված էր վերանվաճելու այդ երկրամասերը:

Շատ հավանական է, որ Անտիոքոս Գ-ը, Մոփքի Քսերքսես թագավորին հնազանդեցնելուց հետո, օգնել էր իր ստրատեգոսներից արմեն Արտաքսիաս-Արտաշեսին, տապալելու Երվանդ Վերջինին և որպես Սելեվկյանների սատրապ, իշխելու Հայաստանի այս հատվածում: Այդ մասին արժեքավոր ցուցումներ կան Ստրաբոնի և Մովսես Խորենացու մոտ:

«Վերջին իշխողը, — գրում է Ստրաբոնը, — Օրոնտեսն էր, շառավիղը յոթը պարսիկներից մեկի՝ Հյուդարնեսի: Այնուհետև երկիրը բաժանվեց երկու մասի... Անտիոքոս Մեծի ստրատեգոսների Արտաքսիասի և Ջարիադրիսի կողմից և իշխում էին սրանք թագավորի հանձնարարութեամբ...»⁶⁸: Իսկ Մովսես Խորենացու «Հայոց պատմութեան» երկրորդ գլխի մի շարք գլուխներ նվիրված են Երվանդի դեմ Արտաշեսի մղած պայքարին և նրա կործանմանը Արտաշեսի կողմից⁶⁹:

Այս առնչութեամբ Հ.Հ. Մանանդյանը ճիշտ կերպով նկատում է, թե Խորենացու մոտ պահպանված «գրույցների և երգերի մեջ, ըստ երևույթին, պատմվում էին Արտաշեսի այն պատերազմները, որոնց միջոցով նա վերջ էր դրել Երվանդյանների իշխանութեանը և նվաճել էր Արարատյան դաշտը ու նրանց աթուռանիստ կենտրոն Երվանդաշատը: ... Խորենացին մեզ միջոց է տալիս կռահելու, որ Երվանդյանների դինաստիայի փոխանակումն Արտաշեսյան նոր դինաստիայով տեղի է ունեցել համառ կռիվներից հետո»⁷⁰:

Դժվար է գերազնահատել Արտաշեսի արժանիքները որպես պետական գործչի: Հայոց թագավորներից և ոչ մեկի գործունեությունը այնպիսի խոշոր նշանակություն և դրական հետևանքներ չի ունեցել հայ ժողովրդի պատմութեան համար հետագա դարերում, ինչքան Արտաշեսի գործունեությունը: Հ.Հ. Մանանդյանը իրավացիորեն նշում է, որ «Արտաշեսյան անկախ և հզոր

(67) Հայ ժողովրդի պատմություն, հ. 1, Երևան, 1971, էջ 513 և 532:

(68) Strabo, նույն տեղում:

(69) Մովսես Խորենացի, Բ, լէ-կր:

(70) Հ.Հ. Մանանդյան, Քննական տեսություն ..., հ. Ա, էջ 126:

Հայաստանի կազմակերպումը սկիզբն էր հին Հայաստանի պատմութեան նոր դարաշրջանի: Միանգամայն բնական է ու հասկանալի, որ Արտաշեսյան այս շրջանի պատմական մեծ անցքերը նյութ էին դառել երգերի ու ավանդույթյունների, որոնցից օգտվել էր Մովսես Խորենացին»⁷¹:

Այսպես, Արտաշեսը միջազգային քաղաքական ամենաբարդ իրադրութեան պայմաններում կարողացավ ընտրել հարմարագույն պահը, Սելևկյանների գերիշխանութիւնը վերջնականապես թոթափելու համար: Դա այն ժամանակն էր, երբ Մագնեսիայի մոտ 190 թվականին պարտութիւն կրելով հռոմայեցիներից, Անտիոքոսը դադարեց որևէ լուրջ դեր խաղալուց Առաջավոր Ասիայի քաղաքական կյանքում, իսկ Հռոմը դեռևս ի վիճակի չէր հաստատուն ոտքերով կանգնելու Արևելքում:

Այնուհետև, իրեն Մեծ Հայքի թագավոր հայտարարելով, Արտաշեսը լայն գործունեութիւն ծավալեց հայաբնակ բոլոր երկրամասերը իր թագավորութեանը միացնելու և միակուռ պետականութիւն ստեղծելու ուղղութեամբ: Այն բանից հետո, երբ նա, միավորելով Արարատյան դաշտի հարևան մարզերը, դարձել էր Հայաստանի մեծագույն մասի տիրակալը⁷², փորձեց իր նորաստեղծ թագավորութեանը միացնել նաև հայկական մյուս իշխանութիւնները՝ Փոքր Հայքն ու Ծոփքը, դրանով իսկ ավարտելու հայկական ցեղերով բնակեցված բոլոր մարզերի միավորումը: Բայց, ինչպես տեսանք, նրա կարևոր այս մտադրութիւնն անհաջողութեան մատնվեց, որովհետև Պոնտոսի թագավոր Փառնակեսը, ինչպես և, հավանաբար, Սելևկոս Դ-ը, խանգարեցին նրան, օգնելով Փոքր Հայքի սատրապ Միհրդատին⁷³, մինչդեռ կապաղդովկիայի թագավոր Արխարաթես Ե-ը ամեն կերպ օժանդակում էր Ծոփքի թագավոր Մերոստանին Ջարեհի որդուն⁷⁴: Այնուամենայնիվ, Արտաշեսի ժամանակ զգալի չափով ուժեղանում է Մեծ Հայքի թագավորութիւնը, որն արդեն սկսում է լուրջ դեր խաղալ Փոքր Ասիայի պետութիւնների փոխհարաբե-

(71) Նույն տեղում, էջ 124:

(72) Արտաշեսի գործունեութեան լավագույն շարադրանքը տես Հայ ժողովրդի պատմութիւն, հ. 1, Երևան, 1971, էջ 526-534:

(73) Polyb., XXVI, 6, 11.

(74) Diodor., XXXI, 22.

րություններում⁷⁵։

Վերջապես, Արտաշեսի մատուցած պատմական խոշորագույն ժառանգություններից մեկն էլ այն է, որ նա Արաքսի ձախափին, Այրարատյան դաշտում, կառուցեց իր նոր մայրաքաղաքը՝ Արտաշատը, որը շուրջ հինգ դար պահպանեց իր շքեղությունը և կարևորությունը որպես քաղաքական և տնտեսական կենտրոնը ոչ միայն Արտաշեսյանների թագավորության, այլև Արշակունյաց Հայաստանի։ Հ.Հ. Մանանդյանը Արտաշատի կառուցումը Այրարատյան դաշտուն համարում է «Արտաշես Ա-ի կարևորագույն գործերից մեկը։ Այդ դաշտն այնուհետև դառավ Հայաստանի քաղաքական ու մշակութային միավորման կենտրոնը»⁷⁶։

Մեծ Հայքի թագավորության բարձրացումն ու հզորացումը, անկասկած, հաճելի չէր ոչ միայն հարևան Կապպադովկիային ու Պոնտոսին, որոնք, ինչպես տեսանք, ամեն կերպ խափանեցին հայկական երեք իշխանությունների միավորումը, այլև Հայաստանի նախկին գերագույն տեր Սելևկյաններին ու նոր բարձրացող Պարթևական թագավորությանը։ Դիողորոս Սիկիլիացին և Ապպիանոսը⁷⁷ վկայում են, որ Անտիոքոս Դ Եպիփանեսը (175-164 թթ.) իր գահակալության վերջին տարիներին արշավել էր Հայաստան, պարտության մատնել Արտաշեսին, բայց չէր կարողացել իր գերիշխանությունը վերահաստատել այնտեղ։ Դեռ ավելին. Դիողորոսը վկայում է, որ Արտաշեսը դաշն էր կնքել Սելևկյանների նախկին սատրապ Տիմարքոսի հետ, որը իրեն հայտարարել էր Մեդիայի թագավոր, և օգնել նրան ընդարձակելու իր տերության սահմանները ի հաշիվ Սելևկյանների⁷⁸։

Այդ նույն տարիներին էր, որ պարթևական աշխարհակալության հիմնադիր Միհրդատ Ա թագավորը (171-138 թթ.), օգտվելով Սելևկյանների թուլացումից, նվաճեց նախկինում սրանց գերիշխանության տակ գտնված երկրները մինչև Հյուսիսային Միջագետք և Եփրատ գետը։ Հետագայում պարթևները

(75) Տես Polyb., XXVI, 6.

(76) Հ.Հ. Մանանդյան, Տիգրան Երկրորդը և Հռոմը, Երևան, 1940, էջ 24:

(77) Diodor., XXXI, 27a : Appian., Sur., 45-46: Հմմտ. Գ. Խ. Սարգսյան, Հելլեն-նիստական դարաշրջանի Հայաստանը և Մովսես Խորենացին, Երևան, 1966, էջ 242-247:

(78) Diodor., նույն տեղում:

Միհրդատ Բ-ի ժամանակ (123-88 թթ.), նվաճելով մի շարք մարզեր ևս, փորձում են տիրել նաև Հայաստանին, բայց այդ նրանց չի հաջողվում: Այս դրուժյունը արձանագրված է Ստրաբոնի մոտ: «Պարթևները, – գրում է հույն աշխարհագետը, – իշխում են մեղացիներին ու բաբելոնացիներին: Իսկ հայերին ոչ մի անգամ: Թեև բազմիցս արշավանքներ եղան, սակայն չկարողացան ուժով նվաճել»⁷⁹:

Արտաշես Ա-ի մահից հետո (չուրջ 160 թ.), մինչև Տիգրան Բ-ի գահակալումը (95 թ.) ընկած ժամանամիջոցը Հայ ժողովրդի պատմության ամենաթուլ լուսաբանված հատվածներից է, քանի որ սկզբնաղբյուրները համարյա ոչինչ չեն հաղորդում այդ ժամանակաշրջանի Հայաստանի մասին: Մեզ հասած սկզբնաղբյուրներում պահպանված ավելի քան պատահական տվյալների հիման վրա Հ.Հ. Մանանդյանը հավանական է համարում, «որ Արտաշես Ա-ին հաջորդել էր նրա որդին, Արտավազդ Ա-ը, և ապա սրա եղբայրը՝ Տիգրան Ա-ը, որից հետո թագավորել էր այս վերջինի որդին՝ Տիգրան Բ-ը»⁸⁰:

Մենք այստեղ ընդհատում ենք այդ դարաշրջանի Հայաստանի քաղաքական պատմության մեր համառոտ շարադրանքը, քանի որ այդ լավագույն կերպով արված է ակադ. Հ.Հ. Մանանդյանի «Տիգրան Երկրորդը և Հուռմը» և «Քննական տեսություն Հայ ժողովրդի պատմության, Կ. Ա», ինչպես նաև վերջերս ՀՍՍՀ ԳԱ Պատմության ինստիտուտի հրատարակած «Հայ ժողովրդի պատմություն, Կ. 1» կապիտալ աշխատություններում և անցնում ենք հայկական թագավորության պետական կառուցվածքի ուսումնասիրությանը հելլենիստական ժամանակաշրջանում, նկատի ունենալով, որ հին Հայաստանի պետական հաստատությունները, նախկինում սաղմնային վիճակում, գոյություն ունենալով հանդերձ, հիմնականում առաջացել և ձևավորվել են Արտաշեսյանների, առանձնապես Տիգրան Բ-ի թագավորության տարիներին:

(79) Strabo, XVI, 1, 19.

(80) Հ.Հ. Մանանդյան, Տիգրան Երկրորդը ..., էջ 27: Նույնի, Քննական տեսություն, Կ. Ա, էջ 135:

ԳԼՈՒԽ ՉՈՐՐՈՐԳ

ԹԱԳԱՎՈՐԱԿԱՆ ԻՇԽԱՆՈՒԹՅՈՒՆԸ ՀԻՆ ՀԱՅԱՍՏԱՆՈՒՄ

1. Գերագույն իշխանությունը Արեմենյանների տիրապետության շրջանում

Սույն աշխատության առաջին գլխում, հենվելով Քսենոփոնի հայտնի երկերի վրա, մենք փորձեցինք ցույց տալ, որ «Կյուրոպեդիայի» տվյալներով, Արմենիան մ.թ.ա. VI դարի կեսերին ունեցել է իր առաջնորդ-բասիլևսը (βασιλεύς), իսկ ըստ նույն հեղինակի «Անաբասիսի»՝ Արմենիան մ.թ.ա. V-IV դարերի սահմանագրին կառավարվել է պարսկական «արքայից արքայի» նշանակած սատրապի միջոցով: Այս երկու տեղեկությունների թվացող հակասությունը միանգամայն բացատրելի է: «Կյուրոպեդիա»-յում նկարագրված պատմական դեպքերը վերաբերում են այն ժամանակաշրջանին, երբ Հայկական լեռնաշխարհում բնակիլոյ արմենական ցեղերը դեռևս համեմատաբար անկախ էին. դեռ ավելին, նրանք նույնիսկ դաշնակից էին համարվում մարերին և լրիվ չէին ենթարկվել Մեդական թագավորների իշխանությանը: Մինչդեռ ավելի ուշ շրջանի դեպքերը նկարագրող «Անաբասիս»-ում, ինչպես և Հերոդոտոսի մոտ, Արմենիան արդեն հպատակ է և հարկատու Աքեմենյան «արքայից արքային» որպես նրա սատրապությունը:

Պատահական չէ, որ մ.թ.ա. V-IV դդ. լավատեղյակ մտանոագիր Քսենոփոնը, Հայկական լեռնաշխարհում մ.թ.ա. VI դարի կեսերին կատարված դեպքերը նկարագրելիս, արմենական ցեղերի առաջնորդին բնութագրելու համար օգտագործում է հին Հունաստանի հասարակությունից իրեն շատ լավ հայտնի բասիլևս (βασιλεύς) տերմինը, դրանով իսկ, հավանաբար, ցան-

կանալով ընդգծել, որ արմենական ցեղերի այս առաջնորդի դիրքն ու դերը Հին Հայաստանի հասարակութայն մեջ նունն էր, ինչ հունական բասիլեաների ֆունկցիան հին Հունաստանի հասարակական կյանքում:

Հելլենիստական ժամանակաշրջանում առաջացած ու ծաղկում ապրած Ալեքսանդրյան դպրոցի քերականների բացատրությամբ, *βασιλεύς* բառը կազմված է եղել *βάσις* (հիմք) և *λεύς* (ժողովուրդ) բառերից, հետևապես նշանակել է՝ «ժողովրդի հիմք»: Առավել հավանական է, սակայն, որ *βασιλεύς* բառը ծագած լինի *βαίνω* (քայլել, առաջանալ) բայից կազմված *βάσις* (քայլք, ընթացք) և *λεύς* (ժողովուրդ) բառի իոնիական *λεύς* ձևից, դրանով իսկ նշանակելով «ժողովրդի առաջնորդ»:

Հոմերոսյան դյուցազներգություններում *βασιλεύς* բառի տակ հասկացվում է ոչ միայն սվյալ ցեղի գերագույն պետը, այլև ամեն մի առաջնորդ ընդհանրապես, քանի որ Հոմերոսն այդ հորջորջումը միշտ գերագույն առաջնորդին էլ է միայն, որ տալիս է: Այսպես, անհայտ կորած Ուլիսևսի կնոջ՝ Պենելոպեի փեսացուները ևս նրա մոտ կոչվում են բասիլեաներ¹: Իսկ փեակաների երկրում բասիլևս Ալիլիոսի հետ միասին կային նաև ուրիշ տասներկու բասիլեաներ ևս²:

Հին Հունաստանի պատմության, այսպես կոչված, հերոսական շրջանի բասիլևսի հասարակական դիրքն ու դերը լավագույնս բնորոշել է մ.թ.ա. IV դարի խոշորագույն մտածող, փիլիսոփա Արիստոտելը, նշելով, որ բասիլևսը հանդիսանում է գորքի առաջնորդ, միաժամանակ նաև դատավոր ու կրոնապետ³: Արիստոտելի այս դիպուկ, բնորոշումը իրենց ժամանակ ընդունել են մարքսիզմի դասականները: Այսպես՝ Ֆ. էնգելսը գրում է. «Բասիլևսը, բացի զինվորական իրավունքներից, ուներ նաև քրմական և դատական իրավունքներ: . . . Թուլիդիդեսը հին *basileia-ն* (թագավորական իշխանություն – Մ.Կ.) որոշակի կերպով *patrikē* է անվանում, այսինքն՝ տոհմերից առաջացած, և ասում է, թե նա հաստատուն որոշված, ուրեմն, սահմանափակ, իրավունքներ ուներ: Իսկ Արիստոտելն ասում է, թե հերոսական դարաշրջանի *basileia-ն*

(1) 'Ομήρου 'Οδύσσεια, I, 394-395.

(2) *Նույն տեղում*, VIII, 390-391.

(3) «Στρατηγός γὰρ ἦν καὶ δικαστὴς ὁ βασιλεύς καὶ τῶν πρὸς τοὺς θεοῦς κύριος» (Aristot. Polit., III, 10)

մի ղեկավարութունն էր ազատանիւնների վերաբերմամբ, իսկ բասիլեսը զորահրամանատար, դատավոր ու քրմապետ էր . . . »⁴:

Եթե հին Հունաստանում քաղաք-պետութունների պոլիսների առաջացումով, որտեղ հաղթանակեց ստրկատիրական դեմոկրատիան, պետք է վերացվեր բասիլեսների ինստիտուտը և այդ հիման վրա քաղաքական և ռազմական իշխանութունը պետք է անջատվեր կրոնական ու դատական իշխանութուններից, սպա հին Հայաստանում, որտեղ հասարակության զարգացումն ընթացավ սոցիալ-տնտեսական և քաղաքական այլ պայմաններում, հետագայում կազմավորված անկախ թագավորության հողի վրա, շարունակվեց նույն անձի՝ բասիլես-թագավորի ձեռքում մնալ ռազմաքաղաքական ու կրոնական գերագույն իշխանութունը:

Ս.Տ. Երեմյանը իր հոդվածներից մեկում, անդրադառնալով Քսենոփոնի նկարագրած Հայաստանի հասարակությանը, գտնում է, որ «բազմաթիվ ցեղերն ունեին իրենց առաջնորդները, «բառիլեսները», որոնք ենթարկվում էին սատրապին: Նրանցից յուրաքանչյուրը կրում էր իր տոհմական տիրույթը, որը համապատասխան լեզվով նշանակում էր «տոհմապետ»⁵: Մեր կարծիքով, սակայն, Քսենոփոնը խոսում է Հայաստանի ոչ [Թե բասիլեսների, այլ սոսկ մեկ բասիլեսի մասին, իսկ տոհմապետներին անվանում է «պատվավոր արմեններ»:

Այսուհանդերձ, Քսենոփոնի այդ հաղորդման հիման վրա Ս.Տ. Երեմյանը իրավացի կերպով նշում է, որ այդ ժամանակ, «բնակչության զանգվածից աստիճանաբար առանձնանում է ռազմա-քրմական ավագանին, որին Քսենոփոնը . . . անվանում է «պատվավոր արմեններ»: Նրանց թվին էին պատկանում սատրապները, որոնք դարձան ժառանգական իշխաններ, քրմերը և ցեղերի ու համայնքների պետերը»⁶:

(4) Կնգելս, Ընտանիքի, մասնավոր սեփականության և պետության ծագումը, Երևան, 1953, էջ 149-150:

(5) С.Т. Еремян, Основные черты общественного строя Армении в эллинистическую эпоху, Տեղ. ՀԳԱՀԳ 1948, No 11, էջ 11:

(6) Նույն տեղում, էջ 40: Այնուամենայնիվ, պիտի նշեի, որ Քսենոփոնն այս դեպքում չէր կարող նկատի ունենալ սատրապներին, քանի որ «կյուրոպեղիա»-յում նկարագրված է նախասատրապյան Հայաստանի հատրակութունը:

«Կյուրոպեդիա»-յում Քսենոփոնի հիշատակած արմենների բասիլևսի իշխանությունը իր ցեղակիցների վրա նույնպես բացարձակ չէր, ինչպես և հոմերոսյան Հունաստանում, որտեղ բասիլևսի կողքին գոյություն են ունեցել նրա իշխանությունը սահմանափակող ավագների խորհուրդը՝ բուլեն (βουλή) և ժողովրդական ժողովը՝ էկկլեսիան (ἐκκλησία): Այդ երևում է թեկուզ այն բանից, որ հույն մատենագրի վկայությամբ, Կյուրոսը արմենների բասիլևսին գերի վերցնելուց հետո, նրա հետ դատաստան տեսնելիս, «անհապաղ կանչեց պարսիկների և մեդացիների զորապետներին, հրավիրեց նաև պատվավոր արմեններին, որոնք ներկա էին»⁷: Այս «պատվավոր արմենները», հավանաբար, նոր կազմավորվող արմենական ավագանու ներկայացուցիչներն էին: Արմենների բասիլևսը, ըստ Քսենոփոնի, ունեցել է իր նստավայրը, որը եղել է ապարանք-ամրոց⁸: Պիտի ենթադրել, որ արմենների բասիլևսը չի ունեցել իր մշտական բանակը: Պատերազմի ժամանակ գեներալները ընդունակ բոլոր ցեղակիցները, «գեղջավագ»-ների (Քսենոփոնի մոտ՝ κωμῖδοχος, ὄρχων τῆς κώμης) գլխավորությամբ, ներկայանում էին, համալրելու համար բանակը: Այդպես է եղել նաև Աքեմենյան Պարսկաստանում, որտեղ զորքը կոչվել է «kara», այսինքն՝ ժողովուրդ: Հոմերոսի մոտ ևս հունական ամբողջ զորքը կոչվում է ժողովուրդ (հուն. λαός): Արմենների բասիլևսը մոտիկ հարաբերությունների մեջ է եղել պարսկա-մարական արքունիքի հետ: Նրա անդրանիկ որդին, Տիգրանը, եղել է Կյուրոսի որսի ընկերը⁹:

Դարեհ Ա-ի թողած Բեհիստունյան արձանագրության մեջ հիշատակված են նաև երկու արմեններ, Դադարչիչը և Արախան, ավագանու խոշորագույն ներկայացուցիչներ, հավանաբար ցեղապետներ, որոնք Աքեմենյան տիրության մեջ տեղի ունեցող պատմական այդ բուռն իրադարձությունների ժամանակ խաղացել են առաջնակարգ դեր: Այսպես, Դադարչիչը երեք անգամ գլխավորել է ապստամբություն բարձրացրած Արմենիայի դեմ՝ Դարեհի կողմից ուղարկված պարսկական զորքերը, իսկ Արախան, իսլադիտայի որդին, Բաբելոնում ապստամբելով պարսկական տիրապետության դեմ, իրեն հայտարարում է թագավոր՝ Նաբուգոդոնո-

(7) Xenoph., Cyropae., III, 1, 8.

(8) Նույն տեղում, II, 4, 24.

(9) Նույն տեղում, III, 1, 7:

սոր անուանով¹⁰:

Արմենիայի մասին Քսենոփոնի և Հերոդոտոսի հաղորդած վկայությունները և Բեհիստունի արձանագրության տվյալները պարզորեն ցույց են տալիս, որ Արմենիան, մինչև Աքեմենյանների կողմից վերջնականապես նվաճվելը (521 թ.), ունեցել է իր բասիլևսը: Իսկ այն բանից հետո, երբ Դարեհ Ա-ը իր իշխանության տակ գտնվող երկրները, որոնց թվում նաև Արմենիան, բաժանում է առանձին վարչական միավորների՝ սատրապությունների, կառավարվել է «արքայից արքայի» նշանակած հատուկ կառավարչի՝ սատրապի միջոցով:

Պարսկաստանի գերիշխանության տակ գտնվող մի շարք երկրամասերում ծագած ապստամբությունները դաժանորեն ճնշելուց հետո, Դարեհ Ա. Վշտասպյանը ձեռնարկեց վարչական մի շարք ռեֆորմներ, որոնցից ամենակարևորը ամբողջ երկիրը սատրապությունների բաժանելն էր:

Արմենիան ևս այդ ռեֆորմով վերածվեց վարչական առանձին միավորի, սատրապության, որի կառավարումը հանձնարարվեց Աքեմենյան արքունիքի մերձավորներից՝ Օրոնտեսին (Երվանդին): Ստրաբոնի հետաքրքիր մի վկայությունից մեզ հայտնի է, որ Օրոնտես Վերջինը իրեն համարում էր շառավիղը Հյուսիսարևմտի, որը հանդիսանում էր իրեն Պարսկաստանի թագավոր հայտարարած Գառմատա մոգին տապալելու գործում Դարեհին օգնած պարսից ավագանու վեց ներկայացուցիչներից մեկը¹¹:

Դարեհի ռեֆորմներից հետո Աքեմենյան Պարսկաստանում սատրապների ձեռքին է եղել քաղաքական ու դատական գերագույն իշխանությունը սատրապության սահմաններից ներս: Իրենց գործունեությունը համար նրանք հաշվետու են եղել միայն «արքայից արքայի» առաջ: Նրանք յուրատեսակ թագավորներ են եղել իրենց վստահված երկրամասերում և նույնիսկ իրավունք են ունեցել արծաթ և սղինձ դրամ հատելու, իրենց սատրապության ներքին առևտրի կարիքները բավարարելու համար, մինչդեռ ոսկի դրամ հատելու իրավունքը բացառապես վերապահված էր իրեն՝ «արքայից արքային»: Առանձին սատրապների հնարա-

(10) М.А. Дандамаев, Иран при первых Ахеменидах, М., 1963, էջ 262 և հաջ.:

(11) Strabo, XI, 14, 15:

վոր ուժեղացումը և այդ ուժեղացման հողի վրայ նրանց անջատողական ձգտումները կանխելու նպատակով Դարեհը կիրառեց նոր միջոցառում: յուրաքանչյուր սատրապուլթյան ներսում գտնվող բոլոր զորքերը նա ենթարկեց հատուկ զորահրամանատարների, որոնք ենթակա չէին սատրապներին: Դրանով իսկ «արքայից արքան» ստեղծեց կենտրոնական իշխանուլթյան համար այնքան անհրաժեշտ եղող փոխադարձ հսկողուլթյան մի համակարգ սատրապուլթյան ներսում, տեղի քաղաքական և զինվորական իշխանուլթյունների միջև: Այս կարևոր երևուլթի մասին Քսենոփոնը հաղորդում է հետևյալը. «Եթե զորահրամանատարը անբավարար չափով է երկիրը պաշտպանում, ապա (խաղաղ) բնակչուլթյան կառավարիչը և հողերի մշակման ղեկավարը հայտնում է, թե պաշտպանուլթյան բացակայուլթյան հետևանքով աշխատել հնարավոր չէ: Իսկ եթե զորահրամանատարը ապահովում է խաղաղուլթյունը, իսկ կառավարիչի մոտ մշակելի հողը քիչ է բնակեցված և չի մշակված, ապա վերջինիս մասին հայտնում է զորահրամանատարը»¹²:

Վարչական վերահսկողուլթյան այսպիսի համակարգ հաստատել են Աքեմենյանները փոքրասիական, միջերկրածովյան ափերի, Բաբելոնի և Եգիպտոսի սատրապուլթյուններում: Ըստ երևուլթի Արմենիայի սատրապի իրավունքները որոշ չափով տարբեր են եղել: Օրոնտեսը, հավանաբար, ունեցել է ոչ միայն քաղաքական ու դատական, այլև զինվորական իշխանուլթյուն, քանի որ պատերազմի ժամանակ ինքն էր առաջնորդում արմենական զորքերին¹³:

Հնարավոր է, սակայն, որ Արմենիայի սատրապը իրավունք չի ունեցել դրամ հատելու: Ասենք, նա հաղիվ թե դրա կարիքն ունենար, քանի որ բնատնտեսուլթյան տիրապետուլթյան պայմաններում առևտուրը երկրի ներսում թույլ էր զարգացած, իսկ արտաքին առևտուրը, ինչպես հետևում է Հերոդոտոսի վկայուլթյուններից, այդ ժամանակ գտնվում էր օտարականների՝

(12) Xenophontis Oeconomicus, Berlin, 1910, IV, 10.

(13) Arriani de expeditione Alexandri, III, 11, 7: Հմմտ. նաև՝ Xenoph., Anabasis, IV, 3, 4:

ասորեստանցիների ձեռքին¹⁴:

Ճիշտ է, մեզ հասել են Օրոնտեսի և Տիրիբազոսի (առաջինը մի ժամանակ եղել էր Արմենիայի սատրապ, իսկ երկրորդը՝ նրա հյուպարքոսը) նկարներով դրամներ. սակայն այդ դրամները, մեր կարծիքով, հատված են այն ժամանակ, երբ Օրոնտեսն ու Տիրիբազոսը արդեն առնչություն չունեին Արմենիայի հետ, այլ նշանակված էին Փոքր Ասիայի առափնյա քաղաքների կառավարիչներ¹⁵:

Աքեմենյանների շքեղ արքունիքը, վարչական ապարատը և հսկայական բանակը, ինչպես նաև սատրապի արքունիքը ու նրա մերձավորներին հնարավոր էր պահել միայն սատրապություններում ապրող հպատակ ժողովուրդներից գանձվող դրամական ու նատուրալ ծանր հարկերի հաշվին: Այսպես, բացի դրամական խոշոր գումարից — Հերոդոտոսը (գիրք III, գլխ. 93) վկայում է, որ 13րդ սատրապության մեջ մտնող արմենները և նրանց հարևան ցեղերը պարսից թագավորին վճարում էին 400 տաղանդ ամենամյա հարկ —, Արմենիայի սատրապը, «արքայից արքային» ուղարկում էր տարեկան 20 հազար մարուկ Միթրայի տոնի համար¹⁶:

Սկզբնաղբյուրներում պահպանված վկայությունների հիման վրա մենք փորձեցինք ցույց տալ, որ պատմական այդ ժամանակաշրջանում արդեն առկա էին մի շարք կարևոր նախադրյալներ, որպեսզի Հայկական լեռնաշխարհը դառնար պետական անկախ միավոր: Մ.թ.ա. VI-IV դարերում Հայաստանը հաստատորեն կանգնած էր ինքնուրույն պետականությունից ստեղծման շեմին¹⁷: Դրա իրականացմանը, սակայն, խանգարում էր օտարերկրյա քաղաքական լուծը: Հարկավոր էր մի նոր ուժ,

(14) Я. А. Манандян, О торговле и городах Армении в связи с мировой торговлей древних времён, 2րդ հրատ. Ереван, 1954, էջ 10-11: Հ. Հ. — Մանանդյան, Քննական տեսություն ..., հ. Ա, էջ 59-61: Մ. Մ. Կրկյաշարյան, Հին Հայաստանի և Փոքր Ասիայի քաղաքների պատմության գրվագներ, Երևան, 1970, էջ 159-164:

(15) Diodor., XV, 2, 2.

(16) Strabo, XI, 14, 9.

(17) Մույն աշխատության առաջին գլխում մենք քննության ենք սուել նաև հակառակ տեսակետը, որի համաձայն մ.թ.ա. VI դ. արդեն ստեղծվել էր հայկական անկախ պետություն: Կրկնությունից խուսափելու համար այստեղ չենք անդրադառնում այդ հարցին:

արտաքին մի նոր ազդակ, օտար քաղաքական տիրապետութիւնը վերացնելու և երկրի զարգացումը իր բնականոն հունի մեջ դնելու համար: Ճիշտ է, այդ ազդակն սկզբում շատ էր կողմնակի, բայց ունեցավ ուղղակի, անմիջական նշանակութիւն հայերի և Հայաստանի պատմական հետագա զարգացման համար: Այդպիսի ազդակ հանդիսացավ Ալեքսանդր Մակեդոնացու գլխավորած հունա-մակեդոնական ռազմա-քաղաքական էքսպանսիան դեպի արևելք¹⁸: Դրա մերձավորագույն հետևանքը Հայաստանի համար եղավ Աքեմենյանների լծի տապալումը, որից հետո, ազատութիւն ձեռք բերած երկիրը, ավելի քան յոթը դար տևած ժամանակաշրջանում պահպանեց իր անկախ կամ կիսանկախ քաղաքական դրութիւնը:

Տեսնենք, թե սատրապական իշխանութիւնից սոցիալ-տնտեսական ու քաղաքական ինչպիսի՞ ժառանգութիւն ստացավ Հայաստանի առաջին թագակիրը:

Ինչպես նշել ենք, սատրապութեան սահմաններից ներս Աքեմենյան սատրապն, ընդհանրապես, ուներ ռազմական ու քաղաքական լիակատար իշխանութիւն: Վարչական առումով նա իր սատրապութեան համար յուրատեսակ փոքր արքա էր, ուներ իր արքունիքը, որը մանրակերտային ձևով պետք է հիշեցնէր պարսից «արքայից արքայի» արքունիքը: Սատրապը պետք է ապահովէր ամենամյա կանոնավոր հարկերի գանձումը և դրանց առաքումը մեծ արքային: Դրանից բացի, նա իր մերձավորների պահանջները բավարարելու համար ուներ ընդարձակ հողային տիրույթներ, որոնք կառավարվում էին հատուկ պաշտոնյաների միջոցով. այդ տիրույթներում անմիջական արտադրողները ստրուկ ռազմագերիներն էին կամ աղքատացած համայնականները:

Այս առնչութեամբ մասնավորելով խոսքը Հայաստանի սատրապութեան մասին, Գ.Ա. Տիրացյանը իրավացիորեն գրում է. «Բացառված չէ, որ Հայաստանի սատրապները... Հայաստանում իրենց տիրույթներն ունեին: Քսենոփոնը հիշատակում է գյուղերով շրջապատված կամ առանձին գյուղում կանգնած երկու ապարանք-ամրոց (βασιλεια), որոնք պատկանել են սատրապին կամ նրա ենթակային (Անաբասիս, IV, 4,2,7): Մյուս սատ-

(18) Հմմտ. С.Т. Еремян, Основные черты общественного строя Армении в эллинистическую эпоху, էջ 42:

րապուլթյունների օրինակով (որտեղ, որպես կանոն, ապարանքի շրջակայքը պատկանում էր ապարանքի տիրոջը՝ հենց իրեն սատրապին կամ մեկ այլ մեծամեծի) կարելի է ենթադրել, որ Հայաստանում հիշատակված ապարանք-ամրոցների շուրջը գտնվող գյուղերը իրենց հողերով հանդերձ պատկանում էին Հայաստանի սատրապին¹⁹:

Սատրապուլթյան շրջանում Հայաստանի հասարակուլթյան կազմակերպուլթյան ձևը, ինչպես բխում է Քսենոփոնի արժանահավաստ տվյալներից, եղել է գյուղական համայնքը իր գյուղապետով՝ գեղջավագով (κωμάρχης, ἄρχων τῆς κώμης): Ն. Ադոնցի կարծիքով, Քսենոփոնի նկարագրած հայկական գյուղերը եղել են տոհմային համայնքներ, իսկ կոմարխները՝ տոհմապետեր²⁰: Մ.Տ. Երեմյանը, սակայն, վերանայելով այդ տեսակետը, ենթադրում է, որ դրանք եղել են տերիտորիալ գյուղական համայնքներ, որոնք իրար հետ կապված էին տնտեսական կապերով²¹:

Հայաստանի սատրապն իր երկիրը կառավարելու համար ուներ իրեն ստորադրյալ արշտոնյաներ: Այսպես, «Անաբասիս»-ում հիշատակվում է հյուպարքոս Տիրիբազոսը, որն իր հերթին ուներ իր ծառայողներին՝ հացարարներ և մատուվակներ²²: Օրոնտասի կողքին տեսնում ենք Արտուխասին իր զորաջոկատի հետ²³:

Բնակչուլթյունից ամենամյա հարկերը կանոնավոր կերպով հավաքելու համար Հայաստանի սատրապը, անկասկած, պետք է ունենար հարկահավաքների հատուկ մի հաստատուլթյուն, որի մասին, սակայն, աղբյուրներում մենք որևէ հիշատակուլթյան չենք հանդիպել:

Հավանաբար սատրապի արքունիքում կար նաև հատուկ գիլան իր դպիրով, որը վարում էր պետական գրագրուլթյունը: Այդպիսի ենթադրուլթյունը բխում է Եվմենեսին ուղղված Օրոն-

(19) Գ.Ա. Տիրացյան, Հին Հայկական պետուլթյան առաջացումը, ՊԲՀ, 1966, նո 4, էջ 85:

(20) Н. Адонц, Армения в эпоху Юстиниана, стр. 390-391.

(21) С.Т. Еремян, Основные черты общественного строя Армении в эллинистическую эпоху, էջ 37-38:

(22) Xenoph., Anabasis, IV, 4,4: IV, 4, 21.

(23) Նույն տեղում, IV, 3, 4.

տեսի նամակի մասին Դիոդորոսի մեզ հայտնի հաղորդումից, որի մասին արդեն խոսել ենք վերևում²⁴։ Վերջապես, Հերոդոտոսի, Քսենոփոնի, ինչպես նաև Ալեքսանդր Մակեդոնացու արշավանքների պատմությունն անող հեղինակների հաղորդումներից կարելի է եզրակացնել, թե Հայաստանի սատրապն ուներ իր զորքը, բաղկացած հայերից հավաքագրված, ինչպես նաև հարևան ցեղերից կազմված վարձկան զինվորներից։

2.- Սատրապական իշխանության փոխակերպումը քազավորական իշխանության

Աքեմենյան տերության վերջնական փլուզումից հետո, ինչպես արդեն նշել ենք, արմենական ցեղերով բնակեցված երկրները մեխանիկորեն ձեռք բերեցին քաղաքական անկախություն։ Սուլյն ուսումնասիրությունն անխորդ գլխում մենք, ընդհանուր գծերով, փորձեցինք տալ պատմական այդ ժամանակաշրջանում Հայկական բարձրավանդակում առաջացած երեք պետական միավորումների, Ծոփքի, Փոքր Հայքի և Մեծ Հայքի թագավորությունների քաղաքական պատմությունը։

Քաղաքական անկախությունն ձեռք բերելուն զուգընթաց, սատրապական իշխանությունը Հայաստանում պետք է վերածվեր թագավորական իշխանության։ Սակայն, ինչպես հետևում է աղբյուրների մանրակրկիտ ուսումնասիրությունից, կարևորագույն այդ փոփոխությունը միանգամից տեղի չի ունեցել։

Ալեքսանդր Մակեդոնացին, նվաճելով Աքեմենյանների տերությունն համարյա ամբողջ տարածքը, չվերացրեց նախկինում գոյություն ունեցող երկրի բաժանումը սատրապությունների։ Այնուամենայնիվ, Ալեքսանդրի ժամանակ արդեն նրա նշանակած սատրապների իրավասությունները զգալի չափով սահմանափակվեցին։ «Թե նրանք, — գրում է Ի.Գ. Դրոյզենը, — նշանակվում էին իրենց տերիտորիայում ոչ որպես տիրակալներ, այլ որպես պաշտոնյաներ, երևում է այն հանգամանքից, որ մինչև 306 թվա-

(24) Այս մասին մանրամասն տես՝ Գ.Ա. Տիրացյան, նույն տեղում։ Գ.Ա. Тирацян, Некоторые аспекты внутренней организации армянской сатрапии, ՊՐՀ, 1972, № 2։

կանը մենք չունենք Ալեքսանդրի թագավորության սատրապների դրամներ»²⁵:

Մակեդոնացու մահից հետո (323 թ.) նրա գլխավոր զորահրամանատարները նվաճված բոլոր երկրները բաժանեցին իրար միջև, իրենց բաժին ընկած երկրամասերում իշխելով որպես սատրապներ: Նրանցից և ոչ մեկը դեռևս չէր համարձակվում իրեն թագավոր հռչակել, քանի որ Մակեդոնացու շառավիղը դեռ ապրում էր և իշխանության գլուխ անցած մակեդոնացի սատրապները ձևականորեն չէին կարող իրենց թագավոր հայտարարել: Վերջապես, Մակեդոնիայի կառավարիչ Կասսանդրոսը 310 թվականին, սպանելով թագավորական տան վերջին ներկայացուցչին՝ Ռոքսանայից ծնված Ալեքսանդրի որդի Ալեքսանդրին, վերացրեց այդ ձևական խոչընդոտը: Ահա դրանից հետո միայն գլխավոր սատրապությունների կառավարիչներն սկսեցին իրենց թագավոր հայտարարել:

Սատրապներից Անտիգոնոս Միականին առաջինն էր, որ 306 թվականին իրեն թագավոր հռչակեց: Նրան արդեն հաջողվել էր իր որդու, Դեմետրիոս Պոլիորկետեսի հետ համատեղ, իր իշխանությունը տարածել հարավային Հունաստանի, էգեյան ծովի կղզիների, ինչպես նաև Փոքր Ասիայի մեծագույն մասի վրա: Սկիզբն արդեն դրված էր: 304 թվականին նրա օրինակին հետևեց վերջնականապես փարափոնների երկրում հաստատված Պողոմենոս Լագոսը: Շուտով իրենց թագավորներ հայտարարեցին նաև մինչ այդ սատրապներ համարվող Լիսիմաքոսը՝ Թրակիայում, Կասսանդրոսը՝ Մակեդոնիայում և Թեսսալիայում, իսկ Սելևկոս Նիկատորը՝ Բաբելոնում և Ասորիքում: Դրանից հետո է միայն, որ նրանք սկսում են դրամ հատել իրենց անուններով:

Ըստ երևույթին, արդեն քաղաքական անկախություն ձեռք բերած Հայաստանում դեպքերն ուրիշ ընթացք ստացան: Չնայած, որ դեռևս Ալեքսանդրը Սարդես քաղաքի կայսրի պետ պարսիկ Միթրիոնեսին վարձահատուկյ լինելու նպատակով (այն բանի համար, որ վերջինս առանց դիմադրության իրեն էր հանձնել կարևորագույն այդ քաղաքի միջնաբերդը), նրան նշանակել էր դեռևս չնվաճված Հայաստանի սատրապ, իսկ Մակեդոնացու մահից հետո նրա զորահրամանատարները որպես Հայաստ-

(25) И.Г. Дройзен, История эллинизма, т. I, М., 1890, էջ 129:

տանի սատրապ ճանաչում են մակեդոնացի Նեոպտոլեմոսին, այնուամենայնիվ, ինչպես արդեն նշել ենք, երկիրը փաստորեն չէր նվաճվել հունա-մակեդոնացիների կողմից: Հետևաբար, ե՛լ Միթրինեսի, ե՛լ Նեոպտոլեմոսի՝ Հայաստանի սատրապ նշանակվելը կրում էր սոսկ ձևական բնույթ: Սկզբնաղբյուրների ուշադիր ուսումնասիրությունը մեզ հանգեցնում է այն եզրակացություն, թե իշխանությունը Հայաստանում մնացել էր տեղական նախկին սատրապի՝ Օրոնտես-Երվանդի ձեռքին:

Դիոդորոսի մոտ պահպանված երկու տարբեր բնույթի վկայություն հիմք են տալիս մեզ ենթադրելու, որ Արմենիայի կառավարիչը, որը Երվանդունիների տոհմից էր, Աքեմենյանների վերջնական փլուզումից հետո իրեն հայտարարել էր թագավոր (ΒΑΣΙΛΕΥΣ) – բասիլևս), մինչդեռ հունա-մակեդոնացի զորահրամանատարների համար նա մնում էր սոսկ Արմենիայի սատրապ: Այսպես, Դիոդորոսը պատմում է, թե մ.թ.ա. 322 թվականի սկզբներին մակեդոնացիները ներխուժում են Կապպադովկիա: Երկրի ծերունի տիրակալ Արիարաթսը դիմադրում է նրանց, սակայն պարտություն է կրում և գերվում: Նրա Արիարաթես որդին փոքրիկ զորախմբով փախչում է Հայաստան և «ոչ շատ ժամանակ անց... արմենների Արդոատես թագավորից զորք ստանալով, սպանեց մակեդոնացիների զորապետ Ամյունտասին և շուտով մակեդոնացիներին դուրս վտարեց երկրից ու վերագրավեց իր հայրենի իշխանությունը»²⁶:

Սեկ ուրիշ անգամ նույն Դիոդորոսը, պատմելով 317 թվականի դեպքերի մասին, հաղորդում է, որ նախկինում Ալեքսանդր Մակեդոնացու անձնական քարտուղար, իսկ այդ ժամանակ արդեն Կապպադովկիայի սատրապ, Եվմենեսը մակեդոնացի զորահրամանատարների ժողովում, վերջիններիս համոզելու նպատակով, հրապարակում է ասորերեն գրերով (ΣΥΡΙΟΥΣ ΥΟΡΔΑΜΙΑΣ) գրված մի նամակ, որն ինքն իբր ստացել էր «Արմենիայի սատրապ Օրոնտեսից»²⁷: Այս ամենի մասին մենք արդեն հանգամանորեն խոսել ենք նախորդ գլխում:

Ուսումնասիրողն արդեն իր տրամադրությունից սակ ունի արժանահավատ երկու վավերագիր, որոնցից մեկում՝ Մեծ Հայքի և մյուսում՝ Մոփքի տերերը մ.թ.ա. III դարում կրում են թագա-

(26) Diodor., XXXI, 19, 5.

(27) Նույն տեղում, XIX, 20.

վոր (βασιλεύς) տիրողսը: Դրանցից առաջինը 1927 թվականին Արմավիրի բլրում հայտնաբերված հունարեն արձանագրություններից մեկն է (երկրորդ քարի առաջին արձանագրությունը), որում երկու անգամ հանդիպում է βασιλεύς (թագավոր) տիրողսը: Հ.Հ. Մանանդյանը իր հասուկ ուսումնասիրության մեջ այս արձանագրությունը իրավամբ դիտում է որպես Արմավիրի տաճարի քրմապետ Միթրասի, որն իրեն անվանում է նույնպես (βασιλεύς), նամակը ուղղված Երրոնտեսերվանդ թագավորին²⁸: Այս արձանագրության առաջին հրատարակիչ Ա.Ի. Բոլտուևովան ճիշտ կերպով այն մեկնաբանում է որպես «հելլենիստական նամակի սովորական ձև»: Իրոք, այդ արձանագրության բովանդակությունն ու ոճը շատ նման են թագավորների այն բազմաթիվ նամակներին, որոնք հայտնաբերվել են արձանագրությունների ձևով հելլենիստական Արևելքի երկրներում: Նշենք, սակայն, որ Ա.Ի. Բոլտուևովան սխալմամբ այդ նամակի հեղինակ համարում է ոչ թե Արմավիրի քրմապետ Միթրասին, այլ թագավոր Արտաքսիասին (Արտաշեսին)²⁹: Նրա ոչ ճիշտ մեկնաբանումը հիմք է ծառայել Ա.Գ. Բոկչանինին հանդերու այն սխալ ենթադրության, թե այս արձանագրության մեջ հիշատակված Երրոնտեսը հանդիսանում էր Կոլխիդայի թագավոր, որի հետ Արտաքսիասը իբր «մտել էր քաղաքական սերտ հարաբերության մեջ»³⁰: Մեր նախորդ աշխատություններից մեկում Արմավիրի վերոհիշյալ արձանագրության մեջ հիշատակված Միթրաս անունը համադրելով Գառնիի հունարեն արձանագրության ΗΛΙΟΣ անվան, ինչպես նաև Կոմմագենեի Անտիոքոս թագավորի՝ Նեմրուդ-լեւան վրա կառուցած հուշարձանի տվյալների հետ, ցույց ենք տվել, որ Միթրասը եղել է Արմավիրի

(28) Հ.Հ. Մանանդյան, Արմավիրի հունարեն արձանագրությունները նոր լուսարանությամբ, Երևան, 1946:

(29) А.И. Болтунова, Греческие надписи Армавира, «Արմֆանի տեղեկագիր», 1942, Նո 1-2: Ա.Ի. Բոլտուևովայի վերծանության սխալը մանրամասն ցույց ենք տվել մեր նախորդ ուսումնասիրություններում (Դիտողություններ հին Հայկական տաճարային քաղաքների առաջացման մասին, Տեղ. ՀԳԱՀԳ, 1963, Նո 9, էջ 57: Հին Հայաստանի և Փոքր Ասիայի քաղաքների պատմության դրվագներ, Երևան, 1970, էջ 134-135): Այստեղ նկատենք, որ տվյալ արձանագրության մեջ Արտաքսիասի անունը չէ հիշատակված:

(30) А.Г. Бокшанин, Парфия и Рим, ч. I, М., 1963, էջ 224)

տաճարի քրմապետի անունը³¹:

Երկրորդ վավերագիրը պղնձե այն դրամն է, որի երեսին դրոշմված է Ծոփքի թագավոր Արշամի պատկերը, գլխին կոնաձև տիարան: Դրամի հակառակ երեսին կարդացվում է՝ «ΒΑΣΙΛΕΩΣ ΑΡΣΑΜΟΥ» (թագավորի Արշամի) վերտառությունը³²: Այդ հայ թագավորի պատկերը կրող մեզ հայտնի դրամներից ամենահինն է: Մ.թ.ա. III դարի կեսերին Ծոփքում դրամ հատելու այս փաստը վկայում է այն մասին, որ հայկական ոչ մեծ այս թագավորութունը միջազգային առևտրական հարաբերություններ էր հաստատել հարևան երկրների հետ՝ մի հանգամանք, որը պայմանավորված էր առաջին հերթին այն բանով, որ Ծոփքը աշխարհագրական տեսակետից առավել մոտ էր գտնվում հելլենիստական աշխարհին, քան Հայաստանի մյուս հատվածները: Ապա և այն բանով, որ Ծոփքի միջով էր անցնում Փոքր Ասիայի ծովափնյա վաճառաչահ քաղաքները Արևելքին միացնող «արքունի ճանապարհի» մի զգալի մասը³³: Բացի այդ, իր անունով դրամ հատելն, անպայման, նշանակում էր նաև, որ Արշամը արդեն իրեն հայտարարել էր անկախ թագավոր: Հիրավի, նորագույն ուսումնասիրությունները ցույց են տալիս, որ հիշյալ Արշամը (Αρσάμης) ոչ միայն Ծոփքի թագավորն էր, այլև կոմմագենեի, քանի որ այդ ժամանակ, Ծոփքն ու կոմմագենեն կազմում էին մեկ միասնական թագավորութուն: Այս կարծիքը հաստատվում է ոչ միայն կոմմագենեի հայտնի արձանագրությամբ, այլև կոմմագենեում այս թագավորի անունը կրող գույգ Արսամեյա քաղաքների առկայությամբ: Հիշյալ արձանագրություններում այս Արշամի հայրը՝ Սամեսը (Σάμης)

(31) Մ.Մ. Կրկյաշարյան, Դիտողություններ հին հայկական տաճարային քաղաքների առաջացման մասին, էջ 57-59: Տես նաև՝ Հ.Հ. Մանանդյան, Արմավիրի հուշարեն արձանագրությունները նոր լուսաբանությամբ, Երևան, 1946: Մ.Մ. Կրկյաշարյան, Հին Հայաստանի և Փոքր Ասիայի քաղաքների պատմության դրվագներ, էջ 136-139:

(32) E. Babelon, Les rois de Syrie, d'Arménie et de Commagene, Paris, 1890, p. СХСIII.

(33) Я.А. Манандян, О торговле и городах Армении в связи с мировой торговлей древних времён, 2րդ հրատ. Երևան, 1954, էջ 31:

և հիշատակվում է որպես թագավոր³⁴: Արշամ թագավորի անունը մատենագրության մեջ հիշատակված է միայն Պոլիեմնոսի մոտ (II դար մ.թ.) «Արսաբես» ձևով: Պոլիեմնոսը նրան ընդթագրում է որպես ընկեր (φίλος Ἀρσάβης)³⁵ Անտիոքոս Հիերաքսի, որն ապստամբելով իր եղբոր՝ թագավոր Սելևկոս Բ Կալլինիկոսի դեմ, ապաստանել էր Արշամի մոտ: Հույն պատմիչը, դժբախտաբար, չի հիշատակում, թե այս Արշամը Հայաստանի ո՞ր հատվածում է իշխել: Վ. Լանգլուան³⁶ իրավացի կերպով ենթադրում է, որ նրա նստավայրը եղել է Ծոփքում գտնվող Արշամաշատ քաղաքը³⁷, որը հիշատակված է Պոլիբիոսի, Պլինիոսի և Տակիտոսի երկերում³⁸: Այս ենթադրությունը հավանական է համարում նաև է. Բաբելոնը³⁹:

Այն, որ Ծոփքի տերերը արդեն մ.թ.ա. III դարում յուրացրել էին թագավորական տիրոջուր, հետևում է նաև Անտիոքոս Գ-ի այսպես կոչված արևելյան արշավանքին վերաբերող Պոլիբիոսի հայտնի վկայությունից: Նա գրում է. «Քսերքսեսի թագավորության ժամանակ (βασιλεύοντος Ξέρξου) Արմոսատա քաղաքում, որը գտնվում է այսպես կոչված Գեղեցիկ դաշտում Եփրատի և Տիգրիսի միջև, Անտիոքոս թագավորը, քաղաքը պաշարելով վերցնելու մտադրությամբ, բանակել էր նրա մոտ»⁴⁰, Հույն պատմագրի գործածած βασιλεύοντος դերբայը (βασιλεύω) = «թագավորել» բայից) անկասկած է դարձնում այն, որ Արշամաշատ քաղաքում նստած Քսերքսեսին նույնիսկ Պոլիբիոսը, որը գրեթե ժամանակակից էր նկարագրվող դեպքերին, համարում է թագավոր:

(34) K. Humann und O. Puchstein, Reisen in Kleinasien und Nordsyrien. Textband, Berlin, 1890; K.F. Dörner, T. Goell, Arsameia am Nymphaios, "Istanbuler Forschungen", Bd. 23, 1963; Գ.Խ. Սարգսյան, Հելլենիստական դարաշրջանի Հայաստանը և Մովսես Խորենացին, էջ 31-33: Հայ ժողովրդի պատմություն, հ. 1, Երևան, 1971, էջ 512-519:

(35) Polyae., IV, 17.

(36) Langlois, Numismatique générale de l'Arménie, Paris, 1859, p. 11.

(37) Արշամաշատ քաղաքի մասին մանրամասն տես՝ Ս.Մ. Կրկյաշարյան, Հին Հայաստանի Փոքր Ասիայի քաղաքների պատմության գրվագներ, էջ 108-111:

(38) Polyb., VIII, 25, 1; C. Plinii Nat. Hist., VI, 10; Taciti Annales, XV, 10.

(39) Babelon, Նույն տեղում:

(40) Polyb., Նույն տեղում:

Այս Քսերքսեսը, հավանաբար, որդին է Ծոփքի Արշամ թագավորի, որի մասին խոսք եղավ վերևում⁴¹ և, ինչպես հետևում է Պոլիբիոսի հետագա վկայությունից, նա ժառանգել էր ոչ միայն իր հոր թագավորությունը և նրա թագավորական տիրոջը, այլև պատկառելի գումարի հասնող մի պարտք, որը իբրև հարկ Սելևկյան թագավորին վճարելուց հրաժարվել էր իրեն անկախ թագավոր հայտարարած Արշամը: Այն հանգամանքը, որ Քսերքսեսի անձնատուր լինելուց հետո Անտիոքոսը վերցնում է նրանից երեք հարյուր տաղանդ և հազար ձի ու նույնչափ ջորի իրենց լծասարքով⁴², ցույց է տալիս, որ Ծոփքի թագավորը բավական խոշոր միջոցների տեր էր:

Ծոփքի Քսերքսես թագավորի մասին մ.թ. VI դարի բյուզանդական պատմիչ Հովհաննես Անտիոքացու ժամանակագրության մեջ պահպանված մի վկայությունից հետևում է, որ նա, հետագայում, զոհ էր գնացել նույն Անտիոքոս Գ-ի մեքենայություններին և սպանվել Սելևկյան թագավորի քրոջ՝ Անտիոքիսի միջոցով, որին կնություն էր առել Քսերքսեսը⁴³: Քսերքսեսի մահով ժամանակավորապես վերանում է թագավորական իշխանությունը Ծոփքից, որտեղ, որպես Սելևկյան թագավորի սուրատեգոս-կառավարիչ հաստատվում է Ծոփքի ապագա թագավոր Զարեհը (Ζαρέαδρος):

Ծոփքի թագավորությունը վերացնելուց հետո Անտիոքոս Գ-ը մտածեց հայկական մյուս պետականությունը՝ Երվանդունիների Արարատյան թագավորությունը ևս վերացնելու մասին: Այդ նրան խիստ անհրաժեշտ էր դեպի արևելք կատարելիք արշավանքի ժամանակ իր թիկունքն ապահովելու համար: Իր այս մտադրությունը իրագործելու նպատակով նա օգտագործեց հայկական ավագանու ներկայացուցիչներից Արտաշեսին (Αρταξιάς), որը գուցե և Ծոփքի Զարեհին ազգակից էր: Սա, հավանաբար Անտիոքոս Գ-ի տրամադրած զորքերի օգնությամբ, երկարատև կռիվներից հետո, որոնց մասին վկայում են Ստրաբոնն ու

(41) Հմմտ. K.J. Beloch, Griechische Geschichte, III Band, II Abteilung, Strassburg, 1904, s. 295; J. Sandaljian, Histoire documentaire de l'Arménie, II, Rome, 1917.

(42) Polyb., նույն տեղում:

(43) Joh. Antioch., fr. 53, K. Müller, Fragmenta historicorum graecorum, IV, s. 557.

Մովսես Խորենացին⁴⁴, տապալում է Արմավիրում կամ նորահառուլց Երվանդաշատում թագավորող Երվանդ Վերջինին և հաստատվում այնտեղ որպես Սելևկյանների հպատակ ստրատեգոս-կառավարիչ: Այսպիսով, մ.թ.ա. III դարի վերջին հայկական այս երկու երկրամասերում թագավորական իշխանությունը ժամանակավորապես վերանում է:

Հունարենում ստրատեգոս (στρατηγός) բառը նշանակում է՝ «գորավար, զորքի առաջնորդ»: Եվ իրոք, Սելևկյանների տերության մեջ, ինչպես նշում է Գ.Ա. Տիրացյանը, մինչև մ.թ.ա. III դարի կեսերը ստրատեգոսները եղել են գերագանցապես զորավարներ⁴⁵: Հետագայում, Անտիոքոս Գ-ի ժամանակ, ստրատեգոսի պաշտոնն արդեն «լինվորական աստիճանից վեր է ածվում պետական, քաղաքացիական պաշտոնի, մարզի կառավարչի, որը որպես այդպիսին աստրապին ետ է մղում պետական վարչությունից, կառավարչությունից»⁴⁶: Անտիոքոս Գ-ի վարչական այս միջոցառման հիմնական նպատակը եղել է «երկրին տալ միաստարր, միասնական կառավարչական կազմվածք: Այդ պատճառով էլ ստրատեգոս տերմինն սկսում է շնորհիվ անկախ այն հանգամանքից, թե տվյալ անձնավորությունը ռեալ կապ ունի՞ր կայսրության զորքի հետ, և անտեսելով նրա հույն, մակեդոնացի կամ բնիկ լինելը»⁴⁷: Այս երևույթն իր արտահայտությունն է գտել այն փաստում, որ Ստրաբոնը Հայաստանի երկու մարզերի կառավարիչներ Արտաքսիասին և Զարիադրիսին անվանում է ոչ թե հիպարքոս կամ սատրապ, այլ Անտիոքոս Գ-ի ստրատեգոսներ⁴⁸:

Ինչպես հետագայում կտեսնենք, մ.թ.ա. I դարում Տիգրան Բ-ը, հետևելով Սելևկյանների օրինակին, իր նվաճած երկրներում հայ ազնվականության ներկայացուցիչներին (Բագարատ, Գուրաս) նշանակում է ստրատեգոս-կառավարիչ⁴⁹: Ըստ երևույթի, Սելևկյանների այս քաղաքականությունը որդեգրեցին նաև

(44) Strabo, XI 14, 15 (C. 531): Մովսես Խորենացի, Բ, 15-կր:

(45) Գ.Ա. Տիրացյան, Մովսես Խորենացու «Հայոց Պատմության» և Ստրաբոնի «Աշխարհագրության» մի քանի տվյալներ Հայաստանի ն.մ.թ. 3-2րդ դարերի պատմության մասին, ԲՄ, Նս 6, 1962, էջ 22:

(46) Նույն տեղում:

(47) Նույն տեղում:

(48) Strabo, XI, 14, 15 (C. 531).

(49) Appian Syr., 48: Plut. Lucull., XXXII.

իրենց տերուլթյան սահմաններն ընդարձակած Պոնտոսի թագավորները, որոնք իրենց ենթակա մարզերում նշանակում էին ստրատեգոս-կառավարիչներ: Այսպես, Ստրաբոնը, խոսելով իր արիստոկրատական ծագման մասին, իր նախնիների թվում հիշատակում է պոնտական թագավորուլթյան ամենահայտնի մարդկանց, որոնք Միհրդատ Եվպատորի ժամանակ զբաղեցրել են պետական բարձրագույն պաշտոններ, եղել են ստրատեգոսներ, սատրապներ և քրմապետներ⁵⁰:

Արդեն նշել ենք, որ Մոփքում՝ Ջարեհի և Մեծ Հայքում՝ Արտաշեսի ստրատեգոսի պաշտոնում նշանակվելու ակտով Հայկական լեռնաշխարհում ժամանակավորապես վերացավ թագավորական իշխանուլթյունը: Բայց շուտով, 190 թվականին, Մագնեսիայի մոտ հռոմայեցիների դեմ մղած վճռական ճակատամարտում, Անտիոքոս Գ-ի կրած ծանր պարտուլթյունից հետո, նույն Արտաշեսն ու Ջարեհը, օգտվելով արդեն ստեղծված բարենպաստ պայմաններից, իրենց հայտարարեցին անկախ թագավորներ այն երկրամասերում իսկ, որտեղ մինչև այդ իշխել էին որպես Սելևկյան թագավորի կողմից նշանակված ստրատեգոսներ:

Ստրաբոնի վկայուլթյունից պարզ կերպով հետևում է, թե նոր կազմավորված այս երկու — Մեծ Հայքի ու Մոփքի — հայկական թագավորուլթյուններից առանձնապես ուժեղանում ու բարգավաճում է առաջինը, որի թագավոր Արտաշեսը դառնում է հիմնադիրը նոր՝ Արտաշեսյան արքայատոհմի⁵¹, որի ներկայացուցիչները քիչ փառավոր էջեր չգրեցին հայ ժողովրդի պատմուլթյան տարեգրքում: Ստրաբոնի վկայուլթյունը հաստատուլթում է տեղի ունեցած դեպքերին ժամանակակից ամենահավաստի մատենագիրներից մեկի՝ Պոլիբիոսի մեզ արդեն հայտնի հաղորդման այն հատվածով, որտեղ Արտաշեսն անվանված է «Հայաստանի մեծագույն մասի տիրակալ» (ὁ τῆς πλειίστης Ἀρμενίας ἄρχων)⁵²: Արտաշեսի թագավոր հռչակվելը շրջադարձային կետ հանդիսացավ հայ ժողովրդի պատմուլթյան մեջ, ունեցավ քաղաքական կարևորագույն նշանակուլթյուն թե՛ ներքին և թե՛ արտաքին իմաստով: Հայաստանում թագավորական իշխանուլթյան հաստատումն, առաջին հերթին, հետևանք էր երկրի ներքին

(50) Strabo, XI, 2, 10 (C. 499): XII, 3, 33 (C. 557) և այլն:

(51) Նույն տեղում, XI, 14, 5 (C. 528).

(52) Polyb, XXVI, 6, 1-2.

զարգացման և, դրա հիման վրա, մեծ թափով շարունակվող հայկական էթնիկական տարրերի համախմբման:

Հայաստանում Աքեմենյանների տիրապետութայան շրջանից մինչև Արտաշեսյանների թագավորությունն ընկած ժամանակամիջոցը Հայաստանի տնտեսական կյանքում տեղի էին ունեցել լուրջ տեղաշարժեր: Այդ եզրակացությունը հետևում է պատմական այդ տարրեր շրջաններին վերաբերող երկու վկայությունից, որոնցից առաջինը մեզ հասել է Աքեմենյաններին ժամանակակից Հերոդոտոսի գրչի շնորհիվ, մյուսը՝ Ստրաբոնի: Ելնելով այդ վկայությունների կարևորությունից, անհրաժեշտ ենք գտնում դրանք մեջ բերել բնագրից կատարած մեր թարգմանություններ:

«Նավերը, — պատմում է Հեսողոտոսը, — որոնցով (ասորեստանցիները) նավում են գետն ի վար դեպի Բաբելոն, կլոր են և ամբողջովին կաշեպատ: Արմենիայում, որը գտնվում է Ասորեստանից վերև, նրանք կարում են ուռիներ, (որոնցով) պատրաստում են նավի կողերը. դրանց կողերը պատում են կաշվե ծածկով, նավի հատակի նման: Նրանք ոչ նավի ետնամասն են լայնացնում, ոչ էլ նրա առաջամասը նեղացնում, այլ տալիս են դրան վահանի նման կլոր ձև: Ամբողջ նավը լցնում են ծղոտով, բեռնում այն և թողնում հոսանքն ի վար: Նրանք մեծ մասամբ փոխադրում են գինի կարմիր կարասներով»⁵³: Իսկ Ստրաբոնը, խոսելով նախարչակունյան Հայաստանի առևտրի մասին, գրում է. «Կոմանան բազմամարդ քաղաք է և հանդիսանում է Հայաստանից եկածների հայտնի վաճառատեղին»⁵⁴: Այս երկու վկայությունների համեմատությունից բխում է, որ եթե Հերոդոտոսի ժամանակ, երկրի տնտեսությունը համեմատաբար թույլ էր զարգացած և Հայկական լեռնաշխարհի ու Բաբելոնի միջև կատարվող առևտրի միջնորդները ասորեստանցի առևտրականներն էին, ապա Ստրաբոնի ժամանակ, մոտավորապես հինգ հարյուրամյակ հետո, երկրի տնտեսությունն արդեն այնքան էր զարգացել, որ հայերն իրենք էին անմիջականորեն զբաղվում ներքին

(53) Herod., I, 194.

(54) Strabo, XI, 5, 8 (C. 506): XII, 3, 36 (C. 559).

և արտաքին առևտրով⁵⁵;

Հայկական բարձրավանդակում արտադրողական ուժերի հետագա աճի և, այդ հիման վրա, առևտրի զարգացման պատմական պրոցեսի արագացմանը մեծ չափով նպաստեցին Ալեքսանդր Մակեդոնացու արչավանքների հետևանքով Աքեմենյանների լծի տապալումը, ինչպես նաև Աքեմենյան նախկին սատրապուլթյունների ավերակների վրա Մերձավոր Արևելքում մի շարք նոր, հելլենիստական տիպի պետուլթյունների (Պոնտոս, Կապադովկիա, Բյուլթանիա և այլն) առաջացումը, որոնք, հակառակ յուրաքանչյուր երկրի բնակչուլթյան էթնիկական առանձնահատուկուլթյուններից բխած որոշ տարբերուլթյուններին, այնուամենայնիվ, ունեին հիմնականում միատեսակ սոցիալ-տնտեսական և քաղաքական կարգեր:

Եթե մինչ այդ, կլասիկ կոչված շրջանում, Հունաստանում և Փոքր Ասիայում պետական կազմակերպուլթյան գերակշռող ձևը քաղաք-պետուլթյունն էր, պոլիսը, ապա Ալեքսանդր Մակեդոնացու նվաճումներից հետո ընկած պատմական ժամանակաշրջանում, որն ընդունված է անվանել ընդհանրապես հելլենիզմ, պետական կառուցվածքի եթե ոչ համընդհանուր, ապա գերակշռող ձևը դառնում է տերիտորիալ միապետուլթյունը, թագավորների գլխավորուլթյամբ: Մենք տեսանք, որ Հայկական լեռնաշխարհում ևս այդ ժամանակ առաջանում է Երվանդունիների հայկական թագավորուլթյունը, որի հիման վրա հետագայում կազմավորվում է Արտաշեսյանների հելլենիստական թագավորուլթյունը:

Այս առթիվ անհրաժեշտ ենք համարում հիշեցնել, որ Արևելքի համար հելլենիստական պետուլթյունը երբեք չի կարելի պատկերացնել որպես հելլենների պետուլթյուն: Նորաստեղծ այս հելլենիստական թագավորուլթյունները նույնպես արևելյան տիպի պետուլթյուններ էին, պատմական զարգացման նոր փուլին համապատասխան, որտեղ, սակայն, հելլենների դերը եղել է

(55) Այս մասին տվելի մանրամասն տես Ս.Մ. Կրիկյաչարյան, Դիտուլթյուններ հին հայկական սաճարային քաղաքների առաջացման մասին, էջ 64-65: Նույնի հին Հայաստանի և Փոքր Ասիայի քաղաքների պատմուլթյան դրվագներ, էջ 180-185, որտեղ քննադատել ենք ցարդ կատարված սխալ թարգմանուլթյունները:

շողափելի, հատկապես տնտեսական ու մշակութային առումով⁵⁶:

Արդ, ինչ նկատելի տարբերություն կար Երվանդունիների և դրան հաջորդած Արտաշեսյանների հայկական թագավորության կառուցվածքի միջև: Ինչո՞վ էին տարբերվում իշխանության գլուխ կանգնած Արտաշեսյան թագավորի իրավասությունները իր նախորդի՝ Երվանդունի թագավորի իրավասություններից: Սկզբնաղբյուրները համարյա լուռն են այդ մասին: Այնուամենայնիվ, աղբյուրների ազոտ տվյալների և անորոշ ակնարկությունների հիման վրայ կփորձենք որոշ համեմատություններ անել, այդ հարցին ինչ-որ չափով պատասխանելու նպատակով:

Նախորդ էջերում մենք խոսեցինք սատրապական Հայաստանում գոյություն ունեցած մի շարք հաստատությունների մասին, որոնք, բնական է, սատրապ Օրոնտեսից պլուտի ժառանգեր թագավոր Երվանդը:

Երվանդունի թագավորի մասին Դիոդորոսի հաղորդած չփոթ տեղեկություններից հետո, որոնց մասին արդեն խոսք է եղել նախորդ հատվածներում, վավերական առաջին տվյալը Արմավիրի հունարեն այն արձանագրությունն է, որի մասին նույնպես մեկ անգամ խոսել ենք վերևում: Մեզ հետաքրքրող հարցին անցնելուց առաջ, անհրաժեշտ ենք համարում մեջ բերել այդ արձանագրությունն ամբողջությամբ: Այնտեղ կարդում ենք:

Ο ΒΑΣΙΛΕΥΣ ΑΡ
ΜΑΔΟΕΙΡΩΝ
ΜΙΘΡΑΣ Ε(Β)ΡΟΝΤΗ
ΒΑΣΙΛΕΙ ΧΑΙΡΕΙΝ
(Ε)Ι ΕΡΡΩΣ ΕΥ ΑΝ ΕΧΟΙ
ΥΓΙΑΙΝΕΙΝ ΔΕ ΚΑΙ ΤΑ ΕΓ
ΓΟΝΑ ΑΥΤΟΥ ΥΓΙΑΙ
ΝΩΝ ΤΗΝ ΒΑΣΙΛΕΙ
ΑΝ ΔΙΑΤΕΛΕΣΕΙΣ
ΤΕ ΣΙΒΙΟΥ

Δ

(56) Հայ ժողովրդի պատմություն, հ. 1, Երևան, 1971, էջ 406 և հաջ.:

ինչպես նկատելի է, արձանագրության մեջ, որը քրմապետի նամակն է թագավոր Եբրոնտեսին, երկու անգամ (առաջին և չորրորդ տողերում) օգտագործված է բասիլևս — «թագավոր» բառը և մեկ անգամ՝ (8-9րդ տողեր) բասիլեյա — «թագավորություն, թագավորական իշխանություն» բառը: Առաջին դեպքում երրորդ տողում նամակի հեղինակ, Արմավիրի տաճարի քրմապետ Միթրասը (ΜΙΘΡΑΣ)⁵⁷ ինքն իրեն անվանում է բասիլևս: Երկրորդ դեպքում Միթրասը, դիմելով Եբրոնտեսին, որն անկասկած հայկական աղբյուրների Երվանդն է, նրան անվանում է նույնպես թագավոր: Այն հանգամանքը, որ քրմապետը իր ուղերձում իրեն ևս համարում է թագավոր, ինչպես Եբրոնտեսին, թույլ է տալիս ենթադրելու, որ Հայաստանում, դասակարգային շերտավորման դեռևս համեմատաբար թույլ լինելու պայմաններում, Երվանդունի թագավորի իշխանությունը տակավին բացարձակ էջր, որ դեռևս նրա կողքին կային քրմապետներ ու ցեղերի առաջնորդներ, որոնք նույնպես իրենց համարում էին թագավորներ:

Արմավիրի արձանագրության այս Եբրոնտեսը, ամենայն հավանականությամբ, հունական աղբյուրներում կցկտուր կերպով հիշատակված Հայաստանի աստրապ, հետագայում, Աքեմենյանների տապալումից հետո, թագավոր, Օրոնտեսների վերջին ներկայացուցիչն է եղել: Սա, անկասկած, Մովսես Խորենացու Երվանդն է, որը պատմահոր մոտ կիսապատմական-կիսավիպական անձնավորություն է: Խորենացին այս Երվանդի պատմությանը նվիրել է իր մատյանի երկրորդ գրքի 15-իսգ գլուխները:

Պատմահայրը Երվանդ Վերջինի գահակալությունը վերագրում է երկու տարբեր ժամանակների: Մի անգամ նա Երվանդի թագավորությունը դնում է «յոթերորդ ամի Դարեհի վերջնոյ»⁵⁸: Սակայն, ոչ պարթև Արշակունիների, և ոչ էլ Սառանյանների մեջ Դարեհ անունը կրող որևէ թագավոր մեզ հայտնի է: Պատմությանը հայտնի են Դարեհ անունը կրող ընդամենը երեք թագավոր, որոնք պատկանում էին մ.թ.ա. VI-IV դարերում

(57) Միթրասի մասին հանգամանորեն տես՝ Ս.Մ. Կրյաշարյան, Դիտողություններ հին հայկական տաճարային քաղաքների առաջացման մասին, էջ 57-59: Նույնի, Հին Հայաստանի և Փոքր Ասիայի քաղաքների պատմության գրվագներ, էջ 134-139:

(58) Մովսես Խորենացի, Բ, 15:

իշխած Աքեմենյան տոհմին: Եթե ընդունենք, իսկ չընդունել
 չենք կարող, որ այս Դարեհ Վերջինը կողմանոսն է (336-331
 թթ.), որի թագավորությանը վերջ դրեց Ալեքսանդր Մակեդոն-
 ացին, ապա պիտի ենթադրել, որ Խորենացին իրոք նկատի ունի
 Երվանդյան թագավորներից մեկն ու մեկին: Մեր այս ենթա-
 դրության օգտին խոսում է նաև այն փաստը, որ նույն Խորե-
 նացու պատմելով, Երվանդին կործանում և նրան հաջորդում է
 ոչ այլ ոք, քան Արտաշեսը⁵⁹: Այս տվյալները լիովին համընկ-
 նում են Ստրաբոնի հավաստի այն վկայությանը, թե Հայաս-
 տանում «վերջին իշխողն էր յոթը պարսիկներից մեկի, Հյու-
 դարների շառավիղ Օրոնտեսը: Այնուհետև երկիրը բաժանվեց
 երկու մասի հռոմայեցիների դեմ պատերազմած Անտիոքոս Մեծի
 ստրատեգոսների՝ Արտաքսիասի և Ջարիադրիսի կողմից: Եվ իշ-
 խում էին նրանք թագավորի հանձնարարությամբ, իսկ նրա
 պարտությունից հետո հարելով հռոմայեցիներին՝ իշխեցին իրենք
 առանձին և թագավոր հայտարարվեցին»⁶⁰: Հ.Հ. Մանանդյանը
 նույնպես գտնում է, որ Խորենացու հիշատակած Երվանդը Ար-
 տաշեսի նախորդ Երվանդ Վերջինն է⁶¹: Իր մատյանի հաջորդ
 գլխում, սակայն, պատմահայրը նույն այս Երվանդին համարում
 է Հռոմի կայսրներ Վերպասիանոսի (69-79 թթ.) և Տիտոսի (70-
 81 թթ.) ժամանակակից⁶²: Այս դեպքում արդեն Խորենացու
 ժամանակագրական վրիպումն ակներև է. քանի որ, Վեսպասիա-
 նոսին ու Տիտոսին ժամանակակից պատմիչներ Հովսեպոս Փրավ-
 իոսի և Տակիտոսի, ինչպես նաև II դարի հեղինակներ Սվետոնիոս
 Տրանկվիլի ու Դիոն Կասիոսի համապատասխան վկայություն-
 ների համաձայն⁶³, այդ թվականներին Հայաստանում թագավո-
 րում էր Տրդատ Ա Արշակունին, Արշակունյաց հարստության
 հիմնադիրը Հայաստանում:

Հ.Հ. Մանանդյանը, անդրադառնալով Խորենացու այս վրի-
 պումին, իրավացի կերպով գրում է. «Բայց մեր պատմահայրը,

(59) Մովսես Խորենացի, Բ, իդ-իսգ:

(60) Strabo, XI, 14, 15 (C. 531).

(61) Հ.Հ. Մանանդյան, Քննական տեսություն ..., հ. Ա, էջ 126:

(62) Մովսես Խորենացի, Բ, ԼԷ:

(63) 'Ιωσηπος Φλαύιος, Περί 'Ιουδαϊκοῦ πολέμου, VII, 249; C. Taciti Annales, XIII, 34-40; XIV, 26; XV, 24-30; XVI, 23-24; C. Suetonii Tranquilli, De vita XII Caesarium, Nero, 12, 1; Cass. Dio, L XIII, 1-8.

օգտվելով, հավանորեն, բացի վիպասանքից նաև այլ մեզ անհայտ աղբյուրներից՝ Երվանդի ու Արտաշեսի ընդարձակ պատմությունը հերյուրել է և շարադրել, բնականաբար ըստ իր ըմբռնման ու փամանակագրության, շփոթելով Օրոնտես-Երվանդին Եղեսիայի Արգար է թագավորի որդու՝ Արրանդեսի (Ἀρβάντης) հետ, որը փամանակակից էր Տրայանոս կայսեր (96-117 թթ.)⁶⁴:

Ըստ երևույթին, Խորենացին այս Երվանդին չի համարում օրինական թագավոր, քանի որ նա թագավորել է «առանց արանց յագգէն Բագրատունեաց լինել թագադիր»⁶⁵, այսինքն, չի թագադրվել Բագրատունի ասպետի կողմից: Այն, որ թագադրման ակտը առաջնահերթ նշանակություն ուներ հայոց թագավորի իշխանություն օրինականությունը հաստատելու համար, կարելի է հետևյալից նաև Խորենացու այն հաղորդումից, որի համաձայն վաղարշակ թագավորը, իր թագավորությունը կազմակերպելիս և նախարարությունները հաստատելիս, առաջին հերթին կարգավորում է ինքն իրեն և իր տունը, սկսելով իր գլխից ու թագից և Բագրատին նշանակում է թագադիր ասպետ:

«Արդ՝ նախ և առաջին, — գրում է Խորենացին, — օրինադրէ թագաւորն գինքն և գտուն իւր, սկիզբն առնելով ի գլխոյ իւրմէ և ի թագէ: ... Եւ իշխել նմա (Բագրատին — Ս.Կ.) թագ ի գլուխ դնել թագաւորին, և կոչել թագադիր, այլ և սպսեա»⁶⁶:

Թագադրման ակտը ոչ միայն օրինականացնում էր տվյալ թագավորի իշխանությունը, այլև միաժամանակ հաստատում էր թագադրողի և թագադրվողի, այն է՝ քրմապետի և թագավորի դասինքը և համագործակցությունը երկրի կառավարման գործում:

Պատմահոր տվյալներով, Երվանդը, որպես թագավոր, քաղաքական ու տնտեսական ոչ մի աչքի ընկնող միջոցառում չի ձեռնարկել, բացի այն, որ իր համար նոր մայրաքաղաք կառուցելիս, երկրի վարչա-քաղաքական կենտրոնը անջատել է պաշտամունքային կենտրոնից, ինչպիսին մինչ այդ հանդիսանում էր նախկին մայրաքաղաք Արմավիրը: Այդ մասին Խորենացու մոտ

(64) Հ.Հ. Մանանդյան, նույն տեղում: Հմմտ. նաև Г. Халатяни, Армянский эпос в «Истории Армении» Моисея Хоренского, М., 1896, էջ 219 և 226:

(65) Մովսես Խորենացի, Բ, լե:

(66) Նույն տեղում, Բ, լ:

կարգում ենք. «Բայց Երուանդայ շինեալ զքաղաքն իւր և փոխեալ անդր զամենայն ինչ յԱրմաւրայ, ուրոյն ի կրոցն, զոր ոչ օգուտ իւր համարեալ յիւրն փոխել ի քաղաքն, զի մի ի գալ և ի զոհել անդր աշխարհի՝ ոչ զգուշուլթեամբ պահեսցի քաղաքն. այլ հեռագոյն ի նմանէ իբր քառասուն ասպարիսաւ զհիւսիսով՝ նման իւրոյ քաղաքին շինեաց քաղաք փոքր ի վերայ գետոյն Ախուրենայ, և անուանեաց Բագարան, այս ինքն թէ ի նմա զբազնաց յօրինեալ է զկազմութիւն, և փոխեաց անդր զամենայն զկուռսն որ յԱրմաւիր: Եւ մեհեանս շինեալ զեղբայր իւր զԵրուազ քրմապետ կացուցանէր»⁸⁷: Գահակալման այս դեպքը հիմք է տվել Ս.Տ. Երեմյանին ենթադրելու, որ «Երվանդունիների տոհմում ավագ եղբայրը ժառանգում էր թագավորական գահը, իսկ կրտսերը դառնում էր Արմավիրի քրմապետը»⁸⁸: Նշենք, սակայն, որ աղբյուրներից մեզ հայտնի այս միակ փաստի հիման վրա նման անվերապահ եզրակացության հանգելը դերևս վաղ է: Թագավոր Երվանդը երկրի կրոնական կենտրոնը Արմավիրից փոխադրում է ոչ թե իր նոր հիմնադրած Երվանդաշատ թագավորանիստը, այլ Բագարան, ըստ երևույթին, տաճարների և քրմերի հետագա հզորացումը կանխելու նպատակով, քանի որ Հայաստանում տաճարների սնտեսական հզորությունը և դրա նետ միասին նրանց քաղաքական ազդեցությունը, հավանաբար աճելով, սկսում էր հասնել թագավորական իշխանության համար վտանգավոր չափերի: Երվանդի այս քայլն առնելու պատճառներից մեկն էլ, անկասկած, տոնախմբությունների ժամանակ ժողովրդական հավանական ընդվզումների վախն է եղել — «զի մի ի գալ և ի զոհել անդր աշխարհի՝ ոչ զգուշուլթեամբ պահեսցի քաղաքն»:

Մեր քննարկած հարցի կապակցութեամբ թագավորանիստը պաշտամունքային կենտրոնից անջատելու երևույթն ունի կարևոր նշանակություն: Պիտի ենթադրել, որ երկրի վարչաքաղաքական կենտրոնը պաշտամունքայինից անջատելը և այնտեղ, որպես քրմապետ, Երվազին նշանակելը հետևանք էր երկրում առաջացած յուրատեսակ երկիշխանության: Մենք այս ենթադրությունն անում ենք ելնելով երկու փաստից: Արմավիրի վերոհիշյալ արձանագրության մեջ հիշատակված են, ինչպես

(87) Նույն տեղում, Բ, խ:

(88) С.Т. Еремян, Основные черты ..., էջ 62:

տեսանք, երկու թագավոր, որոնցից մեկը քրմապետն է, մյուսը՝ Եբրոնտես-Երվանդը: Այնուհետև, խորենացու պատմելով, Սմբատը Արտաշեսից հրաման է ստանում «երթալ յամուրն Բագարան, որ հուպ ի քաղաքն Երուանդայ ի վերայ Ախուրեան գետոյ, զի սպանցէ զԵրուազ զեղբայր Երուանդայ»⁶⁹: Ըստ երևույթին, թագավոր Երվանդին սպանելով չէր կարելի գործը ավարտված համարել: Որպեսզի Արտաշեսը կարողանար վերցնել թագավորական իշխանութիւնը Երվանդուհիների ձեռքից, անհրաժեշտ էր ոչընչացնել նաև երկրորդ թագավորին՝ քրմապետ Երվազին:

Մեր մատնանշած երկիշխանութիւնն այս երևույթը Երվանդուհիների Հայաստանում աղերսվում է, մի կողմից, պատմական նույն այս ժամանակաշրջանում Հայաստանի հարևան երկրներում տիրող դուռթկանք, որտեղ, Ստրաբոնի վկայութեամբ, «քուրմը թագավորից հետո երկրորդ անձնավորութիւնն է և ... մեծ մասամբ նույնիսկ թագավորներն ու քրմերը պատկանում են միևնույն տոհմին»⁷⁰, մյուս կողմից, հելլենիստական թագավորութիւններում լայնորեն տարածված գահակցութիւնն երևույթին, երբ հայր ու որդի և կամ երկու եղբայր գահակից են հայտարարվում:

Արտաքին ազդեցութիւնները հնարավորութիւնն չեն տալիս դատելու երկրի ներսում Երվանդուհի թագավորների ձեռնարկած որևէ վարչական միջոցառման մասին: Այդ առնչութեամբ սոսկ աղոտ ակնարկութիւնների կարելի է հանդիպել խորենացու մոտ: Պատմահոր հաղորդումներից կարելի է եզրակացնել, թե Երվանդ Վերջինը փորձել է վարչական ինչ-որ բարեփոխութիւններ կատարել, իր երերվող իշխանութիւնը ամրապնդելու նպատակով, սակայն անհաջող: Խորենացին պատմում է, թե Երվանդը, տեսնելով, որ նախարարները լքում են իրեն և անցնում Արտաշեսի կողմը, «առաւել ևս յորդագոյն տայր գպարգևան, և բաշխէր միոյ միոյ ումեք ի նոցանէ զգանձան. և որչափ շատ տայր շատ ևս ատելի լինէր: Քանզի գիտէին ամենեքեան, եթե ոչ առ առա-

(69) Մովսես Խորենացի, Բ, խր:

(70) Strabo, XII 2, 3 (C. 535): Հմմտ. նաև Strabo, XII, 3, 32 (C. 557) և XI 4, 7 (C. 503): Այս մասին հանդամանորեն տես Ս.Մ. Կրկյաշարյան, Դիտողութիւններ հին հայկական տաճարային քաղաքների առաջացման մասին, էջ 56-81: Նույնի, Հին Հայաստանի և Փոքր Ասիայի քաղաքների պատմութիւնն զրվագներ, էջ 126-143:

տութեան տայ, այլ առ երկիւղի վատնէ: Եւ ոչ այնչափ սիրելի զայնոսիկ առնէր, որոց շատն տայր, քան թէ թշնամի զայնս՝ որոց ոչն տայր պերճագոյնս»⁷¹:

Խորենացու պատմելով, Երվանդի և Երվազի սպանությունից հետո Հայաստանի գահն անցնում է Արտաշեսին: Ի դեպ նշենք, որ պատմահոր մոտ Արտաշեսի գահակալության տարիները ևս չփոթված են, քանի որ խախտված են նրա նախորդի Երվանդի թագավորության տարիները: Ըստ Խորենացու, Երվանդի թագավորությանը անմիջապես փոխարինում է Արտաշեսի գահակալությունը: Մինչդեռ, ինչպես տեսանք, այդ դեպքերին առավել ժամանակակից օտար աղբյուրների համաձայն, Երվանդունիների կործանումից հետո, կարճ ժամանակով, վերանում է Հայաստանում թագավորական իշխանությունը և Հայաստանը վերածվում է Սելևկյան թագավորներին ենթակա մարզի՝ ստրատեգիայի, ստրատեգոս-կառավարչի տիրապետության տակ: Բայց այս դրությունը տևում է ոչ երկար, հավանաբար երկու տասնամյակից էլ պակաս: Շուտով Մոսիքում Չարեհը, իսկ Մեծ Հայքում Արտաշեսն իրենց հայտարարում են թագավորներ: Հիմք է դրվում Արտաշեսյան թագավորությանը: Թե՛ օտար և թե՛ հայկական աղբյուրներում համեմատաբար ավելի լայն տեղեկություններ կան Արտաշեսյանների թագավորության մասին, որոնց քննարկումը մեզ հնարավորություն կտա որոշ եզրակացություններ անելու թագավորական իշխանության ֆունկցիաների մասին Հայաստանում:

Արտաշեսի մասին եղած պատմական առաջին հիշատակության համար մենք պարտական ենք Պոլիբիոսին, որի մոտ Արտաշեսը (Ἀρταξίας) դասված է Փոքր Ասիայի դինաստիաների տիրակալների շարքում և անվանված է «Հայաստանի մեծագույն մասի «ἄρχων»⁷²: Վերջին ἄρχων (արքոն) բառը հունարենում նշանակում է տիրոջ, թագավոր, ուստի և մենք այն նույնացրնում ենք «արքայ» հասկացողությանը: Արտաշեսին թագավոր (βασιλεύς) են անվանում նաև Դիոդորոս Սիկիլիացին, Ստրա-

(71) Մովսես Խորենացի, Բ, խե:

(72) «... Περιελήφθησαν δέ ταῖς συνθήκαις τῶν μὲν κατὰ τῆς Ἀσίας δυναστῶν Ἀρταξίας ὁ τῆς πλείστης Ἀρμενίας ἄρχων» (Polyb., XXV, 1, 12).

բոնը և Ապպիանոսը⁷³: Հատկանշական է, որ Ստրաբոնը Օրոնտեսներին (Երվանդունիներ) համարում է ինքնակոչ Գառմատային տապալած յոթը պարսիկներից մեկի, Հյուսիսարևելյան շառավիղի⁷⁴, նշանակում է նրանց չի համարում տեղական, հայկական արքայատոհմ: Մինչդեռ Արտաշեսին Ապպիանոսը համարում է հայ արմեն (Ἀρταξίαν τὸν Ἀρμένιον)⁷⁵: Արտաշեսյաններին հայ է համարում նաև Ստրաբոնը, որը Տիգրանի Կապպադովկիա կատարած արշավանքի մասին խոսելիս, նրան անվանում է Տիգրան հայ (Τιγράνης ὁ Ἀρμένιος)⁷⁶, իսկ մեկ այլ դեպքում նույնիսկ առանց անունը տալու, Տիգրանի որդի Արտավազդին նա պարզապես անվանում է հայ (Ἀρμένιος)⁷⁷:

Այսուհանդերձ, եթե բացառենք Արտաշեսի կողմից Արտաշատ մայրաքաղաքի կառուցման մասին Ստրաբոնի, Պլուտարքոսի և Դիոդորոսի հաղորդումները, ինչպես նաև վերջինիս այն վկայությունը, թե Արտաշեսը, «ժողովեց հզոր արանց»⁷⁸, ապա, ինչպես արդեն նկատել ենք, օտար հեղինակները անդրադարձել են հայոց Արտաշես թագավորի արտաքին քաղաքականությունը ասպարեզում ունեցած գործունեությունը միայն: Արտաշեսի ժամանակ Հայաստանում կատարված ներքին վարչատնտեսական բարեփոխությունների մասին մեզ հասած հաս ու կտոր տեղեկությունների համար, մենք դարձյալ պարտական ենք Մովսես Խորենացուն և, մասամբ, իր իսկ Արտաշեսի թողած նորահայտ արամեատառ վիճակն արձանագրություններին:

Սկզբից ևեթ նշենք, որ պատմահոր մոտ Արտաշեսի անձնավորությունը շփոթված է այլ թագավորների հետ և նրան վերաբերող վկայությունները հաճախ պարուրված են առասպելական շղարշով: Սակայն, ժամանակագրական հաշվումներից ելնելով, ենթադրում ենք, որ Խորենացու մոտ հիշատակված հայոց թագավոր Վաղարշակ Ա Արշակունին պետք է դիտվի որպես արտաքին աղբյուրներում բազմիցս հիշատակված պատմական

(73) Diod., XXXI, 17a; 27a; Strabo, XI, 14, 15; Appiani Syr., 40 և 46.

(74) «Τελευτατος δ' ὑπηρξεν Ὀρόντης ἀπόγονος Ὑδάρονου τῶν ἐπτὰ Περσῶν ἐνόσ» Strabo, XII, 2, 9.

(75) Appiani Syr., 45.

(76) Strabo, XII, 1, 28.

(78) Նույն տեղում, XI, 14, 6: Diodor., XXXI, 17a.

Արտաշեսը⁷⁹: Նախ՝ որովհետև Վաղարշակը, ըստ Խորենացու, հանդիսանում է հայկական թագավորության հիմնադիրը, մինչդեռ այդպիսին, արտաքին աղբյուրների համաձայն, եղել է Արտաքսիաս-Արտաշեսը: Ասած Վաղարշակին վերագրված գահակալության ժամանակը մոտավորապես համընկնում է պատմական Արտաշեսի թագավորության տարիներին: Այսպես, Մովսես Խորենացին վկայում է, որ «յետ վաթսուն ամի մահուանն Ալեքսանդրի թագավորէ ի վերայ Պարթևաց Արշակ քաջ»⁸⁰: Պատմագրության մեջ Արշակի գահակալման տարեթիվն ընդունված է մոտ 250 թվականը, իսկ Խորենացու տվյալներով ստացվում է 323-ից (Մակեդոնացու մահվան տարեթիվը) կամ 312/311-ից (Սելևկյան տոմարի սկիզբը) հանած 60՝ 263 կամ 252-251 թվականը: Նա իշխում է «ամս երեսուն և մի, և յետ նորա Արտաշէս, որդի նորա ամս քսան և վեց, զսա պայագատէ նորին որդի Արշակ, որ կոչեցաւ մեծ»⁸¹: Ահա այս Արշակն է, որ, ըստ Խորենացու, «թագաւորեցուցանէ զեղբայր իւր Վաղարշակ մերոյ աշխարհի»⁸²: Արդ՝ եթե Արշակ Ա-ի գահակալման տարուց հանենք նրա և նրա որդու թագավորության տարիները (263/252-31-26), կստացվի 206/195 թվականը, որը Արշակ Մեծի գահակալման տարեթիվն է ըստ Խորենացու: Այս Արշակի 40-րդ տարում թագավորում է Վաղարշակը. ուստի՝ 206/195-40=166/155 թ.: Մեկ ուրիշ առիթով, Խորենացին ավելի մանրամասն ժամանակագրական տվյալներ է հաղորդում Վաղարշակի գահակալության տարեթվի մասին: «Եւ ի նոցանէ, – գրում է Խորենացին, – Արշակ քաջ, որ ապատամբեալ ի Մակեդոնացուց՝ թագաւորեաց յերկրին Քուշանաց ամս երեսուն և մի, և յետ նորա որդին նորին Արտաշէս ամս քսան և վեց, սարս Արշակ նորին որդի, որ կոչեցաւն մեծ, որ զԱնտիոքոսն եսպան և զՎաղարշակ զեղբայր իւր թագաւոր կոցոյց Հայոց, երկրորդ իւր աւնելով: Եւ ինքն լուեալ ի Բահլ՝ հաստատեաց զթագաւորութիւնն իւր ամս

(79) Ա. Գ. Փերիխանյանը նշում է, որ Վաղարշակի կերպարում միակցված է պատմական երկու դեմք՝ Արտաշես Ա-ը և Տրդատ Ա-ը (Ա. Գ. Սերիանյան, Древнесармянские востаники, ВДИ, 1956, №2, стр. 51, примеч. 3):

(80) Մովսես Խորենացի, Բ, ր:

(81) Նույն տեղում:

(82) Նույն տեղում, Բ, գ:

յխտուն և յերիս ...: Յետ Արշակայ մեծի առնու զթագաւորութիւն նորա Արշական, յերեքասաներորդի ամի Վաղարշակայ ...»⁸³: Այս տվյալների հիման վրա դարձյալ ունենում ենք, 263/252-31-26-26-53+13=166/155 թվականը: Ինչպես տեսնում ենք, այս դեպքում ևս ժամանակագրական տարբերությունը Խորենացու Վաղարշակի և պատմական Արտաշեսի գահակալման միջև մեծ էի լինում, շուրջ քսուորդ դար⁸⁴:

Այս առնչությունները տեղին է նշել ևս մի հանգամանք: Պոնտոսում, Փուլսեպոլիսում և Ղազիկայում Վաղարշակի մղած պատերազմը, որի մասին պատմում է Խորենացին⁸⁵, շատ բանով հիշեցնում է Պոնտոսի թագավոր Փառնակեսի դեմ Արտաշեսի մղած պատերազմը, որի մասին ակնարկում է Պուլբիոսը⁸⁶:

Վաղարշակ-Արտաշես նույնությունը ավելի հավանական է դառնում, եթե հաշվի առնենք Մովսես Կաղանկատվացու այն վկայությունը, թե «ի նոյն Պարթևաց, որք ի Վաղարշակայ մինչև ցԱրտաշիր՝ Վուամշապհոյ որդի, թագավորք Հայոց քսան և վեց, իսկ ամք վեց հարիւր քսան»⁸⁷: Ահա այս 620-ից եթե հանենք Արշակունյաց թագավորության վերացման թվականը՝ 428, ստանում ենք 192, այն է՝ գրեթե Արտաշեսի գահակալության նույն թվականը՝ 190/189:

Ի տարբերություն Երվանդունիների, որոնք նախապես հանդիսանալով Աքեմենյան արքայից արքայի կողմից Հայաստանում նշանակված ասորապներ, հետագայում, բարենպաստ հանգամանքների բերումով, դառնում են անկախ տիրակալներ, Արտաշեսը, ինչպես այդ երևում է Ստրաբոնի և Խորենացու վկայություններից, Հայաստանի ամեն մի թիզ հողին տեր էր

(83) Մովսես Խորենացի, Բ, կր:

(84) Այստեղ մեր նպատակից դուրս է միջամտել Խորենացու ժամանակագրության առնչությունները հայագետների միջև առաջացած տարաձայնություններին: Սակայն, մեզ հետաքրքրող տվյալ հարցի առիթով հիշեցնենք, որ Վաղարշակի գահակալության տարեթիվը ստատսվում է տարբեր հայագետների մոտ: Այսպես ըստ Մ. Չամչյանի՝ մ.թ.ա. 149 թ., ըստ Սեն Մարտենի՝ 152, ըստ Գուտշմիտի և Գ.Խ. Սարգսյանի՝ 153, ըստ Մ. Էմինի՝ 144՝ ըստ Բ. Պատկանյանի՝ 132, ըստ Թ. Ավդալբեկյանի՝ 135 և ըստ Լ.Փ. Շահինյանի՝ 134:

(85) Մովսես Խորենացի, ր, դ-է:

(86) Polyb., XXVI, 6, 1-12.

(87) Մովսեսի Կաղանկատվացույ Պատմութիւն Աղուանից աշխարհի, գլխ. Կ:

դարձել Երվանդի, ինչպես նաև վերջինիս գահակալության ժամանակ հայաբնակ մի շարք շրջաններին տիրացած սահմանակից թագավորների դեմ մղած դաժան կռիվներից հետո: Հետևաբար, նա կարող էր Հայաստանը դիտել իբրև իր նիգակով նվաճված երկիր: Այսպիսի երևույթը հաճախ է հանդիպում հելլենիստական թագավորութունների առաջացմանը վերաբերվող հունական աղբյուրների հաղորդումներում և արտահայտված է հունարեն *δορικτητος* կամ *δοριζῶτος* (նիգակով նվաճված) բառով: Այսպես, Սելևկոս Նիկատոր Ա-ը, Լիսիմաքոսին պատերազմում հաղթելուց և նրան սպանելուց հետո, նրա ամբողջ երկիրը համարում է *δορικτητος* – իր նիգակով նվաճված⁸⁸:

Պտղոմեոս Լագոսը ևս իշխելով Եգիպտոսում, այն համարում է *δορικτητος* *χώρα* – նիգակով նվաճված երկիր⁸⁹: Հայաստանն իր նիգակով նվաճված երկիր համարելով, Արտաշեսը, ինչպես հելլենիստական մյուս միապետներն իրենց երկրներում, լիովին իրեն իրավունք էր վերապահում արդեն կազմավորվող ազնվականության ներկայացուցիչներին հողային տիրույթներ շնորհելով, նրանց նշանակելու պետական այս կամ այն պաշտոնի: Հետագայում Տիգրան Բ-ի նվաճումները ավելի լայն հնարավորություններ պիտի ստեղծեին պետական պաշտոններ վարողներին հողային ընդարձակ տիրույթներ պարգևելու համար:

Արտաշեսն, անկասկած, ձեռնամուխ է եղել հողային բարեփոխություններին, որոնց հրամայական պահանջը բխում էր արտաքին ընդարձակման և սոցիալ-տնտեսական ներքին բուռն զարգացման ուղին թևակոխած երկրի շահերից: Արտաշեսի հողաշինարարական գործունեության մասին մեզ հասել են լատիգոլյն վավերագրեր՝ մատենագրական և վիմական: Այսպես, Խորենացին հաղորդում է, թե Արտաշեսը «հրամայե՛ց զսահմանս գիւղից և ագարակաց որոշել. քանզի բազմամարդացոյց գաշխարհս Հայոց, եկամուտս բազումս ածելով ազգս, և բնակեցուցանելով ի լերինս և ի հովիտս և ի դաշտս: Եւ նշանս սահմանացն հաստատեսաց այսպես. հրաման տալով քարինս կոփել չորեքկուսիս ի վերայ յարուցել ամբարտակս, սակաւ ինչ բարձրագոյն յերկրէ: ... Ի ժամանակս Արտաշիսի ոչ գտանել երկիր անգործ յաշխարհիս Հայոց, ոչ լեռնային, ոչ դաշտային, յաղագս

(88) Polyb., XVIII, 51, 4.

(89) Diodor., XX, 76, 7.

շինութեան երկրիս»⁹⁰: Խորենացու այս ավելի քան պարզ հարորդման մեկնաբանութիւնն ավելորդ է թվում:

Պատմահոր այս վկայութիւնները իրենց պերճախոս հաստատումը գտան Արտաշեսի անունը կրող արամեատառ վիմական այն արձանագրութիւններում, որոնք վերջերս հայտնաբերվեցին Հայաստանում ե որոնց մասին մենք դեռ կտեսնենք⁹¹:

Երվանդունի թագավորների և Արտաշեսի ունեցած Փունկցիաների հնարավոր համեմատութիւնը մեզ հանգեցնում է այն եզրակացութեան, որ եթե Երվանդը, ինչպես տեսանք, միակ թագավորը էր երկրում, ապա Արտաշեսի ժամանակ միանձնյա թագավորն արդեն օժտված էր ավելի քան ինքնակալական իշխանութեամբ:

Թագավորական իշխանութեան ամրապնդմանը և բացարձականացմանը պետք է նպաստեր գահակալութեան կարգի ժառանգականութիւնը: Երվանդունիների և Արտաշեսյանների ժամանակ Հայաստանում, թագավորի մահանալուց հետո, գահն անցնում էր նրա ավագ որդուն: Արքայի անգամակ մահանալու դեպքում գահը ժառանգում էր նրա եղբայրը կամ մերձավորագույն ազգականը: Այդ են վկայում անտիկ երկերում Հայաստանի մասին պահպանված տեղեկութիւնները: Գահակալութեան իրավունքը ժառանգական է եղել նաև հելլենիստական մյուս պետութիւններում* Պտղոմեոսյան Եգիպտոսում, Սելևկյանների տերութեան մեջ, Պերգամոնում, Կապադոքիայում, Պոնտոսում և այլն:

Հայոց արքան ևս, հարևան մի շարք երկրների թագավորների նման, ունեցել է իր պատվատիրոջը: Այդպիսին մենք չենք հանդիպում դեռևս Երվանդունի թագավորներին վերաբերող առանց այն էլ աղքատիկ տվյալներում: Հայոց թագավորներից իր տիրոջուսաշարով առաջինը մեզ հայտնի է Արտաշես Ա-ը: Նրա տիրոջուսաշարը վկայված է արդեն բազմիցս հիշատակված նրա արամեատառ արձանագրութիւններում, որտեղ ընթերցվում է «Արտաշես արքա, որդի Զարիսարայի (Զարեհ – Ս.Կ.), Երվանդա-

(90) Մովսէս Խորենացի, Բ, Ժգ:

(91) Այս մասին մանրամասն տես նաև Հայ ժողովրդի պատմութիւն, հ. 1, Երևան, 1971, էջ 533-536:

կան» (Սևանի արձանագրություններ)⁹², «Արտաշես, արքա, Երվանդական, Բարի, որդի Չարեհի» (Չանգեզուրի արձանագրություն)⁹³: Հետագայում, Թեղուտի արձանագրության վերձանման կապակցությամբ, Ա.Գ. Փերիխանյանը վերանայեց իր նախկին տեսակետը և առաջարկեց նոր ընթերցում, համարյա ամբողջ արձանագրության բովանդակությունը դիտելով իբրև Արտաշեսի տիտղոսաշար: Թեղուտի արձանագրության մեջ⁹⁴, Ա.Գ. Փերիխանյանի վերձանմամբ, Արտաշեսի տիտղոսաշարն է՝ «Արտաշես, արքա, Երվանդական, որդի Չարիադրեսի, Բարի, թագակիր, դաշնակից Խշաթրայի, հաղթող այն ամենին, ինչը քաջալերում է չարը»⁹⁵:

Անկախ այն բանից, թե Ա.Գ. Փերիխանյանի առաջարկած այս երկու վերձանումներից ո՞ր մեկը պետք է ընդունել, կասկած չի հարուցում այդ տիտղոսաշարի առաջին մասը՝ «Արտաշես արքա, Երվանդական, Բարի, որդի Չարեհի»:

«Երվանդական» (Երվանդունի) տիտղոսի մասին մենք արդեն խոսել ենք: Այստեղ հատկանշական է Արտաշեսի «Բարի» մակդիրը, որը ձայնակցում է հելլենիստական թագավորների մեզ հայտնի Եվերգետես (Բարեգործ), Եվսերես (Բարեպաշտ), Եվպատոր (Բարեհայր) և այլ մակդիրներին: Հետևելով իր նախկին սյուզերեն Սելևկյանների օրինակին, Արտաշեսը ստացել էր «Բարի» պատվատիտղոսը, որի յուրացումը Գ. Սարգսյանի կարծիքով, թերևս կապ ունի թագավորական նախնիների պաշտամունքի հետ⁹⁶:

Արտաշեսյանների ժամանակ երկրում քաղաքական իրա-

(92) А.Я. Борисов, Надписи Артаксия (Арташеса), царя Армении, ВДИ, 1946, № 2, стр. 97-17; И.М. Дьяконов, К.Б. Старкова, Надписи Артаксия (Арташеса), царя Армении, ВДИ, 1955, № 2, стр. 161-174; К.В. Тревер, Очерки по истории культуры древней Армении, էջ 163-164: Գ.Ա. Տիրացյան, Արտաշես Ա-ի արամեաառ նորագյուտ արձանագրությունը, Տեղ. ՀԳԱՀԳ, 1957, Նո 10, էջ 108:

(93) А.Г. Периханян, Арамейская надпись из Зангезура, ՊԲՀ, 1985, Նո 4, էջ 108: А. Perikhanian, Une inscription araméenne du roi Artasès trouvée à Zanguéour (Siwnik'), REANS, III, 1966, էջ 16-29:

(94) Գ.Հ. Կարախանյան, Արամեերեն երկու արձանագրություններ, ՊԲՀ, 1971, Նո 3, էջ 274-276:

(95) А. Perikhanian, Une inscription araméenne du roi Artasès, REANS, VIII, 1971, էջ 169-174:

(96) Հայ ժողովրդի պատմություն, հ. 1, Երևան, էջ 528:

դրության փոփոխման, ինչպես նաև ժամանակի միջազգային քաղաքական կյանքում Հայաստանի ունեցած դերի և կշռի փոփոխման համապատասխան, փոփոխություններ են նկատվում նաև հայոց թագավորի կրած տիտղոսաշարի մեջ: Դեռ ավելին: Միայն Տիգրան Մեծը իր 40-ամյա գահակալության ընթացքում կրել է սարքեր պոսլատիտղոսներ, որոնց մասին կան ե՛լ մատենագրական վկայություններ, ե՛լ հայոց թագավորի հատած դրամների վրա արված համապատասխան մակագրություններ: Անկասկած է, որ Տիգրանն իր թագավորության առաջին տարիներին կրել է սոսկ «թագավոր» (βασιλεύς) տիտղոսը, ինչպես և իր նախորդները: Իր գահի վրա ամուր հաստատվելուց հետո, երբ արդեն իր իշխանության տակ միավորել էր ամբողջ Մեծ Հայքը և Ծոփքը, գրավել էր Կապադոկիան ու Կոմմագենեն, նա արդեն հայերի համար պիտի դառնար «Մեծ թագավոր» (μέγας βασιλεύς): Իսկ Կորդուքի, Ադիաբենեի, Ատրպատականի, Օսրոենեի թագավորներին հպատակեցնելուց և պարթև «արքայից արքային» հաղթելուց հետո, Տիգրանը ինքը պետք է մեծարվեր վերջին՝ «արքայից արքա» (βασιλεύς βασιλέων) տիտղոսով: Տիգրանի անունը կրող դրամների վրա հանդիպում են հայոց թագավորի վերահիշյալ բոլոր երեք տիտղոսները: Ինչպես իրավացիորեն նշված է պատմական գրականության մեջ, «տարբերությունը գալիս է և դրամների՝ նրա թագավորության տարբեր տարիներին պատկանելուց, ... և դրանց հատման վայրից: Եթե Հայաստանում՝ Արտաշատում հատված դրամների վրայ հաճախակի հանդիպում է «թագավորների թագավոր»-ը, ապա այն երբեք չի պատահում Ասորիքում, Անտիոքում և այլուր հատվածների վրա»⁹⁷: Այս վերջին հանգամանքը, հավանաբար, բացատրվում է նրանով, որ Ասորիքի համար Տիգրանը համարվում էր Սելևկյանների հետնորդ և կրում էր նրանց նման՝ «թագավոր» տիտղոսը⁹⁸:

Հատկանշական է, որ Տիգրան Մեծի հետնորդները ևս, թեպետև բոլորովին կորցրել էին իրենց արտաքին տիրույթները, այնուամենայնիվ իրենց հատած դրամների վրա հանդես են գալիս իբրև «արքայից արքա» (βασιλεύς βασιλέων):

Տիգրան Մեծը կրել է նաև Θεός — «աստված» պատվա-

(97) Նույն տեղում, էջ 668:

(98) Հմմտ. Josephi Flauii antiq. Ivd., XII, 419.

տիտղոսը, որ բավական տարածված էր հելլենիստական և պարթև թագավորների մեջ: Գ.Խ. Սարգսյանն այս երևույթը հիրավի բացատրում է նրանով, որ այդ պատվատիտղոսը կրող թագավորը դեռևս իր կենդանության օրոք աստվածացված է եղել⁹⁹:

Վերջին Արտաշեսյաններից ոմանք կրել են նաև «հելլենասեր» (φιλέλλην) կամ, «հռոմեասեր» (φιλορῶμαιος) պատվատիտղոսները: Այս առնչությամբ Գ.Խ. Սարգսյանը ճիշտ է, երբ գրում է. «Այս երկուսը իրենց արտաքին նմանությամբ հանդերձ, միանգամայն տարաբնույթ էին իրենց իմաստով: «Հունասեր»-ը նշանակում էր իր հպատակների մեջ հույն բնակչություն ունեցող և այդ բնակչությանն ու ընդհանրապես հունական մշակույթին ու քաղաքակրթությանը բարյացակամ վերաբերմունք ցուցաբերող: Ի տարբերություն սրան, «հռոմեասերն» ունի քաղաքական իմաստ, այն նշանակում էր Հռոմին ու հռոմեական քաղաքականությանը համակրող: Այս պատվատիտղոսներն, ուրեմն, բացահայտում էին իրենց կրողների հակումները»¹⁰⁰, ինչպես նաև, կավելացնելիս մենք, միջազգային ասպարեզում նրանց ստանձնած քաղաքական պարտավորությունները:

Հայաստանում միապետի իշխանությունը դառնում է առավել բացարձակ, երկրի ռազմական ու տնտեսական հզորացման գույքը թաց: Այն իր բարձրակետին է հասնում Տիգրան Բ Մեծի գահակալության տարիներին: Սկզբնաղբյուրներից հետևում է, թե Տիգրան Մեծն իր բոլոր հպատակների նկատմամբ ունեցել է կյանքի և մահվան իրավունք: Պատահական չէ, որ Թ. Թեյնաքը, Տիգրանակերտ քաղաքի կառուցման առնչությամբ, Տիգրանին անվանում է նոր Սալմանասար¹⁰¹: Միապետի իշխանության հզորացման հիման վրա Հայաստանում ևս, հելլենիստական մյուս երկրների նման, թագավորի նախնիների աստվածացումից հետո, արդեն աստվածացվում է տիրող թագավորի անձը, դեռևս նրա գահակալության ժամանակ: Ինչպես ճիշտ նկատված է գրականության մեջ, թագավորի անձի պաշտամունքը Հայաստանում պետք է հիմնադրված լիներ Տիգրան Մեծի

(99) Հայ Ժողովրդի պատմություն, Կ. 1, Երևան, 1971, էջ 670.

(100) Նույն տեղում:

(101) Th. Reinach, Mithridate Eupator, Paris, 1890, էջ 345.

Թագավորության ժամանակ¹⁰²:

Մենք դեռ առանձին կիսոսենք Տիգրանի ժամանակաշրջանի մասին: Բայց նախքան այդ, անհրաժեշտ ենք համարում անդրադառնալ հեթանոսական Հայաստանում քրմական դասի հետ առնչվող հարցերին:

(102 Գ. իՎ. Սարգսյան, Հելլենիստական դարաշրջանի Հայաստանը և Մովսես Խորենացին, Երևան, 1966, էջ 23-78:

ԳԼՈՒԽ ՀԻՆԳԵՐՈՐԳ

ՔՐՄԱԿԱՆ ԴԱՍԸ ՀԱՅԱՍՏԱՆՈՒՄ

Հին Հայաստանում, ինչպես և հարևան փոքրասիական երկրներում, գերագույն իշխանություն մարմնացումը ինքը, թագավորն էր հանդիսանում: Սակայն, պատմական տվյալ ժամանակաշրջանում, նրա կողքին և նրա հետ միասին արդեն գոյություն ունեւ ավագանու ևս մի դաս, որը խոշորագույն դեր էր խաղում երկրի քաղաքական, տնտեսական ու մշակութային կյանքում: Այդ քրմերի դասն էր:

Նախաքրիստոնեական Հայաստանում քրմական դասի գոյություն ու նրա ունեցած քաղաքական ու տնտեսական կշռի մասին մի շարք արժեքավոր վկայություններ են պահպանվել Ագաթանգեղոսի, Մովսես Խորենացու և Հովհան Մամիկոնյանի մոտ, ինչպես նաև մեզ հասած Արմավիրի ու Գառնիի հունարեն արձանագրություններում: Այդ առնչությամբ որոշակի մի ակնարկություն կա նաև Պլուտարքոսի գրչին պատկանող Լուկուլլոսի կենսագրություն մեջ¹: Ավելի առատ են Հայաստանին անմիջական հարևանություն մեջ գտնվող երկրների քրմական դասին վերաբերող տվյալները, որոնց հեղինակը, հիմնականում, Ստրաբոնն է: Այդ վկայությունների համեմատումը Հայաստանին վերաբերող տվյալների հետ, մեզ համոզում է այն բանում, որ թե՛ Հայաստանի և թե՛ նրան հարևան երկրների հասարակական կյանքում բացառիկ մեծ էր քրմական դասի դերը:

Այսպես, Ստրաբոնը, խոսելով Կապպադոկիական Կոմանա տաճարային քաղաքի մասին, վկայում է, թե «քաղաքի բնակիչները կատաոնացիներ են, որոնք իբր ենթարկվում են թագավորին, բայց առավել հնազանդ են քրմին: ... Ընդհանրապես,

(1) Plutarchi Lucullus, XXIV, 2-6.

Թագավորից հետո քուրմը երկրորդ անձնավորությունն է կապպադովկիայում. մեծ մասամբ նույնիսկ թագավորներն ու քրմերը պատկանում են միևնույն տոհմին»²:

Նույնպիսի իրավիճակ է պատկերում դարձյալ Ստրաբոնը, խոսելով Պոնտական կոմանա քաղաքի մասին, որտեղ քուրմը «համարվում էր իր կարևորությամբ երկրորդ դեմքը թագավորից հետո»³: Նման դրություն էր նաև Աղվանքում, որտեղ «քրմական պարտականությունները կատարում է թագավորից հետո ամենահարգված դեմքը»⁴:

Անկասկած, Հայաստանում ևս նույնպիսի փոխհարաբերություն կար թագավորի և քրմական դասի միջև, ինչ վերոհիշյալ երկրներում: Այդ ավելի քան պարզ հետևում է Մովսես Խորենացու վկայությունից, որի համաձայն Երվանդ Վերջինի թագավորության տարիներին Հայաստանի քրմապետ էր կարգված թագավորի եղբայր Երվազը⁵: Մեկ ուրիշ անգամ, պատմելով Երվանդի ջախջախման մասին, Խորենացին դարձյալ վկայում է, որ Արտաշեսի կարգադրությամբ սպարապետ Սմբատ Բագրատունին կործանում է նաև Բագարանում քրմապետ Երվազին և նրա փոխարեն «ի վերայ բազնացն կացուցան է զընտանի Արտաշիսի ...»⁶: Հետագա դեպքերի ընթացքը շարադրելիս, Խորենացին պատմում է, որ Արտաշես թագավորը իր որդի Մաթանին «կարգ է քրմապետ ի յԱնի դիցն Արամազդայ»⁷: Խոսելով Վահուհի քրմերի մասին, որոնք իրենց համարում են Վահագնի սերնդից, պատմահայրը հաղորդում է, որ Վաղարշակ թագավորը նրանց է հանձնարարում քրմության պաշտոնը «և կարգ է ընդ առաջին նախարարութիւնսն ...»⁸:

Մեր այն ենթադրության օգտին, թե Հայաստանի քրմապետները նույնպես սերում էին թագավորական տոհմից, խոսում է նաև Տակիտոսի վկայությունն այն մասին, որ հայ Արշակունիների հարստության հիմնադիր Տրդատ Ա թագավորը (66-80

(2) Strabo, XII, 2, 3 (C. 535).

(3) Նույն տեղում, XII, 3, 32 (C. 557).

(4) Նույն տեղում, XI, 4, 7 (C. 503).

(5) Մովսես Խորենացի, Բ, խ:

(6) Նույն տեղում, Բ, խը:

(7) Նույն տեղում, Բ, ծգ:

(8) Նույն տեղում, Բ, ը:

թ.), միաժամանակ նաև քուրմ էր: Այսպես, հռոմայեցի մատենագիրը պատմում է, որ Հռոմի և պարթևների միջև տեղի ունեցող բանակցությունների ընթացքում, ի պատասխան կայսր Ներոնի պահանջին, որի համաձայն Հայաստանի գահի պարթևական թեկնածու Տրդատը պետք է Հռոմ ներկայանար անձամբ, արքայական թագը կայսրի ձեռքից ստանալու համար, պարթևական թագավոր Վաղարշը, Տրդատի ավագ եղբայրը, գրում է Ներոնին. «Տրդատը չէր հրաժարվի Հռոմ գալով թագն ընդունելուց, եթե նրան չխանգարեին քրմական պարտականությունները»⁹: Ուրիշ մի առիթով Գառնիի հունարեն արձանագրության առաջին երկու՝ ΗΛΙΟΣ ΤΙΡΙΔΑΘΗΣ բառերի շուրջ մեր կատարած դիտողություններից եզրակացրել ենք, որ այդ բառերից ΗΛΙΟΣ-ը եղել է հիշյալ թագավորի տիտղոսը կամ հավելյալ անունը իբրև քրմի, իսկ ΤΙΡΙΔΑΘΗΣ-ը՝ նրա անձնական թագավորական անունը¹⁰:

Գրավոր աղբյուրների այս բոլոր տվյալները վկայում են հին Հայաստանի հասարակական-քաղաքական կյանքում քրմական դասի ունեցած կարևորագույն դերի մասին:

Փոքր Ասիայում և Հայաստանում հայտնաբերված վիմագրական նյութեր ևս մեզ իրավունք է տալիս պնդելու, որ քրմերը հելլենիստական միապետությունների պետական գործերում խաղում էին նշանակալից դեր: Նշենք երկու օրինակ, մեկը Փոքր Ասիայից, մյուսը Հայաստանից:

Այսպես, Պերգամոնի թագավորներ Եվմենես Բ-ը և նրա հաջորդ Ատտալոս Բ-ը մ.թ.ա. 163-156 թթ. աշխույժ գործարար նամակագրութուն վարեցին գալատական Պեսինոնտում գտնվող կյուբեյեի սաճարի քրմապետ Ատտիսի հետ: Վիմական արձանագրությունների ձևով մեզ են հասել վերոհիշյալ թագավորների յոթը նամակ, ուղղված քուրմ Ատտիսին, որոնց բովանդակությունը վկայում է այն մասին, որ երկու կողմերը համատեղ քննարկում են պետական կարևորագույն նշանակութուն ունե-

(9) Taciti Annales, XV, 24: Հմմտ. C. Plin., Nat. Hist., XXX, 6, 1.

(10) Այս մասին մանրամասն տես՝ Ս.Մ. Կրկյաշարյան, Դիտողություններ հին Հայկական տաճարային քաղաքների առաջացման մասին, էջ 57-59: Նույնի Եւս մի անգամ Գառնիի հունարեն արձանագրության մասին, ՊԲՀ, Նո 3, էջ 235-238:

ցող գործեր¹¹: Ժամանակի քաղաքական իրադրույթյան հետնախորքի վրա ավելի հստակորեն է ընդգծվում այն դերը, որ խաղում էր քրմապետ Ատտիսը կենտրոնական Փոքր Ասիայի պետությունների փոխհարաբերության մեջ: Մագնեսիայի ճակատամարտում և դրա ելքը արձանագրած Ապամեայի պայմանագրով Հռոմը և նրա դաշնակից Պերգամոնի թագավոր Եվմենես Բ-ը ծանր հարված հասցրին Առաջավոր Ասիայի խոշորագույն տերություն, Սելևկյան կայսրության, որից հետո Սելևկյանները դադարեցին ասիական գործերում որևէ կարևոր դեր խաղալուց: Նրանց տեղը միջազգային կյանքում փորձում են գրավել Պերգամոնի թագավորները, Եվմենեսն ու Ատտալոսը: Սակայն այդ բանը ձեռնառու չէր Արևելքում իր էքսպանսիան ծավալող Հռոմին: Մակեդոնիան և Հունաստանը վերջնականապես իրեն ենթարկելուց հետո, թիկունքն ապահոված Հռոմն արդեն կարող էր հիմնական ուժերը կենտրոնացնել, Արևելքի երկրները իր քաղաքական ազդեցությանը ենթարկելու համար: Արդեն համալսարհային տիրապետության ձգտող հռոմայեցիները չէին թույլատրում ոչ մի տիրակալի, մինչև իսկ իրենց երեկվա գլխավոր դաշնակիցներին, Պերգամոնի թագավորներին, արտաքին քաղաքականության հարցերում որևէ չափով ինքնուրույնություն դրսևորել: Միաժամանակ, հռոմայեցիների ոտնձգություններն անպակաս էին Եվմենես Բ-ի դեմ: Այսպես, երբ վերջինս փորձեց ի հաշիվ սահմանակից Գալատիայի, որտեղ քրմապետ էր վերահիշյալ Ատտիսը, ընդարձակել իր տերություն սահմանները, հակառակ գալատների դեմ պետարագմում Պերգամոնի թագավորի տարած հաղթանակին, Հռոմի ծերակույտը, ի հեճուկս Եվմենեսի շահերին, Փռյուզիայում հաստատված գալլական ցեղերին շնորհեց ինքնավարություն նրանց նախկին տոհմական սահմաններում: Այնուամենայնիվ, Պերգամոնի թագավորները չէին հրաժարվում Գալատիան նվաճելու իրենց մտադրությունից: Նրանք, սակայն, չէին համարձակվում բացահայտ հանդես գալու Հռոմի կամքի դեմ: Հանձին քուրմ Ատտիսի, Պերգամոնի թագավորները հավատարիմ դաշնակից էին գտել: Եվմենեսը կյուրբելի տաճարի քրմապետի օգնությամբ, Հռոմի ծերակույտից գաղտնի, շարու-

(11) C.B. Welles, Royal Correspondence in the Hellenistic Period (այսուհետև՝ RC), New Haven 1934, (55-81).

նակում էր թշնամական գործունեությունը Գալատիայի դեմ: Ակներևորեն, Եվմենեսն ու Ատտալոսը այս դեպքում մեծ հանդրգնություն էին ցուցաբերում: Եթե աշխարհակալության ճրգտող ամենագոր ձուռը տեղեկանար տարվող այդ գաղտնի բանակցությունների մասին, ապա պարզ է, որ շորհակալություն չէր հայտնելու Պերգամոնի թագավորներին: Այս հանգամանքը մի անգամ ևս մեզ համոզում է այն մեծ վտահուլթյան մասին, որ վայելում էր Պեսինոսոսի քրմապետ Ատտիսը Պերգամոնի թագավորների մոտ, որոնք միասնաբար էին քննարկում պետական կարևորագույն հարցեր:

Արմավիրում հայտնաբերված Նո 4 հունարեն արձանագրությունը ևս (երկրորդ քարի առաջին արձանագրությունը) մի արժեքավոր վավերագիր է այն մասին, թե քրմապետը Հայաստանում գտնվում էր թագավորի հետ համարյա հավասար աստիճանում (նա իրեն անվանում է «βασιλεύς»: Այս արձանագրությունը Հ. Մանանդյանը իրավացի կերպով դիտում է որպես Արմավիրի հեթանոսական տաճարի քրմապետ Միթրասի նամակը Հայաստանի Եբրոնտես թագավորին: Արձանագրության մեջ հատկանշականն այն է, որ Միթրասն իրեն անվանում է նույնպես թագավոր, ինչպես և Եբրոնտեսին. հանգամանք, որը վկայում է ոչ միայն նրա բարձր ծագման, այլև այն մասին, որ նա թագավորի կողքին և նրա հետ միասին կարևոր դեր էր խաղում պետական գործերում¹²:

Մեզ մոտ հայտնաբերված վիմական տվյալներից և Խորենացու վկայություններից վստահ կերպով կարելի է հետևեցնել, որ քրմապետը Հայաստանում ևս, ինչպես և հարևան երկրներում, երկրորդ դեմքն էր թագավորից հետո, երբեմն քրմապետի պարտականությունները նույնիսկ միահյուսվում էին թագավորի պարտականություններին և միևնույն անձը հանդիսանում էր միաժամանակ թագավոր և քրմապետ, ինչպես այդ սլարգվում է Գառնիի և Արմավիրի հունարեն արձանագրություններից և Տակիտոսի մի հաղորդումից:

Հայաստանում և ընդհանրապես Արևելքի երկրներում քրմերի բարձր դիրքը և հեղինակությունը հիմնված էր առավելապես տաճարների և տաճարային անտեսությունների նյութա-

(12) Հմմտ. Հ. Հ. Մանանդյան, Արմավիրի հունարեն արձանագրությունները նոր լուսարանությամբ, Երևան, 1946:

կան հզորութեան վրա¹³: Մեր ուսումնասիրած ժամանակաշրջանում տաճարների հարստութիւնը Առաջավոր Ասիայում և Հայաստանում բաղկացած էր հողային ընդարձակ տիրույթներից և այդ հողերի վրա բնակեցված և դրանց վրա աշխատող ու շահագործվող տաճարային ստրուկ-ծառաններից՝ հիերոդոլներից (ἱερόδολοι): Խորենացին պատմում է, թե Երվանդ Վերջինի դեմ Արտաշեսի տարած հաղթանակից և թագավորի եղբայր՝ քրմապետ Երվազի սպանութիւնից հետո, Սմբատ Բագրատունին, «աւար առեալ զգանձսն Երուազայ, և ծառայս անձինս հինգ հարևր, նաև զընտիր ընտիր գանձուցն մեհենից, բերէ Արտաշիսի: Եւ Արտաշէս պարգևէ Սմբատայ զծառայսն Երուազայ»¹⁴: Սա, ինչ խոսք, ոչ թե շահագործվող ծառանների, հողագործների ազատագրումն էր շահագործումից, այլ, պարզապէս, մի տիրոջ գերիշխանութիւնից՝ մյուսի գերիշխանութեան տակ անցնելը: նախկինում քրմապետին պատկանող տաճարական հողերի վրա աշխատողներն այժմ արդեն տարվում են աշխատելու սպարապետ Սմբատին շնորհված հողերի վրա: «Յայնժամ», – գրում է պատմահայրը, – Սմբատայ զծառայսն Երուազայ, զոր գերեացն ի Բագարանէ, տարեալ ընակեցուցանէ ի թիկանց Մասեաց, ի նոյն անուն Բագարան կոչելով զձեռակերտն»¹⁵:

Հայաստանում տաճարների տնտեսական հզորութիւնը և, դրա հետ միասին, նրանց քաղաքական ազդեցութիւնը, հավանաբար, աճելով սկսեց ընդունել թագավորական իշխանութեան համար վտանգավոր չափեր: Ըստ երևույթին, տաճարների և նրանց սպասավորների՝ քրմերի հետագա հզորացումը կանխելու նպատակով է, որ Երվանդը երկրի կրօնական կենտրոնը Արմավիրից փոխադրում է ոչ թե իր նոր կառուցած Երվանդաշատ մայրաքաղաքը, այլ Բագարան: «Բայց Երուանդ շինեալ զքաղաքն իւր, – գրում է Խորենացին, – և փոխեալ անդր զամենայն ինչ յԱրմաւրայ ուրոյն ի կռոցն. զոր ոչ օգուտ իւր համարեալ յիւրն փոխել ի քաղաքն, զի մի գալն և ի գոհել անդ աշխարհի, ոչ զգուշութեամբ պահեսցի քաղաքն, այլ հեռագոյն ի նմանէ իբր

(13) Փոքր Ասիայի և Հայաստանի տաճարային տնտեսութիւնների մասին տես՝ А.Г. Периханян, Храмовые объединения Малой Азии и Армении, М., 1959.

(14) Մովսէս Խորենացի, Բ, խը:

(15) Նույն տեղում:

քառասուն ասպարիտաւ զհիւսիսով՝ նման իւր քաղաքին շինեաց քաղաք փոքր ի վերայ գետոյն Ախուրենայ, և անուանեաց Բագարան, այսինքն թէ ի նմա յօրինեալ է զկազմութիւն բազնացն. և փոխեաց անդր զամենայն զկուռսն որ յԱրմաւիր: Եւ մեհեանս շինեալ, զեղբայր իւր զԵրուազ քրմապետ կացուցանէր»¹⁶:

Խորենացու վերոհիշյալ վկայությունից հետեւում է, որ Հայաստանում տաճարներին պատկանող ընդարձակ հողերի վրա ապրելիս և աշխատելիս են եղել ոչ թէ ազատ մարդիկ, այլ ծառաներ, որոնց, որպէս սեփականություն, տերը կարող էր տեղափոխել և բնակեցնել այս կամ այն վայրը: Նմանօրինակ դրություն էր նաև Հայաստանի հարեան երկրներում, հատկապէս կապաղադովկիայի Կոմանա և Մորիմենա տաճարային քաղաքներում, ինչպէս և պոնտական Կոմանայում: Այդ մասին ընդարձակ տեղեկություններ է հաղորդում ականատես Ստրաբոնը: Այսպէս, կապաղադովկիայի Կոմանա քաղաքի մասին, որտեղ գտնվում էր Մա դիցուհու հայտնի տաճարը, նա գրում է. «... քուրմը տերն է տաճարի և տաճարային ծառաների (ὁ δὲ τοῦ θ'ἱεροῦ κύριός ἐστί καί τῶν ἱεροδοῦλων), որոնք մեր այնտեղ կատարած այցելության ժամանակ ավելի քան վեց հազար էին կանայք և տղամարդիկ միասին: Տաճարին կից կա ընդարձակ հողամաս, որի եկամուտները ստանում է քուրմը»¹⁷: Մորիմենա քաղաքի մասին Ստրաբոնը գրում է, թէ այնտեղ «գտնվում է Վենսայան Զևսի տաճարը, որն ունի մոտ երեք հազար տաճարային ծառաների համար բնակատեղի (ἱεροδοῦλων κατοικίαν ἔχον τρισχιλίων σχεδόν τι) և բարեբեր տաճարային հողամաս, որը քրմին տալիս է տարեկան տասներհինգ տաղանդի եկամուտ»¹⁸: Համարյա նույն պատկերն է նկարում Ստրաբոնը, խոսելով պոնտական Կոմանա քաղաքի մասին¹⁹:

Մեկ այլ տեղ Ստրաբոնը, խոսելով Զելե քաղաքի մասին, որը գտնվում էր իր ծննդավայր Ամասիա քաղաքի մոտ, նշում է, որ այնտեղ կառուցվել է Անահիտ դիցուհու տաճարը, որին մեծարում են նաև հայերը, որ տաճարային ծառաների թիվը և քրմերի վայելած հարգանքն ու պատիվը թագավորի կողմից

(16) Նույն տեղում, Բ, խ:

(17) Strabo, XII, 2, 3 (C. 535).

(18) Նույն տեղում, XII, 2, 5 (C. 537).

(19) Նույն տեղում, XII, 3, 32 (C. 557).

Նույնպիսին էր, ինչպիսին ինքը նկարագրել է հայերի մոտ Անահիտի պաշտամունքի մասին խոսելիս: Այնուհետև հույն մատենագիրը ավելացնում է, որ պարսից արքաները (խոսքը Աքեմենյան թագավորների մասին է – Ս.Կ.) «հնում Ձելեն համարում էին ոչ թե քաղաք, այլ պարսկական աստվածների սրբավայր: Քուրմը ամեն ինչի տերն էր: Այն բնակեցված էր բազմաթիվ տաճարային ծառաներով և քուրմը շատ հարուստ էր: Սրբավայրի շրջապատում կար ոչ քիչ սրբազան հող, որը պատկանում էր քրմին»²⁰: Նույնն էր իրավիճակը նաև Հայկական լեռնաշխարհից հյուսիս–արևելք ընկած երկրներում: Խոսելով, օրինակ, Աղվանքում բնակվող ցեղերի մասին, Ստրաբոնը դարձյալ գրում է. «Նրանք իբրև աստվածների պաշտում են Արևը, Ջևսին և Լուսինը: Սրա տաճարը գտնվում է Իբերիայից ոչ հեռու: Քրմական պարտականությունները կատարում է ամենահեղինակավոր անձը թագավորից հետո: Նա կանգնած է սրբազան հողի գլուխ, որն ընդարձակ է և լավ բնակեցված, ինչպես նաև գլխավորում է տաճարային ծառաներին (ἱεροδοῦλων)²¹: Իբերիայի բնակչուության չորս դասի (τέτταρα γένη) բաժանված լինելու մասին Ստրաբոնի հայտնի հաղորդումից²² պարզվում է, որ Իբերիայում ևս քրմական դասը իրոք խոշոր դեր է ունեցել երկրի քաղաքական կյանքում:

Ստրաբոնի ժամանակ եթե այդպիսին էր դրուժյունը Հայաստանին սահմանակից երկրներում, ապա ոչ մի հիմք չկա կասկածելու Հայաստանում ևս նման հարաբերությունների գոյություն մասին:

Այսպիսի իրավիճակը, երբ քրմապետը համարվում էր թագավորից հետո ամենահեղինակավոր անձնավորությունը, շարունակվել է նաև քրիստոնեությունը Հայաստանում որպես պետական կրոն հաստատվելուց հետո: Միայն այսպես կարելի է հասկանալ Փավստոս Բուզանդի մոտ պահպանված այն պատումը, որի համաձայն, երբ բյուզանդական Վաղես կայսրը որոշում է մահվան ենթարկել իր մոտ ժամանած հայոց կաթողիկոս Ներսեսին, կայսեր մերձավորները խորհուրդ են տալիս չանել այդ, քանի որ Ներսեսը մեծ ու ավագ մարդ է «և աշխարհի միոյ

(20) Նույն տեղում, XII, 3, 37 (C. 559).

(21) Strabo, XI, 4, 7 (C. 503).

(22) Նույն տեղում, XI, 3, 4.

զլուխ: Զի թագաւորն դոցա աշխարհին և դա, որպես ասեն, ընդ մի համար են»²³:

Սկզբնաղբյուրների վկայութիւններից կարելի է հետևել, թե, ինչպես Փոքր Ասիայի երկրներում, այնպես էլ հին Հայաստանում, որոշակի համերաշխութիւն գոյութիւն ուներ թագաւորական իշխանութեան և քրմական դասի միջև: Դրա յուրահատուկ արտահայտութիւնը մենք տեսնում ենք Մորիմենա քաղաքում գտնվող Վենասյան Զևսի տաճարի քրմի մասին Ստրաբոնի այն վկայութեան մեջ, թե «այս քուրմը ցկյանս է (δὸν βίου), ինչպես և Կոմանայի քուրմը»²⁴: Հետևաբար, ինչպես ցկյանս էր թագաւորի իշխանութիւնը, այնպես էլ ցկյանս էր քրմական պաշտոնը: Հավանական է, որ թագաւորը իրավունք է ունեցել խախտելու այդ կարգը և զրկելու քրմերին իրենց պաշտոնից: Ամենայնդեպս, մեզ հայտնի է Խորենացու մատյանում եղած մի վկայութիւն, որի համաձայն Տիգրան թագաւորը «ցասուցեալ ընդ Վահուհիսն, եթէ ընդէր յիւրեանց սեպհականին իշխեցին կանգնել զպատկերն Հերակլի, զառաքեալն ի նորին հօրէ՝ ընկենու զնոսա ի քրմութենէն, և զգիւղն առնու, յորում պատկերքն կանգնեցան»²⁵:

Հայաստանում ևս թագաւորական իշխանութեան և քրմական դասի միջև գոյութիւն ունեցած սերտ հարաբերութիւնների մասին վկայող մի շարք ցուցումներ կան Խորենացու մոտ: Հայտնի են պատմահոր վկայութիւններն այն մասին, որ հայոց թագաւորներն իրենց ազգակիցներին էին հանձնարարում կրօնական ծեսերի կատարումը: Այսպես, «Արայեանն Արայ մեռանի ընդ Շարմիրամայ ի պատրեազմին, թողլով արու զաւակ ամենահարուստ և շատահանճար յիր և ի բան՝ զԱնուշաւանն Սօսանուէր: Քանզի ձօնեալ էր ըստ պաշտամանց ի սօսիսն Արամանեկայ որ յԱրմաւիր»²⁶: Մեկ այլ աւելի թով Խորենացին հաղորդում է, որ Երվանդը «մեհեանս շինեալ, զեղբայր իւր զԵրուազ քրմապետ կացուցանէր»²⁷: Այնուհետև, Խորենացու մի ուրիշ հաղորդման համաձայն, Արտաշեսը «զտեալ յԱսիոյ պղնձաձոյլ

(23) Փայտոս Բուզանդ, Դ. Ե:

(24) Strabo, XII, 2, 5 (C. 537).

(25) Մովսէս Խորենացի, Բ, ԺԳ:

(26) Նույն տեղում, Ա, ի:

(27) Նույն տեղում, Բ, ի:

ոսկեզօծ պատկերս զԱրտեմիդեայ և զՀերակլեայ և յԱպողոնի, տայ բերել յաշխարհս մեր, զի կանգնեսցեն յԱրմաւիր: Չոր առեալ քրմապետացն, որ էին յազգէ Վահունեաց, զԱպողոնին և զԱրտեմիդայն կանգնեցին յԱրմաւիր»²⁸: Նույնքան հետաքրքիր է նաև Խորենացու վկայութիւնն այն մասին, թե Արտաշեսն իր որդիներէց Մաթանին «կարգէ քրմապետ ի յԱնի դիցն Արամազդայ»²⁹, իսկ Բագարանում՝ սպանված քրմապետ Երվազի փոխարեն Սմբատը «ի վերայ բազնացն կացուցանէ զընտանի Արտաշիսի...»³⁰։ Այս առթիվ դարձյալ տեղին է հիշեցնել, որ Գառնիի հունարեն արձանագրութեան տվյալներով և Տակիտոսի վկայութեամբ, նույն անձը միաժամանակ եղել է քուրմ և արքա³¹:

Պիտի ենթադրել, որ ինչպես Փոքր Ասիայի հելլենիստական երկրներում, Հայաստանում ևս նմանօրինակ հանձնարարութիւնները, սովորաբար, ուղեկցվում էին հարուստ նվիրատուութիւններով: Այլապես, դժվար կարելի է բացատրել Խորենացու հաղորդումն այն մասին, թե Արտաշես թագավորի սպարապետ Սմբատը, «աւար առեալ զգանձան Երուսազայ, և ծառայս հինգ հարևր, նաև զընտիր ընտիր գանձուցն մեհենից, բերէ Արտաշիսի»³²: Քրմերի ձեռքին և հեթանոսական տաճարներում այդպիսի մեծ հարստութիւն կուտակվում էր ժամանակի ընթացքում տաճարներին շնորհված հողային և նյութական պարգև-

(28) Նույն տեղում, Բ, Ժբ:

(29) Մովսես Խորենացի, Բ, Ծգ:

(30) Նույն տեղում, Բ, խբ:

(31) Այս առնչութեամբ Կ. Վ. Տրեվերը գրում է. «Տակիտոսի այս խոսքերից երևում է, որ մ.թ. առաջին դարում Հայաստանում դեռևս շարունակվում էր պահպանվել արքայի և քրմի ֆունկցիաների միակցութիւնը (որը պարզվում է նաև հայերեն համապատասխան տերմինների – «արքա» և «արգապետ» – մոտիկութեամբ, մի երևույթ, որը Յ. Էնգելսը նշել էր Հունաստանի վերաբերյալ» (К.В. Тревер, Очерки по истории культуры древней Армении, М.-Л., 1953, էջ 62-63):

(32) Մովսես Խորենացի, Բ, խբ:

ների միջոցով³³:

Տեղին է յիշել, որ Ագաթանգեղոսը, խոսելով Տարոնում գտնվող Վահեփահյան մեհյանի մասին, այն համարում է «մեծագանձ, լի ոսկով և արծաթով, և բազում նուէրք մեծամեծ թագաւորաց ձօնեալ անդր»³⁴:

Հողային նվիրատվություններ կարող էր անել միայն նա, ով սեփականատերն էր այդ հողերի և իրավունք ուներ ազատորեն, ըստ իր հայեցողության, տնօրինել դրանք: Իսկ այդպիսի անձնավորություն Հայաստանում, ինչպես նաև Արևելքի մյուս երկրներում, բոլորից առաջ, երբեմն և բացառապես, հանդիսանում էր ինքը՝ թագավորը: Դրա պատճառով էլ տաճարներին, ինչպես և առանձին մարդկանց հողային նվիրատվություններ անում էին գլխավորապես թագավորները: Այսպիսի բազմաթիվ փաստերի կարելի է հանդիպել, ինչպես Փոքր Ասիայի հելլենիստական թագավորների՝ քաղաքներին ուղղված նամակներում, այնպես և անասիկ ու հայ մատենագիրների երկերում:

Նշենք այդ փաստերից մի քանիսը: Պերգամոնի թագավորներից մեկը (հավանաբար Ատտալոս Բ-ը) Իլիոն քաղաքին հղած իր նամակում հիշատակում է անասունների և հողային որոշ տարածության նվիրաբերման մասին Աթենաս ղիցուհուն: Հետաքրքրական է նշել, որ անասունների հետ միասին, գրանք խնամելու համար, թագավորն ուղարկում է նաև հոտաղներին (βουκόλους)³⁵, որոնք, հավանաբար, տաճարի տնտեսության մեջ ղառնալու էին տաճարային ծառաներ՝ հիերոդոլներ: Մ.թ.ա. II դարի վերջերին թագավորած Անտիոքոսներից մեկին վերագրվող մեկ այլ նամակ, ուղղված բարձրաստիճան պաշտոնյաներից մեկին, վերաբերում է Բայտոկայկեյում գտնվող Ջևսի տաճարին (Διός Βαιτοκείκης) արված նվիրատվություններին: Այդ նամա-

(33) Տաճարներում կուտակված հարստությունը երբեմն գայթակղեցրել է թագավորներին և նրանք փորձել են այդ գանձերը կողոպտելով լցնել իրենց դատարկված գանձարանը (հմմտ. Diodor., XXVIII, 3; XXIXm 5; Strabo, XVI, որտեղ խոսվում է հլիմայիսում գտնվող տաճարի գանձերը հափշտակվելու ուղղությամբ Սելևկյան Անտիոքոս Գ թագավորի կատարած անհաջող փորձի մասին, որի համար էլ վերջինս հատուցեց իր իսկ կյանքով):

(34) Ագաթանգեղոս, ՃԺԴ, 809:

(35) RC, 62.

կում հաղորդվում է, որ թագավորը ետ է վերադարձնում տաճարին այն հողերը, որ Սելևկյան թագավորները իրենց տիրապետութւյան առաջին շրջանում վերցրել էին տաճարից և պարգևել իբրև ՃԱԾԵՃ մակեդոնացի պաշտոնյա Դեմետրիոսի³⁶: Հելլենիստական աշխարհի թագավորները տաճարներին և դրանց սպասարկուներին, քրմերին, նվիրում էին ոչ միայն հողային տիրույթներ, այլև ուրիշ ունեցվածք, շարժական և անշարժ: Այսպես, հելլենիստական թագավորի (հավանաբար Ատտալոս Ա-ի) նամակը քրմական պաշտոնի հաստատման պայմանների մասին, ուղղված մի պաշտոնյայի, հավաստում է, թե քուրմը պետք է իբր նվիրատուութուն և լրացուցիչ վարձ ստանա գոհաբերվող անասունների մորթին և զիստը, ինչպես նաև այն արհեստանոցների եկամուտը, որոնք թագավորը նվիրել է տաճարին³⁷:

Հելլենիստական թագավորի կողմից սրբատեղիներին արված հողային նվիրատուութունների մասին անժխտելի վկայութուններ կան Կոմմագենեի Նեմրուդ լեռան հայտնի արձանագրութունում, որտեղ այդ ոչ մեծ թագավորութւյան գահակալ Անտիոքոս Ա-ը պատմում է աստվածների, հերոս նախնիների և իր թագավորի պաշտամունքի կազմակերպման մասին: Այդ սրբավայրը սպասարկելու համար հաստատված էին քրմեր և տաճարային սորոուկներ (ἱεροδοῦλοι): Սրբավայրը տնտեսապես սպահովելու համար թագավորը տաճարին նվիրել էր «բավարար քանակութւյամբ հողեր և դրանից ստացվող կաշուն եկամուտ» (χώραν τε ἰκατην καὶ προσόδους ἕξ αὐτῆς ἀκινήτους)³⁸:

Այս կապակցութւյամբ չի կարելի ուշադրութուն չդարձրնել մեկ ուրիշ նամակի վրա ևս, որը հասցեագրել է Սելևկոս Ա-ը Միլետ քաղաքին, որով հաղորդում է Դիդիմեյան Ապոլլոնի տաճարին իր ուղարկած թանկարժեք նվերների մասին: Նամակին կցված է հետաքրքիր ցուցակ, որում մանրամասն թվարկված են Սելևկոսի ուղարկած նվերները Ապոլլոնի տաճարին. զանազան ոսկե և արծաթե սպասներ, 12628 զրախմա 3 օբոլա ընդհանուր արժողութւյամբ, 10 տաղանդ անուշահոտ յուղ, 1000 ոչխար, 12

(36) Նույն տեղում, 70:

(37) « ... λαμβανέτω τῶν θυομένων γέρα τό δέσμα καὶ κωλεάν καὶ τῶν ἐργαστηρίων ὧν ἀνατέθηκα τήν προσοδόν» (RC, 24).

(38) K. Humann und O. Puchstein, Reisen in Kleinasien und Nordsyrien, Berlin, 1890, էջ 265.

պլուխ խոշոր եղջերավոր անասուն (βους) և այլն³⁹:

Կարծում ենք, որ այս նամակների և Արմավիրի Նո 3 հունարեն արձանագրության համադրումը որոշ չափով հնարավորություն կտա պարզելու վերջինիս բնույթը: Ա.Ի. Բոլտունովան հետևյալ կերպ է ընթերցում այդ արձանագրությունը.

τέτταρες
ἵπποι τό ζεύγος
Εὐθυχαομί[δης]
πινάκιον
Πηλαμύδος

և այն համարում է Արմավիրի տաճարին արված նվիրաբերությունների թվարկում և թարգմանում է հետևյալ կերպ. «Չորս ձի, կառք, որ նվիրաբերել է Եվթիքարմիդեսը և ոչ մեծ մի պատկեր, որը նվիրաբերել է Պելամիդեսը»⁴⁰: Իսկ Կ.Վ. Տրեվերը, հիմնվելով ահադ. Յա.Ի. Սմիռնովի՝ այս արձանագրության մասին թողած ձեռագիր մեկնաբանությունների վրա, առաջարկում է կարդալ՝

τέτταρες
ἵπποι τό ζεύγος
εὐθύ Χάομι
πινάκιον εἶ[μα]
Πηλαμύδο[υ]

և տալիս է հետևյալ, առաջինից բոլորովին տարբեր թարգմանությունը. «Չորս ձի (և) կառք (նվիրված) Հարմային, տախտակն եմ Պելամիդեսի»⁴¹: Ա.Կադ. Յա.Ի. Սմիռնովը և, նրան հետևելով, Կ.Վ. Տրեվերը ենթադրում են, որ այս արձանագրությունը ևս, Արմավիրի մյուս արձանագրությունների նման, ունի ընծայաբերական բնույթ կամ թե հատված է գրական ինչ-որ երկից⁴²:

Մենք առավել ընդունելի ենք համարում Ա.Ի. Բոլտունովայի՝ արձանագրության բառերը իրենց ուղիղ իմաստով վերցրնելը. ինչո՞ւ արձանագրության բառերի մեջ փնտրել խորհրդ-

(39) C. B. WELLES, RC, 5.

(40) А. И. Болтунова, Греческие надписи Армавира, *Արմֆանի Տեղեկագիր*, 1942, նո 1-2, էջ 42:

(41) К. В. Тревер, *Очерки по истории культуры ...*, էջ 132:

(42) Նույն տեղում, էջ 132-156:

դանշական կամ փոխաբերական իմաստ, ինչպես այդ անում են Յա-ի. Սմիռնովը և Կ.Վ. Տրեվերը, այն ժամանակ, երբ այդ նույն բառերը ուղիղ իմաստով վերցնելը լիովին բանական է և չի հակասում պատմական իրականությունը: Տվյալ արձանագրությունն ընդհանուր իմաստը հետևյալն է. ոմն Եվթիփարմիդես ընծայաբերում է տաճարին չորս ձի և կառք, իսկ Պելամիդեսը՝ ΠΛΥΑΚΙΟΝ:

Այս ոչ մեծ արձանագրության առաջին մասի ընդլիթի վերաբերյալ կարելի է երեք ենթադրությունն անել: Առաջինը բխում է Ստրաբոնի այն վկայությունից, թե Հայաստանը վաղուց ի վեր հարուստ է եղել ձիաբուծության համար հարմար արոսավայրերով (ἵπποβοτος), որ Հայաստանի սատրապը ամեն տարի պարսից արքային ուղարկում էր 20 հազար մտրուկ՝ Միհրական տոների համար (τοῖς Μιθρακίνοις)⁴³: Արմավիրի տաճարը, հավանաբար, նվիրված էր Միհրին: Ուստի լիովին բնական է ենթադրել, որ արձանագրության մեջ հիշատակված չորս ձիերը ընծայվել էին տաճարին, Միհրի տոնակատարության ժամանակ գոհաբերելու համար: Այս դեպքում, սակայն, անբացատրելի է մնում ձիերի հետ կառքի նվիրաբերումը: Ուստի բացառված չէ նաև երկրորդ ենթադրությունը, որ չորս ձիերը և կառքը նվիրաբերված էին տաճարային տնտեսության մեջ օգտագործելու համար: Հնարավոր է նաև մի երրորդ ենթադրություն, որ այս փոքր արձանագրությունը եղել է տաճարային տնտեսության ունեցվածքի գույքագրության ցուցակից մի հատված: Այնուամենայնիվ, այս դեպքում ևս Եվթիփարմիդեսը և Պելամիդեսը մնում են թվարկված իրերի նվիրաբերողները: Ինչ վերաբերում է արձանագրության երկրորդ մասում հիշատակված ΠΛΥΑΚΙΟΝ բառին, սպա այդ բառի նշանակությունը այս դեպքում ընդունելի է ոչ թե որպես տախտակ (Կ. Տրեվեր) կամ ոչ մեծ նկար (Ա. Բուլտոնովա), այլ որպես մատուցարան, պնակ:

Փոքր Ասիայում ևս, ինչպես Արևելքի մյուս երկրներում, տաճարներն ունեին հողային ընդարձակ տիրույթներ: Խոսելով կապաղովկիայի Կոմանա քաղաքում գտնվող Մա դիցուհու տաճարի մասին, Ստրաբոնը գրում է, որ տաճարին կից կա մեծ հո-

(43) Strabo, XI, 13, 7 (C. 525): XI, 14, 9 (C. 530): Հմմտ. նաև Xenoph. Anabasis, IV, 5, 24:

ղամաս⁴⁴։ Այնուհետև հուլյն աշխարհագետը մասնանշում է, որ Վենասյան Զևսի տաճարին առընթեր Մորիմենա քաղաքում կա «բարերեր սրբազան հողամաս»⁴⁵, որ Աղվանքում քուրմը «կանգնած է ընդարձակ և լավ բնակեցված սրբազան հողի գլուխ»⁴⁶։ Անկասկած, նույն դրուժյունը պետք է եղած լիներ նաև Հայաստանում։ Ագաթանգեղոսի մի շարք վկայությունները խոսում են նման ենթադրության օգտին։ Իր պատմության սկզբում Ագաթանգեղոսը հաղորդում է, որ Սասանյան Պարսկաստանի դեմ տարած հաղթանակից հետո Տրդատ Մեծի հայրը, Հայաստանի խորով թագավորը, վերադարձավ հարուստ ավարով, որի մեկ հինգերորդ մասը նա պարզևեց քրմերին⁴⁷։ Նույն Ագաթանգեղոսը վկայում է, որ Հայաստանում քրիստոնեությունն ընդունելուց հետո, Տրդատ Մեծը Գրիգոր Լուսավորչի հետ համատեղ սկսեցին կործանել երկրում գտնվող հեթանոսական բոլոր տաճարները։ Շարունակելով, հայ մատենագիրը վկայում է, որ Արտաշատում գտնվող Անահիտ դիցուհու⁴⁸ տաճարը կործանելուց հետո, Տրդատ թագավորը և Գրիգոր Լուսավորիչը հեթանոսական այդ տաճարին պատկանող ունեցվածքը նվիրեցին եկեղեցուն — «Եւ զղաստակերտսն և զսպասուրսն քրմօքն հանդերձ և նոցին գետնովքն և սահմանօքն ի ծառայութիւն նուիրեցին եկեղեցւոյ սպասաւորութեան»⁴⁹։ Այնուհետև, Ագաթանգեղոսը վկայում է Հայաստանի հեթանոսական մյուս տաճարների ունեցվածքի բռնագրավման մասին հօգուտ քրիստոնեական նորաստեղծ եկեղեցու։

Այս առնչությամբ ակնառու փաստեր կան Հովհան Մամիկոնյանի «Պատմութիւն Տարօնոյ» աշխատության մեջ, ըստ որի Մեծ Հայքում Աշտիշատի հեթանոսական տաճարին պատկանում էին 7 գյուղ՝ Կուառ, Մեղտի, Բրեխ, Տուժը, Խորնի, Կեղք և

(44) Strabo, XII, 2, 32 (C. 535).

(45) Նույն տեղում, XII, 2, 5 (C. 537):

(46) Նույն տեղում, XI, 4, 7 (C. 507):

(47) Ագաթանգեղոս, Ա, 22:

(48) Ստրաբոնը (XI, 14, 16) մատնանշում է, թե «հայերը սուանձնապես պտուղում էին Անահիտի տաճարները, որի պատվին նրանք այգավտիք կառուցել էին այլ վայրերում և հատկապես Ակիլիստենյում։ Այստեղ նրանք նվիրարեբում էին սորուկներ և սորկուհիներ»:

(49) Ագաթանգեղոս, ՃԸ, 731:

Բուզու⁵⁰:

Ազաթանգեղոսի վերոհիշյալ հաղորդման արժանահավատությունը հաստատվում է Փափսոս Բուզանդի տվյալներով: Վերջինս Պապ թագավորին (367–380 թթ.) մեղադրելիս, իմիջի-այյուց խոսում է նրա ձեռնարկած բարենորոգումների մասին: Այդ բարենորոգումներից մեկն էլ այն էր, որ թագավորը բռնագրավում էր մի մասը եկեղեցապատկան այն հողերի, որ Տրդատ Մեծը վերցրել էր հեթանոսական տաճարներից և պարգևել քրիստոնեական եկեղեցու սպասավորներին⁵¹: Վերջապես, մենք ունենք պատմահոր այն վկայությունը, թե Տիգրան թագավորը «ցատուցեալ ընդ Վահունիսն, ... ընկենու զնոսա ի քրմութենէն, և զգեղն յարքունիս առնու»⁵²:

Ավելորդ չենք համարում այս վկայությունների կողքին մեկ անգամ ևս հիշատակել մ.թ.ա. VI դարի վերջերին գահակալած Անտիոքոսներից մեկի նամակն այն մասին, որ թագավորը ետ է վերադարձնում Բայտոկայկեյում գտնվող Ջևսի տաճարին նրա հողային նախկին տիրույթները: Այս դեպքում անկասկած է, որ Սելևկյան թագավորները իրենց տիրապետության սկզբնական շրջանում այդ տաճարից վերցրել էին նշանակալից հողային տարածություններ⁵³: Այս բոլորից հետո, դժվար չէ կռահել, որ թագավորական իշխանության փոխհարաբերությունը քրմական դասի հետ ոչ բոլոր դեպքերում էր բարեկամական:

Այսպիսին էր իրողությունը ոչ միայն Հայաստանի պաշտամունքային կենտրոնի՝ Արմավիրի տաճարում, այլ նաև երկրի մյուս մասերում և քաղաքներում: Եփրատի վերին ձախ հոսանքում, Եկեղյաց գավառում, մի ամբողջ շրջան է հայտնի, որը այնտեղ գտնվող Անահիտ դիցուհու տաճարի անունով հայերը կոչել են Անհատական երկիր, հույները՝ ἡ Ἀναΐτιδος χώρα և համարվում էր «սրբազան երկիր»: Պյուտարքոսը հաղորդում է, որ այդ երկրի ընդարձակ արոտավայրերում արածում էին հատուկ գույնի կովեր, որոնք նվիրաբերված էին աստվածուհուն⁵⁴: Ս.Տ. Երեմյանը նշում է, որ «տաճարային այդ տիրույթները

(50) Յովհան Մամիկոնեան, Պատմութիւն Տարօնոյ, Երևան, 1941, էջ 111:

(51) Փափսոս Բուզանդ, է, լս:

(52) Մովսես Խորենացի, Բ, Ժգ:

(53) C. B. Welles, RC, 79.

(54) Plutarchi Lucull., XXIV, 2-6.

առավել կայուն և պահպանողական էին և մի շարք դեպքերում առաջացել են նախահայկական շրջանում»⁵⁵:

Արտաշեսյանների մայրաքաղաք Արտաշատը ևս, հին աշխարհի բոլոր մեծ քաղաքների նման, ունեցել է իր հովանավոր դիցուհուն՝ Անահիտին, որի պատվին քաղաքում կառուցված է եղել տաճար⁵⁶: Անկասկած, իրենց հովանավոր աստվածներին նվիրված տաճարներ կային նաև Հայաստանի այնպիսի քաղաքներում, ինչպիսիք Երվանդաշատը, Բագարանը, Բագավանը, Տիգրանակերտը և այլն:

Սկզբնաղբյուրների ուսումնասիրությունը ավելի քան պարզ կերպով ցույց է տալիս, որ քրմապետի իրավասությունները չէին սահմանափակվում միայն պաշտամունքային արարողությունների կատարումով և տաճարային տնտեսությունների վերահսկողությամբ:

Ամենայն հավանականությամբ, հեթանոսական Հայաստանում քրմապետներն ունեցել են նաև մի բացառիկ իրավունք, որպիսին մենք չենք հանդիպում հելլենիստական արևելքի մյուս երկրներում: Այդ՝ հայոց թագավորին թագադրելու իրավունքն էր: Իսկ սա ունեի բացառիկ կարեւորություն, քանի որ առանց թագադրումի արարողության թագավորական իշխանությունը ապօրինի կհամարվեր: Հավանաբար այս հանգամանքը ի նկատի ունի Խորենացին, երբ անդրադառնալով Երվանդի գահակալությանը, գրում է. «Եւ ի մեռանելն Սանատրկոյ՝ միաբանեալ թագաւորեցուցին զնա, առանց արանց յազգէն Բագրատունեաց լինել թագադիր»⁵⁷: Թագադրման արարողությունն, անկասկած, տեղի էր ունենում հայտնի սրբավայրերից մեկում: Այդպիսի սրբավայրում, հավանաբար, թագադրվել էր Տիգրան Բ-ը, որտեղ և հետագայում նա կառուցեց իր քաղաքը, Տիգրանակերտը⁵⁸:

Աղբյուրներից հայտնի է, որ հայոց թագավորին թագադրելու իրավունքը վերապահված էր Բագրատունյաց տոհմին: Բագրատունի անվան առաջին բաղկացուցիչ մասը «բագ» — ինքնին հուշում է այն մասին, որ Բագրատունիները սկզբնական

(55) С.Т. Еремян, Основные черты общественного строя Армении в эллинистическую эпоху, стр. 56; Նույնի, О рабстве и рабовладении в древней Армении, ВДИ, 1950, N^o 1. стр. 25.

(56) Հմմտ. Մովսես Խորենացի, Բ, ԽԺ:

(57) Մովսես Խորենացի, Բ, ԼԷ:

(58) Հմմտ. Appiani Mithrid., 67.

չրջանում պատկանելիս են եղել քրմական դասին⁵⁹։ Հենց այս հանգամանքն էլ մեզ հանգեցրել է վերոբերյալ ենթադրության, թե հայոց թագավորին թագադրում էր քրմապետը։

Հրեաների մոտ ևս քրմապետն ունեցել է թագավորին թագադրելու իրավասություն։ Այսպես, Աստվածաշնչի մեջ կարդում ենք, որ քահանայապետ Սամվելը թագավոր է օծում Սավուղին⁶⁰։

Արևելքի երկրներում քրմական դասի ձեռքին է եղել նաև դատական իշխանությունը։ Դեռ ավելին։ Երբեմն քրմապետ դատավորը հանդիսացել է նաև երկրի գերագույն իշխանավորը և աշխարհագործի առաջնորդը։ Աստվածաշնչի մեջ կա մի ամբողջ գիրք, որտեղ նկարագրվում է պատմական այն դարաշրջանը, երբ հրեաները դեռ թագավոր չունեին և երկրի գերագույն իշխանությունը գտնվում էր քահանայապետ-դատավորի ձեռքին, որը միաժամանակ պատերազմի ընթացքում հանդիսանում էր հրեաների ռազմական առաջնորդը⁶¹։

Ըստ երևույթին, հեթանոսական Հայաստանում ևս քրմապետի ձեռքին է եղել դատավորական իշխանությունը, որը հետագայում ժառանգաբար անցել է հայոց կաթողիկոսին։ Ինչպես վկայում է պատմահայրը, հայկական եկեղեցու գլուխ կանգնած կաթողիկոսը միևնույն ժամանակ վարում էր «մեծ դատավարություն գործակալությունը»։ Հայաստանում քրիստոնեությունը պետական կրոն հայտարարվելուց հետո, ինչպես հաղորդում է Ագաթանգեղոսը, Տրդատ թագավորը և Գրիգոր

(59) Իրավացի է Ա.Մ. Գարազյանը (տես՝ Քննական Պատմություն Հայոց մ. Ա, Թիֆլիս, 1895, էջ 178), երբ գրում է. «Ըստ մեզ թագավոր պատկերն առ հայո ոչ միայն վաղեմի սովորություն էր, ... այլև թերևս կրոնական արարողություն, և Բագրատունիք իբրև գլխահունիս էին թերևս քրմական ցեղ ի մեջ Հայոց։ Առ այս արդարև չունենք պատմական ապացույց, բայց այսպես ենթադրելու բավական պատճառ կուտա մեզ Բագրատունի անվան առաջին բառը բազ, որ հնդեվրոպական լեզվաց շատերուն մեջ կա և կնշանակե դիք կամ աստված։ Ուստի մարթ է կարծել, թե Բագրատունիք այսպես կոչված էին իբր նվիրական անձինք որպես գլխահունիս, որ քուրմ էին ցեղով և որոց անվան առաջին բառը վանձրագ բառին ուրիշ ձևն է և միևնույն նշանակությունն ունի»։

(60) Ա. գիրք Թագավորութեանց, Գ-ԺԱ.

(61) Գիրք Դատաւորաց, Բ, 16-19: Գ, 10: Դ, 4-24: ԺԱ-ԺԶ.

Լուսավորիչը «զդաստակերտան և զսպասաւորան քրմօքն հանդերձ և նոցին գետնովքն և սահմանօքն ի ծառայութիւն նուիրեցին եկեղեցւոյն սպասաւորութեան»⁶²: Կասկած չի կարող լինել, որ նորաստեղծ քրիստոնեական եկեղեցին Հայաստանում հեթանոսական տաճարներից փառանդեց ոչ միայն նրանց շարժական և անշարժ ունեցվածքը, այլև քրմերի մինչ այդ ունեցած արտոնութիւնները, այդ թիւում նաև դաստական իշխանութիւնը:

Վերջապես Արևելքում քրմապետը հաճախ հանդիսանում էր նաև ամբողջ մարզի քաղաքական կառավարիչը, ստրատեգոսը: Այդ մասին մեզ է հասել հետաքրքիր մի վկայութիւն, որի վաւերականութիւնը ամեն կասկածից վեր է: Դա Կապպադովկիայի Կոմանա քաղաքում գտնված Մա դիցուհուն նվիրված տաճարի քրմապետի պատվին ընդունված մեծարման դեկրետն է, որը մեզ է հասել արձանագրութեան ձևով: Դրանում ասված է. «[Οἱ Κατάονες οἱ ἐ]ν [τ]ῆ ἱερῶ Κομάνων πό]λει Τ[ρ]ο[ι][τανταίχ]ιτην Ἰαζήμ[ιον] τὸν ἱερέ]α Νικηφόρου θ[ε]ᾶς καί[] στρατηγὸν Καταονία[ς. ἡ] γησαύμενον αὐτῶν ἐπιεικ[ῶς τε] καί εὐεργετικῶς»:

(Կատանացիները, որոնք ապրում են Կոմանայի սրբազան քաղաքում, Տրիտանտեքմեսին, Յագիմոսի որդուն Նիկեփորոս դիցուհու քրմին և Կատանիայի ստրատեգոսին, որը նրանց կառավարում էր պատշաճորեն ու բարեգործութեամբ)⁶³: Ինչպես տեսնում ենք, Կոմանայի քրմապետը միաժամանակ հանդիսանում է Կապպադովկիայի տասը ստրատեգիաներից մեկը, Կատանայի ստրատեգոս-կառավարիչը⁶⁴: Ինչ խոսք, որ վերոհիշյալ արձանագրութիւնից բխող եզրակացութիւնը սերտորեն ձայնակցում է Ստրաբոնի հայտնի վկայութեանը, թե Կոմանայի քրմապետը «թագավորից հետո երկրորդ անձնավորութիւնն է Կապպադովկիայում»⁶⁵:

Բոլոր հիմքերն ունենք ենթադրելու, որ քրմերը Հայաստանում ևս ունեցել են զինվորական իշխանութիւն: Այդ են-

(62) Ագաթանգեղոս, ՃԸ, 781:

(63) Արձանագրութեան հրատարակութիւնը տես W. Ramsay, The social basis of Roman power in Asia Minor, Aberdeen, 1941, p. 105-106.

(64) Հմմտ. Ա.Գ. Периханян, Храмовые объединения Малой Азии и Армении, էջ 160.

(65) Strabo, XII, 2, 3 (C. 535).

Թաղրուլթյան յավագույն հիմքը հեթանոսության վերացման և քրիստոնեության տարածման ամբողջ պատմությունն է: Մեր հիմնական աղբյուրը, Ագաթանգեղոսը, վկայում է, որ քրիստոնեությունը միանգամից, խաղաղ ճանապարհով չէ, որ մտավ Հայաստան, այլ Տրդատ Թագավորի և Գրիգոր Լուսավորչի կողմից բռնությամբ, հրով ու սրով տարածվեց: Նոր վարդապետության դեմ պայքարելիս, հեթանոսության գլխավոր հենարանները տաճարներն էին, որոնք մեծ մասամբ ամրացված բերդեր էին և ունեին հատուկ զորական միավորումներ: Տրդատ Թագավորն ու Լուսավորիչը ստիպված էին մեծաթիվ զորքով արշավել այդ տաճարային կենտրոնների դեմ և արյունալի մարտերից հետո միայն գրավել դրանք:

Հայաստանի տաճարային մի շարք կենտրոնների մասին խոսելիս, հայ մատենագիրները դրանք համարում են նույնիսկ ամրություններ: Բերենք մի քանի օրինակ: Մովսես Խորենացին Երվանդաշատի մոտ կառուցված Բագարան քաղաքը, որտեղ Երվանդը փոխադրեց Արմավիրում եղած բոլոր կուռքերը և այնտեղ մեհյաններ շինելով իր Երվազ եղբորը քրմապետ նշանակեց, անվանում է «ամուրն Բագարան»⁶⁶: Ագաթանգեղոսի վկայությամբ, Տրդատ Թագավորն ու Գրիգոր Լուսավորիչը Եկեղյաց գավառի Անի-Կամախում գտնվող Արամազդի տաճարը ավերելուց հետո, «գաւանն ամրականայն հանդերձ ի ծառայութիւն եկեղեցւոյ նուիրէին»⁶⁷: Մովսես Խորենացին ևս այս Անին նույնպես անվանում է ամրոց⁶⁸: Երիզա ավանը ևս, որտեղ գտնվում էր Անահիտ դիցուհու տաճարը, շրջապատված էր բարձր պարիսպներով և ցույց տվեց ուժեղ դիմադրություն Տրդատի և Լուսավորչի զորքերին⁶⁹:

Հովհան Մամիկոնյանի «Պատմութիւն Տարօնոյ» մատուցում հիշատակվում են մի շարք պատերազմներ, որ մղել է Տարոնում գտնվող Գրիսիանեի տաճարային կազմակերպությունը Թագավորական զորքերի դեմ: Նրա հաղորդման համաձայն, տաճարին պատկանող ավաններից դուրս բերված զորքերը բաղկա-

(66) Մովսես Խորենացի, Բ, խը:

(67) Ագաթանգեղոս, ՃԹ, 785:

(68) Մովսես Խորենացի, Բ, Ժբ:

(69) Ագաթանգեղոս, ՃԹ, 786:

ցած էին աղեղնավորներից, պարսավորներից և տեգավորներից⁷⁰: Հայկական մատենագրության մեջ պահպանված են ոչ քիչ տեղեկություններ այն մասին, որ Հայաստանում նորաստեղծ եկեղեցու առաջին ականավոր գործիչները միաժամանակ առնչություն են ունեցել գինվորական ծառայության հետ: Այսպես, Փավստոս Բուզանդի վկայությամբ, Գրիգոր Լուսավորչի թուները, Պապը և Աթանազիները, զբաղվում էին ռազմական գործով⁷¹: Դարձյալ Փավստոսի պատմությունից մեզ հայտնի է, որ Ներսես կաթողիկոսը, նախքան հայկական եկեղեցու քահանայապետ նշանակվելը, եղել էր գինվորական⁷²: Այս առնչությամբ առավել հետաքրքրական է Փավստոսի այն հաղորդումը, թե Ջավեն եպիսկոպոսը ոչ միայն մտցրեց հոգևորականության ռազմական պատրաստականության հարցը, այլև առաջարկում էր հոգևորականներին կրել ռազմական համազգեստ⁷³: Մեզ հասել է վկայություն, թե մեծն Մաշտոցը ևս մի ժամանակ եղել է գինվորական⁷⁴: Այս փաստերի մեջ Հ.Հ. Մանանդյանը հակված է տեսնելու Եվրոպայի միջնադարյան ասպետական բարքերի ընդօրինակումը Հայաստանում⁷⁵, իսկ Ա.Գ. Փերիխանյանը Փոքր Ասիայի և Հայաստանի տաճարային տնտեսություններին նվիրված իր ուսումնասիրության մեջ վերահիշյալ փաստերի կապակցությամբ իրավացիորեն գրում է, որ «քրիստոնեության սկզբնական շրջանում հայ հոգևորականության ներկայացուցիչների ռազմական հակումները գուցե անհրաժեշտ է բացատրել որպես վերապրուկ նրա նախորդների հայկական քրմական դասի ավանդների»⁷⁶:

Ամբողջ շարադրվածից ավելի քան պարզ է, որ հեթանոսական Հայաստանում և Առաջավոր Ասիայի մյուս երկրներում քրմական դասը խոշոր դեր է ունեցել երկրի թե՛ ներքին

(70) Յովհան Մամիկոնեան, Պատմութիւն Տարօնոյ, Երևան, 1941, էջ 110-112:

(71) Փավստոս Բուզանդ, Գ, Ժգ:

(72) Նույն տեղում, Դ, գ:

(73) Նույն տեղում, Դ, ր:

(74) Կորիւն, Պատմութիւն վարուց և մահուան Մեսրոպայ Վարդապետի, վենետիկ, 1894, էջ 13-14:

(75) Հ.Հ. Մանանդյան, Ֆեոդալիզմը հին Հայաստանում, էջ 145-147:

(76) А.Г. Перихаян, Храмовые объединения Малой Азии и Армении, էջ 80-81:

տնտեսական և թե՛ մշակութային-պաշտամունքային կյանքում: Քրմերի գործունեությունը, սակայն, չի սահմանափակվել այդքանով: Նրանք գործոն մասնակցություն են ունեցել նաև արտաքին, միջպետական հարաբերություններին: Այս տեսակետից հետաքրքիր են երկու փաստ, մեկը մատենագրությունից, մյուսը վիմական արձանագրություններից:

Նկարագրելով Իբերիայի (Վրաստան) հասարակակարգը, Ստրաբոնը գրում է. «Չորս դասի (γέννη) մարդիկ են բնակեցնում երկիրը: Դրանցից մեկը ամենակարևորն է, որից և թագավոր են ընտրում (καθίστασθαι), ծագումով (նախնին թագավորին) ամենամոտիկ և տարիքով ավագագույն անձին, իսկ նրանցից երկրորդը վարում է դատական գործերը և առաջնորդում է զորքը: Երկրորդը քրմերի դասն է, որին հանձնված է հարևանների հետ հարաբերություններ վարելու գործը: Երրորդ (դասը) ռազմիկներն են և երկրագործները: Չորրորդ դասը ժողովուրդն է (τὸ τῶν λαῶν), որոնք հանդիսանում են արքունի ստրուկներ (βασιλικοὶ δοῦλοι) և արտագրում են այն ամենը, ինչ անհրաժեշտ է ապրելու համար»⁷⁷:

Ստրաբոնի անգնահատելի այս հաղորդման մեջ նրա վկայությունը Իբերիայի քրմական դասի մասին, անշուշտ, չի կարելի հասկանալ այն տառացի իմաստով, որ երկրի արտաքին հարաբերությունների հարցերը վճելու իրավունքը գտնվում էր բացառապես քրմերի ձեռքին: Արտաքին քաղաքականություն հարցերը, անկասկած, բոլոր դեպքերում պետք է, որ լուծեր ինքը, երկրի գերագույն տերը համարվող թագավորը, իր իսկ հայեցողությունով: Ստրաբոնի վկայության իմաստն այն է, որ թագավորը քրմերին էր հանձնարարում արտաքին քաղաքականություն հարցերի մասին հոգալը:

Մյուս փաստը, որի մասին ակնարկեցինք, վիմական արձանագրությունների այն ամբողջ կոմպլեքսն է, որը հայտնաբերվել է Գալատիայի խոշորագույն տաճարային կենտրոն Պեսսինոնտում: Այդ արձանագրություններում պահպանված է այն նամա-

(77) Strabo, XI, 3, 6: Ա.Ի. Բոլտուովան գտնում է, որ Ստրաբոնի այս վկայության աղբյուրը Պոսիդոնիոսն է, ուստի և այն արտացոլում է մ.թ.ա. II դարի կեսերի Իբերիայի հասարակական և քաղաքական կարգերը (տես՝ А.И. Болтунова, Возникновение классового общества и государственной власти в Иберии, ВДИ, 1956, N^o 2., стр. 38).)

կազրուեցան, որ ժամանակի միջազգային քաղաքական բարդ պայմաններում ունեցել են Պերգամոնի թագավորները կյուբեղեի տաճարի քրմապետի Ատտիսի հետ: Ներկա գլխում մեկ ուրիշ առիթով մենք մանրամասն անդրադարձել ենք այդ արձանագրուեցաններին, որոնց վերլուծուեցանը նույնպես մեզ հանգեցրել է այն եզրակացուեցան, թե քրմապետները նշանակալից դեր են խաղացել հելլենիստական տերուեցանների միջպետական հարաբերուեցաններում:

Այսպիսով, քրմապետները, բոլոր դեպքերում, ունեցել են բարձր հեղինակուեցան և համարվել են թագավորի մերձավորագույն մարդիկը, միաժամանակ իրենց պաշտոնը վարելով ցմահ: Հայաստանում ևս, ինչպես և հելլենիստական մյուս երկրներում, թագավորները տաճարներին և դրանց սպասարկող քրմերին նվիրել են հողային ընդարձակ տիրուեցաններ, դրանց վրա աշխատող անմիջական արտադրողների հոծ զանգվածով, որը և կազմում էր քրմական դասի տնտեսական և քաղաքական հզորուեցան գլխավոր սղբյուրը:

Քրիստոնեուեցան ընդունումից հետո, նորաստեղծ եկեղեցին Հայաստանում ժառանգեց հեթանոսական տաճարների ոչ միայն ամբողջ հարստուեցանը, այլև բոլոր այն առանձնաշնորհումները, որ նախապես վայելում էին քրմերը: Դրանով էլ, այնուհետև, քրիստոնեական եկեղեցին դառնում է Հայաստանի քաղաքական, տնտեսական և մշակուեցանային կյանքի տմենակարևոր գործոններից մեկը:

ԳԼՈՒԽ ՎԵՅԵՐՈՐԳ

ՊԵՏԱԿԱՆ ԱՊԱՐԱՏԻ ԿԱԶՄԱՎՈՐՈՒՄԸ ԵՒ ՆՐԱ ՀԵՏԱԳԱ ԶԱՐԳԱՑՄԱՆ ՓՈՒԼԸ ՀԱՅԱՍՏԱՆՈՒՄ

Հայտնի է, որ պետական ապարատի կազմավորումն, առհասարակ, պայմանավորված է առաջին հերթին տվյալ հասարակութան մեջ գոլթային անհավասարության հիման վրա ծագած պետականության առաջացմամբ:

Նախորդ գլուխներում Բեհիտունի արձանագրության, ինչպես նաև Հերոդոտոսի և Քսենոփոնի հաղորդած տվյալների հիման վրա ցույց տվեցինք, որ Հայկական լեռնաշխարհում բնակվող ցեղերը մ.թ.ա. VI դարում արդեն թևակոխել էին դասակարգային շերտավորման փուլը և որ այնտեղ ստեղծվել էին մի շարք նախադրյալներ ինքնուրույն պետականության առաջացման համար: Սակայն Հայաստան աշխարհը շուտով ընկավ օտարերկրյա, պարսկական տիրապետության տակ, որով և ժամանակավորապես խանգարվեց երկրի զարգացման բնականոն ընթացքը պետականության կազմավորման ճանապարհին և արգելակվեց ինքնուրույն պետության ստեղծումը: Այնուհետև, մենք ցույց տվեցինք, որ Աքեմենյանների պարսկական տերության կործանումը և Ալեքսանդր Մակեդոնացու մահից հետո նրա ժառանգների միջև ծայր առած հակամարտությունը ավելի քան նպաստավոր պայմաններ ստեղծեցին Առաջավոր Ասիայում մի շարք փոքր միապետությունների (Պերգամոն, Բյութանիա, Կապպադոկիա, Պոնտոս, Հայաստան, և այլն) առաջացման համար, տեղական իշխանների գլխավորությամբ: Այդ ժամանակ էլ ինքնուրույն պետականության ստեղծման հիման վրա Հայաստանում սկսում է կազմավորվել պետական սպարատը:

Հայրենական և օտարաբան սկզբնազբյուրների, ինչպես նաև վիճաբարական նյութի մանրակրկիտ ծանոթությունը մեզ հիմք է տալիս Հայաստանում պետական սպարատի կազմավոր-

ման ու հետագա զարգացման ամբողջ ընթացքը բաժանել երեք հիմնական փուլի: 1) Ներքին համախմբման ու կազմակերպման փուլ, որն ընդգրկում է Երվանդունիների թագավորության ամբողջ շրջանը և Արտաշեսյան թագավորության հաստատումից հետո մինչև Տիգրան Բ-ի գահակալումն ընկած տարիները (IV դարի վերջ — I դարի սկիզբ մ.թ.ա.): 2) Արտաքին ընդարձակման և ներքին կատարելագործման փուլ, որն ընդգրկում է Տիգրան Բ-ի գահակալումից մինչև Հայաստանում Արշակունիների հաստատումն ընկած ժամանակահատվածը (I դար մ.թ.ա. — I դար մ.թ.): 3) Հելլենիստական ստրկատիրական պետական ապարատի ֆեոդալականի վերափոխման փուլ, որն ընդգրկում է հայ Արշակունիների թագավորության 350-ամյա գահակալության ամբողջ ժամանակաշրջանը:

Ավելի քան յոթհարյուրամյակ տևած պատմական այդ երեք շրջանների համար ընդհանուրն այն է, որ պետական իշխանության գլուխ կանգնած է եղել ինքը՝ թագավորը: Մենք արդեն խոսել ենք թագավորական իշխանության առաջացման և նրա ֆունկցիաների մասին Երվանդունիների և Արտաշեսյանների թագավորության առաջին շրջանում: Այդ շրջանի մասին պահպանված պատմական բոլոր վկայությունները ցույց են տալիս, որ Հայաստանում դեռևս չէր կազմավորվել այնպիսի զարգացած ու ճյուղավորված պետական ապարատ, ինչպիսին հետագայում առաջացավ Տիգրան Բ-ի աշխարհակալությունից հետո և Արշակունիների գահակալության տարիներին: Այնուամենայնիվ, մենք նկատեցինք, որ Երվանդունիների ժամանակ Հայաստանում արդեն գոյություն ունեւ իշխանության ինչ-որ բաժանում: Թագավորի հետ միասին երկրի կառավարման գործին ակտիվ կերպով մասնակցել են նաև քրմերը: Ամենայն հավանականությամբ, այդ շրջանում հայոց թագավորի կողքին եղել է նրան շրջապատող և նրա իշխանությունը ինչ-որ չափով սահմանափակող ավագանու խորհուրդը, որը Գսենոփոնի վկայությամբ, գոյություն ունեւ Աքեմենյանների կողմից Հայաստանի նվաճումից առաջ: Հույն պատմագիրը նրանց անվանում է «պատվավոր արմեններ»¹:

Ընթերցողին արդեն հայտնի են անտիկ հեղինակների

(1) Xenoph., Cyrop., III, 1, 8:

երկերում պահպանված այն բոլոր վկայութիւնները, որոնցում հիշատակութիւն կա Արմենիայի սատրապ, հետագայում թագաւոր, Երվանդի (ՄΘΡΩΝΤΗΣ) մասին: Այդ վկայութիւնների մեջ չկա և ոչ մի տեղեկութիւն, ոչ մի ակնարկութիւն հայոց թագաւոր Երվանդի որևէ ստորագրչալի մասին: Մեզ հայտնի միակ աղբյուրը, որտեղ խոսվում է Երվանդ թագաւորի ստորագրչալների մասին, Մովսես Խորենացու «Հայոց պատմութիւնն» է: Պատմահոր վկայութեամբ, թագաւոր ասպետը Բագրատունյաց սոհմից մերժել է թագաւորել Սանադրուկ թագաւորին հաջորդած Երվանդին²: Այնուհետև Խորենացին հիշատակում է Երվանդին ենթակա բազում նախարարների մասին: «Լուր հասանէ, — գրում է հայ մատենագիրը, — առ Երուանդ, յուտեացուց գաւառին, եթէ գումարեաց արքայն Պարսից զօրս բազումս ի ձեռն Սմբատայ, զի ի վերայ քո խաղացեալ անցէ զմանուկն Արտաշէս ի թագաւորութիւն իւր: Զայս լուեալ Երուանդայ՝ եթող անդեն զբազումս ի նախարարացն կողմնապահս ... և ամենայն նախարարացն տայր պարգևս և պատիւս, և զօրացն ամենեցուն պարգևէր առատապէս»³: Եւ վերջապես, պատմահայրը հիշատակում է Երվանդի պալատում գտնվող արքունի սպասավորների մասին⁴:

Մովսես Խորենացու այս վկայութիւնները, սակայն, որոնք ժամանակագրական առումով ընկնում են մ.թ. առաջին դարին, դժվար թե վերաբերվեն Երվանդ անունով մեզ հայտնի թագաւորներից որևէ մեկին: Անդրադառնալով Խորենացու պատմութեան մեջ Երվանդին վերաբերող գլուխներին (գիրք Բ, գլխ. 15-16), 4.4. Սանանդյանը իրավացի կերպով նշում է, որ «պատմահայրը, օգտվելով, հավանորեն, բացի վիպասանքից նաև մեզ անհայտ աղբյուրներից՝ Երվանդի ու Արտաշեսի ընդարձակ պատմութիւնը հերյուրել է և շարադրել, բնականաբար, ըստ իր ըմբռնման ու ժամանակագրութեան, շփոթելով Օրոնտաս-Երվանդին Եդեսիայի Աբգար է թագաւորի որդու Արբանդեսի (ΑΘΒΑΝΤΗΣ) հետ, որը ժամանակակից էր Տրայանոս կայսեր»⁵:

Երվանդունիների թագաւորութեան ժամանակ Հայաստանում չէր կարող գոյութիւն ունեցած լինել զարգացած վարչա-

(2) Մովսես Խորենացի, Բ, 15:

(3) Նույն տեղում, Բ, 16:

(4) Նույն տեղում, Բ, 16:

(5) 4.4. Սանանդյան, Քննական տեսութիւն ..., Կ. Ա, էջ 128-127:

պետական ապարատ, քանի որ նրանց տերության սահմանները զգալի չափով կրճատվել էին և երկիրը դժվար թե ունենար վարչա-տերիտորիալ բաժանումներ: Մ.թ.ա. III դարում Երվանդունիների իշխանությունից դուրս էին գտնվում Փոքր Հայքը, Ծոփքը, Կոմմագենեն, որտեղ, ինչպես տեսանք, հաստատվել էին առանձին իշխանություններ: Բացի այդ, երկրի հարավ-արևմրտյան մի շարք շրջաններ նվաճել էին Սելևկյանները: Ըստ երևույթին, Հայկական լեռնաշխարհի մի շարք գավառներ այդ ժամանակ գտնվում էին հարևանների իբերների (խորղենեն և Գոգարենեն), մեղացիների (Կասպիանեն, Փավնիտիսը և Բասորոպեղան), խալիբների և մոսինոյկների (Կարենիտիսը և Դերքսենեն), Կատաոնների (Ակիլիանեն) և ասորիների (Տամոնիտիսը) ձեռքին⁶: Այդ գավառները, ինչպես հաղորդում է Ստրաբոնը, հետագայում Արտաշեսն ու Ջարեհը նվաճելով, միացրին իրենց տերությանը⁷: Հետևաբար, Երվանդ Վերջինի իշխանությունը տակ մնացել էր Հայաստանի այն մասը, որը հետագայում հայտնի էր «միջնաշխարհ» անունով: Երվանդյան Հայաստանի տարածքային այս կրճատումները չէին կարող բացասաբար չանդրադառնալ նոր կազմավորվող հայկական պետական ապարատի հետագա պարզացման վրա:

Հայկական պետականության կազմավորման և հետագա ներքին զարգացման փուլը հիմնականում ավարտվում է Արտաշես Ա-ի թագավորության ժամանակ: Պատմական այդ պրոցեսը պայմանավորված է եղել ոչ միայն երկրի ներքին, սոցիալ-տնտեսական զարգացմամբ, այլև մի շարք ներքին ու արտաքին քաղաքական հանգամանքերով, որոնց մասին արդեն խոսել ենք նախորդ գլուխներում:

Թագավոր դառնալուց հետո, Արտաշեսին հաջողվեց նախկինում Արաքսի հովտում պարփակված թագավորության սահմաններն ընդարձակել, նրան միացնելով հայկական լեռնաշխարհի ծայրամասային գավառները⁸, որի հետևանքով, ինչպես վկայում է Պոլիբիոսը, Արտաշեսը դառնում է Հայաստանի մե-

(6) Հմմտ. Գ.Ա. Тирациян, Страна Коммагена и Армения, Տեղ. ՀԳԱՀԳ, 1956, նո 3, էջ 72: Գ.Ա. Տիրացյան, Երվանդունիները Հայաստանում, Տեղ. ՀԳԱՀԳ, 1958, նո 6, էջ 66:

(7) Strabo, XI 14, 5 (С. 528).

(8) Նույն տեղում, XI 14, 5:

ծագուլն մասի (բայց ոչ ամբողջ Հայաստանի) տիրակալ (ὁ τῆς πλειστοῦς Ἀρμενίας ἄρχων)⁹: Հենց այդ ժամանակ էլ մեկ միասնական պետութեան կազմում ընդգրկված Հայկական լեռնաշխարհում բնակվող ցեղերի կյանքում տեղի ունեցավ պատմական կարևորագույն իրադարձություն, «բոլորը միալեզու դարձան»¹⁰:

Ինչպես արդեն նշել ենք, Պոնտոսի և Կապպադոկիայի թագավորներն ամեն կերպ խանգարում էին հայկական բոլոր հողերը մեկ թագավորության մեջ միավորելու ուղղությամբ Արտաշեսի վարած քաղաքականությունը, որի հետևանքով էլ Փոքր Հայքն ու Ծոփքը դուրս մնացին հայկական կենտրոնացած պետության սահմաններից: Այսուհանդերձ, հաստատուն հիմքը դրված էր: Ստեղծված էր էթնիկական կոմպակտ ամբողջություններ կայացնող մի պետական միավորում:

Անցնելով միասնական պետության գլուխ, Արտաշեսը պետք է որ ձեռնամուխ լիներ վարչա-պետական նոր ապարատի ստեղծմանը: Այդ ուղղությամբ նրա ձեռնարկած միջոցառումներին հետևելու համար ուսումնասիրողն իզուր կփորձի ուղղակի տվյալներ փնտրել հայ, ինչպես և օտար մատենագրության մեջ: Այս դեպքում մենք դարձյալ ստիպված ենք դիմելու անուղղակի տվյալների և հարևան հելլենիստական երկրների պատմությունից մեզ հայտնի օրինակներին: Ամենից առաջ պիտի նկատի ունենալ այն փաստը, որ Արտաշեսը, նախքան իրեն անկախ թագավոր հռչակելը, եղել էր Սելևկյան Անտիոքոս Գ-ի նշանակած ստրատեգոսը Հայաստանի մի մասի վրա: Մենք արդեն առիթ ունեցանք նշելու, որ Անտիոքոս Գ-ի ժամանակ ստրատեգոսն արդեն ոչ միայն գինվորական, այլ քաղաքական-վարչական պաշտոն էր նաև, որը նույնացվում է մարզի կառավարչի պաշտոնի հետ¹¹:

Կասկած չի կարող լինել, որ Արտաշեսը, որպես Սելևկյանների նշանակած ստրատեգոսը Հայաստանում, մոտ էր կանգնած Անտիոքոսի արքունիքին և լավ էր ծանոթ հելլենիստական այդ

(9) Polyb., XXVI, 6, 1-12:

(10) Strabo, նույն տեղում:

(11) Հին Հայաստանի *στορατῆγός* տերմինի մասին տես Գ.Ա. Տիրացյան, Մովսես Խորենացու «Հայոց պատմության» և Ստրաբոնի «Աշխարհագրության» մի քանի տվյալներ Հայաստանի ն.մ.թ. 3-2րդ դարերի պատմության մասին, ԲՄ, նո 6, 1982, Երևան, էջ 21-23:

խոշոր տերուլթյան պետական ապարատին: Ուստի Հայաստանի մեծագույն մասի թագավոր դառնալուց հետո նա, իր պետուլթյան վարչա-պետական ապարատի ստեղծմանը ձեռնարկելիս, առաջին հերթին պետք է անպայման նկատի ունենար Սելևկյանների պետական հաստատուլթյունները և աշխատել հետևել նրանց օրինակին:

Նորաստեղծ հայկական կենտրոնացված թագավորուլթյան կառավարչական ապարատը կազմակերպելիս, սակայն, Արտաշեսը չէր կարող հաշվի չառնել նաև Հայաստանում ստեղծված պատմական կոնկրետ պայմանները, որոնք շատ բանով տարբերվում էին Սելևկյանների մոտ տիրող պայմաններից: Առկա էին երկու հական տարբերուլթյուն: Հայկական թագավորուլթյան աշխարհագրական սահմաններն անհամեմատ նեղ էին Սելևկյանների լայնատարած պետուլթյան սահմաններից: Մյուս կողմից, սակայն, Սելևկյանների տերուլթյունը, որն իր մեջ ընդգրկում էր տարբեր ցեղերով ու ժողովուրդներով բնակեցված երկրամասեր, զուրկ էր էթնիկական այն միասնուլթյունից, որին արդեն հասել էր Արտաշեսի տիրապետուլթյան տակ գտնվող «միալեզու» դարձած Հայաստանը:

Հին Հայաստանի վարչա-տերիտորիալ բաժանման մասին մեզ հասած գրավոր սակավաթիվ տեղեկուլթյունները հիմնականում կարելի է բաժանել երկու կարգի: Դրանց մի մասը վերաբերում է պատմական այն ժամանակահատվածին, երբ Հայկական լեռնաշխարհը դեռևս գտնվում էր Աքեմենյան Պարսկաստանի տիրապետուլթյան տակ (սատրապուլթյան շրջան): Մյուս մասը վերաբերվում է արդեն Հայկական ինքնուրույն պետուլթյան վարչական ներքին բաժանմանը:

Սատրապուլթյան շրջանին վերաբերող Հայկական լեռնաշխարհի բաժանման մասին պահպանվել են երկու վկայուլթյուն՝ Հերոդոտոսի¹² և Քսենոփոնի¹³ մոտ: Այդ վկայուլթյունների հիման վրա մի շարք ուսումնասիրողներ ենթադրում են, որ Հայաստանն այդ ժամանակ վարչական տեսակետից բաժանված է եղել երկու մասի՝ Արևելյան և Արևմտյան, կազմելով Աքեմեն-

(12) Herod., III, 93 և 94:

(13) Xenoph., Anabasis, III, 5, 17: IV, 4, 4.

յան Պարսկաստանի 13-րդ և 18-րդ սատրապությունները¹⁴: Հիրավի, Հերոդոտոսը հաղորդում է, որ Արմենիան և նրա հարևան մի շարք շրջաններ կազմում էին Աքեմենյան տերության երկու՝ 13-րդ և 18-րդ սատրապությունները, որոնցից յուրաքանչյուրը պարսից արքային վճարում էր տարեկան որոշակի հարկ, մինչդեռ «Անաբասիում», Քսենոփոնի նկարագրած Հայաստանը, հավանաբար, կազմում էր մեկ սատրապություն, Օրոնտասի իշխանության տակ: Հ.Հ. Մանանդյանն այն կարծիքին է, թե «ինչպես Հերոդոտոսի, այնպես և Քսենոփոնի ժամանակ Արմենիան ունեցել է, հավանորեն, միայն մեկ սատրապ: Հ.Հ. Մանանդյանը, սակայն, չի բացառում Հայաստանի բաժանումը Արևելյան և Արևմտյան մասերի, որոնք կազմում էին մեկ սատրապություն, սատրապ Օրոնտասի գերիշխանության տակ, որի օգնականն էր հյուսիսարևոս (ՆՍԱՍՏՈՍ) Տիրիբազոսը¹⁵: Վերջերս Գ.Ա. Տիրացյանը ճիշտ է նկատել, որ Հերոդոտոսի և Քսենոփոնի վկայությունները արտացոլում են տարբեր իրավիճակ և որ V դարի վերջերին Հայկական լեռնաշխարհը վարչական վերաբաժանման է ենթարկվել¹⁶:

Հետագայում արդեն որպես ինքնուրույն պետություն կազմավորված Հայաստանի վարչա-տերիտորիալ բաժանումը և, այդ հիման վրա, պետական տարբեր պաշտոնների առաջացումը իր արտահայտությունը գտել է ինչպես հունա-լատինական, այնպես էլ հայ պատմիչների երկերում:

Աղբյուրներից մեզ հայտնի է, որ Հայկական լեռնաշխարհը դեռևս Արտաշեսից առաջ բաժանված է եղել Մեծ Հայքի, Մոփքի և Փոքր Հայքի իշխանությունների¹⁷: Սակայն, ղժբախտաբար, մենք ոչինչ չգիտենք այդ իշխանությունների ներքին վարչա-տերիտորիալ բաժանման և կառավարման ձևի մասին:

(14) Ա.Մ. Գարագաշյան, Քննական պատմություն հայոց, մ. Ա, էջ 87: Н. Адонц, Армения ..., էջ 390: К. Aslan, Etudes historiques sur le peuple arménien, Paris 1909, էջ 71 և ուրիշներ:

(15) Հ.Հ. Մանանդյան, Քննական տեսություն ..., հ. Ա, էջ 65: Պրոֆ. Լեոն ևս մատնանշում է, որ Հայաստանը Քսենոփոնի ժամանակ ունեցել է մեկ սատրապ (Լեո, Հայոց պատմություն, Հ. Ա, Թիֆլիս, 1917, էջ 391):

(16) Գ.Ա. Տիրացյան, «Անաբասիս» և Հայաստանը (Քսենոփոն, Անաբասիս, Երևան, 1970 զրքում, էջ 228-229): Հայ ժողովրդի պատմություն, հ. 1 Երևան, էջ 454:

(17) Polyb., XXVI, 6, 1-1: VIII, 25, 1-6: Strabo, XI, 14,5 (C. 528).

Միայն Ստրաբոնն է, որ հիշատակում է այդ երկրների սահմաններում բնակվող ցեղերի, ինչպես նաև մի շարք գավառների անունները: Խոսելով, օրինակ, Փոքր Հայքի մասին, նա հաղորդում է, որ «Մոփքի նման այստեղ ևս իշխել են բնիկ դինաստներ ...: Նրանց տիրապետության տակ էին նաև տիրաբեռները և խալդայները, այնպես, որ նրանց իշխանությունը տարածվում էր մինչև Տրապիզոն»¹⁸: Նույնպիսի բնույթ ունի նաև հույն աշխարհագետի հայտնի հաղորդումը Չարեհի և Արտաշեսի իշխանության տակ գտնվող Մոփքի և Մեծ Հայքի մասին, ուստի և այդ տվյալները մեծարժեք լինելով հանդերձ, մեզ քիչ են օգնում այդ երկրների պետական ներքին կառուցվածքի ու վարչական բաժանման մասին ճշգրիտ եզրակացության հանգելու:

Ստրաբոնի համապատասխան հաղորդումները վկայում են այն մասին, որ Արտաշեսի ժամանակ Մեծ Հայքի թագավորությունն արդեն մեծապես ընդարձակվել էր, ընդգրկելով հայկական տարրերով բնակեցված գրեթե բոլոր մարզերը: Հետևաբար, պետության կառավարման գործը դյուրացնելու նպատակով, անհրաժեշտ էր ձեռնամուխ լինել երկիրը վարչատերիտորիալ բաժանման ենթարկող բարենորոգումների: Այս կարևորագույն երևույթի մասին, ցավոք, աղբյուրներում գրեթե բացակայում են որոշակի տվյալներ: Ճիշտ է, Խորենացին որոշ տեղեկություններ հաղորդում է Արտաշեսի վարչական բարեփոխությունների մասին, սակայն պատմահայրը դրանք տեղադրում է մ.թ. Վ դարում և նրա պատմության ընթացքում այդ բոլորն ընկալվում են իբրև շարունակություն Վաղարշակ Ա-ի ձեռնարկած միջոցառումների¹⁹:

Հայագիտության մեջ առանձին ուշադրության է արժանացել Պլինիոս Ավագի այն հաղորդումը, թե Հայաստանը «բաժանված է պրեֆեկտուրաների, որոնք կոչվում են *στρατηγία* ներ, որոնցից մի քանիսը հնում եղել են թագավորություններ: Դրանք (թվով) 120 են և ունեն բարբարոսական անուններ»²⁰:

Պրոֆ. Ն. Ադոնցն այն կարծիքին է, թե Պլինիոսի այս հաղորդումը արսացողում է Հայաստանում Արշակունյաց հա-

(18) Strabo, XII, 3, 28 (C. 555).

(19) Մովսես Խորենացի, Բ, իէ-ծթ:

(20) "Dividitur in praefecturas, quas *στρατηγία*s vocant, quasdam ex iis vel singula ragna quondam, barbaris nominibus CXX" (C. Plin., Nat. Hist., VI, 10).

րըստույթյան հիմնադիր Տրդատ Ա-ի ժամանակաշրջանը²¹։ Գ.Խ. Սարգսյանն, իր հերթին, ենթադրում է, որ Հայաստանի բաժանումը ստրատեգիաների կատարվել է Արտաշեսյանների, գուցե և իր՝ Արտաշեսի ժամանակ²²։

Հիրավի, Պլինիոսի այս հաղորդումը պատմական ո՞ր շրջանին է վերաբերում. Տրդատ Ա-ի, թե՞ Արտաշեսյանների թագավորութայն։ Գ.Խ. Սարգսյանն իր վերոհիշյալ տեսակետը հիմնավորելու նպատակով նշում է մի շարք համոզիչ փաստարկներ։ Դրանց մեծ կցանկանայինք ավելացնել ևս մեկը, որը, մեր կարծիքով, կարող է առավել պարզութուն մտցնել այդ կարևոր հարցը որոշելու համար։ Բանն այն է, որ Պլինիոսի՝ լատիներեն դրված այս երկում ստրատեգիա (στρατηγία) բառը գրված է հունարեն տառերով։ Այս հանգամանքը մեզ մղում է երկու ենթադրութայն։ Առաջին, որ Պլինիոսը չի գտել այդ բառի լատիներեն բուն համարժեքը, թեև նա ստրատեգիան բացատրելով իբրև պրեֆեկտուրա, փորձել է որոշ պարզաբանում մտցնել երկրորդ, որ նա այդ տեղեկութունը քաղել է իրենից առաջ (ասել է թե՛ Տրդատ Ա-ի թագավորութունից առաջ) հեղինակած մի հույն պատմիչի երկից։ Ուստի մենք նույնպես առավել հավանական ենք համարում այս վերջին կարծիքը, դրա համար որոշակի հիմքեր տեսնելով իրենց իսկ Ստրաբոնի և Պլինիոսի հաղորդումներուն մեջ։

Ինչպես գիտենք, Ստրաբոնը, թվարկելով Արտաշեսի ջանքերով հայոց թագավորութայն տարածքին վերամիավորված մարզերը, տալիս է հայկական մեկ տասնյակ գավառների անուններ՝ Կասպիանե, Փավնիտիս, Քորգենե, Գոգարենե, Ակիլիսենե, Կարենիտիս և այլն²³։ Սրանցից յուրաքանչյուրը, հավանաբար, միաժամանակ նաև ստրատեգիաներից մեկի անվանումն էր, քանի որ Պլինիոսը նշելով, թե Հայաստանի ստրատեգիաները կրում են բարբարոսական անուններ, տալիս է դրանցից մեկի անունը՝

(21) Н. Адонц, Армения в эпоху Юстиниана, стр. 391-392, 433-434.

(22) Գ.Խ. Սարգսյան, Հին Հայաստանի սոցիալ-տնտեսական զարգացման ուղիների մասին, Երևան, 1962, էջ 7-9: Հայ ժողովրդի պատմութուն, հ. 1, Երևան, 1971, էջ 676-679 և 839-840: Այստեղ հետաքրքիր ենթադրութուն է հայտնվում այն մասին, թե Պլինիոսի բնագրի 120 թիվը հետագայի ազավաղում է և այն պետք է լինի 20:

(23) Strabo, XI, 14, 5.

Caranitis²⁴, որն, անկասկած, Ստրաբոնի հիշատակած նույն կարենիտինն է՝ հայկական կարինը:

Արտաշեսյանների ժամանակ Հայաստանը ստրատեգիաների բաժանված լինելու մասին ենթադրությունը առավել հավանական է դառնում Ստրաբոնի այն հաղորդումների հաշվառմամբ, որոնց համաձայն այդ ժամանակ Հայաստանի հարևան Պոնտոսի և Կապադոկիայի թագավորությունները ևս կազմված էին ստրատեգիաներից²⁵:

Ստրաբոնի և Պլինիոսի վերոհիշյալ հաղորդումներում հիշատակված տեղանունները հիմք են տալիս ենթադրելու, որ վարչա-տերիտորիալ առումով Հայաստանի ստրատեգիաների սահմանները համընկնում էին հայրենի լեռնաշխարհի ներքին ռելյեֆով, ինչպես նաև էթնիկական երանգներով պայմանավորված ստորաբաժանումներին: Ուստի ճիշտ պիտի համարել այն ենթադրությունը, թէ «այդ վարչա-տերիտորիալ միավորները կայուն են եղել և իրենց աշխարհագրական նկարագիրը հաղորդել են հետագայի նախարարություններին, հետզհետե վերափոխվելով Ֆեոդալական «տիրակալական իշխանությունների», որպիսիք և հանդիպում ենք մ.թ. IV-V դարերում»²⁶: Ստրատեգիաների կառավարիչները եղել են պետական պաշտոնյաներ, որոնց նշանակել է հայոց թագավորը իր մերձավորագույն շրջապատի մարդկանցից: Այդ հարցին մենք կանդրադառնանք փոքր ինչ հետո, Տիգրան Բ-ի տերություն մասին խոսելիս:

Անտիկ հեղինակների մեզ հասած երկերում, թեկուզ և դարձյալ կցկտուր, այնուամենայնիվ ավելի շատ տեղեկություններ կան Տիգրան Բ-ի թագավորության տարիների Հայաստանի, քան նրան նախորդած որևէ այլ շրջանի մասին: Այն բանից հետո, երբ Հռոմը կայուն կերպով հաստատվեց Փոքր Ասիայում և հասավ մինչև Եփրատ գետը, անտիկ, հատկապես լատինական հեղինակները, ավելի հաճախակի են անդրադառնում Հայաստանի տարածքում ծավալված դեպքերին, դրանով իսկ լրացնելով հայ ժողովրդի առաջին դարի պատմությունը վերաբերող

(24) C. Plin., Nat. Hist., V, 20.

(25) Strabo, XI, 2, 16: XII, 1, 4.

(26) Հայ ժողովրդի պատմություն, հ. 1, Երևան, էջ 878-879: Հմմտ. նաև Գ. Խ. Սարգսյան, Հին Հայաստանի սոցիալ-տնտեսական զարգացման ուղիների մասին, էջ 8, ծան. 1:

հայկական աղբյուրների շատ սուղ և, հաճախ, խառնաշփոթ վկայութիւնները:

Մի կողմից, հենվելով երկրի ներքին զարգացման հետևանքով կուտակված միջոցների վրա, մյուս կողմից, օգտվելով ստեղծված միջազգային բարենպաստ քաղաքական պայմաններից, մ.թ.ա. 95 թվականին Հայաստանի գահին բարձրացած «Տիգրանի որդի Տիգրանը»²⁷ ձեռնամուխ է լինում իր տերութիւն սահմաններն ընդարձակելու գործին: Առաջին հերթին նա բարեհաջող վախճանի է հասցնում Արտաշեսի սկսած պայքարը Մոսիքը ևս Մեծ Հայքի թագավորութիւնը միացնելու համար: Ինչպես հայտնի է, Արտաշեսի այդ բացառիկ կարևորութիւն ունեցող ծրագրի իրագործմանը մինչև այդ խանգարում էր հարևան Կապպադովկիայի թագավորը: Սակայն Տիգրան Բ-ի գահակալութիւնն առաջին տարիներին Կապպադովկիայի թագավորն ինքը հազիվ էր հռոմայեցիների օգնութիւնը պահպանում իր անվանական անկախութիւնը: Հետևաբար, նա արդեն ի վիճակի էր իրական օժանդակութիւն ցույց տալու Մոսիքի թագավորին: Ուստի և Տիգրան Բ-ը, օգտվելով հարմար առիթից, հարձակվում է Մոսիքի վերջին թագավոր Արտանեսի վրա և նրա երկիրը միացնում իր թագավորութիւնը (մ.թ.ա. 94 թ.): Պատմական այս սկսի միակ աղբյուրը Ստրաբոնի հետևյալ հակիրճ հաղորդումն է. « ... Իսկ Ջարիադրիսի (չառավիղն) էր Արտանես Մոսիացին ...: Նա նվաճվեց Տիգրանի կողմից և սա ամբողջ երկրին տեր դարձավ»²⁸:

Հայկական ցեղերով բնակեցված միակ երկրամասը, որը դուրս մնաց Տիգրան Բ-ի տիրապետութիւնից, Փոքր Հայքն էր, որն արդեն մ.թ.ա. II դարի վերջին դադարել էր գոյութիւն ունենալուց որպէս ինքնուրույն պետութիւն այն բանից հետո, երբ Միհրդատ Պոնտացին, նույնպէս օգտվելով Փոքր Ասիայում իր համար ստեղծված միջազգային քաղաքական նպաստավոր իրադրութիւնից, այն միացրել էր իր թագավորութիւնը: Ուստի, այդ հզոր հարևանի և ապագա դաշնակցի հետ հարաբերութիւնները չսրելու համար, Տիգրանին մնում էր հաշտվել կատարված

(27) Appiani Syr., 48.

(28) Strabo, XI, 14, 15 (C. 532): Հմմտ. նաև Հ.Հ. Մանանդյան, Տիգրան երկրորդը և Հուռը, Երևան, 1940, էջ 28: Նույնի, Քննական տեսութիւն ..., Կ. Ա., էջ 137:

փաստի հետ: Հետագայում Փոքր Հայքը անցավ Հռոմի գերիշխանության տակ: Այսպիսով, հնագույն ժամանակներից հայկական էթնիկական տարրերով բնակեցված այդ երկրամասը, պատմական դաժան հանգամանքների բերումով, երբեք չմտավ հայկական միացյալ թագավորության սահմանների մեջ:

Իրեն արդեն բավականաչափ ամուր զգալով իր գահի վրա, Տիգրան Բ-ը կարող էր ձեռնամուխ լինել արտաքին նվաճումների: Սակայն դրա համար նախապես անհրաժեշտ էին նյութական որոշ միջոցներ, որը նա, Միհրդատ Պոնտացու հետ դաշնակցած, ձեռք բերեց հարևան Կապպադովկիայի վրա երկու անգամ արշավանք կատարելով²⁹: Հայոց թագավորի արշավանքը Կապպադովկիա միաժամանակ նպատակ ուներ ապահովելու իր թիկունքը, պարթևների դեմ արշավանք սկսելու նախօրյակին: Այս վերջին արշավանքի ամենամերձավոր նպատակն էր ետ նվաճել պարթևներից այն յոթանասուներեք հազար զորք, որ, Սարաբոնի վկայությամբ,³⁰ նրանց արքունիքում որպես պատանդ գտնվող Տիգրանը իբրև փրկագին տվել էր պարթևներին, Հայաստանի գահը ստանալու համար:

Տիգրան Բ-ը, սակայն, չբավականացավ դրանով: Նա, օգտվելով պարթևների տերության թուլացումից, նվաճեց Ադիաբենեն, Ատրպատականը, և Գորդիենեն: Այդ երկրների թագավորները, որոնք մինչ այդ պարթևական թագավորի հպատակներն էին, հարկադրված եղան ճանաչել Տիգրանի գերիշխանությունը: Պարտված պարթևները ստիպված եղան զիջելու Տիգրանին նաև ամբողջ Միջագետքը: Հ. Հ. Մանանդյանը նշում է, որ այս առնչությունում էլ պարթևների թագավորը ստիպված եղավ, հօգուտ հայոց թագավորի, հրաժարվելու «արքայից արքա» տիտղոսից³¹: Մենք կարծում ենք, որ հայոց թագավորին տրված այս նոր տիտղոսը ոչ այնքան հետևանք էր պարթևների դեմ Տիգրանի տարած հաղթանակի, որքան փաստական այն դրություն, երբ նրա գերիշխանություն տակ էին գտնվում արդեն մի շարք երկրների թագավորներ³²: Դա առանձնապես շեշտված է Ապպիանոսի մի վկայության մեջ, որի համաձայն Հայաստանի թա-

(29) Strabo, XII, 2, 9 (C. 539): Appiani Mithr., 10.

(30) Strabo, XI, 14, 15 (C. 532).

(31) Հ. Հ. Մանանդյան, Քննական տեսություն ..., հ. Ա, էջ 148-151:

(32) Ս. Մ. Կրկյաշարյան, Բզեչխությունների առաջացումը Հայաստանում, ՊԲՀ, 1968, նո 4, էջ 259-260:

գալոր Տիգրանը, հաստակեցնելով իրենց սեփական դինաստիաներին ունեցող մի շարք հարևան ազգերի, այնուհետև համարվեց արքայից արքա³³:

Այս բոլորից հետո Տիգրան Բ-ը իր ուշադրությունը բեռեց մի ժամանակ հզորագույն հելլենիստական տերության, նախկինում Հայաստանի սյուզերեն համարվող, բայց արդեն ներքին խորագույն քաղաքական ճգնաժամ ապրող Սելևկյանների տերությունը նվաճելու վրա³⁴: Մագնեսիայի ճակատամարտում կրած պարտությունից հետո, Սելևկյան տերության սկսած արագ քայքայումը գնալով ավելի ու ավելի խանգարում էր առևտրական նորմալ հարաբերություններին Առաջավոր Ասիայում: Այս հանգամանքը մեծապես հարվածում էր Արևելքի հելլենիստական վաճառաչաճ քաղաքների և ստրկատիրական իշխող վերնախավի շահերին: Մյուս կողմից, Սելևկյանների երկրի նվաճումը անհրաժեշտ էր Տիգրանին հատկապես Մերձավոր Արևելքի քարավանային ուղիների վերահսկողությունն իր ձեռքը վերցնելու, ինչպես նաև դեպի Միջերկրական ծով ելք ապահովելու համար: Դրանով ուժեղ զարկ կստանար քարավանային տարանցիկ առևտուրը նրա տերության մեջ: Իսկ այդ առևտրից գանձվող տուրքը կազմում էր թագավորական եկամուտի մի պատկառելի մասը: Ուստի և Տիգրանը, իր թիկունքն ապահովելուց հետո, մ.թ.ա. 84 թ.³⁵ արշավելով, նվաճում է Ասորիքը՝

(33) «Καί βασιλεύς Αρμενίας Τιγράνης ὁ Τιγράνου, ἔθνη τινά τῶν περιόικων ἰδίοις δυνάσταις χρωμένα ἐλών, βασιλεύς ἀπό τοῦδε βασιλέων ἠγεῖτο εἶναι ...» (Appiani Syr., XLVIII).

(34) Սելևկյանների տերության ներքին ճգնաժամը յուրահատուկ ձևով արտահայտել է Յուստինոսը, գրելով, որ «... Ասորիքի (իմա Սելևկյան տերության — Ս.Կ.) է՛լ թագավորները է՛լ թագավորությունը ուժասպառ եղան համառ կռիվներում ...» (Justin, XL, 1, 1-3):

(35) Strabo, XI, 14, 15 (C. 532): Josephi Flavii Jud. Antiq., XIII, 16, 4: De bello jud., I, 5, 3: Justin., XL, 1, 1-3: Հ.Հ. Մանուկյան, Տիգրան Երկրորդը և Հռոմը, էջ 49-55: Նույնի, Քննական տեսություն ..., Կ. Ա, էջ 151-156: Այս առնչությամբ մասնանշանք պրոֆ. Ա.Գ. Առաքելյանի (Հայ Ժողովրդի մտավոր մշակութի զարգացման պատմություն, Հ. Ա, Երեւան, 1959, էջ 19) մի բացահայտ սխալը: Նա մեզ համար անհասկանալի պատճառով, գտնում է, որ Սելևկյան տերությունը նվաճվել է Հռոմի կողմից դեռևս մ.թ.ա. 190 թ.: Պատմական իրականությունն այն է, որ Հռոմը 190 թ. միայն ծանր հարված հասցրեց Սելևկյաններին: Իսկ նրանց տերությունը նվաճողը եղել է հայոց թագավոր Տիգրան Բ-ը:

Անտիոք մայրաքաղաքով, Փյունիկիան, ինչպես նաև Դաշտային Կիլիկիան: Ասորիքը նվաճելու գործում Տիգրան Բ-ին մեծ աջակցություն ցույց տվեցին հելլենիստական քաղաքների, հատկապես Անտիոքի առևտրականները և վաշխառուները, արհեստանոցների սերերը, խոշոր ստրկատերերը³⁶:

Տիգրան Բ-ի այս նվաճումների հետևանքով արդեն աշխարհակալ տերություն դարձած հայկական պետությունը չէր կարելի կառավարել նախկին եղանակներով ու միջոցներով: Եթե մինչև այդ նվաճումները Հայաստանը իրենից ներկայացնում էր առավել կամ պակաս չափով միատարր տնտեսական և էթնիկական մի ամբողջություն, ապա Տիգրան Բ-ի ընդարձակ նվաճումներով հիմնովին խախտվեց այդ միատարրությունը: Տիգրան Բ-ի ստեղծած ընդարձակածավալ տերությունն արդ ուներ մոտավորապես նույն պատկերը, ինչ մի ժամանակ Աքեմենյանների պարսկական և, հետագայում, Սելևկյանների հելլենիստական, տնտեսապես և էթնիկական խայտաբղետ, տերությունները: Նրա գերիշխանության տակ այժմ գտնվում էին մի կողմից բարձր զարգացման հասած Ասորիքի և Փյունիկիայի առափնյա վաճառաշահ ստրկատիրական կենտրոններ, մյուս կողմից արաբական անապատների վաչկատուն ցեղեր, երկար ժամանակ իրենց պետականությունն ստեղծած Կապպադովկիայի և Ատրպատականի կողքին դեռևս տոհմատիրական կարգերում ապրող և որպես պետություն չկազմավորված աղվանական ցեղեր, մանր թագավորություններ և ինքնավար քաղաքներ: Ուստի Տիգրանը պարտավոր էր կառավարչական որոշակի բարեփոխություններ կատարել:

Տիգրան Բ-ը իր տիրապետության տակ գտնվող երկրների մի մասի կառավարումը, Սելևկյանների օրինակով, թողեց այդ երկրների նախկին թագավորների ձեռքին, որոնք այժմ համարվում էին հայոց թագավորի հպատակներ: Այդ հպատակների թվում էին Կորդիենեի թագավոր Զարբիենոսը, Ատրպատականի թագավոր Միհրդատը, Կոմմադենեի թագավոր Անտիոքոսը, Խաչկիսի տիրակալ Մեննայոսը և Ադիաբենեի թագավորը: Բացի հպատակության տարեկան հարկ վճարելուց, նրանք պարտավոր էին պատերազմի ժամանակ Տիգրանին զորք տրամադրել: Հիրա-

(36) Очерки истории СССР, Первобытно-общинный строй и древнейшие государства на территории СССР, М., 1956, стр. 451.

վի, ինչպես հաղորդում է Պլուտարքոսը, Տիգրանին, երբ նա կռվում էր Լուկուլլոսի դեմ, իրենց զորքերով օգնութեան եկան Ադիաբենեի և Ատրպատականի թագավորները³⁷:

Տիգրան Բ-ի նվաճած երկրների մեջ կային և այնպիսիները, (Կիլիկիա, Միջագետք), որոնք շատ վաղուց արդեն կորցրած լինելով իրենց ինքնուրույն պետականութունը, չունեին իրենց թագավորը, այլ կառավարվում էին Սելևկյան արքունիքին մոտիկ կանգնած ստրատեգոսների միջոցով, որոնց նշանակում էր ինքը՝ Սելևկյան թագավորը: Նվաճելով այս երկրները, Տիգրան Բ-ը նոր վարչաձև չմտցրեց: Նա հետևեց Սելևկյանների օրինակին, որպես կառավարիչ այդ երկրամասերում նշանակելով իր մերձավորներին: Աղբյուրներից մեզ հայտնի է, որ Հյուսիսային Միջագետքի կառավարումը հայոց թագավորը հանձնել էր իր եղբայր Գուրասին, որի նստավայրը Մծբին քաղաքն էր³⁸: Տիգրան Բ-ը նույն ձևով վարվեց նաև Սելևկյանների թագավորութան բուն կորիզի՝ Ասորիքի հետ, որը հանդիսանում էր Սելևկյան թագավորի ոստանը և հունական աղբյուրներից հայտնի է որպես $\chi\omega\theta\alpha \beta\alpha\sigma\iota\lambda\kappa\acute{\eta}$ – արքունի երկիր: Այնտեղ Տիգրան Բ-ը ստրատեգոս-կառավարիչ նշանակեց Բագադատեսին (Ապալիանոսի մոտ հանդիպում է նաև Μαγαδάτης = Մագադատես ձևը)³⁹, որին Յ. Մարկվարտը և Ն. Ադոնցը համարում են հայ Բագրատունիների նախահայր⁴⁰: Դաշտային Կիլիկիան ևս, ինչպես հետևում է Ապալիանոսի վկայութունից, վարչականորեն միացվելով Ասորիքին, հանձնվել էր այս նույն Բագադատեսի կառավարմանը: Այժմ արդեն Տիգրան Բ-ի կողմից նվաճված բոլոր երկրների թագավորներն ու նոր նշանակված ստրատեգոս-կառավարիչները հայոց թագավորի հանդեպ ունեին հստակութան նույնպիսի հարաբերութուններ, ինչպիսին նախկինում Արտաշեսյան թագավորութան հիմնադիր ստրատեգոս Արտաշեսը, ինչպես նաև այդ նույն երկրների տիրակալներն ունեին մինչ այդ դեպի Սելևկյան թագավորը: Այդ հարաբերութուն-

(37) Plutarchi Lucull., XXII, 6.

(38) Նույն տեղում, XXXII.

(39) Appiani Syr., 40 և 49.

(40) J. Markwart, Eransahr nach der Geographie des Pseud. Mose Xorenac'i, Berlin, 1901, s. 174; Н. Адонц, Армения в эпоху Юстиниана, стр. 411-413.

ների էութեան մասին մենք արդէն խոսել ենք նախորդ էջերում:

Այս իրադրութեան լավագուէն ապացուցը պիտի համարել Սոփսես Խորենացու վկայութիւնն այն մասին, թէ Տիգրանը «արանց գլուխ կացեալ և արութիւն ցուցեալ զազգս մեր բարձրացոյց և զընդ լծովն կացեալս՝ լծադիրս և հարկապահանջս կացոյց ըզմաց»⁴¹:

Հելլենիստական պետութեաններու օրինակով ստեղծված սորատեգոսս-կառավարչի պաշտոնը Տիգրան Բ-ի նորաստեղծ ընդարձակ պետութեան մեջ չէր կարող ժառանգական բնույթ ունենալ, քանի որ, պայմանավորված լինելով արտաքին նվաճումների միջոցով երկրի տարածքի աննախընթաց ընդարձակումով, այն չէր կարող առաջանալ Տիգրան Բ-ի թագավորութեանը նախորդած ժամանակաշրջանում, երբ Հայկական պետութեանը դեռևս պարփակված էր ավելի նեղ շրջանակներում, քան երկրի բնական-աշխարհագրական սահմաններն էին: Սորատեգոսի, որպէս առանձին մարզի կառավարչի պաշտոնի համար Հայաստանում պայմաններ ստեղծվեցին միայն Տիգրան Բ-ի աշխարհակալ նվաճումներից հետո: Հետևաբար, նվաճված երկրների կորուստով էլ, ինքնաբերաբար, պիտի վերանային այդ երկրներում հայոց թագավորի նշանակած կառավարիչների պաշտոնները: Այդ իսկ պատճառով, դժվար է համաձայնվել Ն. Ադոնցի⁴² և Հ. Մանանդյանի⁴³ հետ, որոնք նախարարութեանների, որպէս ժառանգական հողատիրութեան հետ կապված պետական պաշտոնների, առաջացումը Հայաստանում դնում են Արտաշես Ա-ի կամ Տիգրան Բ-ի թագավորութեան ժամանակ: Նախարարութեանները, որպէս պետական պաշտոններ, որոնք անցնում էին ժառանգաբար, առաջացել են, անկասկած, ավելի ուշ, հայ Արշակունիների թագավորութեան շրջանում: Այդ մասին հետո:

* * *

(41) Սոփսես Խորենացի, Ա, իդ:

(42) Н. Адонц, Армения ..., стр. 211-212:

(43) Հ. Հ. Մանանդյան, Ֆեոդալիզմը հին Հայաստանում, էջ 10:

Պետական կազմակերպության առաջացումից հետո միշտ և ամենուրեք պետական կարևորագույն հաստատություններից մեկը եղել է զորքը, բանակը: Հայկական զորքերի առաջին հիշատակումների համար մենք դարձյալ պարտական ենք հույն հեղինակներին: Քսենոփոնը մեղացիների թագավորի բերանով պատմում է, որ «արմենների կողմից ... կգան 4000 հեծելազոր և 20 հազար հետևակ»⁴⁴: Իսկ դա, պատմիչի վկայությամբ, կազմում էր արմենական ամբողջ զորքի կեսը: Որ արմեններն, իրոք, ունեցել են այդպիսի պատկառելի քանակությամբ զորք, կողմնակի կերպով հաստատվում է նաև Դարեհ Ա-ի Բեհհիստունյան արձանագրության Արմենիային վերաբերող տվյալներով: Այնտեղ կարդում ենք. «Դարեհ թագավորն ասում է. Դադարչիչ անունով արմենին, իմ ստրուկին, ես ուղարկեցի Արմենիա: Ես նրան ասացի. «Գնա, ջարդիր ապստամբ զորքին ...: Շնորհիվ Ահուրամազդայի, իմ զորքը գլխովին ջախջախեց ապստամբ զորքին»»: Նույն բնույթի տվյալներ կան նաև արձանագրության շարունակության մեջ, որի թարգմանությունը տվել ենք մեր աշխատության առաջին գլխում:

Հայտնի է Հերոդոտոսի վկայությունը՝ Արտոքմեսի (Արտաշեսի — Ս.Կ.) գլխավորությամբ հույն-պարսկական պատերազմներին մասնակցած արմենական զորքերի մասին, որոնք «գինված էին փոյուզիացիների նման»⁴⁵: Այս զորքը դերևս մշտական չէր, այլ ամեն անգամ, պատերազմի դեպքում, զենք կրելու ընդունակ տղամարդիկ ներկայանում էին «գեղջավազների» գլխավորությամբ: Վերևում ուրիշ առիթով մենք անդրադարձել ենք նաև Երվանդունիների ժամանակ պարսկական բանակի կազմում գտնվող արմենական զորքերի մասին անտիկ հեղինակների մի շարք վկայություններին: Սակայն, հայկական զորքերի և նրանց ինքնուրույն ռազմական գործողությունների մասին մենք համեմատաբար ավելի հավաստի տեղեկություններ ունենք Տիգրան Բ-ի թագավորության ժամանակաշրջանի վերաբերյալ, որոնք մեզ հասել են ինչպես անտիկ հեղինակների, այնպես էլ Մովսես Խորենացու միջոցով:

Ճիշտ է, պատմահայրը հայկական պետական հաստատությունների ու հայկական բանակի կազմակերպումը վերագրում

(44) Xenoph., Cyrop., II, 1, 6.

(45) Herod., VII, 73.

է հայոց կիսապատմական թագավոր Վաղարշակ Արշակունուն⁴⁶, այնուամենայնիվ, մեզ համար կասկածից վեր է, որ Տիգրան Բ-ը մեծ վերափոխություններ ձեռնարկեց հայկական բանակի վերակազմության ուղղությամբ, այն բարձրացնելու համար իր ժամանակի առևմտվ պրոֆեսիոնալ աստիճանի: Հաջորդած դեպքերի ամբողջ ընթացքը ցույց է տալիս, որ այս բանը նրան մասամբ հաջողվում է: Տիգրան Բ-ի ձեռնարկած ռազմական վերափոխությունների ամենամերձավոր հետևանքը պիտի համարել կարճ ժամանակի ընթացքում նրա տերության սահմանների ոչ միայն վերականգնումը, այլև դրանց աննախընթաց ընդարձակումը Կովկասյան լեռներից մինչև Կիլիկիա ու Պաղեստին: Տիգրան Բ-ի ռազմական այդ վերափոխությունների էություն մասին որոշ պատկերացում կարելի է ստանալ Մովսես Խորենացու այն վկայությունից, թե այդ ժամանակ, «հետևակամարտքն ի վերայ ուսոց ձիոց բերեալք, և պարսաւորքն առ հասարակ դիպաղեղունք, և շերտաւորքն ի սուսեր և ի տէգ նիզակի վառեալք. մերկքն վահանօք և զգեստուք երկաթօք պարածածկեալք: Որոց ի մի վայր հասելոց բաւական էր տեսիլն միայն, և որ ի նոցայն պահպանակաց և զինուց փայլմունք և շողիւնք՝ զթշնամիսն արտահայածել»⁴⁷:

Տիգրան Բ-ի բանակի և նրա մղած ռազմական գործողությունների մասին անտիկ հեղինակներից մեզ հասած կարևոր վկայությունները մանրամասն թարգմանաբար մեջ են բերված Հ. Հ. Մանանդյանի՝ Հռոմի զորավարների դեմ Տիգրան Բ-ի վարած պատերազմների պատմությանը նվիրված մեծարժեք ուսումնասիրության մեջ: Այդ տեղեկությունների ուսումնասիրությունից առաջին հերթին պարզ է դառնում այն, որ Արևելքի բոլոր մյուս երկրների նման, Հայաստանում ևս զորքերի գլխավոր հրամանատարը հանդիսանում էր ինքը՝ թագավորը: Սակայն, ոչ բոլոր ռազմական արշավանքների ժամանակ հայոց թագավորը անձամբ առաջնորդում էր իր զորքը:

Հետևենք սկզբնաղբյուրների վկայություններին: Ապպիանոսը հազորդում է, որ Տիգրանի զորավարներից Միթրաասը և Բագոասը ուղարկվեցին Կապադոկիան նվաճելու համար⁴⁸: Մեկ

(46) Մովսես Խորենացի, Բ, գ:

(47) Նույն տեղում, Ա, իդ:

(48) Appiani Mithr., 10.

ուրիշ առիթով նույն Ապպիանոսը խոսում է Տիգրանի Բագադատես (Μαγαδάτης = Βαγαδάτης զորավարի մասին⁴⁹։ Հավանաբար այս Բագադատեսն է Տիգրանի կողմից զորքի մի մասով ուղարկվել նվաճելու Կոմմագենեի թագավորությունը և դաշտային Կիլիկիան, մինչ ինքը՝ հայոց թագավորը, զբաղված էր Փյունիկիայի վրա արշավելով։ Այնուհետև, այս նույն Բագադատեսն էր, որ 69 թ., Լուկուլլոսի արշավանքի ժամանակ, իր զորքով Կիլիկիայից օգնություն շտապեց անակնկալ հարձակման ենթարկված Տիգրան թագավորին։

Տիգրան Բ-ի մեկ այլ զորապետի՝ Մեհրուստանի (Μεθροβουζάνης) մասին, որը Մեծ Հայքին միացված Ծոփքի թագավորական զերդաստանից էր, հանգամանալից խոսում են Պլուտարքոսն ու Ապպիանոսը։ Անակնկալի ելած հայոց թագավորը սրան 2000 հեծելազորով ուղարկում է Լուկուլլոսի դեմ, հռոմեական լեգեոնների առաջխաղացումը կանգնեցնելու համար։ Տեղի ունեցած կատաղի ճակատամարտում այս Մեհրուստանը ընկնում է քաջաբար⁵⁰։ Մեհրուստանի հրամանատարությունը հանձնված այս հեծելազորի, ինչպես նաև Հայաստանի նախկին սյուլզերեն Սելևկյան թագավորի արքունի հեծելազորի մասին սկզբնաղբյուրներում պահպանված տեղեկությունների ուսումնասիրումը մեզ հնարավորություն է տալիս որոշ չափով պարզելու Մեհրուստանի պաշտոնի և նրա ղեկավարած հեծելազորի էությունը։

Սելևկյանների իշխանություն կարևորագույն հենարանը նրանց, ճիշտ է, խայտաբղետ, սակայն պատերազմի ժամանակ պատկառելի ուժ ներկայացնող բանակն էր։ Այդ բանակի կազմի մասին որոշ գաղափար կազմում ենք 216 թ. Ռաֆիայում և 190 թ. Մագնեսիայում տեղի ունեցած պատերազմների նկարագրություններից, որ մեզ թողել են Պոլիբիոսը, Ապպիանոսը և Տիտոս Լիվիոսը⁵¹։ Այդ նկարագրությունների հիման վրա ուսումնասիրողները եզրակացրել են, որ Սելևկյանների հսկայական բանակը, հիմնականում, կազմված է եղել հետևակներից և հեծյալներից⁵²։ Հետևակների ամենակարևոր մասը հայտնի մակեդոնական Փալանգան էր, փաղանգը, որտեղ գլխավոր հարվածա-

(49) Նույն տեղում, 48։

(50) Նույն տեղում, 84։ Plutarchi Lucull., XXV, 3-6.

(51) Polyb., V, 79; Appiani Syr., 32; Titi Livii, XXXVII, 40.

(52) E. Bickermann, Institution des Seleucides, Paris, 1938, p. 52-60.

յին ուժը կազմում էր պեգետայրոյ (πεζεταῖροι = հետևակ ընկերներ) կոչված գունդը: Այս զորագունդը, որը գոյութուն ուներ դեռևս Փիլիպպոս Բ-ի և Ալեքսանդր Մակեդոնացու ժամանակ և բաղկացած է եղել 6000 ծանրազեն հետևակներից, հանդիսանում էր թագավորի թիկնապահ զորքը:

Հետևակի շարքերում, բացի ծանրազեն հոպլիտներից, կռվում էին նաև թեթևազեն աղեղնավորներ և պարսատիկավորներ (τοξόται καὶ σφενδονηται)⁵³:

Եթե Ալեքսանդր Մակեդոնացու արշավանքներին մասնակցած հետևակը հիմնականում կազմված էր մակեդոնացի ծանրազեն ֆալանգիտներից, հոպլիտներից, ապա Սելևկյանների ժամանակ մակեդոնական ֆալանգայի կողքին կարևոր տեղ էին գրավում նաև հույն և բարբարոս (ոչ հույն) վարձկանների, ինչպես նաև Սելևկյաններին հպատակ երկրներից հավաքագրվածների գնդերը:

Սելևկյանների հեծելազորը ևս, հետևակի նման, բաղկացած էր բուն մակեդոնացիներից, որը կոչվում էր ագեմա (τὸ λεγόμενον ἄγημα τῶν Μακεδόνων)⁵⁴, և տեղաբնիկ, արևելյան ժողովուրդներից, քանի որ Ապպիանոսի համապատասխան վկայություն մեզ մակեդոնացիների կողքին հիշատակված են հեծյալ աղեղնավորներ դայերից, միտիացիներից և էլիմայեցիներից (ἰπποτοξόται ... Δάαι καὶ Μυσοὶ καὶ Ἑλυμαῖοι), ինչպես նաև՝ ծանրազեն հեծյալ գալատներ (Γάλαται τε κατὰφρακτοί)⁵⁵: Պոլիբիոսը ևս, Սելևկյանների բանակը նկարագրելիս, հիշատակում է նիսսյական ծանրազեն հեծելազորի մասին⁵⁶: Ապպիանոսը նույն հատվածում հիշատակում է նաև (δρωμάδες = վազողներ) կոչված գունդը, որը, ամենայն հավանականությամբ, կազմում էին անապատի արաբներն իրենց ուղտերով:

Բացի հեծելազորի մի գնդից, որի մասին խոսք կլինի ստորև, ինչպես նաև տարբեր բերդերում տեղակայված կայազորներից, Սելևկյանների այս ամբողջ բանակը, ըստ երևույթի, մշտական չէր, այլ ամեն անգամ հավաքագրվում էր պատերազմների ժա-

(53) Polyb., V, 53, 9: Հմտ նաև Polyb., V, 79, 6 և XVI, 18, 7:

(54) Appiani Syr., XXXII: Տրոսոս Լիվիոսը սխալմամբ այս ագեման համարում է մեդական (Titi Livii, XXXVII, 40, 6):

(55) Appian., նույն տեղում:

(56) Polyb., XXXI, 3, 6.

մտնակ: Հայոց թագավորը ևս, Սելևկյանների նման, չի ունեցել մշտական բանակ: Ս.Տ. Երեմյանը այդ առնչությամբ իրավացի կերպով նշում է, որ «հելլենիստական մյուս միապետությունների նման, Հայաստանում ևս չկային մշտական խոշոր բանակներ: Պատերազմի ավարտից հետո հայ թագավորները արձակում էին դրանք: Սակայն, այս պրակտիկան կապված էր խոշոր անպատեհությունների հետ, քանի որ նոր պատերազմի դեպքում հարկ էր լինում նորից դրանք հավաքագրել: Այդ պատճառով թագավորը իր մոտ պահում էր հեծելազորի մի մասը»⁵⁷:

Սելևկյանների մշտական բանակը հիմնականում ցրված էր տերության տարբեր պրովինցիաներում որպես կայազորներ, տեղավորված բերդերում և ամրոցներում (ՊՐՕՍՏՐԱՆ): Այդպիսի բերդեր մեզ հայտնի են Սարդեսում, Եփեսոսում, Սուսայում, Երուսաղեմում, Դուրա-Եփրոպոսում և այլն: Բերդի կայազորը գտնվում էր բերդապահի (ՊՐՕՍՏՐԱՐՇՈՍ) հրամանատարության տակ⁵⁸: Բերդապահն աղբյուրներում հաճախ կոչվում է նաև ἀκροφύλαξ⁵⁹ կամ ἑπαρχος = praefectus⁶⁰:

Հելլենիստական թագավորների կայազորները հաճախ դավորված էին լինում ոչ միայն բերդերում և ամրոցներ այլև թագավորին ենթակա քաղաքներում: Քաղաքներին ուղված հելլենիստական թագավորների նամակներում հանդիպում է πισταθμεισθῆναι⁶¹ (տեղավորված լինել օթեվաններում) ἀνεπίσταθμος⁶² (օթևան տրամադրելու պարտավորությունից ազատ) բառերը, ինչպես նաև Պոլիբիոսի ուշագրավ մի վկայությունը⁶³ դրա ամենահավաստի ապացույցն է: Հունական քաղաքներում կայազորներ (ϋσλακκαι) տեղավորելու պրակտիկան գոյություն է ունեցել դեռևս Ալեքսանդր Մակեդոնացու ժամա-

(57) С.Т. Еремян, Основные черты ..., էջ 56:

(58) Polyb., XXI, 44, 1:

(59) Polyb.; V, 50, 10.

(60) Բ Մակկարեաց, Դ, 14:

(61) С.В. Welles, RC, 30, 7.

(62) С.В. Welles, RC, 70, 13.

(63) Պոլիբիոսը պատմում է, որ Թասոսի բնակիչները հազորդեցին Մակեդոնիայի վերջին թագավոր Փիլիպպոս Ե-ին այն մասին, որ կհանձնեն իրենց քաղաքը, եթե «հաստատում է նրանց ազատել կայազորից, հարկերից, օթևան տրամադրելու պարտավորությունից և թուլատրի ապրելու սեփական օրենքներով» (Polyb., XV, 24, 2):

նակ և ամեն մի քաղաքային համայնք պարտավոր էր իր միջոցներով հոգալու կայազորի կարիքները⁶⁴: Դրանով, մի կողմից, թագավորի տրամադրության տակ լինում էր որոշ քանակությամբ մշտական զորք, մյուս կողմից, սահմանափակվում էր քաղաքի ինքնավարությունը և ուժեղանում էր նրա ենթակայությունը թագավորական իշխանությանը:

Անկասկած, Սելևկյանների մշտական բանակի մասն էին կազմում նաև աղբյուրներում հիշատակված թիկնապահները (ὑπαοπιστοι) իրենց հրամանատարով (ἡγεμῶν τῶν ὑπαοπιστῶν)⁶⁵:

Սելևկյանների այս խայտաբղետ բանակում, սակայն, ամենակարևոր դերը պետք է որ խաղար հեծելազորային այն գունդը, որը հայտնի է ագեմա (ἀγῆμα)⁶⁶ կամ արքունի հեծելազունը (βασιλική ἰλιη)⁶⁷ անունով:

Հայոց թագավորի, հատկապես Տիգրան Բ-ի բանակի մասին խոսելիս, մենք անհրաժեշտ համարեցինք համառոտակի ուրվագծել Սելևկյանների բանակի կազմակերպման պատկերը, քանի որ, մեր կարծիքով, հելլենիստական այդ խոշորագույն պետության բանակը, ինչպես նաև հարևան հելլենիստական մյուս առավել փոքր միապետությունների բանակները, այն հիմնական սկզբնօրինակն էր, որին հետևեց հայոց թագավորը, վճռական մարտերից առաջ իր բանակը կազմակերպելիս: Հետևաբար, Տիգրանի բանակը ևս հռոմեականի նկատմամբ պետք է որ ունենար նույն թերությունները, ինչ Սելևկյանների բանակը, որի հետևանքով էլ, Անտիոքոս Գ-ի նման, Տիգրան ևս պարտվեց հռոմեացիների դեմ բաց դաշտում ունեցած առաջին իսկ ճակատամարտում:

Ինչպես Սելևկյանների պետությունում էր, Հայաստանում ևս բանակի գլխավոր հարվածային կորիզը հանդիսանում էր թագավորի թիկնապահ հեծելազորը: Հայոց թագավորներ Տիգրանի, Արտավազդի և Արշակունի Տրդատ Ա-ի թիկնապահ հեծելազորի մասին մեզ հասել են անտիկ հեղինակների մի շարք

(64) W. Dittenberger, Sylloge Inscriptionum Graecarum, ed. 3, Lipsiae, 1915-1924, 3, 283.

(65) Polyb., VII, 16, 2: Polyae., IV, 9, 3.

(66) Polyb., XXXI, 3, 7: Appiani Syr., XXXII.

(67) Polyb., V, 85, 12: 2₂ 49, 7: Polyae., IV, 9, 6.

հետաքրքիր հիշատակություններ, որոնք բացառիկ կարևորություն ունեն, ուստի և մեջ ենք բերում՝ բնագրից կատարած մեր թարգմանությամբ:

«Առաջինը նրա (Տիգրան – Ս.Կ.) ընկերներից Մեհրուսանը (τῶν φίλων Μιθροδουζάνης) համարձակվեց ճշմարտությունը հաղորդելու...: Սա իսկույն ուղարկվեց Լուկուլլոսի դեմ 3000 հեծելազորով և բազմաթիվ հետևակով»⁶⁸:

«Տիգրանը Մեհրուսանին ուղարկեց երկու հազար հեծյալներով, որպեսզի խափանի Լուկուլլոսի ճանապարհը»⁶⁹:

«Իսկ Տիգրան թագավորը վերցնելով իր ընկերներին ու ազգականներին, գնաց, որպեսզի անձնատուր լինի Պոմպեոսին»⁷⁰:

«Նրան (Կրասսոսին – Ս.Կ.) սրտապնդեց հատկապես Արտավազդ Արմենի փամանուժը: Սա եկավ ճամբար վեց հազար հեծելազորով: Իսկ սրանք, ինչպես ասում էին, միմիայն թագավորի թիկնապահներն էին և ուղեկիցները: Նա (Արտավազդը – Ս.Կ.) խոստանում էր, որ կտա տասը հազար այլ զրահապատ հեծելազոր և երեք բյուր հետևակ»⁷¹:

Մի վերջին վկայություն ևս կա Տրդատ Ա-ի թիկնապահ հեծելազորի մասին: Հռանդեայի մոտ հայ-պարթևական միացյալ զորքերից կրած ծանր պարտությունից հետո, Հռոմը հարկադրված եղավ համաձայնվել այն բանին, որ Հայաստանում արդեն թագավոր հռչակված Տրդատ Արշակունին մեկնի Հռոմ և այնտեղ Ներոն կայսեր ձեռքից ստանա Հայաստանի թագը: Այդ նպատակով Տրդատի Հռոմ կատարած ճանապարհորդությունը և այնտեղ նրան ցույց տրված շքեղ ընդունելությունը մանրամասն նկարագրված է Դիոն Կասսիոսի կողմից: Տակիտոսն ու Պլինիոս Ավագը ևս որոշ մանրամասնություններ են հաղորդում Տրդատի այդ այցելության մասին: Նրանց վկայությունների համաձայն, Տրդատն ուղևորվելիս իր հետ վերցրել էր իր կնոջը և երեխաներին, իր եղբայրներ՝ Ատրպատականի թագավոր Պակուրոսի (Բակուր) և Ադիաբենեի թագավոր Մոնոբալոսի որդիներին: Հայոց թագավորին ուղեկցում էր երեք հազար հայ ու պարթև

(68) Plutarchi Lucull., XXV, 9.

(69) Appiani Mithr., 84.

(70) Plutarchi Pomp., XXXIII, 1.

(71) Plutarchi Crass., XIX 1-2.

հեծյալներից բաղկացած մի շքախումբ⁷²:

Վերոհիշյալ վկայություններում հիշատակված հայոց թագավորի թիկնապահ հեծելազունդն, անկասկած, համապատասխանում էր Սելևկյանների մակեդոնական ազեմային, որի մասին խոսք եղավ վերելում: Հայկական այդ հեծելազունդը իր սոցիալական կազմով համապատասխան պետք է լիներ ազեմային: Ինչպես հայտնի է, մակեդոնական այդ ազեման բաղկացած էր Սելևկյան թագավորի ընկերներից ու մերձավոր բարեկամներից (εταίροι, φίλοι, σύντροφοι), որոնց միջից էլ, սովորաբար, նշանակվում էին պալատական և այլ պաշտոնյաները: Պլուտարքոսի և Ապպիանոսի, ինչպես և մյուս հեղինակների վկայություններից հետևում է, որ հայկական թիկնապահ հեծելազունդը ևս կազմված էր թագավորի բարեկամներից և ընկերներից: Ելնելով դրանից, պիտի ենթադրել, որ հայոց թագավորի թիկնապահ գնդի և նրա հրամանատարի դերը երկրի քաղաքական կյանքում նույնքան կարևոր էր, ինչքան ազեմայի դերը Սելևկյանների պետութայունում:

Այդ դրությունն էլ արձանագրված ենք տեսնում հետագա դարերի հայ մատենագրության մեջ: Մովսես Խորենացին, օրինակ, պատմելով Վաղարշակ թագավորի կողմից Հայաստանում արքունի գործակալությունների՝ նախարարությունների հաստատման մասին, վկայում է, որ թագավորը նշանակում է «թիկնապահս իւր, զինու հանդերձ, ի գաւակացն Խոռայ Հայկազնոյ, արս ընտիրս և քաջս, նիգակաւորս և սուսերաւորս, և գլուխ նահապետության նոցա զՄաղխազ ոմն այր բարի և սրտեայ ...»⁷³: Ինչպես հետևում է պատմահոր այս խիստ կարևոր վկայությունից, Մաղխազը գլխավորում էր արքունի թիկնապահների գունդը և նրա վարած պաշտոնը կոչվում էր «մաղխազություն», որը հին Հայաստանում կարևորագույն վեց գործակալություններից (թագակապ ասպետություն, հազարապետություն, մարդպետություն, մաղխազություն, սպարապետություն և մեծ դատավորություն) մեկն էր: Ինչպես ցույց է տվել Ն. Ադոնցը, «մաղխազ» (= ասոր. malxazu) նշանակում է տեր, իշխան, թագավոր⁷⁴:

(72) Cass. Dio, LXIII, 1-7; Taciti Annales, XVI, 24; C. Plin., Nat. Hist., XXX, 16; XXXIII, 54.

(73) Մովսես Խորենացի, Բ, է:

(74) Н. Адонц, Армения в эпоху Юстиниана, стр. 400.

Մենք արդեն նշել ենք, որ Տիգրանի թիկնապահ հեծելա-
գնդի հրամանատար Մեհրուժանը Ծոփքի թագավորական տոհմից
էր: Այդ հանգամանքը, ինչպես նաև «Մաղխազ» անվան Ն.
Ադոնցի տված բացատրությունը միանգամայն պարզ են դարձը-
նում, որ բարձր ազնվականությունից սերած այդ պաշտոնյան
չառ մոտիկ կանգնած լինելով արքունիքին, նշանակալից դեր
պետք է խաղար Հայաստանի քաղաքական կյանքում:

Սելևկյանների մակեդոնական ազեմայի և հայոց թագա-
վորի թիկնապահ հեծելագնդի ոչ միայն սոցիալական դերն ու
դիրքն էր համընկնում համապատասխան երկրների հասարակա-
կան-քաղաքական կյանքում, այլև դրանք պրեթե համընկնում
են նաև թվական առումով:

Ինչպես տեսանք, Պոլիբիոսի և Ապպիանոսի վկայություն-
ներում Սելևկյանների ազեման բաղկացած էր 2000 հեծյալնե-
րից: Վերևում բերված տվյալների համաձայն, հայոց թագավորի
թիկնապահ հեծելագունը հաշվվում էր 2000, 3000, 6000 և 3000:
Առաջին հայացքից թվում է, թե այդ գնդի թիվը Հայաստանում
տարբեր ժամանակներում տարբեր է եղել՝ 2000-ից մինչև 6000:
Սակայն այդ վկայությունների մանրակրկիտ ուսումնասիրու-
թյունը և վերլուծությունը թույլ է տալիս ասելու, որ հայկական
թիկնապահ գունդը ևս, Սելևկյան ազեմայի նման, բաղկացած է
եղել շուրջ 2000 հեծյալներից: Ինչպես նկատեցինք, Ապպիանոսը
հաղորդում է, որ Տիգրանը Մեհրուժանին 2000 հեծյալներով
ուղարկեց Լուկուլլոսի դեմ: Նրա հաղորդած այս թիվն էլ, մեր
կարծիքով, պիտի համարել միակ ճիշտը:

Պլուտարքոսը գրելով այդ նույն դեպքերի մասին, պատ-
մում է, որ Տիգրանը Մեհրուժանին ուղարկեց Լուկուլլոսի դեմ
3000 հեծյալներով և բազմաթիվ հեռեկանով: Տիգրան Բ-ի պատ-
մությունը վերաբերող Պլուտարքոսի մի շարք վկայություններ
Հ.Հ. Մանանդյանը իրավացի կերպով համարում է միտումնավոր
ու չափազանցված: Մենք հակված ենք ենթադրելու, որ Մեհրու-
ժանին հանձնված հեծելագործի թվի և հեռեկանի մասին Պլուտար-
քոսի այս հաղորդումը ևս վստահելի չէ: Դեռևս Հ.Հ. Մա-
նանդյանն իր ժամանակին մատնացույց է արել, որ Պլուտարքոսն
իր իդեալականացրած հերոսի՝ Լուկուլլոսի տարած հաղթանակն
ընդգծելու նպատակով, բոլոր դեպքերում մեծացրել է Տիգրանի

գորքերի թիվը⁷⁵: Անհավանական պիտի համարել նաև Պրուտար-
քոսի հաղորդման այն մասը, որ իբր հեծելագորից բացի Մեհրու-
ժանին հանձնվել էր նաև հետևակ գործ, այն էլ՝ «բազմաթիվ»:
Ինչպես նշում է Հ.Հ. Մանանդյանը⁷⁶, Լուկուլլոսի արշավանքը
հանկարծակիի էր բերել Տիգրանին: Հետևաբար, հայոց թագա-
վորը պատրաստ չլինելով պատերազմելու, չէր կարող այդ
ժամանակ Տիգրանակերտում իր տրամադրությունն տակ ունենալ
«բազմաթիվ հետևակ»: Մեր ուսումնասիրություններից մեկում⁷⁷
մենք ցույց ենք տվել, որ Լուկուլլոսի հարձակման ժամանակ
Տիգրանը գտնվում էր Պաղեստինում և, լսելով իր մայրաքաղա-
քի վրա կատարված հանկարծակի հարձակման մասին, շտապ
կերպով ուղարկել էր իր թիկնապահ հեծելագունդը Մեհրուժանի
գլխավորությունով, Լուկուլլոսի առաջընթացը կասեցնելու համար:
Տիգրանը Մեհրուժանին չէր կարող հանձնած լինել նաև հետևակ,
քանի որ այն միայն կիսանգարեր հեծելագունդի արագ ընթացքին:

Ինչ վերաբերում է մ.թ.ա. Կրաստոսի բանակատեղին Ար-
տավազդի գալու մասին Պրուտարքոսի հաղորդմանը, որի համա-
ձայն հայոց թագավորը ժամանել էր 6000 թիկնապահներով, ապա
մենք կարծում ենք, որ այն ոչ լիովին է համապատասխանում
պատմական իրականությունը: Կասկած չի կարող լինել, որ մինչև
Ասորիք, որտեղ բանակել էր պարթևների դեմ արշավանքի
պատրաստվող Կրաստոսը, ճանապարհվող հայոց թագավորին
պետք է որ ուղեկցեր նրա թիկնապահ հեծելագունդը, հիմնակա-
նում բաղկացած 2000 հեծյալներից: Արտավազդը, անտարակույս,
խրատվելով իր հոր՝ Տիգրան Բ-ի ճակատագրական սխալից, որը
չէր կանխատեսել նենդ Լուկուլլոսի անակնկալ արշավանքը,
ուզմական անհրաժեշտ պատրաստություն էր տեսել, հավաքելով
բավականաչափ գործ, հարկ եղած դեպքում դիմագրավելու
համար եւ հռոմայեցիների, եւ պարթևների հավանական հարձա-
կումները: Հետևաբար, եւ անձնական ապահովության (նրա ճա-
նապարհի զգալի մասը, Կրաստոսի մոտ գնալիս, անցնում էր
օտար երկրի տարածքով), եւ իր ուժը ցուցադրելու համար, նա,
բացի իր թիկնապահ հեծելագունդից, որի թիվը պետք է լիներ

(75) Հ.Հ. Մանանդյան, Տիգրան Երկրորդը և Հռոմը, էջ 116-120:

(76) Նույն տեղում, էջ 93-103:

(77) Ս.Մ. Կրկյաշարյան, Տիգրան II-ին վերաբերող մի կարևոր ուղղում, ՊԲՀ,
1987, Նո 4, էջ 275-278:

չուրջ երկու հազար, իր հետ վերցրել էր նաև մի քանի հազար ուրիշ հեծյալների, որով իրեն ուղեկցող զորագնդի ընդհանուր թիվը հասել էր վեց հազարի: Իսկ հռոմայեցիներն այդ պատկառելի բանակն ամբողջությամբ ընդունել էին որպես թագավորի թիկնապահ զորք:

Երկու խոսք էլ ըստ պայմանավորվածության Ներոնի ձեռքից Հայաստանի թագը ստանալու համար Հռոմ ուղևորված Տրդատ Արչակունուն ուղեկցող երեք հազարանոց հեծյալ շքախմբի մասին: Ակներև է, որ այն խայտաբղետ է եղել: Սակայն այդ շքախմբի հիմնական կորիզը, անկասկած, թագավորի երկու հազարանոց թիկնապահ հեծելազունն էր: Տրդատի շքախմբի թիվը հասել էր երեք հազարի, հավանաբար, այն բանից հետո, երբ թագավորական հեծելազնդին միացել էին Ատրպատականի և Ադիաբենեի թագաժառանգներին ուղեկցողները, ինչպես նաև պարթև Վաղարշ Ա-ի Հռոմ ուղարկած պատգամավորները:

Խորենացու այն եզակի հաղորդումը, թե Արտաշեսը Հայկական զորքերը չորս մասի բաժանեց և դրանք, համապատասխանաբար, հաստատեց աշխարհագրական չորս ուղղություններով⁷⁸, հնարավորություն է տալիս ենթադրելու, թե Արտաշեսյանների ժամանակ Հայաստանում ստեղծված են եղել հատուկ սահմանապահ զորամասեր, որոնց առաջելությունն էր՝ պաշտպանել երկրի սահմանները արտաքին հարձակումներից: Մեր կարծիքով, այս հիմքի վրա է, որ հետագայում, Արչակունիների օրով, Հայաստանում ստեղծվում են այսպես կոչված «կողմնակալ» իշխանությունները, որոնք գալիս են փոխարինելու նախկին բղեշխություններին: Բղեշխությունների մասին կխոսենք քիչ հետո:

Պատերազմի ժամանակ Հայոց թագավորը հավաքում էր մեծ քանակությամբ հետևակ զորք, որի թիվը, մոտավոր հաշվումների համաձայն, կարող էր հասնել 100 հազարի: Մեր խոսքը, անշուշտ, վերաբերում է ոչ թե Տիգրան Բ-ի նվաճումներից հետո առաջացած ընդարձակածավալ և էթնիկատնտեսապես խայտաբղեր տերությունից, այլ, ընհանրապես, Մեծ Հայքից հավաքագրված զորքերի քանակին⁷⁹:

(78) Մովսես Խորենացի, Բ, Ժգ:

(79) Այս մասին առավել մանրամասն տես՝ Հայ ժողովրդի պատմություն, Երևան, հ. 1, 1971, էջ 686-688:

Արտաշեսյանների ժամանակ հայոց թագավորը, բացի հեծյալ թիկնապահ գնդից և և մեծաթիվ հետևակից, ուներ նաև պատկառելի թիվ կազմող հեծյալ զորաբանակ: Թեև սկզբնաղբյուրներում հայկական հեծելազորի ընդհանուր թվի մասին հիշատակութուն չկա, սակայն այլ տվյալներով հնարավոր է որոշել դրա մոտավոր քանակը: Այսպես՝ Պլուտարքոսը հաղորդում է, թե Արտավազդը, գալով Կրասսոսի մոտ, խոստացավ նրան սրամաղրել «10 հազար զրահապատ հեծելազոր և 30 հազար հեռակա»⁸⁰: Ենթադրելով, որ Արտավազդը, իբրև «Հռոմի դաշնակից ու բարեկամ» Կրասսոսին օգնելու համար կտրամադրեր ոչ թե իր ամբողջ զորքը, այլ, լավագույն դեպքում, դրա կեսը, ապա կարելի է ասել, որ նրա զրահապատ հեծելազորի թիվը, բացի թիկնապահներից, հասնում էր 20 հազարի:

Բացի հիմնական հեծյալ և հետևակ զորքերից, հայկական բանակում կային նաև օժանդակ զորամասեր, որոնց մասին վկայութուններ մնացել են Ստրաբոնի, Պլուտարքոսի և այլոց մոտ: Այսպես, Ստրաբոնը, խոսելով Տիգրանին հպատակ կորդվացիների մասին, նշում է, որ «նրանք համարվում էին աչքի ընկնող ճարտարապետներ և պաշարողական գործերին հմուտ: Դրա համար էլ Տիգրանն օգտագործում էր նրանց այդպիսի գործերում»⁸¹: Պլուտարքոսը, նկարագրելով Տիգրանակերտի ճակատամարտը, խոսում է Տիգրանի բանակում եղած սակրավորների զորամասերի, ինչպես նաև մեծաքանակ գումակի մասին⁸², որը և այդ ճակատամարտում դառնում է Տիգրանի պարտության հիմնական պատճառը:

Նախորդ էջերում, Տիգրան Բ-ի տերության մեջ ստեղծված ստրատեգոս-կառավարչի պաշտոնի մասին խոսելիս, նշել էինք, որ նման պաշտոնը, պայմանավորված լինելով տերության սահմանների աննախընթաց ընդարձակումով, չէր կարող առաջանալ Տիգրանի թագավորությանը նախորդած ժամանակաշրջանում, իսկ նոր նվաճված երկրների կորուստով էլ, բնականաբար, պետք է վերանար: Այնուհետև հայտնել էինք այն միտքը, որ նախարարութունները Հայաստանում, որպես ժառանգական պաշտոններ, կարող էին առաջանալ ավելի ուշ, Արշակունիների թագա-

(80) Plutarchi Crassus, 19, 1-4.

(81) Strabo, XVI, 1, 24.

(82) Plutarchi Lucullus, 26-27.

վորության ժամանակ:

Այս երևույթը բացատրելու համար հատուկ նշանակու-
թյուն են ստանում անտիկ հեղինակների վերևում արդեն նշված
այն հաղորդումները, որոնցում, տարբեր հանգամանքներում,
հիշատակվում են Տիգրան Բ-ի զորքերի տարբեր հրամանատար-
ների անուններ: Դա վկայում է այն մասին, որ ոչ Արտաշեսի, ոչ
իսկ Տիգրանի ժամանակ դեռևս գոյություն չուներ հայոց սպա-
րապետի ժառանգական պաշտոնը և սպարապետությունը չէր
կազմավորված որպես նախարարություն: Այն, որպես այդպիսին,
կազմավորվեց հետագայում, Արշակունիների թագավորության
ժամանակ, երբ Հայաստանում պետական բոլոր պաշտոնները, որ-
պես արքունի գործակալություններ, ժառանգաբար շնորհվեցին
այս կամ այն նախարարական ընտանիքի ավագագույն ներկայա-
ցուցչին:

Նկատեցինք, որ Տիգրան Բ-ի (ինչպես նաև նրա հաջորդ-
ների) ժամանակ կազմավորված էր արքունի թիկնապահ հեծելա-
զորը: Տիգրանի օրոք այդ գնդի հրամանատարն էր Մեհրուժանը:
Այս կարևոր պաշտոնը ևս այդ ժամանակ չէր կարող ժառան-
գական լինել, քանի որ հիշյալ Մեհրուժանը Մոսիքի թագա-
վորական գերդաստանից էր⁸³, իսկ Մոսիքը դեռ նոր էր միացվել
թագավորությանը և, հավանաբար, Մոսիքի արքունիքի ներ-
կայացուցիչներին սիրաշահելու համար, հայոց թագավորը ար-
քունի գերդաստանին զանազան պաշտոններ էր տալիս:

Վերևում նշվեց, որ Սելևկյանների մշտական բանակը,
հիմնականում, ցրված էր տերության տարբեր մասերում, որպես
կայազորներ, տեղավորված բերդերում և ամրոցներում: Հավա-
նաբար Հայաստանում ևս հայոց թագավորի զորախմբերը ցրված
են եղել երկրի բերդերում և ամրոցներում: Նշենք դրանցից
կարևորագույնները: Տոմիսա բերդը Եփրատի ձախ ափին,
կապպադոկիայի և Մոսիքի սահմանի վրա: Ստրաբոնը այն
տեղադրում է Մոսիաց աշխարհում⁸⁴: Տոմիսան ոչ միայն հայո-
նի ամրություն էր, այլ գտնվելով պարսկական հին «արքունի
ճանապարհի» վրայ, միևնույն ժամանակ Հայաստանի վրայով
Բաբելոնիա կամ Փոքր Ասիա գնացող քարավանների հայտնի

(83) Markwart, Eranšahr..., էջ 176: Հմմտ. նաև Հ.Հ. Մանանդյան, Տիգրան
Ներկրորդը և Հուսիքը, էջ 103:

(84) Strabo, XII, 2, 1 և XIV, 2, 29.

կայանն էր⁸⁵։ Նկատի ունենալով այս վերջին հանգամանքը, պիտի ենթադրել, որ այդ ամրոցում տեղավորված բերդապահ զորքը պարտավորված էր ապահովելու Տոմիսայի վրայով անցնող քարավանային ուղիների անվտանգությունը։

Մայրաքաղաք Արտաշատի մասին խոսելուց հետո, Ստրաբոնը թվարկում է Հայաստանի մի քանի բերդերի անուններ, որոնք միաժամանակ եղել են հայոց թագավորի գանձատները։ «Քաղաքից (Արտաշատից – Ս.Կ.) ոչ շատ հեռու, – գրում է Ստրաբոնը, – գտնվում էին Տիգրանի և Արտավազդի գանձատները, Բաբյուրսա և Օլանես անառիկ ամրոցները։ Ուրիշներ ևս կային եփրատի վրա։ Արտագեյրան (Արտագեբս – Ս.Կ.) ապստամբեց բերդապետ Ադոնի գլխավորությամբ։ Կեսարի զորավարները գրավեցին այն, երկար ժամանակ պաշարելուց հետո, և պարիսպները քանդեցին»⁸⁶։ Այս վերջին դեպքի մասին Դիոն Կասսիոսի մոտ եղած հիշատակության համաձայն, Արտագեյրա ամրոցը նույնպես եղել է հայոց թագավորի գանձատներից մեկը⁸⁷։

Բերդերն ու ամրոցները, որպես ապահով գանձատուն, օգտագործել են ոչ միայն հայոց թագավորները, այլև հարևան հելլենիստական միապետները։ Վկայակոչենք դարձյալ Ստրաբոնին, որը գրում է. «Միհրդատ Եփլատորը ... հոգ տարավ այս երկրների մասին և կառուցեց այնտեղ յոթանասունհինգ ամրոց, պահելու համար իր գանձերի մեծ մասը։ Սրանցից առավել հիշարժան են Հյուղարան, Բասգոյգարիզան և Սինորիան»⁸⁸։

Կասկած չի կարող լինել, որ Հայաստանի ամենահայտնի բերդերից է եղել Արտաշատ մայրաքաղաքը Հյուսիսից պաշտպանող Գառնի ամրոցը, որը ամբողջ I դարում խոշոր դեր է խաղացել երկրի քաղաքական ու ռազմական կյանքում։ Ուստի բոլորովին էլ պատահական պիտի չհամարել այն հանգամանքը, որ Գառնիի մասին հիշատակություններ կան ոչ միայն օտար և հայ մատենագիրների մոտ, այլև այնտեղ հայտնաբերված հուշարձանագրության մեջ։

Բերդապահ զորքերի պետը, որին վստահված է եղել երկրի այս կամ այն ռազմական կարևոր հանգույցի, ինչպես նաև

(85) Հ. Հ. Մանանդյան, Քննական տեսություն ..., Կ. Ա, էջ 111։

(86) Strabo, XI, 14, 6 (C. 529).

(87) Cass. Dio, LV, 20.

(88) Strabo, XII, 3, 28.

արքունի գանձերի պաշտպանութիւնը, պատկանում էր թագա-
վորին շրջապատող ամենահեղինակավոր և ազդեցիկ պաշտոնյա-
ների թվին:

* * *

Հելլենիստական թագավորների պետական ապարատում
խոշոր դեր խաղում էր նաև արքունի դպիրը, թագավորի անձ-
նական քարտուղարը: Հելլենիստական արքունիքում մեզ հայտնի
առաջին դպիրը եղել է Ալեքսանդր Մակեդոնացու քարտուղար,
Կարգիայում ծնված հույն եվմենեսը, չափազանց կարևոր դեր
կատարեց Արևելքի քաղաքական կյանքում ե՛լ Մակեդոնացու
կենդանութան օրոք, ե՛լ նրա մահից հետո կայսրութիւնը ժա-
ռանգելու շուրջ դիադոխների միջև ծագած պատերազմների ժա-
մանակ: Հավանաբար այդ է պատճառը, որ Պլուտարքոսն իր
գրած կենսագրութիւններից մեկը նվիրել է նրա գործունե-
ութիւնը նկարագրելուն:

Շուտով, հելլենիստական բյուրոկրատական ապարատի
կազմավորման գոլգընթաց, Պողոմեոսների և Սելևկյանների
արքունիքում ստեղծվում է հատուկ գրասենյակ, դիվան, որը
գլխավորում է նամակագիրը (ἐπιστολόγος) — Դիոնիսիոսը
Անտիոքոս Դ-ի օրոք, Մենոքարեսը Դեմետրիոսի օրոք և ուրիշ-
ներ: Նամակագիրը բարձրաստիճան պաշտոնյա էր, որին, բարձ-
րաստիճան բոլոր պաշտոնյաների նման, թագավորը նշանակում
էր իր մերձավոր ընկերների (φίλοι) միջից⁸⁹: Այդպիսի բարձ-
րաստիճան պաշտոնյայի դեկավարած դիվանատունը, անպայման,
կառավարման կարևորագույն մարմին էր: Համապատասխան
կերպով նույնպիսի դրութիւն էր նաև հելլենիստական մյուս
թագավորութիւններում:

Եգիպտական պապիրուսներում, ինչպես նաև մատենագրա-
կան աղբյուրներում և վիճակական արձանագրութիւններում, մեզ
հասել են բազմաթիվ նամակներ, որ փոխանակել են հելլե-
նիստական թագավորներն իրար միջև, կամ ուղղել են հպատակ
քաղաքներին, իրենց ստորադրյալ պաշտոնյաներին և տարբեր
անձնավորութիւնների: Այդ ընդարձակ նամակագրութիւնը,

(89) Polyb., XXX, 25, 16.

հավանաբար, թագավորներին պատճառում էր այնքան մեծ հոգսեր, որ չի կարելի անհիմն համարել այս կապակցությամբ առաջացած այն գրույցը, թե իբր Սելևկոս Ա-ը հաճախ ասելիս է եղել, որ եթե շատերն իմանային, թե ինչքան ծանր է գրել ու կարդալ այդքան շատ նամակներ, ապա նրանք չէին վերցնի դեն շարտված թագավորական դիադեման:

Հայաստանի առաջին թագավորները, Երվանդունիները, Արտաշեսն ու նրա հաջորդները ևս, ունեցել են արդյոք իրենց նամակագիրը, դժվար է այդ հարցի որոշակի պատասխանը գտնել մեզ հասած սկզբնաղբյուրներում: Սակայն հնագույն վավերագրերի և մատենագրական մի շարք անուղղակի տվյալների հիման վրա կարելի է ենթադրել, որ Երվանդունիների և Արտաշեսյանների արքունիքում ևս կային հատուկ գրագիրներ, դպիրներ, արքունի դիվանատան գրագրությունը վարելու և պահելու համար: Այսպես, դեռևս Աքեմենյան տերության մեջ յուրաքանչյուր սատրապ ուներ առանձին դիվանատուն իր գրագիրներով⁹⁰: Անկասկած, Երվանդունի նախկին սատրապի հայոց թագավոր հռչակվելուց հետո, սատրապի ծառայության մեջ գտնված դիվանատունն իր գրագիրներով ու դպրապետով փոխարկվեց արքունի դիվանատան, սպասարկելու հայոց թագավորին: Այդպիսի դիվանատան գոյության օգտին անուղղակիորեն վկայում են նաև Հայաստանում հայտնաբերված Արտաշես Ա-ի հողաբաժան սահմանաքարերի արամեատառ և Արմավիրի, Գառնիի ու Ապարանի հուշարձան արձանագրությունները, որոնց սեփառները, ինչպես նշված է պատմագիտության մեջ, անպայման նախապես մշակված ու կազմված պիտի լինեին արքունի դիվանատանը⁹¹: Մենք մատենագրական որոշակի տվյալներ ունենք այն մասին, թե հետագայում, հայ Արշակունիների արքունիքում, արդեն հաստատապես եղել է դպրի պաշտոնը: Այսպես, Ագաթանգեղոսը խոսում է հայոց թագավորի ստենակալ դպիրների մասին⁹², իսկ Կորյունը և Մովսես Խորենացին վկայում են, որ հայ գրերի ստեղծողն սկզբնական շրջանում նշանակված է եղել քար-

(90) Г.А. Тирациян, Некоторые аспекты внутренней организации армянской сатрапии, *ՊԲՀ*, 1972, № 2, էջ 106-109:

(91) К.В. Тревер, Очерки по истории культуры древней Армении, էջ 181, *Հայ ժողովրդի պատմություն*, հ. 1, Երևան, 1971, էջ 681-682:

(92) *Ագաթանգեղոս*, Ը, 99:

տուղար, դպիր արքունի դիվանում⁹³։ Բացառված չէ, որ Արշակունիների նման, Արտաշեսյանները ևս ունեցել են իրենց արքունի դպիրները։ Հայոց թագավորի դպրի պաշտոնը, ամենայն հավանականությամբ, նույնն էր, ինչ հելլենիստական թագավորների նամակագրի, հախտողգրաֆոսի պաշտոնը։ Այս առնչությամբ Ս.Տ. Երեմյանը գրում է. «Արտաշեսյանների շրջանում պետք է որ գոյություն ունենար նաև արքունի սենեկապետ, որը գլխավորում էր արքունի դիվանը։ Աղբյուրներից երևում է, որ սենեկապետը հանդիսանում էր թագավորի անձնական քարտուղարը և գրանցում էր նրա բանավոր հրամանները, որոնք հետագայում մտցվում էին հատուկ մատյանում»⁹⁴։

* * *

Նախորդ գլուխներում ցույց տվեցինք, որ մ.թ.ա. IV-III դդ. հարևան երկրների նման, հին Հայաստանում ևս գերագույն տեղը թագավորն էր, իսկ քրմապետը հանդիսանում էր «թագավորից հետո երկրորդ անձնավորությունը» տերություն մեջ։ Սկզբնաղբյուրների տվյալների հիման վրա կարելի է եզրակացրնել, որ նշված հարաբերությունը Հայաստանում գոյություն է ունեցել Երվանդունիների և Արտաշեսի ժամանակ, ծայրահեղ դեպքում մինչև Տիգրան Բ-ի գահակալումը, որի օրոք արդեն քրմապետը պետք է որ կորցրած լիներ իր նախկին հեղինակությունը և դիրքը։ Այդ բանն ուղղակի կերպով երևում է երկու վկայությունից, որոնցից մեկը պահպանվել է Մովսես Խորենացու, մյուսը՝ Պլուտարքոսի մոտ։ Այսպես, պատմահայրը վկայում է, որ Տիգրանը «ցատուցեալ ընդ Վահունիսն ընկենուզ գնոսա ի քրմութենէն, և զգլղն յարքունիա առնու»⁹⁵։ Իսկ Պլուտարքոսը, նկարագրելով Տիգրանի արքունի շքախումբը, գրում է. «Շատ թագավորներ սպասարկում են Տիգրանին, բայց նրանցից չորսը միշտ նրա հետ էին լինում որպես ուղեկիցներ և թիվնապահներ. և երբ նա գնում էր ձիով, նրանք, կարճ խիտոններ հագած, վագում էին առջևից, իսկ երբ նստած էր լինում և պաշտոնական գործերով զբաղվում, նրանք, իրար ձեռքից բռնած, կանգնած

(93) Կորիւն, Պատմութիւն վարուց և մահուան Մերոպայ վարդապետի, Վենետիկ, 1894, էջ 14: Մովսես Խորենացի, Գ, խփ:

(94) С.Т. Еремян, Основные черты ..., էջ 72.

(95) Մովսես Խորենացի, Բ, Ժդ:

էին լինում նրա շուրջը»⁹⁶:

Եթե խորենացու վկայությունը որոշակի կերպով վերաբերվում է Վահունիների (որոնց սերնդից էլ պետք է լիներ քրմապետը, երկրի «երկրորդ անձնավորությունը») շնորհազրկմանը, ապա Պլուտարքոսի վկայությունը չորս թագավորների մասին, իր ծաղրանկարային բնույթով հանդերձ, կարելի է դրա անուղղակի ապացույցը համարել: Բանն այն է, որ, ինչպես ենթադրում է Յ. Մարկվարտը, այդ չորս թագավորները պետք է լինեն Հայաստանի չորս բղջիները, որոնց մասին ընդարձակ վկայություններ կան Ագաթանգեղոսի, Փավստոսի և խորենացու մոտ⁹⁷: Ինչպես հայտնի է, Հայաստանի պետական ապարատի հիերարխիայում բղջիները, թագավորից հետո, գրավում էին երկրորդ տեղը: Եթե այդպես է, ապա քրմապետը, ինչքան էլ կարևոր դեր խաղար երկրի քաղաքական կյանքում, բղջիներ թյունների հաստատումից հետո այլևս չէր կարող թագավորից հետո երկրորդ անձնավորությունը լինել:

Գ.Վ. Ծերեթելին, սակայն, չի ընդունում, որ բղջիքը երբևիցե եղել է թագավորից հետո երկրորդ դեմքը պետութայն մեջ, հենվելով այն հայտնի իրողության վրա, որ բղջիները «ինչպես Հայաստանում, այնպես էլ Վրաստանում, մի քանիսն էին, և նրանք բոլորը չէին կարող միաժամանակ լինել երկրորդ դեմքը թագավորից հետո»⁹⁸: Գ.Վ. Ծերեթելու այս տեսակետը, մեր կարծիքով, հակասում է նույն տեղում իր իսկ վկայակոչած այն փաստերին, թե Հայաստանում չորս բղջիներից մեկը Աղձնիքի իշխանը համարվում էր «բղջի մեծ»⁹⁹, որը Փավստոս Բուզանդի և Մովսես խորենացու մոտ կոչված է մեծ իշխան¹⁰⁰, իսկ

(96) Plutarchi Lucullus, XXXI, 6.

(97) J. Markwart, Ernašahr..., էջ 171-173: Մարկվարտի այս ենթադրությունը հավանական են համարում նաև Н. Адонц, Армения в эпоху Юстиниана, стр. 391, էջ 283 և 410-411) և Հ. Մանանդյանը (Ֆեոդալիզմը հին Հայաստանում, էջ 34: Տիգրան երկրորդը և Հռոմը, էջ 58: Քննական տեսություն ..., հ. Ա, 159-160):

(98) Г.В. Церетели, Армазская билингва, Тб., 1941, стр. 60.

(99) Ագաթանգեղոս, ՃԺԲ, 795:

(100) «Ջայնու ժամանակաւ ապստամբեաց յարքայէն Հայոց մի ի ծառայից նորա մեծ իշխան Աղձնեաց, որ անուանեալ կոչէր բղջիսն ...» (Փավլոստոս, Գ.Թ.): «Քանզի վախճանել երանելոյն Տրդատայ՝ մեծ իշխանն Բակուր, բղջիսն Աղձնեաց կոչէր ...» (Մովսես խորենացի, Գ, դ):

Արմագիում հայտնաբերված և իր իսկ Գ.Վ. Մերեթելու կողմից հրատարակված երկլեզվյան (արամեերեն և հունարեն) արձանագրության մեջ հիշատակված է Ջելսիս անունով կրտսեր բղեշխը (Ζηουάχου του νεωτέρου πιτιάξου)¹⁰¹: Եթե Վրաստանում գոյություն է ունեցել կրտսեր բղեշխ, ապա բնական է, որ նրա կողքին պետք է գոյություն ունենար «բղեշխն մեծը»: Հետևաբար, բղեշխներից մեկը, հանդիսանալով «մեծ», կարող էր լինել թագավորից հետո երկրորդ դեմքը պետության մեջ:

Գ.Վ. Մերեթելու այդպիսի ոչ ճիշտ եզրակացություն հանգելը մասամբ հետևանք է այն բանի, որ նա, բղեշխների մասին խոսելիս, հենվում է բացառապես Հայաստանի և Պարսկաստանի մասին հետազայ շրջանի պատմիչների վկայությունների վրա, որոնցում արտացոլված է արդեն Ֆեոդոսիականացած Հայաստանի և Սասանյան Պարսկաստանի քաղաքական իրավիճակը:

Թ.Կ. Գամախուրդիան ևս, իր «Բղեշխությունների ինստիտուտի հարցի շուրջ» հեռաբլբլի աշխատության մեջ, հրատարակված Վրացական ՍՍՀ ԳԱ հասարակական գիտությունների Տեղեկագրում¹⁰², մի շարք զուգահեռների և սկզբնաղբյուրներից բերած վկայությունների հիման վրա, Վրաստանի մասին հանդում է նույն այն եզրակացություն, ինչ մենք՝ Հայաստանի մասին, թե՛ բղեշխը թագավորից հետո եղել է երկրորդ անձնավորությունը երկրում¹⁰³:

«Բղեշխ» տերմինը բղեաշխ, πιτιάξης, πιτάξης, βιτάξης, βίδιξ, βάτσα, vitaxa ձևերով մեզ հայտնի է տարբեր բնույթի սկզբնաղբյուրներից՝ մատենագրական աղբյուրներից, վիճակուն

(101) Г.В. Церетели, Армазская билингва, Тб., 1941, стр. 23. նաև Г.В. Церетели, Эпиграфические находки в Мухета - древней столице Грузии, ВДИ, 1948, N° 2, стр. 50.

(102) «Մայնե», 1970, նո 6: Հայերեն թարգմանությունը տես՝ Թ.Կ. Գամախուրդիա, Բղեշխությունների ինստիտուտի հարցի շուրջ, ՀՍՍՀ ԳԱ հասարակական գիտությունների ինֆորմացիայի սեկտոր, նո 5, 1971, Երևան, (վկայակոչվում է այս հրատարակությունը):

(103) Նույն տեղում, էջ 43-53:

արձանագրություններից, դեմմաներից և այլն¹⁰⁴։

«Բդեչխ» բառի ստուգաբանության և, ընդհանրապես, դրա տակ հասկացված պաշտոնի էությունը տարբեր մեկնաբանություններ են տրվել։ Տիրապետող է այն կարծիքը, թե «բդեչխ» բառն ունի պարսկական ծագում։ Մինչդեռ ակադ. Գր. Ղափանցյանը գտնում է, որ «դժվար է pitiaxš-ը / կամ bidiaxš / համադրել փեհլևական pātāxšāh, նոր պարսկ. pādšāh (Թագավոր) բառերի հետ առաջին վանկի (pitiaxš) i ձայնավորի պատճառով, որին իրանական բառում համապատասխանում է a ձայնավորը»¹⁰⁵։ Մեր կարծիքով, սակայն, ակադ. Ղափանցյանի այս տեսակետի դեմ կարելի է բերել այն փաստարկը, որ Դուրա-Եվրոպոսի պեղումներից հայտնաբերված և 121 թվականին վերագրվող մի հունարեն վավերագրի մեջ մեզ հետաքրքրող տերմինը դրված է βατησα (բատեսա-բատեշա) ձևով¹⁰⁶ և այստեղ առաջին վանկի ձայնավորը ոչ թե i է, այլ a և բառը կարելի է հեշտությամբ համադրել թագավոր նշանակող pātāxšāh և pādšāh իրանական բառերի հետ։

Այսուհանդերձ նշենք, որ βατησα տերմինը bitiax-ի հետ նույնացնելուն կողմնակից են ոչ բոլոր հետազոտողները։ Այսպես, Գ.Կ. Գամասխուրդիան նշում է, որ Ռ. Ֆրայը, ուսումնասիրելով վերահիշյալ վավերագիրը Դուրա-Եվրոպոսից, այն կարծիքն է հայտնում, որ βατησα տերմինը, առավելապես արտահայտում է ազնվատոհմություն, նրա աստիճանը, քան պաշտոն։ Ռ. Ֆրայի կարծիքով βατησα պիտի լինի իրանական āzātān-ի միջագետքյան համարժեքը»¹⁰⁷։

Բդեչխության ինստիտուտը հասուկ է եղել Պարսկաստա-

(104) Փալստոս Բուզանդ, Գ, իգ։ Բ, ը։ Ագաթանդեղոս, 795 և 873։ Մովսես Խորենացի, Ա, իգ։ Բ, ը։ Հր. Աճառյան, Հայերեն արմատական բառարան, Կ. 1, Երևան, 1971, էջ 434։ Ammianus Marcellinus, XXIII, 6, 14; Г.В. Церетели, Армазская билингва, стр. 23, Его же, Эпиграфические находки ..., стр. 50; М.І. Rostovtzeff and С.В. Welles, A Parchment contract of Loan from Dura-Europos, Yale Classical Studies, II (1931), pp. 6 and 51; Ernest Honigmann et André Maricq, Recherches sur le Res Gestae divi Saporis, Bruxelles, 1953, p. 17-18.

(105) Гр. Капанцян, Историко-лингвистические работы, Ереван, 1956, էջ 468.

(106) М.І. Rostovtzeff and С.В. Welles, նույն տեղում։

(107) Թ.Կ. Գամասխուրդիա, նույն տեղում, էջ 6։

նին, իբերիային և հայկական պետութեան: Բղեշխութեան պաշտոնը, անկասկած, անցել է հարյուրամյակների ընթացքում զարգացման որոշակի փուլ: Այսուհանդերձ, այդ պաշտոնը ինչպիսի փոփոխութեան ենթարկուած էլ կրած լինելը, բոլոր դեպքերում իր հոլութեամբ մոտավորապէս համապատասխան էր մնում նահանգապետի, կուսակալի բարձր պաշտոնին:

Սկզբում մենք վկայակոչեցինք Յ. Մարկիպարտի ենթադրութեանն այն մասին, թէ Պրուտարքոսի նկարագրած չորս արքայիկները, որոնք շրջապատում էին Տիգրան Բ-ին, պետք է լինեն Հայաստանի չորս բղեշխները: Յ. Մարկիպարտի կարծիքով, բղեշխները Հայաստանում սահմանային մարզի կառավարիչներ էին¹⁰⁸: Ն. Աղոնցը բղեշխներին համարում է յուրատեսակ մանր արքաներ, որոնք նախապէս իշխել են ինքնուրույն առանձին երկրամասերում, բայց Տիգրան Բ-ի նվաճումներից հետո ճանաչել են Հայաստանի թագավորների գերիշխանութեանը: Այնուհետև նա նշում է, որ Հայաստանում բղեշխները դիտուել են իբրև կուսակալներ համեմատաբար ուշ շրջանում, Սասանյան Պարսկաստանի պետական կարգի ազդեցութեան շնորհիվ¹⁰⁹: Կ. Թումանովը նույնպէս, ըստ հոլութեան, համաձայն է Յ. Մարկիպարտի կարծիքին¹¹⁰: Թ. Գամսախուրդիան այն կարծիքին է, թէ իտրենացու տվյալների համաձայն, Հայաստանում եղել են ոչ թէ չորս, այլ միայն երկու բղեշխ և մատնացույց է անում այն, որ Մարկիպարտը հետագայում նշում է Հայաստանում միայն երկու՝ Աղձնիքի և Գուգարքի բղեշխութեան գոյութեանը¹¹¹: Պետք է դիտել, որ իտրենացու մեկ առանձին վկայութեան վրա հիմնված¹¹² Թ. Գամսախուրդիայի այս տեսակետը դեռևս բավարար չափով փաստարկված չէ, քանի որ իտրենացու համապատասխան վկայութեանները չեն հակասում բղեշխութեանների մասին ցարդ մեր ունեցած պատկերացումներին:

Եթէ ընդունենք չորս արքայիկների մասին Պրուտարքոսի վկայութեանը Յ. Մարկիպարտի տված բացատրութեանը, ապա

(108) J. Markwart, Eransahr..., էջ 163-175:

(109) Н. Адонц, Армения в эпоху Юстиниана, էջ 283.

(110) С. Toumanoff, Studies in Christian Caucasian history, Georgetown University press, 1983, էջ 155-192:

(111) Թ.Կ. Գամսախուրդիա, նույն տեղում, էջ 24-27:

(112) Մովսէս իտրենացի, Բ, Ը:

դրանով իսկ մենք հնարավորություն ենք ստանում մոտավորապես որոշելու Հայաստանում բղեղխությունների առաջացման ժամանակը և պատմա-քաղաքական հանգամանքները:

Ինչպես նշել ենք՝ բղեղխությունների և բղեղխների մասին մեզ հասել են բազմաթիվ տարաբնույթ և տարալեզու տեղեկություններ, որոնք վերաբերում են տարբեր ժամանակների: Սակայն Հայաստանում բղեղխությունների, հետևաբար և բղեղխների պաշտոնի, առաջացման մասին տեղեկություններ պահպանել են Պլուտարքոսը և Մովսես Խորենացին: Հույն մատենագրի համապատասխան վկայությունը նոր մեջ բերվեց վերևում: Ուստի և մենք կսահմանափակվենք ստորև մեջ բերելով միայն մեր պատմահոր երեք վկայությունը բղեղխների վերաբերյալ:

«Յորոց զմինն յարևմտից հարաւոյ աշխարհիս մերոյ, մերձ ի սահմանս նորին Ասորեստանի, բնակեցուցանէ Սկայորդին մեր քաջ նախնին, այս ինքն է զՍանասարն. և ի սմանէ աճուամն և բազմասերութիւն լեալ՝ լցին զՍիմն սասցեալ լեառն: Իսկ պերճքն և գլխաւորքն ի նոցանէ յետոյ ուրեմն մտերմութիւն վաստակոց առ թագաւորսն մեր ցուցեալ՝ զբղեղխութիւն կողմանցն արժանաւորեցան առնուլ»¹¹³:

Այնուհետև՝ «Իսկ ընդդէմ լերինն Կաւկասայ կողմնակալ հիւսիսոյ կարգէ զմեծ և զհզօր ազգն, և նահապետության անուն կարդայ բղեաշխ Գուգարաց ...»¹¹⁴:

Ու վերջապես՝ «և զՇարաշան ի տանէ Սանասարայ հաստատէ բղեղխ մեծ և կուսակալ յարևմտից հարաւոյ, յեզերս սահմանացն Ասորեստանի ...»¹¹⁵:

Ակներև է, որ այս վկայություններից առաջինը մեզ համարյա ոչինչ չի տալիս հիշյալ բղեղխության առաջացման նույնիսկ մոտավոր ժամանակը պարզելու համար: Այսուհանդերձ, այն շատ կարևոր է ընդհանրապես բղեղխության ինստիտուտի առաջացման սոցիալ-պատմական հանգամանքները հասկանալու տեսակետից: Բանն այն է, որ, ինչպես հաղորդում է Մովսես Խորենացին, Պարույր Սկայորդու կողմից Հայկական լեռնաշխարհի հարավ-արևմտյան մասում, Ասորեստանի սահմանների մոտ բնակեցված Սանասարի սերնդից ականավոր մարդիկ հետա-

(113) Մովսես Խորենացի, Ա, Իգ:

(114) Նույն տեղում, Բ, Ը:

(115) Նույն տեղում:

գայում, թագավորին հավատարմորեն ծառայելով, որպես հատուցում ստանում են այդ կողմերի բղեչխուժյունը: Այստեղից պարզ կարելի է եզրակացնել, որ բղեչխուժյան պաշտոնը Հայաստանում սկզբնական շրջանում եղել էր ոչ թե ժառանգական, ինչպիսին էին, սովորաբար, պետական պաշտոնները Աքեմենյան տերության մեջ, այլ այն շնորհում էր թագավորը ազնվականության այս կամ այն ներկայացուցչին կամ իր մերձավորներից որևէ մեկին, որպես վարձատրություն նրա մատուցած ծառայության համար, ինչպես ընդունված էր Սելևկյանների պետության մեջ:

Հայաստանում բղեչխուժյունների առաջացման ժամանակը որոշելու տեսակետից առանձնապես արժեքավոր են խորենացու հաջորդ երկու վկայությունը, թե՛ հայոց Վաղարշակ թագավորը Հայաստանի ծայրամասերի կառավարումը հանձնում է բղեչխներին: Մեկ ուրիշ առիթով մենք նշել ենք, որ պատմահոր կիսապատմական-կիսավիպական Վաղարշակ թագավորի գործունեությունը և ժամանակը ընդհանրապես համընկնում է հունական ազբյուրներում հիշատակված պատմական Արտաշեսի և, մասամբ, Տրգատ Ա-ի գործունեությանը: Հետևաբար, ելնելով բղեչխների մասին խորենացու վկայություններից, հնարավոր կլիներ ենթադրել, որ բղեչխություններն առաջացել են Հայաստանում մ.թ.ա. II դարի կեսերին:

Մյուս կողմից, եթե, հենվելով Յ. Մարկիարաի ենթադրության վրա, ընդունենք, որ Պլուտարքոսի հայտնի վկայության մեջ հիշատակված չորս թագավորները, որոնք ամենուրեք ուղեկցում էին Տիգրանին, նույն այդ բղեչխներն են, ապա միանգամայն ճիշտ կլինի ենթադրել, որ բղեչխություններն առաջացել են Հայաստանում իր իսկ Տիգրան Բ-ի թագավորության տարիներին, մի բան, որը միանգամայն (եթե ոչ բացառապես) հնարավոր էր այդ տարիներին ստեղծված քաղաքական իրադրության պայմաններում: Աշխատենք պարզել մեր տասածը:

Մինչև Տիգրան Բ-ի գահակալումը, հայկական թագավորության աշխարհագրական անձուկ սահմանները հնարավորություն չէին ընձեռում բղեչխությունների առաջացման համար, քանի որ բղեչխությունն ինքնին մի փոքր թագավորություն էր, իսկ բղեչխը՝ Պլուտարքոսի վկայության համաձայն՝ թագավոր (βασιλεύς): Դրությունն արմատապես փոխվում է Տիգրան Բ-ի գահակալության առաջին տասնամյակում իսկ:

Տիգրանի մղած յաջող պատերազմների հետևանքով, այդ տարիներին հայկական թագավորութւյան սահմանները մեծապես ընդարձակվեցին աշխարհագրական բոլոր չորս ուղղութւյուններով, դրանով իսկ ընդգրկելով մի շարք նախկինում ինքնուրույն թագավորութւյուններ: Ահա և այս թագավորութւյունների նախկին տիրակալները, հպատակվելով նոր աշխարհակալին, դառնում են նրա հպատակ գինակիրները:

Բդեաշխ (pitiaxš) տերմինի լեզվաբանական վերլուծութւյան վրա ակադ. Գր. Ղափանցյանի արած եզրակացութւյան վերջին մասը համահնչուն է մեր տեսակետին: Նա գրում է. «Ես չեմ կասկածում, որ մենք ունենք հին փոքրասիական բառ, որտեղ սկզբնական bidi-(piti) նշանակում էր տեղ, երկրամաս (համոխեթ. peda – «տեղ»), իսկ – ašx հավանաբար նշանակում էր տիրակալ, իշխան ...: Այնպես, որ bidiaxš կարող էր նշանակել «երկրի իշխան», այսինքն՝ տեղական կիսանկախ մեծատոհմիկ, և ոչ թե սյուզերեն թագավորի օտար տեղապահը»¹¹⁶:

Թ.Կ. Գամսախուրդիան թեև փորձում է վիճարկել Հայաստանում բդեշխութւյունների Տիգրան Բ-ի ժամանակ առաջացած լինելու տեսակետը, բայց իվերջո ստիպված է լինում ընդունելու, թե «բացառված չէ, որ դա իրոք էլ այդպես էր»: Նույն միտքը նա կրկնում է երկրորդ անգամ գրելով, թե «a priori կարելի է կարծել, որ այդ իրոք այդպես է եղել»¹¹⁷:

Թեև ուզ և բդեշխներին ուղղակի կերպով չի հիշում, սակայն, ըստ հույնական վերահիշյալ իրավիճակին է նկատի ունեցել ակադ. Ս.Տ. Երեմյանը՝ գրելով. «Լեոնային ծայրամասային մարզերի տեղաբնիկ բնակչութւյունը, մեծ մասամբ անասնապահական, հայոց թագավորների հարկատուն էր կամ դաշնակիցը: Դրանք կիսանկախ բարբարոսական իշխանութւյուններ էին ...: Երկրի ներկայացուցիչը, իշխան կամ արքայիկ, հայոց թագավորին հարկ էր վճարում և պատերազմի դեպքում իր աշխարհագրորի հետ միասին մասնակցում էր թագավորների կողմում: Ռազմական ավարը հարստացնում էր ցեղի ավագանուն, որը ժամանակի ընթացքում հայոց թագավորի կողմից ճանաչվեց որպես ժառանգական տիրա-

(116) Гр. Капанцян, Хаяса-колыбель армян, Ереван, 1946, էջ 116, ծանոթ. 1:

(117) Թ.Կ. Գամսախուրդիան, նշվ. աշխ., էջ 30 և 33:

կալ իր ցեղի և նրա գբաղեցրած տերիտորիայի վրա»¹¹⁸:

Ի դեպ նշենք, որ այդ պայմաններում էլ հենց հնարավորութուն է ստեղծվում հայոց թագավորի համար յուրացնել «արքայից արքա» (βασιλεύς βασιλέων) տիտղոսը¹¹⁹: Կարծում ենք, որ հայոց թագավորի այս նոր տիտղոսը ոչ այնքան հետևանք էր պարթևների դեմ նրա տարած հաղթանակի, որի մասին վկայում են Ստրաբոնը և Յուստինոսը¹²⁰, որքան փաստական այն դրության, ըստ որի, Տիգրանի գերիշխանության տակ էին գտնվում արդեն մի շարք երկրների թագավորներ: Այս մասին մենք արդեն խոսել ենք:

Ս.Տ. Երեմյանը, սակայն, խոսելով ուղղակի բղեչխությունների առաջացման մասին Հայաստանում, վերոհիշյալից փոքր ինչ տարբեր բացատրութուն է տալիս: Նա գրում է. «նվաճված երկրները (խոսքը Տիգրան Բ-ի նվաճումների մասին է —Ս.Կ.) ստանում էին նոր վարչական կառավարում: Դրանք բաժանված էին առանձին կուսակալութունների, որոնց գլուխ կանգնած էին թագավորի նշանակած կուսակալները՝ բղեչխները, որոնք ունեին քաղաքացիական և ռազմական իշխանություն: Բղեչխներին կարելի է համեմատել Սելևկյան պետության սատրապների հետ: Այս կուսակալութուն-բղեչխութունների կառավարիչներ նշանակվում էին կամ թագավորական ընտանիքի անդամները, կամ բարձր ազնվականության ներկայացուցիչները: Այսպես, օրինակ, Միգդոնիա նահանգում կուսակալ էր նշանակված Գուրասը, Տիգրան Բ-ի եղբայրը: Հավանաբար նրա (Տիգրանի — Ս.Կ.) որդին, արքայորդի Զարեհը, նշանակված էր Նոր Ծիրականի բղեչխ: Նախկին Սելևկյան Միրիայի կառավարիչ նշանակված էր մեծատոհմիկ Բագադատը կամ Բագարատը ...: Նույնպիսի կառավարիչներ և կուսակալներ էին նաև Տիգրան Բ-ի պալատականներ Մեհրուժանը և Մանկայոսը»¹²¹:

(118) С.Т. Еремян, Основные черты ..., էջ 52:

(119) Թեև այս «արքայից արքա» տիտղոսը մեզ մոտ հանդիպում է դեռևս ուրարտական արձանագրութուններում՝ տրված Ուրարտուի թագավորներին, սակայն այդ պատմական ժամանակաշրջանից մինչև Տիգրանն ընկած ժամանակահատվածն այնքան երկար է, որ դժվար կլինի Տիգրանին տրված «արքայից արքա» տիտղոսի և ուրարտական թագավորների նույնանման տիտղոսի միջև որևէ առնչութուն գտնել:

(120) Strabo, XI, 14, 15 (С. 531); Justin., XL, 3.

(121) С.Т. Еремян, Основные черты ..., էջ 72.

Ինչպես տեսնում ենք, Ս-Տ. Երեմյանի այս տեսակետը նույնպես չի հակասում մեր այն ենթադրությունները, թե բղեչխությունները Հայաստանում առաջացել են Տիգրան Բ-ի թագավորությունից ժամանակ:

Հետագա շրջանում, երբ արդեն քաղաքական աննպաստ հանգամանքների բերումով հայերը կորցրին Տիգրան Բ-ի նվաճած այդ երկրամասերը, բղեչխներն, իրենց հերթին, կորցնելով հայոց «արքայից արքային» հպատակ թագավորի բնույթը, աստիճանաբար վերածվեցին թագավորություն չորս ծայրամասերում նրա նշանակած կուսակալ-կողմնակալների: Այս վերջին դրությունն էլ հենց հայտնի է ուսումնասիրողներին, քանի որ այն արձանագրված ենք գտնում Վ դարի մեր մատենագիրների մոտ, որոնք բղեչխներին գիտեն որպես «սահմանակալ» (ΤΟΠΟΚΡΑΤΩ), «գահերէց» (ΤΙΜΩΤΑΤΟΣ), «բարձերէց» իշխաններ¹²²: Ի դեպ, «գահերէց» և «բարձերէց» տերմինների մասին:

Համանիշ այս բառերը աղբյուրներում օգտագործված են բնորոշելու համար բղեչխների սոցիալական դիրքը Հայաստանում Արշակունիների թագավորությունից ժամանակ: Ուսումնասիրողները, ելնելով «գահ» և «բարձ» բառերի նստելու տեղ, «բազմոց» նշանակությունից, գտել են, որ դրանք մեր մատենագրությունից մեջ գործ են ածվել «նշանակելու համար այն տեղը, բազմոցը, որ նախարարները գրավում էին թագավորի սեղանին շուրջը խնջույքների ժամանակ: Այս տեղերը ճշտվում սահմանված էին պարսից թագավորների կողմից (տես Գահնամակ), և նրանցով որոշվում էր նախարարներից յուրաքանչյուրի ավագությունը»¹²³:

Ուսումնասիրողները մինչև հիմա պատշաճ ուշադրություն չեն դարձրել այն փաստի վրայ, որ, «գահերէց» բառը Ագաթանգեղոսի հոնարեն տարբերակում արտահայտված է ΤΙΜΩΤΑΤΟΣ (պատվավորագուն) բառով: Այս բառը ճիշտ հասկանալու համար մենք մի անգամ ևս ստիպված ենք վերադառնալու Սե-

(122) Փախտոս Բուզանդ, Գ, Թ: Դ, Ժ: Ագաթանգեղոս, ձիՁ, 873: Agathangelus und die Akten Gregors von Armenien, neu herausgegeben von Paul de Lagarde, Göttingen, 1887, էջ 83.

(123) Մովսես Խորենացի, Հայոց պատմություն, թարգմանություն, ներածութ. և ծանոթ. Ստ. Մալխասյանի, Երևան, 1940, էջ 282-283, ծանոթ. 128: Հմմտ. նաև Н. Адонц, Армения ..., էջ 283:

լևկյանների հելլենիստական արքունիքը, որտեղ պետական գործերում խոշոր դեր էին խաղում թագավորի ընկերները (φίλοι), և պատահական չէ, որ է. Բիկերմանը Սելևկյանների պետական հաստատութայնությունների ուսումնասիրմանը նվիրված իր կարևոր մենագրութայն մեջ հուշարեն փիլոս տերմինը թարգմանում է courtisan = պալատական և գտնում, որ նրանց կապը թագավորի հետ ավելի սերտ էր, քան սովորական պալատականների կապը¹²⁴։ Աղբյուրներում հաճախ հիշատակված թագավորի այս ընկերները արքունիքում կրել են պատվավոր տարբեր տիտղոսներ, թագավորի հետ իրենց ունեցած մոտիկութայն համապատասխան։ Այսպես, վիմական արձանագրութայնությունների տվյալներից հետևում է, որ Սելևկյանների տերութայն մեջ սովորական ընկերների (τῶν φίλων) ... ἤμιετρον¹²⁵ կողքին կային նաև առաջին ընկերներ (τῶν πρώτων φίλων βασιλέως Αντιόχου), որոնցից մեկը բժշկապետ էր (ἀρχίατρος), մյուսը՝ թագուհու նշարանի վերակացու (ἐπί τοῦ κοιτῶνος τῆς βασιλίσσης)¹²⁶։ Մեզ հաջողվել է արձանագրութայնություններում հայտնաբերել նաև պատվավոր ընկերների (Ἀριστόλοχον τῶν τιμωμένων φίλων)¹²⁷ աստիճանը։ Կար-

(124) E. Bickermann, Institutions des Séleucides, Paris, 1935, էջ 35 և հետ։ Այս առիթով նշենք, որ թագավորին մոտիկ պալատականները համարվել են փիլոս ոչ միայն Սելևկյանների արքունիքում, այլև հելլենիստական մյուս երկրներում, ինչպես Պերգամոնում (Diodor., XXXIV, 3), Պոնտոսում և այլն։ Նրանք այստեղ ևս զբաղեցրել են բարձրագույն պետական պաշտոններ։ Այսպես, Ստրաբոնը գրում է. «Միհրգատ Եվպատորը այնքան գորացավ, որ (Կոլիսիոս) երկիրը նրան անցավ։ Որպես երկրի հյուսիսում և կառավարիչ մշտապես ուղարկվում էր ընկերներից մեկը (τῶν φίλων)։ Մրանցից էր և Մոսիեուսը, մորս հորեղբայրը» (Strabo, XI 2, 18, C. 498-499)։

(125) C.B. Welles, RC, 22.

(126) OGIS, 256.

(127) C.B. Welles, RC, 45։ Այս առումով հետաքրքիր է նաև Կոմմագենեում հայտնաբերված հուշարեն արձանագրութայնություններից մեկը, որը վերաբերում է Կոմմագենի Անտիոքոս Ա թագավորին։ Այս արձանագրութայն մեջ Անտիոքոսի տիտղոսաշարին հաջորդող տղերքում հիշատակվում է, որ թագավորի առաջին և առավել պատվավոր ընկերներից էր (τῶν πρώτων καὶ πρωτιμωμένων φίλων) ոմն Ապոլլաս, Ապոլլասի որդին, որը նշանակվել էր արքայազոս-կառավարիչ (F.K. Dörner and R. Naumann, Forschung in Kommagene, "Istanbuler Forschungen", Bd. 10, Berlin, 1939, էջ 43-44).

ծում ենք, որ չի կարելի այս վերջին փաստի կողքով անցնել: Սելևկյան թագավորի մոտիկ ընկերը, պալատականը, կրում է «պատվավոր» (ΤΙΜΩΜΕΝΟΣ) տիտղոսը: Ինչպես նոր նշեցինք, գահերեց բղեչխներին Ագաթանգեղոսի հունարեն տարբերակը տալիս է ΤΙΜΩΤΑΤΟΙ (պատվավորագույններ) տիտղոսը, որը բղեչխներին տարբերում էր հայոց թագավորի մյուս մերձավորներից ու ենթականերից: Եթե ընդունենք, որ Սելևկյանների արքունիքում հանդիպող «պատվավոր» տիտղոսը իրոք առնչվում է հայկական իրականության մեջ բղեչխներին տրված «պատվավորագույն» տիտղոսին, ապա կարելի է հաստատ ասել, որ «գահերեց» բառում «գահը» օգտագործված է ոչ այնքան «նստելու տեղ, բազմոց» իմաստով, ինչքան «պատիվ» նշանակությունում, որը և, մեր կարծիքով, ավելի է համապատասխանում պատմական իրականությանը:

Մի վերջին, ընդհանուր կարգի, դիտողություն ևս Հայաստանում բղեչխությունների առաջացման կապակցությունում: Վերևում ամբողջ շարադրվածից ավելի քան պարզ է, որ Արտաշեսյան Հայաստանի պետական մի շարք հաստատություններ իրենց վրա կրել են հելլենիստական շրջապատի ուժեղ ազդեցությունը: Այնուամենայնիվ, դրանք ունեցել են տեղական առավել հին արմատներ և կրել են միաժամանակ «ազգային» ավանդությունների բացահայտ կնիքը: Այդ պարզորոշ երևում է Հայաստանում բղեչխությունների առաջացման և դրանց հետագա գոյություն մասին ամբողջ պատմությունից: Ինչպես ցույց տվեցինք, դրանք առաջացել են միայն Տիգրան Բ-ի նվաճումներից հետո, որպես հայոց աշխարհակալ թագավորի գերագույն իշխանությունը ենթակա երկրամասեր: Եթե դրանց առաջացումը խորթ երևույթ լիներ Հայաստանի ներքին զարգացման համար, ապա շուտով, այդ երկրամասերի կորստից հետո, բղեչխությունները, հետևաբար և բղեչխները, պետք է վերանային Հայաստանում: Մինչդեռ նկատելի է, որ դրանք հիշատակվում են մեր մատենագրություն մեջ համարյա մինչև հայկական թագավորություն անկումը: Եւս մի փաստարկ այն մասին, թե բղեչխությունների առաջացումը Հայաստանում կապ չուներ հելլենիզմի ազդեցության հետ, հավանաբար այն է, որ Պլուտարքոսը, չկարողանալով ճիշտ բնորոշել հելլենիստական աշխարհին խորթ այդ հաստատությունը, բղեչխությունների տիրակալներին, ինչպես տեսանք, անվանում է թագավորներ:

Ամփոփելով բղեղաբանների մասին մեր ամբողջ ասածը, կարելի է ուրվագծել հետևյալ պատկերը: Դեռևս նախահայկական ժամանակաշրջանում Հայկական լեռնաշխարհում Ուրարտական պետութեան մեջ, գուցե և դրանից էլ առաջ, եղել են երկրամասերի իշխաններ: Սակայն նրանց մասին մենք առավել հավաստի տեղեկություններ ունենք սկսած Արտաշեսյան թագավորութեան ժամանակից: Այդ դարաշրջանում է, որ Հայաստանը, դառնալով Առաջավոր Ասիայի հզոր տերութուններից մեկը, վարչականորեն բաժանվում է մի շարք միավորների, որոնց գլուխ կանգնած էին հայոց թագավորին ենթակա կուսակալ-կառավարիչներ, որոնք հայկական աղբյուրներից հայտնի են բղեղա անունով, իսկ հույն հեղինակները նրանց համարում են հայոց թագավորին ենթակա բասիլևսներ, թագավորներ: Հին Հայաստանում եղել են հիմնականում չորս բղեղիներ, որոնց կառավարած երկրամասերը, ինչպես և պաշտոնը, կոչվել են բղեղաբաններ: Բղեղներից մեկը կոչվել է «մեծ» և հանդիսացել է թագավորից հետո երկրորդ անձնավորութունը, հետին պլանի վրա մղելով քրմապետին: Բղեղներն ու բղեղաբանները վերջնականապես ձևավորվել են Տիգրան Բ-ի ժամանակ, երբ Հայկական թագավորութեան սահմանները դուրս եկան Հայկական լեռնաշխարհի բնական-աշխարհագրական սահմաններից, դրանով իսկ ստեղծվեցին նյութական պայմաններ բղեղաբանների առաջացման համար: Բղեղները, որպես «գահերէց» և «բարձերէց» իշխաններ, թագավորի մերձավորագույն և հզորագույն գինակիցներն էին: Սկզբնական շրջանում բղեղաբանութեան պաշտոնը ժառանգական չի եղել, այլ թագավորն այն շնորհել է իր մերձավորներից որևէ մեկին, իրեն մատուցած որոշակի ծառայութեան համար: Ավելացնենք նաև, որ միայն հետագայում, Հայաստանում ֆեոդալական հարաբերութունների արմատավորմանը զուգընթաց, բղեղները դառնում են ժառանգական պաշտոնյաներ, որպիսի վիճակն էլ, ահա, արձանագրված ենք գտնում մեր անդրանիկ մատենագիրների երկերում:

Քսենոփոնի երկերից մեզ հայտնի է, որ դեռևս մ.թ.ա. VI դարում արմենների բասիլևսի կողքին են եղել նաև «պատվավոր արմեններ»¹²⁸, որոնք հավանաբար, տոհմական կարգերի քայ-

(128) Xenoph., Cyrop., III, 1, 8.

քայման հիման վրա նոր կազմավորվող արմենական ավագանու ներկայացուցիչներն էին: Ճիշտ կլինի ենթադրել, որ հետագա դարերում, հայկական կենտրոնացված թագավորութան առաջացումից հետո, պետական բարձրագույն պաշտոնները վարել են այդ ավագանու միջից դուրս եկած մարդիկ, որոնք էլ, աստիճանաբար, դառնում են տերիտորիալ որոշակի միավորների ժառանգական տիրակալներ՝ նախարարներ: Նախարարներին մենք կանդրադառնանք առանձին գլխում:

Նախքան նախարարությունների հարցին անցնելը, անհրաժեշտ ենք համարում խօսել «լիտուրգիա» կոչված երևույթի մասին:

* * *

Իր մատյանի երկրորդ գրքի 7-8րդ գլուխները պատմահայրը հատկացրել է Հայաստանում նախարարությունները կարգավորելու ուղղությամբ Վաղարշակ թագավորի ձեռնարկած միջոցառումներին: Նրա վկայություններից կարելի է եզրակացրնել, որ սկզբնական շրջանում յուրաքանչյուր նախարար կապված է եղել արքունի որևէ պաշտոնի, ծառայության հետ: Այդ ծառայությունը սկզբնաղբյուրներում կոչված է նաև «գործակալություն»¹²⁹: Ն. Ադոնցը իրավացի է, երբ գործակալությունը համարում է ծառայություն և այն անջատում է իշխանությունից¹³⁰: Եթե գործակալությունը իրոք ծառայություն է, ապա այդ երեվույթի գոլգահեռը մենք գտնում ենք նաև հելլենիստական աշխարհում, որտեղ պետական ծառայությունը կոչվել է *ΛΕΙΤΟΥΡΓΙΑ* (լիտուրգիա) իսկ այդ ծառայությունը տանող անձնավորությունը՝ *ΛΕΙΤΟΥΡΓΟΣ* (լիտուրգոս): Չենք կասկածում, որ առաջին դարի Հայաստանում ևս պետական ծառայությունը համարվել է *ΛΕΙΤΟΥΡΓΙΑ*: Դրա ապացույցը մենք տեսնում ենք Գառնիի հունարեն արձանագրության մեջ, որտեղ հանդիպում է *ΛΙΤΟΥΡΓΟΣ* բառը: Հունական աշխարհում այս տերմինով արտահայտվում էր այն ծառայությունը (ազգամասնավերի շինություն, թատերախմբի ֆինանսավորում, շինարարական աշխատանքներ,

(129) Փալատոս Բուզանդ, Դ, ք: Ե, գ: Ե, ր: Հմմտ. նաև Հ. Հ. Մանանդյան, Ֆեոդալիզմը հին Հայաստանում, էջ 63-70: Նույնի, Քննական տեսություն ..., Կ. Բ, մաս Ա, էջ 327:

(130) Н. Адонц, Армения ..., էջ 444:

հարկերի գանձում և այլն), որ այս կամ այն պոլիտում իր իսկ միջոցներով կատարում էր որևէ ունևոր քաղաքացի, քաղաքային համայնքի կամ, ընդհանրապես, պետութեան օգտին: Այս առումով պիտի ճիշտ համարել Թ.Վ. Տրեպերի և Գ.Խ. Սարգսյանի տեսակետը, որոնք Գառնիի արձանագրութեան ΛΙΤΟΥΡΓΙΟΣ բառը համարում են արտահայտութիւն այն բանի, որ հելլենիստական Հայաստան մուտք էր գործել լիտուրգիայի ինստիտուտը¹³¹:

Այսուհանդերձ, լիտուրգիայի ինստիտուտը ժամանակի ընթացքում, պետական կարգերի փոփոխման զուգընթաց, ենթարկվել է որոշ փոփոխութիւնների: Եթե Հունաստանի պատմութեան դասական կոչված ժամանակաշրջանում, երբ պետական կազմակերպութեան հիմնական և գերակշռող ձևը պոլիսն էր, քաղաք-պետութիւնը, լիտուրգիայի պարտականութիւնները համայնքի որոշմամբ դրվում էին այս կամ այն հարուստ քաղաքացու վրա, որի նյութական միջոցները հնարավորութիւն էին տալիս նրան կատարելու իր վրա դրված պարտավորութիւնները, ապա հաջորդ շրջանում, երբ պետական կազմակերպութեան հիմնական ձևը դարձավ հելլենիստական միապետութիւնը, արդեն թագավորն ինքը այս կամ այն ծառայութիւնը, լիտուրգիան, հանձնարարում էր այս կամ այն մարդուն (այսպես են հասկացել «Հունարեն մեծ բառարանի» հրատարակիչները՝ Պոլիբիոսի/III, 93, 4) οἱ ἐπὶ τινὰ λειτουργίαν ἀπεσταλμένοι հատվածում լիտուրգիա բառը, այն թարգմանելով «ծառայութիւն, գերատեսչութիւն, հանրային գործերի վերահսկողութիւն, որը կատարվում է մեկ ուրիշի հանձնարարութեամբ»¹³²:

Լիտուրգիայի ինստիտուտի Հայաստան մուտք գործելու առաջին փաստը կարելի է տեսնել Պլուտարքոսի հետաքրքիր մի հաղորդման մեջ: Նկարագրելով Տիգրան Բ-ի ժամանակ Տիգրանակերտի կառուցումը, նա գրում է, որ «ինչպես քաղաքի հասարակ մարդիկ, այնպես էլ իշխանավորները, թագավորին հաճոյանալու նպատակով, իրար հետ մրցում էին քաղաքի կառուց-

(131) К.В. Тревер, Очерки по истории культуры древней Армении, т. I, М.-Л., 1953, էջ 183-185: Գ.Խ. Սարգսյան, Գառնիի հունարեն արձանագրութեան շուրջը, Տեղ. ՀԳԱՀԳ, 1956, նո 3, էջ 55-56:

(132) Μέγα λεξικόν τῆς Ἑλληνικῆς γλώσσης, ἔκδ. Δημητράκου, Αθήναι, 1951, հատ. 5, էջ 4288, տես λειτουργία 2:

ման և ընդարձակման համար»¹³³: Հայաստանում լիտուրգիայի ինստիտուտի հետագա արմատավորման փաստը չի կարելի արդյոք համարել Գառնիի բաղնիքի խճանկար հատակի կենտրոնական մակագրությունը, որտեղ ասված է. Μηδέν λαβόντες ἠογασάμεθα – «Ոչինչ չստանալով աշխատեցինք»¹³⁴:

Լիտուրգիան, մուտք գործելով Հայաստան, անկասկած, տեղական պայմանների, ինչպես նաև տեղական համանման ինստիտուտների ազդեցության հետևանքով, ստացել է տեղական բնույթ, որն արտահայտվել է թագավորին ծառայելու եղանակով: Հեռակաբար, լիտուրգիան հայ իրականության մեջ կարող էր ստանալ թագավորի հանձնարարությամբ հօգուտ պետությանը կատարվող ծառայության բնույթ: Մենք նշեցինք, որ հայոց թագավորը ազնվականության այս կամ այն ներկայացուցչին հանձնարարում էր այս կամ այն ծառայությունը, որը կոչվում էր «գործակալություն», իսկ պաշտոն ստացողը՝ «գործակալ»: Մեր կարծիքով, հունարեն λειτουργός և λειτουργεία տերմինների բովանդակությունն, այդ դեպքում, ուղղակի համընկնում են հայերեն «գործակալ» և «գործակալություն» տերմինների բովանդակությանը¹³⁵:

(133) Plutarchi Lucull., XXVI, Հմմտ. Գ. Սարգսյան, նշվ. աշխ., էջ 56:

(134) Б.Н. Аракелян, Гарни II, Ереван, 1957, էջ 30:

(135) Այդ մասին հանգամանորեն տես՝ Ս.Մ. Կրկյաշարյան, Եւս մի անդամ Գառնիի հունարեն արձանագրության մասին, ՊԲՀ, 1985, նո 3, էջ 235-238:

ԳԼՈՒԽ ՅՈԹԵՐՈՐԴ

ՔԱՂԱՔԸ ՀԵԼԼԵՆԻՍՏԱԿԱՆ ՊԵՏՈՒԹՅԱՆ ԿԱԶՄՈՒՄ

Աքեմենյան Պարսկաստանի գերիշխանության տակ գտնված համարյա ամբողջ տարածքը աննախընթաց արագությամբ նվաճելուց հետո, հունամակեդոնական գաղութարար նվաճողներին անհրաժեշտ էր հիմնավորապես հաստատվել ոչ հունական «բարբարոս» ցեղերով բնակեցված այդ երկրներում: Ալեքսանդր Մակեդոնացին ու նրա հետնորդները նվաճված երկրների քաղաքական ու տնտեսական յուրացման ճանապարհին ամենաարդյունավետ միջոցը համարեցին ինտենսիվ քաղաքաշինությունը: Եւ ահա, շատ արագ կերպով հին քաղաքների կողքին հայտնվում են նորերը, որոնք ոչ միայն թվով են գերակշռում, այլ հաճախ նույնիսկ տնտեսապես և քաղաքականապես հետին պլան են մղում Արևելքի հինավուրց քաղաքային կենտրոնները:

Անտիկ աշխարհում ամեն մի բնակավայր չէ, որ կարող էր քաղաք համարվել: Հույների պատկերացմամբ, որևէ բնակավայր քաղաք էր համարվում սոսկ այն դեպքում, եթե ունեւր քաղաքային ինքնավարության մի շարք օրգաններ, իր հատուկ օրենքները և ֆինանսները: Բացի այդ, քաղաքների մեծ մասի համար հատկանշական էին քաղաքային պարիսպները: Առանց դրան որևէ բնակավայր համարվում էր պարզապես գյուղ (հուն. κώμη):

Մեր կարծիքով, նույնպիսի պատկերացում է եղել նաև Հայաստանում: Մենք այդպիսի ենթադրության հիմքը ուզում ենք տեսնել Վաղարշապատի կառուցման մասին խորենացու հաղորդման մեջ, որի համաձայն, Վաղարշը «Պատեաց պարսպաւ և զհզոր աւանն Վարդգէսի, որ ի վերայ Քասաղ դետոյ...: Այժմ այս Վաղարշ պատեաց պարսպաւ և հզօր պատուարաւ, և անուանեաց Վաղարշապատ, որ նոր քաղաք»¹:

(1) Մովսես Խորենացի, Բ, կէ:

Վերոհիշյալ պայմանների ստեղծումով որևէ բնակավայր հեշտությամբ դառնում էր պոլիս, քաղաք: Դրանով էլ, մասամբ, բացատրվում է քաղաքների այն մեծ թիվը, որոնց հիմնադրումը վերագրվում է Ալեքսանդր Մակեդոնացուն և նրա հետնորդներին: Հունա-մակեդոնացիների Արևելքում նոր քաղաքներ հիմնելու գործը հեշտանում էր նաև նրանով, որ դեռևս հունա-մակեդոնական նվաճումներից առաջ էլ Արևելքին անծանոթ չէր պոլիսային կազմակերպության ձևը: Այստեղ արդեն վաղուց գոյություն ունեին քաղաքներ, որոնց սոցիալական կառուցվածքը մոտիկ էր պոլիսայինի: Դրանք տաճարային քաղաքներ էին, որոնցում քաղաքացիական կազմակերպությունը համընկնում էր տաճարայինի հետ, կազմելով տաճարա-քաղաքացիական համայնք²: Ուստի, այնքան էլ դժվար չէր լինի Ալեքսանդրին և նրա հաջորդներին, այդ քաղաքների մինչ այդ ունեցած առանձնաշնորհումներն ընդունելով, դրանք վերածել պոլիսի: Հունա-մակեդոնացիները չէին կարող չօգտագործել այս հնարավորությունը, քանի որ Մակեդոնացու առանց այն էլ ոչ մեծաթիվ գործը չէր բավականացնի թեկուզ մեկ մեծ քաղաք հիմնադրելուն և բնակեցնելուն, իսկ արշավանքների սկզբնական շրջանում Հունաստանից եկող վերաբնակիչները այնքան էլ մեծ թիվ չէին կազմում, որպեսզի հնարավորություն տային Ալեքսանդրին շատ քաղաքներ հիմնելու և բնակեցնելու: Ինչպես նշում է Մ.Մ. Դյակոնովը, «Ալեքսանդրի և նրա հաջորդների Ասիայում կիրառած ընդարձակ քաղաքաշինությունը չի կարող բացատրվել սոսկ հունական գաղութացմամբ: Այդ բոլոր քաղաքները բնակեցնելու չէր բավականացնի ամբողջ Հունաստանի բնակչությունը»³: Մյուս կողմից, քանի որ ինքը՝ Ալեքսանդրը, զբաղված էր հեռավոր տարածությունների վրա պատերազմական գործողություններով, բավականաչափ ժամանակ չէր ունենա նոր քաղաքների հիմնադրմամբ զբաղվելու: Այդ դեպքում, ինչպես բացատրել այն փաստը, որ Արևելքում առաջացան Ալեքսանդրի անունը կրող բազմաթիվ քաղաքներ: Բոլորից հավանականն այն է, որ Ալեքսանդրը տեղական բնակչության բարյացակամությունն ու հավատարմությունը ապահովելու համար, քաղաքական և ռազ-

(2) Г.Х. Саркисян, Самоуправляющийся город Селевкидской Вавилонии, ВДИ, 1952, № 1.

(3) М.М. Дьяконов, Очерк истории древнего Ирана, М., 1961, стр. 156.

մական նշանակութիւնն ներկայացնող խոշոր բնակավայրերին քաղաքի իրավունքներն էր շնորհում, մեծ մասամբ վերանվանելով դրանք իր իսկ անունով՝ Ալեքսանդրիայի:

Խոսելով ընդհանրապես հելլենիստական աշխարհի կյանքում այդ նոր քաղաքների ունեցած դերի մասին, հելլենիզմի խոշոր մասնագետ պրոֆ. Ա.Բ. Ռանովիչը գրում է. «Թափանցելով հելլենիստական աշխարհի ամենահեռավոր անկյունները, այդ քաղաքները քայքայում էին հասարակական կառուցվածքի հնամենի ձևերը, բերում էին ոչ միայն ուրիշ, ավելի բարձր մշակույթ, այլև տնտեսական տարբեր հարաբերութիւններ, ապրանքայնութիւնն սկսում է երևան գալ այնտեղ, ուր նախկինում անբաժան կերպով իշխում էր բնատնտեսութիւնը: Այնուամենայնիւ, արևելքի հելլենիստական պետութիւնների տարածքի վրա այդ քաղաքները ոչ մեծ օազիսներ էին, ընդարձակ մարզերն անհաղորդ էին մնում իրերի նոր դրութեանը»⁴:

Հելլենիստական միապետները, առանձնապես Սելևկյան թագավորները, օտար երկրներում իրենց իշխանութիւնը ամրապնդելու համար հենվում էին գլխավորապես հելլենիստական քաղաքների վրա: Ուստի շատ բնական է, որ այդ քաղաքները համարվում են արևելյան, ոչ հելլեն, ժողովուրդների վրա հունամակեդոնական տիրապետութեան կենտրոններ:

Քաղաքաշինութեան ասպարեզում համարյա բոլոր հելլենիստական միապետները հետևեցին իրենց մեծ նախորդի՝ Ալեքսանդր Մակեդոնացու օրինակին, որը իր տերութեան տարբեր մասերում հիմնել էր իր անունը կրող մի քանի տասնյակ քաղաքներ: Սակայն Մակեդոնացուն հետևելու տեսակետից առավելապես աչքի ընկան Սելևկյան թագավորները, որոնք ստեղծեցին հելլենիստական քաղաքների մի ամբողջ ցանց:

Մերձավոր Արևելքում առաջացած հունամակեդոնական քաղաքները, բնակավայրերը և ռազմական գաղութները, որոնց հիմնադրումը վերագրվում է Սելևկյան թագավորութեան հիմնադրին և նրա առաջին հաջորդներին, ձգվում էին Միջերկրական ծովի փոքրասիական ափերից մինչև Բակորիա⁵: Դրանք ցրված են եղել հյուսիսային Սիրիայում և Եփրատի միջին հո-

(4) А.Б. Ранович, Эллинизм и его историческая роль, М.-Л., 1950, стр. 27.

(5) M.I. Rostovtzeff, SEHW, էջ 477.

սանքի ուղղութիւնով, որտեղ Սելևկոս Ա-ը ստեղծել էր քաղաքների և այլ բնակավայրերի մի ամբողջ խումբ, տալով դրանց մակեդոնական հին տեղանուններ, ինչպես Եղեսոս, Բերրեյա, Պելլա, Պերինթոս, Խալկիս և այլն: Անտիոքոս Ա-ը Իրանական սարահարթի շուրջը ստեղծել էր քաղաքների կիսաբոլորակ մի ցանց: Անտիոքոս Բ-ը քաղաքաշինութեան ասպարեզում իր հիմնական ուշադրութիւնը կենտրոնացրեց Փոքր Ասիայի միջով անցնող առևտրական և քարավանային ճանապարհների, հատկապես մերձեփրատյան հանգույցի (Փոքր Ասիայից, Սիրիայից և Հյուսիսային Միջագետքից դեպի Պարսկաստան) ապահովման վրա, այդ ճանապարհի երկարութեամբ հունա-մակեդոնական նոր բնակավայրեր և գաղութներ հիմնելու միջոցով⁶:

Պիտի նշել, որ հելլենիստական ոչ բոլոր քաղաքներն ու բնակավայրերն էին նորակերտ: Այս կապակցութեամբ պրոֆ. Ա.Բ. Ռանովիչը իրավամբ նշում է, որ «հիմնադիր (κτίσταις) կարող էր համարվել նաև նա, ով սոսկ ընդարձակում կամ թեկուզ վերանվանում էր արդեն նախկինում գոյութիւն ունեցած քաղաքը»⁷: Հավանական է, որ հին քաղաքը «հիմնադիր» կողմից վերանվանվելով, նրանից ստանում էր նոր պոլիսային կառուցվածք, այլ խոսքով ասած, վերածվում էր ինքնավար քաղաքի:

Այս առիթով հարկ ենք համարում նշել, որ համանման երևույթ նկատելի է նաև հին Հայաստանում: Այսպես, Գառնիի հունարեն արձանագրութեան մեջ խոսվում է այն մասին, որ Մեծ Հայքի թագավոր Տրդատը թագուհու համար կառուցեց (ΑΙΚΤΙΣΕΝ – պետք է լինի՝ ΕΚΤΙΣΕΝ) անառիկ ամրոց⁸: Հնագիտական պեղումները⁹, ինչպես նաև Տակիրոսի հաղորդումները մ.թ. 40-50-ական թվականներին Գառնիի բերդապարիսպների տակ տեղի ունեցած պատմական իրադարձութիւնների մասին¹⁰,

(6) M. Gary, A History of the Greek World from 323 to 146 B.C., London, 1932, p. 258.

(7) А.Б. Ранович, նշվ. աշխ. էջ 98, ծանոթ. 1:

(8) Ս.Մ. Կրկյաշարյան, Եւս մի անգամ Գառնիի հունարեն արձանագրութեան մասին, էջ 235-236:

(9) Б.Н. Аракелян, Гарни I, Ереван, 1951.

(10) Taciti Annales, XII, 45, որտեղ նշված է, թե դեռևս 51 թ. Հայաստանում թագավորող Միհրդատ Իրերացին ամրացել էր Գառնի բերդում (in castellum Gorneas), որի վրայ հարձակվել էր նրա եղբորորդի Հուսդամիզը:

ցույց են տալիս, որ Տրդատ Արշակունին ոչ թե հիմնադրել կամ կառուցել է Գառնի ամրոցը, այլ, պարզապես, վերակառուցել է հինը: Այս վերջին հանգամանքը այնքան ակնհայտ իրողություն է, որ Հ.Հ. Մանանդյանը, անդրադառնալով Գառնիի հունարեն արձանագրությանը, նույնիսկ անիմաստ է համարում այնտեղ հստակ կարդացվող «կառուցեց» արտահայտությունը և առաջարկում է այն ուղղել՝ «վերստին կառուցեց»¹¹:

Քաղաքների հիմնադրումով և քաղաքային կյանքի զարգացման խրախուսումով դեռևս սկսվում էր միայն հելլենիստական միապետների գործունեությունը քաղաքաշինության բնագավառում: Թագավորների համար տակավին անհրաժեշտ էր այդ քաղաքները յուրացնել քաղաքականապես և տնտեսապես ու միավորել դրանք իրենց տերության կազմում: Սակայն թագավորներին այդպես էլ չհաջողվեց վերջնականապես հարթել հարաբերությունները քաղաքների հետ և վերջիններիս դնել լրիվ ստորադրյալ վիճակում: Խուլ հակամարտությունը թագավորական իշխանության և քաղաքային ստրկատիրական համայնքի միջև չէր դադարում, բայց քանի որ երկու կողմերը փոխադարձաբար կապված էին ընդհանուր շահերով, սպա բանը չէր հանգում պառակտման: Քաղաքը իրեն կցագրված հողային տարածության վարչա-քաղաքական ու տնտեսական կենտրոնն էր: Այդ շրջանի բնակչությունը քաղաքային դանձարանին մոծում էր ամենամյա կանոնավոր հողահարկ, որի առյուծի բաժինը, բնականաբար, մտնում էր թագավորական գանձարանը: Հետևաբար, հելլենիստական միապետությունների տարածքի վրա գտնվող քաղաքները պետք է որ երկակի դեր խաղային, այն է՝ պետության համար ապահովելին նյութական եկամուտ և կենսագործեին տվյալ տարածքի քաղաքական ու տնտեսական վերահսկողությունը: Քաղաքային համայնքի (տեղական իշխանություն) և թագավորի (կենտրոնական իշխանություն) սոցիալական ու տնտեսական շահերը համընկնում էին: Երկու կողմերն էլ ձգտում էին հնազանդ պահել անմիջական արտագրողների ճնշված զանգը-

(11) Հ.Հ. Մանանդյան, Գառնիի հունարեն արձանագրությունը և Գառնիի հեթանոսական տաճարի կառուցման ժամանակը, էջ 6: Հ.Հ. Մանանդյանը հետադադում ևս պաշտպանում էր նույն տեսակետը (Новые заметки о греческой надписи и языческом храме Гарни, Տեղ. ՀԳԱՀԳ, 1951, նո 4, էջ 13):

վածներին, ստրուկներին և կիսակախյալ, ոչ լիիրավ հողագործներին: Քաղաքային համայնքը, որպես ստրկատերերի դասակարգի շահագործող լայն կազմակերպություն, հանդիսանում էր ստրկատիրական պետություն սոցիալական կարեւորագույն հենարանը: Մյուս կողմից, քաղաքների համար միանգամայն ձեռնտու էր ընդգրկվելու միասնական խոշոր տերություն կազմում, որը կարող էր լավագույնս ապահովել ստրկատեր քաղաքացիների առևտրական և այլ շահերը¹²: Փոխադարձ շահերի այս համընկնումը հելլենիստական աշխարհում քաղաքների աճի ու քաղաքային կյանքի զարգացման ուղղությունը: Թագավորների ցուցաբերած հոգատարությունն պատճառներից մեկն էր:

Մինչ այդ պատմությունը դեռևս հայտնի չէին ուժեղ կենտրոնական իշխանություն ունեցող պետական այսպիսի խոշոր միավորումներ: Արևելքի հելլենիստական միապետները, որոնք կտրված գտնվեցին Հունաստանի մայր հողից, հույների համար օտար երկրում ստիպված էին հենց այդպիսի պետություն ստեղծել: Այս նպատակի կենսագործման համար նրանք կարիք ունեին հելլենական կայուն և ուժեղ հենարանի: Ահա թե ինչու նրանք լայն բաց արեցին իրենց տերություն դռները հունական բոլոր տարրերի առաջ, որոնք տարբեր պատճառներով լքում էին Հունաստանը և բնակություն հաստատում Մերձավոր և Միջին Արևելքի երկրներում: Այդ տարրերից առավել չափով աշխատում էին օգտվել Սելևկյանները, աննախընթաց աշխուժություն ծավալելով քաղաքաշինության ասպարեզում: «Սելևկյանների պետությունը, — գրում է Վ. Տաունը, — պետք է խարսխվել առավել կամ պակաս հելլենական բնույթ ունեցող քաղաքների և բնակավայրերի ընդարձակ ցանցի վրա: Հունական պոլիսը նրանց թվում էր միակ հնարավորությունը ասիական զանգվածների միջև կայուն պետություն ստեղծելու համար: Սելևկյանների հիմնած բնակավայրերից որո՞նք էին իրականում «պոլիսներ», միշտ չէ, որ հնարավոր է լինում վստահաբար հաստատել: Բայց, հավանական է, որ բնակավայրերի մակեդոնական կամ դինաստիական անունները ցույց են տալիս դրանց հունական պոլիսային կազմակերպությունը և իրավունքները: Հնարավոր է, որ Ալեքսանդրի հիմնած քաղաքները նույնպես դառնում

(12) М.М. Дьяконов, Очерк истории древнего Ирана, М., 1961, էջ 170-172:

էին լիիրավ պոլիսներ...: Երբ տեղական քաղաքն ստանում էր դինաստիական անվանում, դա նշանակում էր, որ այն նորից էր «հիմնված» իբրև լիովին հունական պոլիս, մի հանգամանք, որը իր հետ բերում էր հական փոփոխություններ»¹³:

Առաջին Սելևկյանների ինտենսիվ քաղաքաշինությունը մեկն էր այն միջոցառումներից, որոնք կոչված էին հեշտացնելու իրենց լայնատարած և բազմաբղետ տերության միասնականացման ընդհանուր պրոցեսը: Քաղաքաշինությունը և արևելյան քաղաքներին պոլիսային ստատուտ շնորհելը, մյուս կողմից, նպատակ ուներ դեպի Արևելք հրապուրել նորանոր հունա-մակեդոնական գաղութարարների: Արևելյան քաղաքներին պոլիսային ստատուտ շնորհելով, Սելևկյան առաջին թագավորները ձգտում էին, և այդ նրանց հաջողվում էր, ապահովել այդ քաղաքների չեզոքությունը և, հետագայում, հնազանդությունը: Դրան զուգընթաց «Արևելքի առևտրական քաղաքները և, առաջին հերթին, բնակչության հարուստ խավերը արագորեն հելլենականանում էին, դառնալով հենարան նվաճողների համար»¹⁴:

Ալեքսանդր Մակեդոնացու և նրա հաջորդների, հատկապես Սելևկյանների, քաղաքաշինության ասպարեզում ծափալած գործունեությամբ նշագծվում է նոր երևույթ քաղաքների առաջացման պատմության մեջ: Եթե մինչ այդ քաղաքները, ինչպես բուն Հունաստանում, այնպես էլ Արևելքում, առաջանում էին տարբրայնորեն, ապա Ալեքսանդր Մակեդոնացու նվաճումներով և նրա հաջորդների տիրապետությամբ սկսվում է թագավորների անմիջական միջամտությունը, որոնք այս ու այնտեղ հիմնում էին նոր քաղաքներ և բնակավայրեր:

Ինչո՞ւ Ալեքսանդրը և նրա հաջորդները այդպիսի ջանասիրությամբ քաղաքներ էին հիմնում: Քաղաքները նրանց հարկավոր էին ոչ միայն որպես քաղաքական և ռազմական, այլև տնտեսական, սոցիալական և մշակութային հենարաններ: Արևելքի հունական քաղաքների օժանդակությունն ապահովելու ճանապարհին Ալեքսանդրի և նրա հաջորդների կատարած առաջին քայլը այդ քաղաքների «ազատության» (ἐλευθερία) ճանաչումն էր: Ընդհանրապես քաղաքներին արտոնություններ շնորհելու միջոցով դրանցում հենարան ապահովելու ձգտումը,

(13) В. Тарн, Эллинистическая цивилизация, М., 1949, էջ 143:

(14) А.Б. Ранович, Նշվ. աշխ., էջ 24:

սակայն, օբյեկտիվորեն բախվում էր այն փաստի հետ, որ քաղաքների ինքնավարութունը (αὐτονομία) և պոլիսային կազմակերպութունը խախտում էին այս կամ այն հելլենիստական պետութան վարչական միասնութունը: «Ազատութուն» հասկացութունը, որպես հունական պոլիսների քաղաքական ազատութուն, արդեն անհամատեղելի էր հելլենիստական միապետի բացարձակ իշխանութան հետ: Հունական քաղաքի նմանօրինակ ազատութան ճանաչումը, վերջին հաշվով, կնշանակեր իշխանութան թուլութուն այն թագավորի, որի տիրութան սահմաններում գտնվում էր սովյալ քաղաքը, ուստի և պոլիսի նույնիսկ սահմանափակ ազատութան ճանաչումը թագավորը դիտում էր որպես մեծ զիջում, որպես կորուստ¹⁵: Քաղաքների ազատութունը հելլենիզմի շրջանում այլևս նման չէր նախկինում սուվերեն քաղաքի ազատութանը: Այժմ ազատութունը սահմանափակվում էր, լավագույն դեպքում, քաղաքի ներքին ինքնավարությամբ: Քաղաքների այդպիսի «ազատութունը» ամեն անգամ հռչակվում էր միապետի հատուկ հրովարտակով, ուղղված քաղաքին¹⁶:

Սելևկյանների տիրապետութան վերջին շրջանում, երբ կենտրոնական իշխանութունը ժամանակի ընթացքում հետզհետե թուլանում էր, թագավորն ստիպված էր լայնորեն ճանաչել քաղաքների ազատութունը, ոչ միայն վերադարձնելով նրանց նախկին արտոնութունները, այլև նորերը շնորհելով:

H- Seyrig-ը ուսումնասիրելով Սելևկյան թագավորութան մեջ հատված դրամները, պարզել է, որ Սելևկյանների տիրապետութան տակ եղած մի շարք քաղաքներ զրկված են եղել ἔλευθέρῳ «ազատութուն» կոչված արտոնութունից: Այդ քաղաքները ἔλευθέρῳ ստացել են միայն Տիգրան Բ-ի կողմից մ.թ.ա. 81 թ., այն բանից հետո, երբ հայոց թագավորը նվաճել է Սելևկյանների երկիրը և գահակալել է Անտիոքում: Այդ արտոնութան հետ պայմանավորված էր այն հանգամանքը, որ հիշյալ

(15) Ս.Մ. Կրկյաշարյան, Հին Հայաստանի և Փոքր Ասիայի քաղաքների պատմութան դրվագներ, էջ 48-55:

(16) Նույն տեղում, էջ 53 և հաջ.:

քաղաքները իրավունք են ստանում հատելու սեփական դրամ¹⁷:

Այդ քաղաքներն արդեն ընդգրկված լինելով այս կամ այն հելլենիստական պետության կազմում, հասկանալի է, որ չէին կարող ինքնուրույն, սուվերեն պետական միավորումներ լինել և, հետևաբար, վարել ինքնուրույն արտաքին քաղաքականություն: Անդրադառնալով Սելևկյան պետության քաղաքների ինքնավարության հարցին, Ն.Վ. Պրոուլեակյան նշում է. «Պոլիսները, քաղաքներն իրենց ինքնավարությամբ, թույլ արձագանգն էին քաղաք-պետությունների¹⁸: Հելլենիստական թագավորների հետ քաղաքների ունեցած հարաբերությունների հարցին նվիրված մեր ուսումնասիրության մեջ մենք ցույց ենք տվել, որ այդպիսին էր դրությունը նաև հելլենիստական մյուս միապետություններում¹⁹:

Հելլենիստական տերությունների կազմում ընդգրկված ինքնավար քաղաքներն, անկասկած, ունեին ինքնավարության իրենց սարքեր օրգանները: Այդ օրգաններից մեկի կամ մյուսի առկայությունը կամ բացակայությունը ցուցանիչ էր տվյալ քաղաքի վայելած այս կամ այն չափի ինքնավարության: Ք.Բ. Ուելլսի կողմից հրատարակված միապետների՝ քաղաքներին ուղղված նամակներում իրենց արտահայտությունն են գտել թե՛ այդ քաղաքների ինքնավարությունը կենսագործող օրգանները և թե՛ այդ ինքնավարության աստիճանը: Այդ նամակների առաջին տողերում միապետի՝ քաղաքին դիմելու եղանակն էլ բացայայտում է տվյալ քաղաքի ինքնավարության բնույթը և միապետից ունեցած նրա քաղաքական ու տնտեսական կախվածություն աստիճանը: Թագավորի՝ քաղաքներին ուղղած 46 նամակների մեջ բոլորից հաճախ հանդիպող «քաղաքային խորհրդին և համայնքին» դիմելու եղանակի կողքին երկու անգամ հանդիպում է ուղերձ «իշխանավորներին և խորհրդին և համայնքին» (τῆ βουλή καὶ τῷ δήμῳ), երկու անգամ՝ «իշխանավորներին և քաղաքին» (τοῖς ἄρχουσι καὶ τῆ πόλει) և մեկական անգամ դիմում՝ «համայն-

(17) H. Seyrig, Antiquités syriennes, 42. Sur les éres de quelques villes de Syrie, "Syria", 1940, էջ 26 և հաջ.: Տես նաև Գ.Խ. Սարգսյան, Հելլենիստական դարաշրջանի Հայաստանը և Մոփսես Խորենացին, Երևան, 1966, էջ 50:

(18) Н.В. Пигулевская, Города Ирана в раннем средневековье, М.-Л., 1956, стр. 106.

(19) Դ.Մ. Կրկյաշարյան, Հին Հայաստանի և Փոքր Ասիայի քաղաքների պատմության դրվագներ, Երևան, 1970, էջ 49 և հաջ.:

քին» (τῶ δῆμῳ), «Հոնիական լիգային» (Ἰώνων τῶ κοινῶ) և, «քաղաքին ու ծերերի խորհրդին» (τῆ πόλει καὶ τοῖς γεροαἰσί):

Հելլենիստական այս կամ այն միապետության կազմում ներգրավված հելլենիստական տիպի քաղաքների ինքնավարության վերուհիշյալ օրգանները – համայնք, քաղաքային խորհուրդ, իշխանավորներ, ծերերի խորհուրդ – անցյալի սուվերեն քաղաքապետության, պոլիսի, նույնանուն օրգանների արձագանգներն էին լուի: Շատ քաղաքներում, ինքնավարության նշված օրգանների կողքին, կային նաև հպիստատեսներ, վերակացուներ (ἐπιστάτης)²⁰, որոնք թագավորական իշխանության ներկայացուցիչներն էին տեղերում և առաքելություն ունեին հետևելու թագավորական շահերի պաշտպանությանը տվյալ քաղաքում: Հելլենիստական քաղաքներում հպիստատեսի հայտնվելը, արդեն, նոր երևույթ էր քաղաքային կյանքում, պայմանավորված կենտրոնական իշխանության ուժեղացման հետ:

Խոսելով հելլենիստական թագավորների կողմից քաղաքներում նշանակված վերակացուների մասին, Գ.Խ. Սարգսյանը նշում է, որ նրանց «Ֆունկցիաները մեզ ոչ լրիվ են հայտնի և, հավանաբար, տարբեր ժամանակներում և տարբեր երկրներում միանման չեն եղել: Բայց, ըստ երևույթին, հարկ եղած պահին վերակացուն կարող էր քաղաքային խորհրդին ու ժողովրդական ժողովին թելադրել թագավորի կամքը»²¹: Ի դեպ նշենք, որ հին Հայաստանի քաղաքներում ևս եղել են հայոց թագավորի կողմից նշանակված վերակացուներ, որոնք, ինչպես նկատում է Գ.Խ. Սարգսյանը, բացի քաղաքականից, ունեին նաև զինվորական իշխանություն²²: Այդ երևույթը վկայող առնվազն երկու փաստ կա սկզբնաղբյուրներում. առաջինը՝ Պլուտարքոսի հաղորդումն է այն մասին, որ Մծբին քաղաքի վրա նշանակված էր Տիգրանի եղբայր Գուրասը²³: Երկրորդ փաստը հանդիպում է Խորենացու մատյանի այն հատվածում, որտեղ նկարագրվում է Տիգրանալիերտի բնակիչների դիմադրությունը պարսից Շապուհ արքային: Պատմահայրը գրում է. «Կան ընդդէմ նորա արք քաղաքին հանդերձ գումարտակ գնդաւ. քանզի Անտիոք նահապետ Սիւնեաց,

(20) Polyb., V, 48, 12 և V, 60, 1:

(21) Г.Х. Саркисян, Тигранакерт, էջ 11:

(22) Նույն տեղում, էջ 98-100:

(23) Plutarchi Lucullus, XXXXII.

որ էր աներ Արշակայ և վերակացու քաղաքին, հրամայեաց ար-
խել ընդդէմ Շապհոյ»²⁴: Այս հատվածի «վերակացու» բառը լի-
ովին համապատասխանում է հունարեն ΕΠΙΣΤΑΤΗΣ բառին և վեր-
ջինիս ճշգրիտ պատճենավորումն է հայերեն թարգմանությամբ
(ἐπι = վերա, իսկ στάτης-ի արմատը ἵσταται = «կանգնել» բայն
է):

Այս հարցին անդրադարձել է նաև Ս.Տ. Երեմյանը, որի
կարծիքով, Հայաստանի քաղաքներում թագավորի նշանակած
աստիճանավորը կոչվել է «շահապ» և որը պարտավոր էր հարկեր
հավաքել քաղաքի առևտրից և արհեստներից²⁵: Գ. Սարգսյանը
հավանական է համարում, որ քաղաքի կառավարչին տրված
«շահապ» տիտղոսը միաժամանակ գոյություն է ունեցել «վերա-
կացու» տիտղոսի կողքին²⁶:

Հելլենիստական քաղաքի ինքնավարությունը սահմանա-
փակվում էր ոչ միայն հպիստատեսի ներկայությամբ, այլև նրա-
նով, որ քաղաքում հաճախ կանգնում էին թագավորական կա-
յազորներ: Մյուս կողմից, քաղաքների իրավունք էր վերապահ-
ված անմիջական շիման մեջ մտնել թագավորի հետ, հարկ եղած
դեպքում նրա մոտ ուղարկելով իրենց դեսպաններին²⁷: Նրանց
խնդրանքին տրված թագավորի պատասխանը սովորաբար շա-
րադրվում էր քաղաքային ինքնավարության մարմիններին
ուղղված նամակի ձևով, որն ունենում էր կարգադրության,
հրամանի ուժ: Հելլենիստական քաղաքների իրավազրկությունը
հատկապես զգալի էր արտաքին հարաբերությունների սապարե-
զում: Չունենալով արդեն իրենց ինքնուրույն բանակը, այս հար-
ցում նրանք ստիպված էին լիովին ենթարկվել միապետի կամ-
քին: Իրենց ներքին ինքնավարության վերաբերյալ հարցերը ևս
լուծելիս, քաղաքային համայնքն ու խորհուրդը, ինչպես նաև
մյուս մարմինները, առաջին հերթին պարտավոր էին հաշվի
նստել միապետի կամքի, նրա «խորհրդի» հետ:

Արևելքի հելլենիստական քաղաքներն իրենց իրավական
դրությամբ, արդեն խստորեն տարբերվում էին հին հունական
սուվերեն սրլիսներին, քաղաք-պետություններից: Փոխհարաբե-

(24) Մովսես Խորենացի, Գ, 14:

(25) С.Т. Еремян, Развитие городов и городской жизни ..., էջ 25.

(26) Г.Х. Саркисян, Նշվ. աշխ., էջ 98, ծան. 45:

(27) С.В. Welles, RC, 2, տողեր 6-9, 15, 22, 26, 31-35 և հաջ.:

րությունները այդ քաղաքների և հելլենիստական թագավորների միջև իրենց արտահայտությունն են գտել ինչպես զրավոր աղբյուրներում, այնպես էլ արձանագրություններում հանդիպող – էլեսուθεοία (ազատություն), αὐτονομία (ինքնավարություն), ἀτέλεια (ապահարկ դրություն), ἀφορολόγητος (հարկերից ազատ), ἄσυλτα ապաստանի իրավունք), ἀφοροῦρητος (կայացորից ազատ), ἀνεπιστᾶσθμευτος (օթեան տրամադրելու պարտավորություններից ազատ) տերմիններում, որոնց ուսուլ բովանդակությունը փոխվում էր թագավորական իշխանության ուժեղացումով կամ թուլացումով: Կենտրոնական իշխանության ուժեղացումով քաղաքների արտոնությունները սահմանափակվում էին: Մյուս կողմից, քաղաքներն ամեն կերպ ձգտում էին օգտվել թագավորական իշխանության ամեն մի թուլացումից, հնարավորին չափ ավելի ազատություն և ինքնուրույնություն ձեռք բերելու համար: Այդ էլ հանդիսանում էր թագավորների և քաղաքների միջև գոյություն ունեցող խուլ պայքարի բովանդակությունը հելլենիստական աշխարհում: Սակայն բանը չէր հանգում բացահայտ խզման: Նրանց միջև պառակտումը կանխվում էր նրանց դասակարգային, քաղաքական, հաճախ և տնտեսական շահերի ընդհանրության պատճառով:

Ալեքսանդր Սակեդոնացու նվաճումներից հետո Առաջավոր Արևելքի երկրներում քաղաքաշինության ստացած աննախընթաց թափն ընդգրկեց նաև Հայկական լեռնաշխարհը:

Հայկական լեռնաշխարհում առաջին քաղաքներն առաջացել էին դեռևս նախահայկական, ուրարտական ժամանակաշրջանում: Այդ շրջանից հայտնի են ուրարտական պետության մայրաքաղաք Տուշարան (այժմ Վան), Վանա լճի արևելյան ափին, Արգիշտիխինիլին՝ ուրարտացիների վարչա-նազմական կենտրոնը հյուսիս-արևելքում, Այրարատյան դաշտում, և բազմաթիվ այլ քաղաքներ:

Ուրարտական քաղաքները ուղղամ-վարչական և պաշտամունքային կենտրոններ լինելով հանդերձ, ունեցել են նաև խոշոր տնտեսական նշանակություն: Այդ մասին են վկայում կարմիր բլուրի (Թեյշեբախինի) և Արին-բերդի (Երեբունի) պեղումները²⁸: Ուրարտական պետության վերջնական անկումից հետո

(28) Б.Б. Пиотровский, История и культура Урарту, Ереван, 1944; Եռչյնի, Ванское царство, М., 1959; А.А. Мартиросян, Город Тейшебаани, Ереван, 1961.

(մ.թ.ա. VI դարի սկիզբ) աստիճանաբար իրենց նշանակութունը կորցնում են նաև այդ քաղաքները:

Հայկական բարձրավանդակում մի շարք նոր քաղաքների (Արմավիր, Արշամաշատ, Երվանդաշատ, Արոտաշատ, Կարկաթիակերտ, Տիգրանակերտ և այլն) առաջացումը և զարգացումը մ.թ.ա. III-I դարերում, կապված էր մի կողմից անկախութուն և ազատութուն ձեռք բերելուց հետո երկրի ներսում արտադրողական ուժերի աճման և, մյուս կողմից Ալեքսանդր Մակեդոնացու նվաճումներից հետո Արևելքում նկատված քաղաքային կյանքի աշխուժացման հետ: «Հայաստանի համար, — գրում է Ս.Տ. Երեմյանը, դա ստրկատիրական մասնավոր սեփականութւյան և ապրանքա-դրամային շրջանառութւյան զարգացման ժամանակաշրջան էր, գյուղատնտեսութւյունից արհեստների անջատման և միջազգային ապրանքափոխանակութւյան, միջազգային քարավանային առևտրի մեջ Հայաստանի ներգրավման ժամանակաշրջան, որն իր հերթին խթանում էր ապրանքային արտադրութւյան զարգացումը»²⁹:

Աքեմենյան տիրապետութւյան անկումից հետո, Հայաստանում ստեղծվեցին նպաստավոր պայմաններ արտադրողական ուժերի հետագա զարգացման համար: Հատկապես դրա մեջ է Ալեքսանդր Մակեդոնացու արշավանքների առաջադիմական նշանակութւյունը Հայաստանի համար: Աքեմենյանների վերջնական տապալումից հետո, Հայկական ցեղերով բնակեցված երկրները քաղաքական անկախութւյուն ձեռք բերեցին: Մյուս կողմից, Մակեդոնացու ստեղծած միապետութւյունը, Արևմուտքն ու Արևելքը միավորելով մեկ իշխանութւյան տակ, լայն հնարավորութւյուն ստեղծեց միջազգային առևտրի հետագա զարգացման համար, որի հիմնական մայրուղիները Արևելքում անցնում էին Հայաստանի միջով: Բնական է, որ քարավանային այդ առևտրի հանգուցային կենտրոնը դառնալու էր երկրի վարչաքաղաքական կենտրոնը, որպիսին էր Արմավիրը, Հայկական լեռնաշխարհի հյուսիս-արևելյան մասում, Արարատյան դաշտում, որը դարձել էր Երվանդունիների նորաստեղծ պետութւյան քաղաքական ու պաշտամունքային կենտրոնը:

Արմավիրի, ինչպես նաև մի շարք ուրիշ քաղաքների առաջացումը Հայաստանում պատահական երևույթ չէր: Վաղ

(29) С.Т. Еремян, Развитие городов и городской жизни ..., էջ 11:

հելլենիստական շրջանում, ինչպես տեսանք, սկսվել էր հայկական էթնիկական տարրերի համախմբման պատմական պրոցեսը, որը բացել էր ընդհանրապես Հայաստանի համար տնտեսական, քաղաքական և մշակութային զարգացման ժամանակաշրջան: Միջազգային առևտուրը և տիրող դասակարգի աճող պահանջները խթանում էին արտադրողական ուժերի զարգացումը, աշխատանքի հասարակական բաժանումը և ապրանքային արտադրութայան զարգացումը: Դրա պերճախոս վկայութիւնը պիտի համարել հելլենիստական աշխարհն ընդգրկած ինտենսիվ քաղաքաշինութիւնը: Ահա թե ինչպես է բնութագրում Կ. Մաքսը առևտրի՝ քաղաքային կյանքի զարգացման հետ ունեցած փոխադարձ կապը. «... Երբ քաղաքային արդյունաբերութիւնն իբրև այդպիսին անջատվում է հողագործականից, նրա արդյունքները հենց այն գլխից երևան են գալիս իբրև ապրանքներ, և ուրեմն նրանց վաճառքի համար առևտրի միջնորդութայան պահանջ է գգացվում: Ըստ այնմ, առևտրի հենվելը քաղաքի զարգացման վրա և մյուս կողմից վերջինիս պայմանավորվածութիւնը առևտրով այստեղ հասկանալի են ինքնըստինքյան»³⁰:

Մովսես Խորենացու մի շարք վկայութիւնների հիման վրա կարելի է ենթադրել, որ հնագույն ժամանակներում, դեռևս Արտաշեսյան թագավորութայան հաստատումից առաջ, Արմավիրից բացի, Հայաստանում գոյութիւն ունեին ուրիշ խոշոր բնակավայրեր ևս, ինչպես Աշտիշատը, Անի-Կամախը, Երիզան, Բագահառիճը, Թիլը, որոնք, Արմավիրի նման, միաժամանակ եղել են պաշտամունքային կենտրոններ³¹: Նրանցից և ոչ մեկը Խորենացու մոտ չի անվանվում քաղաք, այլ սոսկ գյուղ կամ ամրոց: Շատ հավանական է, սակայն, որ այդ կենտրոններից գոնե մեկը՝ Աշտիշատը մի ժամանակ եղել է քաղաք, քանի որ ինքը՝ Աշտիշատ անունը նշանակում է «գոհերի քաղաք»:

Երվանդունի թագավորների ժամանակ Մեծ Հայքում առաջանում են Արմավիր ու Երվանդաշատ մայրաքաղաքները: Ծովքում՝ Զարեհյանների թագավորութիւնում հայտնի են դառնում Արշամաշատ և Արկաթիակերտ (կամ Կարկաթիակերտ) քաղաքները: Հայաստանում քաղաքաշինութայան ամենափայլուն շրջանը պիտի համարել Արտաշեսյանների թագավորութայան տա-

(30) Կ. Մաքս, Կապիտալ, 4. 3, մաս 1, Երևան, 1947, էջ 319:

(31) Մովսես Խորենացի, Բ, Ժբ-Ժգ:

րինները: Հայկական հողերի միավորումը մեկ տիրակալի իշխանության տակ այդ ժամանակաշրջանում նպաստում էր տնտեսական և մշակութային կապերի ամրապնդմանը երկրի ներսում և առևտրական հարաբերությունների հետագա զարգացմանը հարևան երկրների հետ: Այս էլ, իր հերթին, խթանում էր Հայկական լեռնաշխարհում մի շարք նոր քաղաքների առաջանալուն: Այդ քաղաքներից ամենակարևորներն էին քաղաքամայր Արտաշատն ու Տիգրանակերտը, հետագայում նաև Վաղարշապատը³²:

Անտիկ հեղինակների տվյալները հնարավորություն են տալիս պարզորոշ կերպով հետևելու քաղաքաշինության պրոցեսին հելլենիստական աշխարհում և առանձնացնելու այդ պրոցեսի երկու տարբեր փուլեր: 1) Քաղաքների տարերային առաջացման փուլ: 2) Թագավորի կողմից կիրառվող քաղաքաշինության փուլ: Հին Հայաստանում քաղաքաշինության գործը հիմնականում գտնվում էր թագավորի ձեռքին: Քաղաքի շինարարության գործում Հայաստանի ազատ բնակչության մասնակցության մասին միակ ակնարկը Պլուտարքոսի այն խոսքերն են, թե «ամեն մի հասարակ մարդ և իշխանավոր, թագավորին հաճոյանալու նպատակով, իրար հետ մրցում էին քաղաքի կառուցման և ընդարձակման համար»³³:

Հայաստանում նոր քաղաքներ կառուցելիս Արտաշեսյանները (հատկապես Արտաշեսն ու Տիգրան Բ-ը) կիրառել են հելլենիստական աշխարհում լայնորեն տարածված քաղաքների բնակեցման հատուկ եղանակ, որը հայտնի է որպես սինոլիխամոս (ΣΥΝΟΙΚΙΣΜΟΣ = համատեղ բնակեցում): Այս հարցին մենք նվիրել ենք առանձին ուսումնասիրություն³⁴:

Ի՞նչ նպատակներ էին հետապնդում Հայաստանի թագավորները նոր քաղաքներ կառուցելով: 1) Համախմբել տիրող դասակարգը, որը հանդիսանում էր թագավորական իշխանության հիմնական հենարանը: 2) Չարկ տալ Հայաստանում առևտրի ու արհեստների զարգացմանը այն պատճառով, որ առևտուրը հսկայական եկամուտ էր բերում արքունի դանձարանին, իսկ

(32) Ս.Մ. Կրկյաշարյան, Հին Հայաստանի և Փոքր Ասիայի քաղաքների պատմության դրվագներ, էջ 79-127:

(33) Plutarchi Lucullus, XXVI.

(34) Ս.Մ. Կրկյաշարյան, Սինոլիխամոսը հելլենիստական Փոքր Ասիայում և Հայաստանում, ՊԲՀ, 1984, Նո 1, էջ 107-118:

արհեստների զարգացումը քաղաքներում խթանում էր առևտրի հետագա զարգացմանը: Յ) Քաղաքներ կառուցելով, Հայաստանի թագավորները ձգտում էին արմատավորել հելլենիստական առավել առաջավոր մշակույթը, որն իր հերթին պետք է որ ծառայեր ամբողջ հայկական հասարակույթյան մշակութային առաջընթացին, դրանով իսկ հանդիսանար գաղափարական զենք Հռոմի էքսպանսիայի դեմ պայքարելիս:

ԳԼՈՒԽ ՈՒԹԵՐՈՐԳ

ԹԱԳԱՎՈՐԱԿԱՆ ԻՇԽԱՆՈՒԹՅՈՒՆԸ ԱՐՇԱԿՈՒՆՅԱՅ ՀԱՅԱՍՏԱՆՈՒՄ

Մենք արդեն հանգամանորեն խոսել ենք Հայաստանում երվանդունի (մ.թ.ա. IV-III դդ. վերջ), ինչպես նաև Արտաշեսյան (մ.թ.ա. II դ. սկիզբ - մ.թ.ա. I դ. վերջ) գահակալների թագավորական իշխանության առաջացման, այդ թագավորների դերի և ստորադրյալների հետ նրանց ունեցած փոխհարաբերությունների մասին: Խոսել ենք այն աստիճանական զարգացման մասին, որ անցել է երկրում գերագույն իշխանության կրողի իրավասությունը, սկսած հայկական անդրանիկ «թագավորության» առաջացման ժամանակներից (մ.թ.ա. VI դար) մինչև Արտաշեսյանների բուռն վերելքի շրջանը, մինչև Տիգրան Բ-ը:

Հին Հայաստանի պետական ապարատի ուրվագծումը, ինչ խոսք, կարևոր շատ կետերում թերի կմնար, եթե չանդրադառնայինք Արշակունյաց ժամանակաշրջանի Հայաստանին, գոնե այդ թագավորության առաջին շրջանին վերաբերող մի շարք էական հարցերին:

Անժխտելի է, որ Արշակունի թագավորների դերն ու ֆունկցիաները Հայաստանում որոշակիորեն տարբերվել են նրանց նախորդած հարստության գահակալների ունեցած իրավասություններից: Այդ փոփոխությունները, մեր կարծիքով, հիմնականում պայմանավորված են եղել մի կողմից երկրի արտադրողական ուժերի ընդհանուր զարգացման հիման վրա սոցիալ-տնտեսական նոր, առավել բարձր հասարակական հարաբերությունների առաջացումով, մյուս կողմից՝ դաժան փորձություններից հետո Հայաստանում Արշակունիների թագավորության հաստատման ռազմա-քաղաքական հանգամանքներով, որոնք մանրամասն չարադրված ու մեկնաբանված են հայագետների ընդ-

հանրացնող բնույթի աշխատություններում¹. ուստի և մենք ավելորդ ենք համարում անդրադառնալ այդ հարցերին:

Տիգրան Մեծից, հատկապես նրա որդի և հաջորդ Արտավազդ Բ-ից հետո մինչև Հայաստանում Արշակունիների թագավորության հաստատումը ընկած մոտ հարյուրամյա ժամանակահատվածը, Արտաշեսյան արքայատոհմի վերջին ներկայացուցիչներն, ընդհանրապես, իբրև ժամանակի այս կամ այն առավել հզոր երկրի կողմից դրածո գահակալներ, ոչ կարողացել են ինքնուրույն ներքին և արտաքին քաղաքականություն վարել, ոչ իսկ երկրի ներսում որևէ հեղինակություն ու հենարան ունեցել²: Ասենք, նրանք այդ ուղղությամբ մտածելու և որևէ բան ձեռնարկելու ժամանակ անգամ չեն ունեցել, քանի որ գահի վրա հաջորդել են իրար գեղադիտակի արագությամբ: Բավական է նշել, որ այդ կարճ ժամանակահատվածում Հայաստանի գահն իր տիրոջ փոխել է շուրջ երկու տասնյակ անգամ:

Սակայն իրավիճակը, կարելի է սսել, արմատապես փոխվեց Տրդատ Արշակունու ժամանակ: Վայելելով իր եղբոր Պարսկաստանի եռանդուն արքա Վաղարշ Ա-ի (51-75 թթ.) բազմակողմանի աջակցությունը և հենվելով հայ-պարթևական միացյալ ռազմական ուժերի վրա, նա, տասնամյա համառ մարտերից հետո, կարողացավ քայլ առ քայլ դուրս մղել Հայաստանից հռոմեական լեգեոներներին և վերականգնել թագավորական իշխանության ամբողջ հեղինակությունն իր իսկ զէնքով վերանվաճված երկրում:

Տրդատը ոչ միայն հնարամտորեն օգտագործեց հայ-պարթևական ռազմա-քաղաքական հնարավորությունները հայկական գահին տիրանալու համար, այլև կարողացավ զենքի միջոցով պարտադրել աշխարհատեր Հռոմի գոռոզ կայսրին՝ Ներոնին, ճանաչել իրեն Հայաստանի թագավոր: Դեռ ավելին. Տրդատի ռազմական հաջողությունների հետևանքը եղավ այն, որ Հայաստանի (ինչո՞ւ միայն Հայաստանի) թագավորներից և ոչ մեկը այնքան չուժքով ու հանդիսավորությամբ չընդունվեց «հավերժական քաղաքում» և այնտեղից այնքան պատիվներով ու պար-

(1) Հ. Հ. Մանանդյան, Քննական տեսություն ..., հ. Ա, էջ 284-355: Հայ ժողովրդի պատմություն, հ. 1, Երևան, 1971, էջ 703-764:

(2) Այս դեպքում գուցե հնարավոր է բացառել Արտավազդ Բ-ի որդի և հաջորդ Արտաշես Բ-ին (մ.թ.ա. 30-20 թթ.):

գւեներով ծանրաբեռ չվերադարձաւ, ինչքան Տրդատ Արշակունին: Մեր այս ասածի պերճախոս վկաներն են իրենք իսկ դեպքերին ժամանակակից հռոմայեցի մատենագիրները, որոնք մանրամասնորեն և վառ գույներով նկարագրել են Տրդատի և նրա շքախմբի ուղեվորությունը Հռոմ, այնտեղ նրան ցուց տրված ընդունելությունը, նրա թագադրումը Ներոնի ձեռքով և վերադարձը³: Այդպիսով, ՅԵ թվականին Հայաստանում վերջնականապես հաստատվում է Արշակունիների հայկական ճյուղի իշխանությունը և Հայաստանն այնուհետև դառնում է պարթև Արշակունիների երկրորդ թագավորությունը (secundogenitur):

Տրդատ Ա-ից բացի մեզ հայտնի չէ և ոչ մեկ ուրիշ թագավոր Հայաստանում, որի գահը հենված լիներ այնպիսի հաստատուն եռոտանու, ինչպիսին էր հայ ժողովրդի աջակցությունը, պարսկական արքունիքի հովանավորությունը և Հռոմի կայսեր հավանությունը: Այս հանգամանքներում գահի վրա իրեն ամուր զգացող Տրդատը եռանդուն ինքնալստահությամբ ձեռնամուխ եղաւ երկարամյա պատերազմների հետևանքով երկրի քայքայված տնտեսությունն ու պետականությունը վերականգնելու, ավերված քաղաքները վերաշինելու գործին: Որպես փաստ հիշենք թեկուզ տասնամյա պատերազմի ընթացքում հիմնահատակ ավերված Արտաշատ մայրաքաղաքի և Գառնիի ամրոցի վերաշինությունն ու Գառնիի հեթանոսական տաճարի կառուցումը Տրդատի թագավորության 11-րդ տարում:

Ջարմանալի է, որ հայ մատենագրության մեջ մենք չենք հանդիպում այս Տրդատի հիշատակությանը: Նույնիսկ Մովսես Խորենացին, որը փորձել է տալ հայոց ամբողջական պատմությունը հնագույն ժամանակներից սկսած մինչև իր ապրած ժամանակաշրջանը, ոչ մեկ ուղղակի հիշատակություն չի թողել Տրդատ Ա-ի մասին: Ուսումնասիրողները, սակայն, իրավացի կերպով ենթադրում են, որ մեր պատմիչների մոտ հիշատակված Վաղարշակ Արշակունու կերպարի մեջ միաձուլված են պատմական երկու անձնավորություն՝ Արտաշեսյան հարստության և Արշակունյաց հարստության հիմնադիրներ Արտաշեսն ու Տրդատը, ուստի և վերջիններիս գործունեության հիմնական

(3) Taciti Annales, XVI, 23; C. Plin., Nat. Hist. XXX, 16; XXXIII, 54; Suetonii Nero, XIII.

գծերը վերագրված են վաղարշակին⁴:

Ի հակադրություն հայկական աղբյուրների, հունահռոմեական մատենագիրների երկերում սակավ չեն Տրդատ Ա-ին վերաբեող վկայութունները⁵: Օտար աղբյուրներում նրա մասին եղած տեղեկութունների քանակը կարելի է համեմատել միայն Տրգրան Բ-ի մասին արտաքին հեղինակների երկերում պահպանված տվյալների հետ:

Բացի այդ, արդեն շուրջ երեք տասնամյակ է, ինչ ուսումնասիրողների տրամադրության տակ Տրդատի մասին այնպիսի առաջնակարգ սկզբնաղբյուր կա, ինչպիսին Գառնիում հայտնաբերված հունարեն արձանագրությունը. և պատահական չէ, որ այս կարճ ժամանակամիջոցում տվյալ արձանագրությունը տարբեր հետազոտողների կողմից մանրամասն ուսումնասիրվել է բազմիցս⁶: Արձանագրության առաջին հրատարակողները (Ստ. Լխիցյան, Հ. Մանանդյան, Ա. Աբրահամյան) գլխավորապես ուշադրություն են դարձրել դրա թվագրման, ինչպես նաև Գառնիում կատարված շինարարական աշխատանքների հետ նրա ունեցած առնչության վրա: Հաջորդ ուսումնասիրողներն արդեն (Կ. Տրեվեր, Գ. Սարգսյան, Հ. Բարթիկյան, Ս. Կրկյաշարյան) արձանագրության որոշ տվյալների օգնությամբ, փորձել են պարզել Արշակունյաց Հայաստանի սոցիալ-քաղաքական պատ-

(4) Н. Адонц. Армения в эпоху Юстиниана, էջ 432: К.В. Тревер, Очерки ..., էջ 198, ծանոթ. 2, էջ 202, 282: А.Г. Периханян, Древнесармянские востаники, ВДИ, 1956, № 2, էջ 51, ծան. 3:

(5) Josephi Flavii bell. Jud., VII, 34-37: 40-41 և այլն: С. Plin., Nat. Hist., XXX, 16: XXXIII, 54: Dio Cass., LII, 20: LXII, 23 և այլն:

(6) Ստ. Լխիցյան, «Սովետական Հայաստան» թերթ, 23-9-1945 և «Коммунист» թերթ, 30-9-1945: Հ.Հ. Մանանդյան, Գառնիի հունարեն արձանագրությունը և Գառնիի հեթանոսական տաճարի կառուցման ժամանակը, Երևան, 1946: Ա.Գ. Աբրահամյան, Գառնիի հունարեն արձանագրությունը, «Իջմիածին», 1947, մարտ-ապրիլ: Я.А. Манандян, Новые заметки о греческой надписи в языческом храме Гарни, Տեղ. ՀԳԱՀԳ, 1951, № 4: Б.Н. Аракелян, Гарни I, Ереван, 1951; К.В. Тревер, Очерки по истории культуры древней Армении, էջ 174-211: Գ. Սարգսյան, Գառնիի հունարեն արձանագրության շուրջը, Տեղ. ՀԳԱՀԳ, 1956, № 3: Հ. Բարթիկյան, Գառնիի հունարեն արձանագրությունը և Մովսես Խորենացին, ՊԲՀ, 1965, № 3, էջ 229-234: Ս.Մ. Կրկյաշարյան, Եվս մի անգամ Գառնիի հունարեն արձանագրության մասին, ՊԲՀ, 1965, № 3, էջ 235-238:

մուլթյանը վերաբերող մի շարք հարցեր: Այսուհանդերձ, մենք կարծում ենք, որ Գառնիի արձանագրությունը դեռևս իրեն չի սպառել: Այստեղ մենք ցանկանում ենք, Գառնիի արձանագրության ընձեռած տվյալների օգնությամբ, անդրադառնալ Տրդատի թագավորական իշխանության բովանդակությանը:

Ուսումնասիրողներն այս արձանագրության առաջին երկու տողերը վերականգնում են երկու կերպ. ΗΛΙΟΣ ΤΙΡΙΔΑΤΗΣ ΒΑΣΙΛΕΥΣ ΜΕΓΑΛΗΣ ΑΡΜΕΝΙΑΣ —, «Հելիոս Տիրիդատես թագավոր Մեծ Հայքի» (Հ. Մանանդյան՝ առաջին ընթերցում, Գ. Սարգսյան, Հ. Բարթիկյան, Ս. Կրկյաշարյան) կամ՝ ΗΛΙΟΣ ΤΙΡΙΔΑΤΗΣ Ο ΜΕΓΑΣ ΜΕΓΑΛΗΣ ΑΡΜΕΝΙΑΣ — «Հելիոս Տիրիդատես Մեծը Մեծ Հայքի» (Հ. Մանանդյան՝ երկրորդ ընթերցում, Ա. Աբրահամյան, Կ. Տրեվեր)⁷: Հ. Բարթիկյանը նշում է, որ այս երկու տողում արձանագրված է Տրդատ թագավորի ամբողջ տիտղոսաշարը, որն ավարտվում է ΜΕΓΑΛΗΣ ΑΡΜΕΝΙΑΣ բառերով⁸: Մենք լիովին բաժանում ենք այս տեսակետը:

Նշված տիտղոսաշարը լիովին համահնչյուն է Ապարանի հունարեն արձանագրությունում պահպանված Տրդատ թագավորի տիտղոսաշարին՝ ΤΙΡΙΔΑΤΗΣ Ο ΜΕΓΑΣ ΜΕΓΑΛΗΣ ΑΡΜΕΝΙΑΣ ΒΑΣΙΛΕΥΣ (Տիրիդատես Մեծ, Մեծ Հայքի թագավոր)⁹: Նույնպիսին է նաև XVI դարում Հռոմում հայտնաբերված մի արձանագրության մեջ մ.թ. II դարում Հայաստանում գահակալած Արշակունի Բակուր թագավորի տիտղոսաշարը՝ ΑΥΡΗΛΙΟΣ ΠΑΚΟΡΟΣ ΒΑΣΙΛΕΥΣ ΜΕΓΑΛΗΣ ΑΡΜΕΝΙΑΣ — Ավրելիոս Պակորոս թագավոր Մեծ Հայքի¹⁰:

Վիմական արձանագրություններում պահպանված է Արշակունյաց շրջանի Հայաստանում գահակալած թագավորների տիտղոսաշարի ևս մեկ տարբերակ, որը հանդիպում է վերջերս Գառնիում հայտնաբերված արամեերեն արձանագրու-

(7) Այստեղ մեզ չի հետաքրքրում ΗΛΙΟΣ (հելիոս) բառին տրված այս կամ այն մեկնարանությունը: Այդ հարցին մենք առանձին անդրադարձել ենք Գառնիի արձանագրությանը նվիրված մեր վերոհիշյալ հոդվածում: Տես նաև Գ. Խ. Սարգսյան, Հեկենիստական դարաշրջանի Հայաստանը և Մովսես Խորենացին, էջ 58-59:

(8) Հ.Մ. Բարթիկյան, նշվ. աշխ., էջ 231:

(9) М.И. Ростовцев, Апаранская надпись царя Тиридата. Анийская серия, N^o 6, СПб., 1911.

(10) К.В. Тревер, Очерки ..., էջ 126:

թյան¹¹ և Սասանյան Շապուհ Ա-ի թողած Նախ-ի-Ռուստեմի երեքլեզվյան արձանագրության մեջ¹²: Այս վերջին վավերագրում «Թագավոր Մեծ Հայքի» տիտղոսի փոխարեն Հայաստանի թագավոր կարգված Որմիզդ-Արտաշիրը (Ὀρμισζδαοταξίρ – Ὀρμισζδαοταξάδ) կրում է «Մեծ թագավորի Հայոց» – ΜΕΓΑΛΟΥ ΒΑΣΙΛΕΩΣ ΑΡΜΕΝΙΑΣ տիտղոսը: Այս տարբերությունը ճիշտ է նշմարել Ա. Փերիխանյանը¹³: Մինչդեռ Ս. Երեմյանը գտնում է, որ Շապուհի ձեռքով Հայաստանի գահի վրա բարձրացած Որմիզդ-Արտաշիրը պիտի կրեր ոչ թե «Արմենիայի (կամ Հայաստանի) մեծ թագավոր», այլ «Թագավոր Հայոց Մեծաց» տիտղոսը¹⁴:

Սակայն այսպիսի եզրահանգման դեմ է խոսում իր իսկ արձանագրության մեջ պարզ վկայված տիտղոսաշարը՝ ΤΟΥ ΜΕΓΑΛΟΥ ΒΑΣΙΛΕΩΣ ΑΡΜΕΝΙΑΣ, որտեղ արական սեռի ΤΟΥ ΜΕΓΑΛΟΥ (մեծի) ածականը ոչ մի դեպքում չի կարող վերաբերվել իրական սեռի ΑΡΜΕΝΙΑΣ գոյականին. այն կարող է վերաբերվել բացառապես արական սեռի ΒΑΣΙΛΕΩΣ (Թագավորի) գոյականին, քանի որ հունարենում գոյականի և ածականի սեռային համաձայնությունը քերականական պարտադիր օրենք է: Բացի այդ, պնդել չի կարելի, որ Սասանյան Շապուհի որդին, դառնալով Հայաստանի թագավոր, անհրաժեշտաբար պետք է վերցնեի Սասանյանների կատաղի թշնամի Հայոց Արշակունիների թագավորական տիտղոսը: Կա նաև ոչ պակաս կարևոր մի հարց. արդյո՞ք պարսիկ Սասանյանների համար այդ ժամանակ կար Մեծ և Փոքր Հայք հասկացությունը: Առ այժմ մեզ համար ղժվար է պատասխանել դրան:

Ուսումնասիրողները միանգամայն ճիշտ են նկատել, որ Գառնիի և Ապարանի հունարեն արձանագրություններում ΣΡΡ-դատի կրած ΒΑΣΙΛΕΩΣ ΜΕΓΑΛΗΣ ΑΡΜΕΝΙΑΣ տիտղոսը միանգամայն համապատասխան է հունա-հռոմեական և հայ մատե-

(11) А.Г.Периханян, Арамейская надпись из Гарни, ՊԲՀ, 1964, նո 3, էջ 126:

(12) Ernest Honigmann et André Maricq, Recherches sur les Res Gestae divi Saporis, Bruxelles, 1953, p. 15-16.

(13) А.Г.Периханян, Նույն տեղում:

(14) Ս.Տ. Երեմյան, Նախ-ի-Ռուստեմի «Քաարա ի Ջարդուչա» հուշարձանի արձանագրության վկայությունները Հայաստանի մասին, ՊԲՀ, 1986, նո 2, էջ 64, ծան. 18:

նագրության միջոցով մեզ հասած Արչակունի գահակալների կրած «Թագավոր Հայոց Մեծաց» տիտղոսին¹⁵:

Տրդատ Արչակունու տիտղոսաշարը եթե համեմատենք նախորդ՝ Արտաշեսյան հարստության հիմնադիր Արտաշեսի տիտղոսաշարի հետ՝ «Արտաշես արքա, որդի Չարիտարայի, Երվանդական» կամ «Արտաշես, արքա, Երվանդական, Բարի, որդի Չարեհի», որը պահպանվել է «Արտաշիսական» սահմանաքարերի վրա եղած արամեերեն արձանագրություններում¹⁶, ապա նկատելի է որոշակի տարբերություն: Եթե Արտաշեսյան Թագավորն իր տիտղոսաշարի մեջ մտցրել էր նաև իր հայրանունը՝ Չարիտարայի (Չարեհի) որդի, ապա Արչակունի Թագավորի տիտղոսաշարում նրա հայրանվանը չենք հանդիպում: Հատկանշական է, որ պարսից Արչակունիների մեզ հասած տիտղոսաշարում ևս հայրանունը բացակայում է: Արդյոք սա չի՞ նշանակում, որ տվյալ գահակալի հայրը Թագավոր չի եղել: Որպես օրինակ նշենք պարթևների Թագավոր Արտավան Գ-ի նամակը, ուղղված Սելևկիայի քաղաքային համայնքին: Վիմական արձանագրության ձևով մեզ հասած այդ նամակը վերաբերում է մ.թ. 21 թվականին և սկսվում է Արտավանի տիտղոսաշարով՝ ΒΑΣΙΛΕΥΣ ΒΑΣΙΛΕΩΝ ΑΡΣΑΚΗΣ – Արքայից արքա Արսակես¹⁷:

Մեր կարծիքով, Հայաստանում Թագավորական իշխանության ներքին բովանդակությունը բացահայտում են Գառնիի հունարեն արձանագրության մեջ Տրդատի տիտղոսաշարին հաջորդող ΑΝΑ[ΣΣΩΝ] ΩΣ ΔΕΣΠΟΤΗΣ – «Թագավորելով իբրև դեսպոտ»¹⁸ բառերը:

(15) А.Г.Периханян, *Նույն, տեղում*: Ս.Տ. Երեմյան, *Նույն տեղում*:

(16) Տես սույն ուսումնասիրությունը, էջ 132, ծան. 1 և 2:

(17) С.В. Welles, 75, 1.

(18) Այսպես են ընթերցում Հ. Մանանդյանը և Ս. Կրկյաշարյանը. մինչդեռ մյուս ուսումնասիրողները բոլորովին տարբեր ձևով են ընթերցում: Բանն այն է, որ Գառնիի արձանագրության երկրորդ տողի վերջում գտնվող բառը կիսատ է պահպանվել. կարդացվում են միայն սուաջին երեք տառերը՝ ΑΝΑ ...: Սու. Լիսիցյանի լրացումը՝ ΑΝΑΞΙΩΣ (նշ. է՝ անարժանարար) պարզապես թյուրիմացություն է. Ա. Աբրահամյանն այդ բառը լրացնում է ΑΝΑ[ΚΤΟΣ] որը լինելով ΑΝΑΞ (Թագավոր) բառի սեռականը, չի կարելի ընդունելի համարել. Կ. Տրեվերը այն լրացնում է ΑΝΑ[ΚΤΩΡ] (նշ. է՝ Թագավոր) հազվագեպ և արխայիկ բառով. Հ. Բարթիկյանը՝ ΑΝΑ[ΚΤΟΡΟΝ] (սպարանք) բառով. իսկ Գ. Սարգսյանը ΑΝΑ-ի հարցը համարում է դեռևս ոչ պարզ:

ΔΕΣΠΟΤΗΣ հունարեն նշանակում է՝ վեհապետ, գերագույն տեր, անսահմանափակ իշխանությամբ օժտված միապետ: Այս բառի այդպիսի նշանակությունը առավել պարզ երևում է իր իսկ Տրդատի այն խոսքերի մեջ, որով նա դիմել է կայսր Ներոնին և որը պահպանվել է Դիոն Կասիոսի մոտ: Այսպես, Տրդատը երեք հազար հոգուց բաղկացած իր շքախմբի ուղեկցությամբ հասնելով Հռոմ, հավերժական քաղաքի Փորումում ծնրադրում է Ներոնի առաջ և, ինչպես պատմիչն է վկայում, այս խոսքերով դիմում նրան. «Եγώ, δέσποτα, Ἀρσάκου μὲν ἕκγονος, Οὐάλα-γαίισου δὲ καὶ Πακόρου τῶν βασιλέων ἀδελφός, σὸς δὲ δοῦλος εἶμι»¹⁹. «Ես, ով վեհապետ, Արշակի հետնորդն եմ, Վաղարշ և Պակորոս թագավորների եղբայրը, իսկ քո ծառան»: Այստեղ դժվար չէ նկատել որ ΔΕΣΠΟΤΗΣ բառով բնորոշված է Ներոն կայսեր բացարձակ իշխանությունը:

Կ.Վ. Տրեվերը նշում է, որ այս տերմինը հանդիպում է Սև ծովի ափերին, Փոքր Ասիայում և Սիրիայում հայտնաբերված նույն ժամանակներին վերաբերող արձանագրություններում, որոնցում ΔΕΣΠΟΤΗΣ են անվանված բոսպորյան թագավորներ Սավրոմատեսը, Ռեսկոպորիդեսը, Հռոմի կայսրներ Սեվերոսը, Մակրինոսը և Դիոկլետիանոսը²⁰:

Այն, որ հայոց Տրդատ Ա. թագավորը իրրև դեսպոտ պետք է որ օժտված լիներ անսահմանափակ իշխանությամբ, կարելի է հետևեցնել նաև այն հանգամանքից, որ, ինչպես հաղորդում է Տակիտոսը և ինչպես պարզվում է Գառնիի արձանագրության մեր վերծանումից, նա ոչ միայն թագավոր էր, այլև քրմապետ²¹: Մինչդեռ վերևում նշեցինք, որ Երվանդունիների և Արտաշեսյանների ժամանակ Հայաստանում թագավորական իշխանության կրողը և քրմապետի պարտականությունները կատարողը սարբեր անձեր էին, թեպետ և նույն տոհմից:

Այսպես, իրենացու մոտ Երվանդ. թագավորի հետ միա-

(19) Dio Cass., LXIII, 5, 2.

(20) К.В. Тревер, Очерки ..., էջ 200-201, ծան. 1:

(21) Taciti Annales, XV, 24: Այս հարցին մենք անդրադարձել ենք մի շարք անդամներ մեր հետևյալ հոդվածներում, «Դիոտղություններ հայկական տաճարային քաղաքների առաջացման մասին», Տեղ. ՀԳԱՀԳ, 1963, Նո 9, էջ 58: «Եւս մի անգամ Գառնիի հունարեն արձանագրության մասին», ՊԲՀ, 1985, Ն. 3, էջ 236:

ժամանակ և նրա կողքին հիշատակվում է նրա եղբայրը՝ քրմապետ Երվազը²²: Արմավիրի հունարեն արձանագրություններից մեկում քրմապետ Միթրասը, դիմելով Երվանդ թագավորին (արձանագրության մեջ՝ Եբրոնտես), իրեն նույնպես անվանում է թագավոր (ΒΑΣΙΛΕΥΣ)²³: Դարձյալ խորենացու վկայությամբ, Արտաշես թագավորն իր որդի Մաժանին «կարգ է քրմապետ յԱնի»²⁴:

Վաղարշ Ա-ի գահակալության տարիներին Արշակունիների պարթևական թագավորությունը հասավ ներքաղաքական որոշակի կայունացման: Գործիմաց Վաղարշին, երկար պայքարից հետո, հաջողվեց միանգամից լուծել երկու կարևորագույն հարց: Մինչ այդ պարսկական արքունիքում թագի հավակնորդների միջև անպակաս էին տերությունը թուլացնող գահակալական երկպառակությունները: Իսկ այդ հանգամանքը վարպետորեն օգտագործում էր Պարսկաստանի գլխավոր թշնամին՝ Հուռը, որը և պատեհ առիթը բաց էջր թողնում, հրահրելու համար պարսկական գահի շուրջ ծագող հաճախակի վեճերը, որոնք շատ անգամ հանգում էին ահավոր ոճրագործությունների: Վաղարշը, ահա, դառնալով պարսից թագավոր, այդ ցավոտ հարցը լուծեց մեծ հեռատեսությամբ: Նա, իվերջո, կարողացավ իր կրտսեր եղբայրներից մեկի, Պակորոսի համար ապահովել Սեդիա-Ատրոպատենեի գահը, իսկ մյուսի՝ Տիրիդատես-Տրդատի համար՝ հայոց գահը²⁵: Այդ բանից հետո նա արդեն կարող էր իրեն հանդիսազգալ պարսկական արքունիքում, որտեղից վարպետորեն հեռացվել էին գահի ամենաիրական հավակնորդները: Արտաքին քաղաքականության տեսակետից հարցի այսպիսի լուծումը ապահովում էր նաև Պարսկաստանի հյուսիս-արևմտյան սահմանները թշնամիների ներխուժումից և Հայաստանն ու Սեդիա-Ատրոպատենեն դարձնում Պարսկաստանի համար կարևոր պատվար

(22) Մովսես Խորենացի, Բ, Խ:

(23) А.И. Болтунова, Греческие надписи Армавира, Արմֆանի Տեղեկագիր, 1942, Նո 1-2, էջ 50-51: Հ.Հ. Մանանդյան, Արմավիրի հունարեն արձանագրությունները նոր լուսարանությամբ, Երևան, 1946: К.В. Тревер, Очерки ..., էջ 134-137: Г.Х. Саркисян, Тигранакерт, М., 1960, էջ 40-41: Ս.Մ. Կրկյաչարյան, Դիտողություններ հին հայկական քաղաքների առաջացման մասին, էջ 56-58:

(24) Մովսես Խորենացի, Բ, 6 գ:

(25) Josephi Flavii, Antiq. Jud., XX 74.

Հռոմի դեմ:

Այսպիսով, Վաղարշի և Տրդատի եռանդուն գործունեությունն ընդհանուր համարելով, Հայաստանի գազը վերջապես բաժին ընկավ պարթև Արշակունիների կրտսեր ճյուղին: Այս հանգամանքը չէր կարող իր որոշակի ազդեցությունը չունենալ մ.թ. I դարի Հայաստանի սոցիալ-քաղաքական կյանքի վրա: Այդ ազդեցությունը երկակի բնույթ ուներ, արտաքին և ներքին իմաստով: Հնարավոր է, որ Տրդատ Արշակունին Վաղարշի անմիջական օգնությունը Հայաստանի թագավոր դարձած լինելով, որոշ չափով իրեն կաշկանդված էր զգում և լիովին ազատ չէր արտաքին քաղաքականություն վարելու, քանի որ բոլոր դեպքերում նա պետք է հաշվի նստեր իր ավագ եղբոր՝ պարսից Վաղարշ թագավորի շահերի հետ: Մյուս կողմից, սակայն, վայելելով պարսից թագավորի համակողմանի աջակցությունը, Տրդատն այժմ բոլոր հնարավորություններն ուներ ներքին քաղաքականության ասպարեզում վճռական և գործուն միջոցների դիմելու համար: մի բան, որի կարիքը խստորեն զգում էր տասնամյակներ անընդհատ ծվատված երկիրը:

Հակառակ այս բոլորին, սակայն, տարօրինակ է, որ մեզ հասած պատմական սկզբնաղբյուրներում ոչ մի ուղղակի վկայություն չենք հանդիպում Տրդատի ձեռնարկած որևէ վարչատնտեսական միջոցառման մասին: Դեռ ավելին. մենք նշել ենք, որ հայ մատենագրությունը մեջ զարմանալի կերպով Տրդատ Ա-ի հիշատակությունն անգամ չկա: Այսուհանդերձ, հայագետները փորձել են հայ պատմիչների, հատկապես Խորենացու մոտ, հայտնաբերել Տրդատ Ա-ին, կամ գոնե նրա գործունեությունը հետքերը: Եվ այդ նրանց մասամբ հաջողվել է:

Այսպես, ենթադրվում է, որ Խորենացու մոտ հիշատակված Վաղարշակ Արշակունու գործերի մի զգալի մասը վերաբերում է հունահռոմեական հեղինակների (Հովսեպոս Փլավիոս, Տակիտոս, Պլինիոս Ավագ, Դիոն Կասիոս, Սվետոնիոս) հիշատակած Տրդատ Արշակունու գործունեությունը: Տեսնենք, թե հայագետները ի՞նչ հիմքեր են ունեցել այդպիսի ենթադրություն անելու համար:

Այս հարցում ամենակարևոր փաստարկն այն է, որ Մովսես Խորենացու «Պատմություն» մեջ Վաղարշակը ներկայացված էր իբրև Արշակունյաց թագավորության հիմնադիրը Հայաստանում. մինչդեռ օտար աղբյուրների համաձայն, այդպիսի դերը պետք է վերագրվի Տրդատ (Τρωδάτης) Ա-ին: Նախարարական

Հայաստանի պատմութեան խոշորագույն հետազոտող Ն. Աղոնցն, օրինակ, նշում է, որ «Խորենացու մոտ ուրվագծված Վաղարշակի բարենորոգչական կերպարը պատմական Տրդատի արտացոլումն է հանդիսանում»²⁶: Ա.Փ. Փերիխանյանը նույապես խոսելով այդ մասին, գտնում է, որ Վաղարշակի կերպարի մեջ «բաղարկվում են (контаминируется) պատմական երկու անձնավորություն՝ Արտաշես Ա-ը և Տրդատ Ա-ը»²⁷: Այս նույն կարծիքն արտահայտել են նաև պրոֆ. Խ. Սամվելյանը, Կ. Բասմաջյանը, Կ.Վ. Տրեվերը, ինչպես նաև ՀՍՍՀ ԳԱ Պատմութեան ինստիտուտի հրատարակած «Հայ ժողովրդի պատմութեան» առաջին հատորի հեղինակները²⁸: Ըստ երևույթին, այդ կարծիքին է հակված նաև Հ.Հ. Մանանդյանը, երբ գրում է. «Վաղարշակի այդ գործունեությունը վերագրվել է Տրդատ Ա-ին, որովհետև ենթադրվել է, որ Խորենացու Վաղարշակը որ Արշակունիների դինաստիայի հիմնադիրն էր, իրականում Տրդատ Ա-ն է»²⁹:

Խորենացու հիշատակած հայոց թագավոր Վաղարշակ Արշակունու և օտար աղբյուրներով անժխտելիորեն վկայված պատմական Տրդատ (Τριδάτης) Արշակունու միջև նկատվող նույնությունը եզրերից մեկն էլ, բացի Հայաստանում Արշակունյաց հարստութեան հիմնադիրը լինելուց³⁰, այն է, որ ե՛լ Վաղարշակը, ե՛լ Տրդատը եղել են պարթև արքայի՝ մի դեպքում Արշակ Մեծի, մյուս դեպքում՝ Վաղարշի, եղբայրը: Այսպես, պատմահայրը հաղորդում է, որ պարսից և պարթևաց արքա Արշակ Մեծը «թագավորեցուցանէ զեղբայր իւր զՎաղարշակ ի վերայ աշխարհիս Հայոց, պատեհ համարեալ այսպէս իմն անշարժ իւրոյ

(26) Н. Адонц, Армения в эпоху Юстиниана, էջ 433.

(27) А.Г. Периханян, Древнеармянские востаники, էջ 51, ծան. 3.

(28) Խ. Սամուելյան, Հին հայ իրավունքի պատմություն, հ. Ա, Երևան, 1939, էջ 181, 264, 328: Կ. Բասմաջյան, Իսկական պատմություն հայոց, Պոլիս, 1914, էջ 100: К.В. Тревер, Очерки ..., էջ 198, ծան. 2 և էջ 202, 282: Հայ ժողովրդի պատմություն, հ. 1, Երևան, 1971, էջ 674-675, 746, 766 և այլն:

(29) Հ.Հ. Մանանդյան, Քննական տեսություն ..., հ. Բ, մ. Ա, էջ 14

(30) Վերջին հետազոտողներից Լ.Փ. Շահինյանը չի համարում Տրդատն Արշակունյաց հարստության հիմնադիր, այլ նրան նույնացնում է Խորենացու հիշատակած Երվանդի հետ (Л.П. Шагинян, Хронологическая система «Истории Армении» Мовсеса Хоренаци и ее достоверность. Автореферат, Ереван, 1968).

Թագաւորութեանն մնալ»³¹: Նույնը երկրորդ անգամ նշում է իտրենացին, գրելով, որ պարսից Արշակ Մեծը «ի ժամանակին յանյնմիկ Թագաւորեցուցանէ զեղբայր իւր զՎաղարշակ աշխարհիս Հայոց, զհիւսիսի և զարեւմուսս տալով նման սահմանս»³²: Ասես ի հաստատումն այս բոլորի, իտրենացին բերում է հայոց Վաղարշակ Թագաւորի Թուղթը, ուղղված պարսից արքա Արշակ Մեծին, որում իմիջիպայլոց կարգում ենք նաև հետևեյալ խոսքերը: «Վաղարշակ կրտսեր եղբայր քո և նիգակակից, որ ի քէն կարգեալ արքայ Հայոց»³³:

Նկարագրված դեպքերին ժամանակակից Հովսեպոս Փլավիոսը (I դ.) վկայում է, որ պարթև Վաղարշը (Οὐολογαίσης) սիրելով Պարսկաստանի գահին, «իւր հայրակից երկու եղբայրներին ևս Թագաւորութեանն վստահեց. ալազին՝ Պակորոսին՝ նա տվեց Մեդիան, իսկ կրտսերին՝ Տրդատին՝ (Τριδάτης) Հայաստանը»³⁴: Նույնը մի քանի անգամ կրկնում է մեկ ուրիշ ժամանակակից մատենագիր՝ Տակիտոսը³⁵: Բացի այս, մենք վերևում մեկ ուրիշ առիթով արդեն հիշատակեցինք նաև Դիոն Կասսիոսի այն հաղորդումը, որտեղ Տրդատն իրեն անվանում է Վաղարշի և Պակորոսի եղբայրը:

Վաղարշակ-Տրդատ Ա. առնչութեան մասին խոսելիս մենք անհրաժեշտ ենք համարում անդրադառնալ աղբյուրներում հանդիպող երկու հաղորդման, որոնք դեռևս պատշաճ ուշադրութեան չեն արժանացել:

Իտրենացին պատմում է, որ Արշակ Մեծն իր եղբոր՝ Վաղարշակին Հայաստանում Թագաւոր կարգելով, նրան է հանձնում մի շարք երկրամասերի կառավարումը և տալիս հետևեյալ հայտնի պատմերը, որն անցել է Թևափոր խոսքերի շարքը. «և այլ որչափ միտք քո և քաջութիւն հասանիցեն. զի սահմանք քաջաց ... զէնն իւրյանց, որքան հասանէ՝ այնքան ունի»³⁶:

Մյուս կողմից, Տակիտոսը վկայում է, որ երբ Վաղարշ Ա-ը այլ գործերով զբաղված լինելու պատճառով, որոշ դանդաղ-

(31) Մովսես իտրենացի, Ա, Ը:

(32) Մովսես իտրենացի, Բ, Գ:

(33) Նույն տեղում, Ա, Թ:

(34) Jos. Flav., Antiq. Juds., XX, 74.

(35) Taciti Annales, XIII, 34; XIII, 37.

(36) Մովսես իտրենացի, Ա, Ը:

կոտուլթյունն էր ցուցաբերում իր եղբոր՝ Տրդատին օգնելու և հռոմայեցիներին Հայաստանից դուրս քշելու հարցում, վերջինս արդարացի տրտունջ է հայտնում պարսից թագավորին և ասես հանդիմանում նրան հետևյալ խոսքերով. «Անգործությամբ չէ, որ պահպանվում են մեծ պետուլթյունները, այլ մարդկանց ու զենքերի մղվող պայքարով: Մարդկային ամենաբարձր վիճակում նա է առավել արդարացի, ով ավելի հզոր է: Պահել ինչ որ իրենն է՝ մասնավոր մարդկանց գործ է, իսկ այլոց ունեցվածքի համար կռիվ մղելը՝ կազմում է թագավորների փառքը»³⁷:

Առաջին իսկ համեմատուլթյունից ակներև է դառնում վերոհիշյալ հատվածներում Արշակի և Տրդատի խոսքերի ներքին բովանդակուլթյան նույնուլթյունը: Այդ պատճառով կարելի է ենթադրել, որ առաջին դարում Տրդատի թագավորուլթյան փամանակ տեղի ունեցած պատմական դեպքերը դառնալով հերոսապատումի նյութ, գողթան երգիչների բերանով աստիճանաբար մասամբ փոփոխուլթյան են ենթարկվել ու հասել մինչև Մովսես Խորենացին և, արձանագրվելով նրա մատյանում, անմահուլթյան ուղեգիր ստացել:

Կա մի հանգամանք ևս, որը հնարավորուլթյունն է տալիս անելու այն ենթադրուլթյունը, թե Վաղարշակի թագավորուլթյան տարիներին վերագրված մի շարք դեպքեր իրականում կատարվել են ավելի ուշ, դուցե Տրդատ Արշակունու գահակալուլթյան փամանակ: Այստեղ նկատի ունենք հետևյալը:

Մովսես Խորենացին, պատմելով Վաղարշակ թագավորի բարենորոգչական գործունեուլթյան մասին, վկայում է, որ «նախ և առաջին օրինադրէ թագաւորն զինքն և զտուն իւր, սկիզբն առնելով ի գլխոյ իւրմէ և ի թագէ: Եւ վկոչեցեալն Բագարատ, որ ի Հրէիցն, շորհակալուլթիւն նմա վասն յառաջագոյն անձնատուր ձեռնտուլթեանն առ թագաւորն և միամտուլթեանն և քաջուլթեանն, զյառաջատոցեալ տանուտիրական պատիւն ազգին պարգևելով. և իշխել նմա թագ ի գլուխ զնել թագաւորին և կոչել թագադիր, այլ և ասպետ»³⁸: Նույն բանը պատմահայրը կրկնում է ամեն անգամ, երբ խոսում է Բագարատի մասին, նրան համարելով «ի հրէից»³⁹:

(37) Taciti Annales, XV, 1: Այս հատվածը մեջ ենք բերել Հ.Հ. Մանանդյանի թարգմանուլթյամբ (տես՝ Քննական տեսուլթյուն ..., հ. Ա, էջ 341):

(38) Մովսես Խորենացի, Բ, է:

(39) Նույն տեղում, Բ, գ: Բ, ը: Բ, թ:

Ինքնընտանիքայան հարց է ծագում, թե այս հրեաները, որոնցից, ըստ Խորենացու հաղորդած ավանդության, սերում էր Բագարատը, ե՞րբ և որտեղի՞ց էին հայտնվել Հայաստանում: Սկզբնաղբյուրների ուշադիր ուսումնասիրությունը ցույց է տալիս, որ պատմական այդ իրադարձությունը տեղի էր ունեցել Տիգրան Մեծի, մասամբ նաև նրա հաջորդ Արտավազդ Բ-ի թագավորության ժամանակ (մ.թ.ա. I դարի առաջին կես), երբ հայոց թագավորն իր նվաճողական արշավանքների ընթացքում առաջին անգամ շփում ունեցավ հրեաների հետ և նրանցից մեծ բազմություն գերեվարելով, բերեց Հայաստան: Այս դեպքերի մասին ուղղակի հիշատակություններ կան թե հրեա մատենագիր Հովսեպոս Փլավիոսի և թե Փավստոս Բուզանդի ու Մովսես Խորենացու մոտ:

«Իսկ Ալեքսանդրյան, – գրում է Փլավիոսը, – Արիստոբոլոսի գլխավորությամբ զորք ուղարկեց Դամասկոս այն պատճառով, որ Պողոմեոսը⁴⁰ անդադար ճնշում էր քաղաքը, սակայն զորքը վերադարձավ իր մոտ առանց նշանակալից որևէ գործ կատարելու: Մյուս կողմից, հայոց թագավոր Տիգրանին, որը բանակել էր Պողոմայիս քաղաքի առջև և այնտեղ պաշարել էր Կլեոպատրային⁴¹, դաշինքով ու ընծաներով հեռացրեց. իսկ սա Լուկոլլոսի արշավանքների հետևանքով սկսված անկարգությունների պատճառով վերացնում է պաշարումը և հասնում Հայաստան»⁴²: Վերևում մենք մի այլ առիթով անդրադարձել

(40) Այս Պողոմեոսը, Մեննայոսի որդին, ոչ մի առնչություն չունի Եգիպտոսի Պողոմեոսների հարստության հետ: Նա եղել է Կելե-Սիրիաքի (Ներքին Ասորիք) ոչ մեծ թագավորության տիրակալը մ.թ.ա. 85-40 թթ. Նրա իշխանության կենտրոնը եղել է Քալկիսը (Χαλκίς): Շատ հավանական է, որ այս Պողոմեոսը գաշնակից էր Տիգրան Բ-ին, քանի որ պատերազմում էր հայոց թագավորի թշնամու՝ Հրեաստանի դեմ: Երբ 84/83 թ. Տիգրանը նվաճեց Ասորիքը, Պողոմեոսը, հավանաբար, ընդունեց Տիգրանի գերիշխանությունը և մնաց Կելե-Սիրիայում որպես հայոց արքային ենթակա թագավոր:

(41) Այս Կլեոպատրան, որը կոչվում էր նաև Սելենե (Strabo, XVI, 2, 3), Եգիպտոսի թագավոր Պողոմեոս Ֆիսկոնի դուստրն էր և հաջորդաբար ամուսնացել էր Սելևկյան մի քանի թագավորի հետ: Նրան հիշատակում է նաև Խորենացին (Բ, Ժդ):

(42) Jos. Flav., Bell. Jud., I, 115.

ենք Հովսեպոսի մեկ ուրիշ վկայությանը ևս⁴³, որտեղ կրկնվում է նույն այս դեպքերի պատմութիւնը:

Տիգրանի հրեական արշավանքի և Հրեաստանից նրա բերած բազում գերիների մասին հաղորդում է նաև Մովսես Խորենացին, որի պատմածը լիովին ձայնակցում է Փլավիոսի վերոբերյալ վկայությանը. ահա պատմահոր խոսքերը. «Եւ նոյն հետոյն դիմէ (Տիգրան – Ս.Կ.) յաշխարհն Պաղեստինացւոց՝ վրէժս պահանջել ի Պողոմայիդ կղեպատրայ յաղագս Դիոնիսի որդւոյ նորա առ հայր իւր յանցանաց: Առեալ գերի բազում և ի Հրէից՝ նստի շուրջ զՊողոմայիդ քաղաքաւ: Իսկ դշխոյն Հրէից Աղեքսանդրիայ, որ և Մեսաղինայ, որ էր լեալ կին Աղեքսանդրի, որդւոյ Յոհաննու, որդւոյ Շմաւոնի, եղբօր Յուդայ Մակաբէի, որ զայնու ժամանակաւ ունէր զԹագաւորութիւնն Հրէից, ինչս բազումս տալով՝ դարձոյց զնա անտի»⁴⁴:

Նույնիսկ այս դեպքերից ավելի քան չորս հարյուրամյակ հետո, IV դարի կեսերին, հայերը դեռևս չէին մոռացել Հրեաստանից բերված գերիների մասին եղած պատմութիւնը: Բավական է հիշել, որ Փաւստոս Բուզանդը, խոսելով Մասանյան Շապուհի՝ Հայաստանի քաղաքներից հայերի հետ Պարսկաստան քրչված հրեաների մասին, նրանց համարում է առաջին (Տիգրանի օրոք) և երկրորդ (Արտավազդի օրոք) գերության ժամանակ Հրեաստանից Հայաստան փոխադրվածների հետնորդներ⁴⁵:

Խորենացին ևս, խոսելով այս նույն դեպքերի մասին, գրում է, որ հրաման հասավ Շապուհ արքայից, որպեսզի «զհրեայն խաղացուցեն ի գերութիւն, և զայն հրեայն, որ նովին հրէութեան օրինօք կային ի Վանն Տոսպայ, զորս ածեալ էր Բարգամիւրանայ Ռըշտունւոյ յաւուրս Տիգրանայ... գերեցին և զայն հրեայն որք յԱրտաշատ և ի Վաղարշապատ, զորս ածեալ էր նոյն Տիգրանայ արքայի»⁴⁶:

Դժվար չէ նկատել, որ Խորենացին ևս այս հատվածում պարզորոշ գատում է հրեաների երկու գերութիւնը, որոնցից առաջինը կատարել է Տիգրանը հրեական արշավանքից վերադառնալու ժամանակ, իսկ երկրորդը տեղի է ունեցել ավելի ուշ,

(43) Jos. Flav., Antig. Jud., XIII, 419-421.

(44) Մովսես Խորենացի, Բ, Ժգ:

(45) Փավստոս Բուզանդ, Դ, Ծե:

(46) Մովսես Խորենացի, Գ, լե:

ըստ Խորենացու՝ դարձյալ Տիգրանի թագավորութեան տարիներին, մինչդեռ պատմագիտությունը հաստատել է, որ այն տեղի է ունեցել նրա հաջորդի Արտավազդ Բ-ի ժամանակ⁴⁷:

Այս ամենից հետո մեզ համար պարզ է դառնում, որ եթե հրեաները Հայաստանում առաջին անգամ հայտնվել էին միայն Տիգրան Բ-ի ժամանակ և նրանից հետո, ապա այդ հրեաներից սերած Բագարատին թագադիր ասպետ կարգող Վաղարշակը չէր կարող մ.թ.ա. II դարի թագավոր լինել: Այս հանգամանքը ևս մեզ մղում է նույն ենթադրութեան, թե հայ պատմիչները Տրդատ Ա-ի գործունեութեան մի շարք դրվագներ վերագրել են Վաղարշակ թագավորին:

Այժմ վերադառնանք այն հարցին, թե Հայաստանում «իբրև դեսպոտ» ὡς δεσπότης – թագավորուլ բացարձակ միապետն ըստ հույների ինչպիսի՞ իրավասություններ ուներ: Հայաստանում Արշակունի թագավորի իշխանությունը, անկասկած, կրում էր արևելյան բացարձակ միապետութեան բնույթ, որտեղ միապետի կամքը օրենք էր:

Տասնամյա դաժան մարտերից հետո հռոմայեցիներին Հայաստան երկրից դուրս մղելով, Արշակունյաց հարստութեան հիմնադիրը, նախորդ հարստութեան հիմնադիր Արտաշեսի նման, լիովին իրավունք ուներ Հայաստանը համարելու իր իսկ նիպակով նվաճված երկիր՝ δοῦκτῆτος χύθρα – և իբրև այդպիսին, այն դիտելու որպես իր բացարձակ սեփականությունը: մի երևույթ, որին մենք արդեն հանգամանալից անդրադարձել ենք Արտաշեսյանների մասին խոսելիս:

Մեր անդրանիկ մատենագիրների գործերում հանդիպում են որոշ վկայություններ, որոնք, մեր կարծիքով, գալիս են հաստատելու մեր այս տեսակետը: Դիմենք այդ վկայություններին:

Փավստոս Բուզանդը պատմում է, թե Շապուհի զորքերի դեմ կռվելիս, ի թիվս այլ քաջերի, մարտում ընկնում է նաև Վաչէ Մամիկոնյան զորավարը, որի համար հայոց աշխարհը սգի մեջ էր: Այդ կապակցությամբ Վրթանես եպիսկոպոսապետը հայոց թագավորի և զորքի առաջ հանդես է գալիս մխիթարական խոսքերով և իմիջիպալոց նշում, թե այս մարտում ընկածներն

(47) Այս մասին մանրամասն տես՝ Գ. Սարգսյան, Աղբյուրների օգտագործման եղանակը Մոսկոս Խորենացու մոտ, ԲՄ, Նո 3, 1956, էջ 31-42: Հմմտ. նաև Jos. Flav., Bell. Jud., I, 246-273:

իրենց անձը զոհեցին հանուն աստվածային ճշմարտության, յանուն իրենց և ուրիշների հավատի, հանուն հայոց աշխարհի բնիկ տիրոջ — «ի վերայ բնակի տեառն աշխարհի»⁴⁸: Նույն Փավստոսի մոտ կարգում ենք, որ պատերազմում պարտություն կրած Շապուհը զարմանքով պատմում է հայոց զորքի ցուցաբերած քաջության մասին, նշելով, որ հայերը կռվում էին իրենց կորած արքայի՝ Արշակի համար, որին Շապուհն անվանում է «բնակ տէր» հայերի⁴⁹:

Հայ Արշակունի թագավորներին Փավստոս Բուզանդի կողմից տրված այս «բնակ տէր աշխարհիս Հայոց» բնորոշումը բացարձակապես համահնչուն է Ագաթանգեղոսի այն հաղորդմանը, թե Տրդատ թագավորն իր իշխանությանը ենթակա ժողովրդի բոլոր խավերին ուղղած հրովարտականներից մեկում հայոց երկիրը համարում է Արշակունյաց թագավորի ձեռասուունկ և ձեռասուն»⁵⁰:

Այս ամենից հետո բոլորովին վարմանալի պետք է է թվա այն, որ Արշակունյաց թագավորության ժամանակաշրջանում հայոց արքան ևս, հին արևելյան միապետների նման, որպես «բնակ տէրն աշխարհի», անկախ ազգակցական մերձավորությունից և առանց աստիճանի խտրության, իր բոլոր հպատակների վրա ունեյր մահու և կենաց իրավունք⁵¹:

Մեր ասածի լավագույնն ապացույցը պիտի համարել Փավստոսի և Խորենացու մատյաններում պահպանված պատմական հավաստի վկայությունները: Տվյալ դեպքում մենք առաջին հերթին նկատի ունենք հայոց Արշակ Բ թագավորի հրամանով արքայի եղբորորդու՝ Գնել Արշակունու սպանությունը⁵². նույն Արշակի հրամանով Սամվելի հոր՝ հայրենիքի դավաճան Վարդան Մամիկոնյանի սպանությունը⁵³. այնուհետև Արշակի որդի և հաջորդ Պապ թագավորի հրամանով Հայր Մարդպետի

(48) Փավստոս Բուզանդ, Գ, Ժա:

(49) Նույն տեղում, Ե, Է:

(50) Ագաթանգեղոս, ԺԲ

(51) Պլուտարքոսի (Lucullus, XXV, 1) և Ապպիանոսի (Mithrid, 84) հաղորդումներից կարելի է եզրակացնել, որ իր հպատակների վրա նույնպիսի իշխանություն ունեցել է դեռևս Տիգրան Բ-ը:

(52) Փավստոս Բուզանդ, Դ, Ժա: Մովսես Խորենացի, Գ, իզ:

(53) Փավստոս Բուզանդ, Դ, Ժբ: Մովսես Խորենացի, Գ, իե:

սպանությունը⁵⁴ և այլ դեպքեր: Եվ այս բոլորը կատարվում են այն ժամանակ, երբ արդեն IV դարի երկրորդ կեսին Արշակունի թագավորների բացարձակ իշխանությունը Հայաստանում անհամեմատ թուլացել, իսկ դրան ի հակակշիռ, ուժեղացել էր կենտրոնախույս նախարարների քաղաքական ազդեցությունը: Եթե հաշվի առնենք այս հանգամանքը, ապա չի կարելի կասկածել, թե առաջին Արշակունի թագավորները, որոնք իրենց անհամեմատ առավել հաստատուն էին զգում Հայաստանի գահի վրա, պետք է որ ավելի լայն ինքնակալական իշխանություն ունեցած լինեին, քան իրենց հետնորդները IV դարում, թեպետև այդ մասին մեր աղբյուրներում ուղղակի վկայություններ չկան:

Հաստատապես կարելի է ասել, որ Արշակունի թագավորի ձեռքին էր ոչ միայն առանձին հպատակի կյանքը, այլև ցանկության դեպքում ինքնակալը կարող էր բնաջնջել նախարարական ամբողջ գերդաստաններ⁵⁵: Այս բանում համոզվելու համար բավական է թերթել դարձյալ խորենացու և Փավստոսի մատյանները: Այսպես, խորենացին պատմում է, թե հրապուրվելով հայոց երգվյալ թշնամի պարսից Շապուհ արքայի խոստումներից, Սլկունյաց տոհմի Սղուկ նահապետը ապստամբեց հայոց Տրդատ թագավորի դեմ (սա Տրդատ Գ-ն է) և «գինքեանն սպանանէ զփեսայ, զծերացեալն Օտայ, որ էր ի տոհմէն Ամասունեաց և սնուցող խորովիդիտոյ քեռ թագավորին», որից հետո «նահապետ ազգին Սլկունեաց ամրանայր յամրոցին, որ անուանեալ կոչի Ողական, ապաւէն առնելով իւրեանց զբնակիչս Սիմն կոչեցեալ լերինն, և ընդդիմացեալ թագաւորին, աղմկէր զերկիրն, և մերձ առ լերամբն ոչ թողացուցանէր այլում պարսպել գործոյ: Ասէ ցամենայն նախարարութիւնս տանս Հայոց արքայ. «Որ ոք ածցէ առ իս զնահապետն ազգին Սլկունեաց՝ տայ նմա յաւիտենական իշխանութեամբ զգեօղս և զգաստակերտս, և զամենայն իշխանութիւն ազգին Սլկունեաց»: Զոր յանձն առնոյր ձենագեայն Մամգոն»: Մամգոնը «յետ բազում վստահութեանն, ի միում աւուրց հաւանեցուցանէ զնահապետ ազգին Սլկունեաց

(54) Փավստոս Բուզանդ, Ե, գ:

(55) Այստեղ մեր առաջադրանքից դուրս է խոսել թագավորի այդ դաժան միջոցառումների հետապնդած քաղաքական նպատակի մասին: Նշենք միայն, որ դրանց հիմնական նպատակը հեռզհետե խախտվող թագավորի կենտրոնական իշխանության ամրապնդումն էր:

ելանել արտաքս յամրոցէն և որսալ երէս. և ի միջամուխ լինել որոցն՝ դիպեցուցանէ զապստամբն: Եւ ընթացեալ իւրովք արամբըքն ի դուռն ամրոցին՝ ունի զբերդն, կապելով զամենայն արս որ ի ներքս: Նա և զազգն Սլկուռնեաց խորհեցաւ բառնալ, և կոտորեաց զամենեսեան. երկուք ոմանց փախստական անկան յաշխարհն Ծոփաց: Իսկ Մամգոն վաղվաղակի զպացուցանէ թագաւորին. ընդ որ ուրախացեալ Տրդատայ, գրէ հրովարտակ՝ իշխել նման ամենայնի զոր խոստացաւն, և կարգէ զնա նախարար ի տեղի ապստամբին, անուանելով յանուն իւր Մամգոնեան: Բայց մնացելոցն Սլկուռնեաց հրամայէ չլնասել»⁵⁶:

Թող մեզ ներվի, եթե հետագա շարադրանքի պահանջներից ելնելով, այսքան ընդարձակ մեջբերում կատարեցինք խորենացուցուց:

Վերահիշյալ դեպքը բոլորովին եզակի երևույթ չէր Արշակուռնյաց Հայաստանում. ահա ևս մեկ օրինակ, խորենացու մատչանից:

«Ի հեռանալ մեծին Ներսիսի ստեաց Արշակ ամենայն ուխտիցն, զոր եղ ընդ նախարարսն, և խնդրեաց զքէն ձեռակերտին իւրոյ Արշակաւանու: Եւ կոտորեաց զբազումս ի նախարարցն, մանաւանդ զազգն կամսարականաց բառնայր ի միջոյ, չարակնելով ազահեալ յամուրն Արտագերս և ի քաղաք ոստանի նոցա Երուանդաշատ: Եւ կոչեցեալ առ ինքն ի լքեալ արքունիսն Արմաւիր իբր զազգականս իւր, ի պատճառս պատուոյ մեծարանաց, միահաղոյն զարս և զկանայս հանդերձ մանկամբք հրամայեաց կոտորել: Եւ ոչ ոք ի նոցանէ ապրեցաւ, բայց Սպանդարատ որդի Արշաւրի. քանզի ունէր կին Արշակուռնի, որ և բնակեցաւ ի նորին ժառանգութեան ի կողմանս Տարօնոյ և Հաշտենից, իբր տրտունջ զհօրեղբօրէ իւրմէ եղեալ զՆերսեհէ. Որոյ աղագաւ և ոչ ի կոտորման նոցա դիպեցաւ: Այլ լուեալ զթօթն՝ հանդերձ որդւովքն Շաւարշաւ և Գազաւոնիւ և բոլոր ընտանեօքն գնաց փախստական ի Յոյնս»⁵⁷:

III-IV դարերում Հայաստանում արքայի կարգադրութեամբ նախարարական ամբողջ տները բնաջնջման մասին խորենացու հաղորդած այս (և ոչ միայն այս) փաստերը հաստատվում

(56) Մովսէս Խորենացի, Բ, ձդ:

(57) Նույն տեղում, Գ, լա: Նաև՝ Փալատոս Բուզանդ, Դ, ԺԺ:

են նաև Փափստոս Բուզանդի հաղորդած նույնիմաստ տեղեկություններով: Բավարարվենք բերելով մեկ օրինակ միայն: Փափստոսը, խոսելով Տիրան թագավորի (որն, ի դեպ, համարվում է հայ Արշակունիների թվում միանգամայն թույլ միապետ) գահակալության ժամանակ նրա խորհրդատու Հայր Մարգարեի քսությունների և դավերի մասին, որոնք պատճառ դարձան հայկական նախարարական մի շարք տների բնաջնջմանը, իմիջիպայրոց գրում է. «Բայց քան զամենեսին աւելի այր մի անօրէն և այսամուտ, որ աւելի ընդ ազգս նախարարցն գրուէր զթագաւորն Տիրան: Այս ինքն ունէր զպատիւն մեծի մարդպետութեանն, այր ներքինի՝ չարասիրտ, չարխորհուրդ, չարագործ, որում Հայր կոչէին: Զբազումս ի նախարարացն ետ քսութեամբ առանց վնասու կոտորել, և խանգարեաց զմեծ տէրութիւն թագաւորութեանն:

Մանաւանդ աւելի զերկու տոհման զաւագս տայր իւրով չարխօսութեամբն հանել ընդ սուր, և անունդ առնել միահաղոյն զտոհման Ռշտունեաց և զտոհմն Արծրունեաց. բառնային ի միջոյ առանց ամենայն վնասու և յանցման, մինչ անգամ և զէզան կոտորեցին ազգացն»⁵⁸:

Բնականաբար իր հպատակների կյանքի տերը համարվող հայոց արքան միաժամանակ գերագույն տերն էր նաև նրանց ինչքի: Ուստի և նախարարական այս կամ այն տունը բնաջնջելուց հետո, հայոց թագավորը իրեն իրավունք էր վերապահում ունեզրկելու ամբողջ տոհմը և բռնագրավված ամբողջ ունեցվածքը տնօրինելու իր հայեցողությամբ՝ նվիրել որևէ մեկ այլ նախարարական տոհմի կամ «յարքունիս առնել»:

Հայաստանում արքայի և ավագանու միջև գոյություն ունեցած այդպիսի հարաբերությունները, երբ ստորադրյալների կյանքն ու ինչքը միապետի կամայականության առարկան էր, նկատելի են դեռևս նախորդ Արտաշեսյան թագավորների ժամանակ: Այդ երևույթի լավագույն ապացույցը կարելի է համարել մեր պատմահօր այն վկայությունը, թե Տիգրան Մեծը «ցասուցեալ ընդ Վահուճիսն ... ընկենու զնոսա ի քրմութենէն, և զգիւղն յարքունիս առնու ... »⁵⁹:

(58) Փափստոս Բուզանդ, Գ, Ժբ:

(59) Մովսես Խորենացի, Բ, Ժդ:

Հունական աղբյուրներում ևս պահպանվել է ուշագրավ մի տեղեկութուն, որն իր բնույթով լրացնում է խորենացու վերոհիշյալ վկայությունը: Հայտնի է, որ Տիգրան Մեծին հաջողվեց իր թագավորության սահմաններն ընդարձակել աշխարհագրական բոլոր չորս ուղղություններով և ժամանակավորապես իր իշխանությունը տարածել լայնարձակ երկրամասերի վրա: Երբ արդեն նրա տերությունն սահմանները տարածվեցին Կովկասից մինչև Պաղեստին, հայոց թագավորի առաջ ծառայցավ իր տիրույթների կենտրոնում մի նոր մայրաքաղաք ունենալու հրամայական պահանջը, քանի որ քաղաքամայր Արտաշատը մնում էր նորաստեղծ լայնարձակ թագավորության հյուսիս-արևելյան ծայրամասում, իսկ նորանվաճ Անտիոքը, Սելևկյանների մայրաքաղաքը, իր օտար բնակչույթյամբ էլ կարող վստահությունները Տիգրանին⁶⁰: Այդ իսկ պատճառով, նա ձեռնամուխ եղավ իր քաղաքի՝ Տիգրանակերտի կառուցմանը: Այդ նպատակով Հայաստանի «արքայից արքան» շարժման մեջ գրեց իր տրամադրություն տակ գտնված բոլոր միջոցները. օտար ռազմագերիներ, կառուցող վարպետներ, անհաշիվ ռազմաուսուցիչներ, ինչպես նաև Հայաստան երկրում նկատված բոլոր հնարավորությունները, կանգ չառնելով նույնիսկ հայկական ավագանուն ունեզրկելու սպառնալիքի առաջ: Ահա թե այս առնչությունով ինչ է գրում Ապպինոսը. «Այստեղ նա (Տիգրանը — Ս.Կ.) հավաքեց իր տերությունն ամենահայտնի մարդկանց, սպառնալով նրանց, որ այն, ինչ էն վերցնի իրենց հետ՝ կբռնագրավվի»⁶¹:

Անկասկած Տիգրանի այս սպառնալիքը իր որոշակի ազդեցությունը ունեցավ. քանզի Պլուտարքոսը ևս, անդրադառնալով Տիգրանակերտի կառուցման հանգամանքներին, վկայում է, որ «ամեն մի հասարակ մարդ և իշխանավոր (δυσνύστος), թագավորի նկատմամբ ունեցած հարգանքից, իրար հետ մրցում էին քաղաքի կառուցման և ընդարձակման համար»⁶²:

Տեսնենք, թե հայոց արքան ինչպե՞ս էր վարվում շնորհագուրդ եղած հանցապարտ նախարարներից խլված ինչքի հետ: Պարզվում է, որ նա այդ ամենը օգտագործում էր երկակի կամ

(60) Ս.Մ. Կրկաշարյան, Սինոլիստոսը հելլենիստական Փոքր Ասիայում և Հայաստանում, ՊԲՀ, 1964, Նո 1, էջ 113:

(61) Appinai Mithrid., 64.

(62) Plutarchi Lucull., XXVI.

բռնագրավում էր արքունիքի օգտին՝ «յարքունիս առնէր», և կամ պարզևում էր իր մերձավորներին և հավատարիմ նախարարներին: Խորենացու և Փավստոսի մատյաններում արձանագրված ենք տեսնում Արշակունյաց Հայաստանում կատարված մի շարք նման դեպքեր, որոնք ժամանակի քաղաքական և սոցիալական ցնցումների պերճախոս վկայութուններն են:

Վերևում մենք խոսեցինք Սլկունյաց Սղուկ նահապետի ապստամբության մասին: Տրդատ Մեծը այդ ապստամբութունը զսպելու նպատակով, դիմում է Հայաստանի բոլոր նախարարներին, ասելով. «Որ ոք ածցէ առ իս զնահապետն Սլկունեաց՝ տաց նմա յաւիտենական իշխանութեամբ զգեօղս և զդաստակերտս, և զամենայն իշխանութիւն ազգին Սլկունեաց»⁶³:

Արձագանքելով արքայի այդ կոչին, Ճենազյա Մամգոնը (ըստ Խորենացու Մամիկոնյան տոհմի նահապետը) հանձն առավ գլուխ բերել այդ գործը: Նրան հաջողվեց իվերջո խաբեությամբ կործանել Սղուկ Սլկունուն, որից հետո Տրդատ թագավորը Մամգունին շնորհեց հրովարտակ՝ «իշխել նմա ամենայնի զոր խոստացաւն, և կարգէ զնա նախարար ի տեղի ապստամբին, անուանելով յանուն իւր Մամգոնեան»⁶⁴:

Նույնպիսի մի դեպք կատարվում է նաև Տիրան թագավորի օրով Ռշտունյաց Ջորա նահապետի հետ, որը հայոց հարավային գնդի գորապետն էր: Ջորան ընդվզում է Տիրան Արշակունու դեմ այն բանի համար, որ սա, բյուզանդական կայսր Հուլիանոս Ուրացողից վախենալով, մահվան է ենթարկում Հուսիկ եպիսկոպոսին և Գրիգոր Լուսավորչի աշակերտ և սպասավոր ծերունի Դանիէլ քահանային:

«Տեսեալ զայս Տիրանայ, — գրում է Խորենացին, — և յոյժ զարհուրեալ՝ առաքէ զմարդպետն կոչեցեալ Հայր, և հանդերձ երդմամբ կոչէ առ ինքն զՋորայ: Իսկ զօրաց նորա տեսեալ, թե լուեալ կան նախարարքն ամենայն՝ ըստ սովորական անժուժութեան մերոյ ազգիս ցրուեցան ի տունս իւրաքանչիւր: Եւ միայնացեալ Ջորայ, գայ առ արքայ յոչ կամաց. և արքայի զՋորայ ի բուռն առեալ՝ ունի և զամուրն նոցին զԱղթամար, և բառնայ զամենեսին սասակմամբ: Բայց զմանուկ մի, որդի Մեհենդակայ

(63) Մովսէս Խորենացի, Բ, ձգ:

(64) Նույն տեղում:

եղբօր նորա, փախուցեալ դայեկացն ապրեցուցին: Իսկ արքայ փոխանակ նորա կարգէ զՍաղամութ տէր Անծըտայ»⁶⁵:

Նմանօրինակ բազմաթիվ վկայություններ կարելի է քաղել մեր մատենագրությունից, բայց այսքանով բավարարվենք. այժմ նշենք մի քանի դեպք ևս, երբ հայոց արքան բռնագրավում է այս կամ այն անձնավորության ունեցվածքը և տիրույթները ոչ թե իր մերձավորներից մեկ ուրիշին վերապարգևելու, այլ ինքը սեփականելու նպատակով:

Այսպես, Խորենացին մանրամասն պատմելով Արշակ թագավորի ձեռքով Գնելի սպանության մասին, գրում է, որ երբ Ներսես կաթողիկոսն իմացավ այդ, անիծելով Արշակին և սպանության առիթ եղողին, հեռացավ և օրերով սուգ պահեց: «Իսկ Արշակ ոչ զղջացեալ ապաշուեաց, այլ անամօթեալ, ազահելով ի գանձս սպանելոյն և ի ժառանգութիւն՝ յաւել առնուլ զկին նորին Փառանձեմ»⁶⁶:

Մեկ ուրիշ անգամ պատմահայրը գրում է, թե երբ Ներսես Եպիսկոպոսապետը բացակայում էր երկրից, Արշակ թագավորը, օգտվելով առիթից, զրժեց նախարարներին տված իր խոստումը, կամենալով իր ձեռակերտի՝ Արշակավանի կործանման համար վրեժ լուծել նրանցից: «Եւ կոտորեաց զբազումս ի նախարարցն, մանաւանդ զազգն կամսարականաց բառնայր ի միջոյ, չարակներով ազահեալ յամուրն Արտագերս և ի քաղաք ոստանի նոցա Երուանդաշատ»⁶⁷:

Խորենացու մեկ ուրիշ վկայության համաձայն, քիչ ժամանակ անց, նման քայլի դիմում է նաև այնպիսի թույլ իշխանություն ունեցող մի թագավոր, ինչպիսին Խոսրով Վերջինն էր (385-388 թթ.): Ինչպես հայտնի է, Վարազդատ Արշակունու մահից հետո Հայաստանը փաստորեն երկու մասի բաժանվեց. մի մասի վրա, որը Բյուզանդիայի կողմում էր, թագավորեց Արշակը, իսկ մյուս՝ առավել մեծ մասի վրա պարսից արքա Շապուհը թագավոր կարգեց Խոսրովին: Մինչ այդ, սակայն, պարսկական հատվածում տիրույթներ ունեցող հայ նախարարները, ապահովության համար, արդեն ապաստանել էին Արշակի մոտ: Բայց Հայաստանի պարսկական մասում Խոսրովի թագա-

(65) Մովսես Խորենացի, Գ, ԺԳ:

(66) Նույն տեղում, Գ, իութ:

(67) Մովսես Խորենացի, Գ, լս:

վոր կարգվելուց հետո, երբ Սասանյան Շապուհ արքան հավաստիացրեց նրանց անձի և ինչքի ապահովությունը, նրանց մի մասը վերադարձավ Խոսրովի մոտ, իսկ մյուս մասը, չանսարով հրավերին, մնաց Բյուզանդիայի կողմում: «Վասն որոյ, — շարունակում է Խորենացին, — զժառանգութիւնս նոցա կալաւ Խոսրով յարքունիս հրամանաւ Շապուհ, և ոչ եթող զկալուածս որդւոյ ի հայր, և ոչ զեղբօր յեղբայր»⁶⁸: Նույն այս Խոսրովը, ի պատասխան նախարարների ունեզրկված մասի դիմումին, որոնք ցանկանում էին վերադառնալ նրա մոտ, եթե արքան խոստանար վերադարձնել իրենցից բռնագրավված կալվածները, իմիջիայլոց գրում է. «Երկրորդ՝ դարձուցանել ի ձեզ ժառանգութիւնս ձեր, զոր ունիմք յարքունիս. բայց յայնմանէ, զոր ումեք պարգևեցաք, զի ոչ չրջին պարգևք թագաւորացն առանց վնասու»⁶⁹:

Հայոց թագավորների կատարած հողային և ինչքի բռնագրավումների մասին մեր հայրենի մատենագրության մեջ պահպանված վկայությունների ամբողջությանը ծանոթանալիս, ակնառու է դառնում հետաքրքիր մի հանգամանք: Այս կամ այն առիթով ու պատրվակով հայոց արքայի կողմից կատարված բռնագրավումների մասին մեր պատմիչների հաղորդումները հիմնականում վերաբերում են հայ Արշակունիների թագավորության վերջին հարյուրամյակին, երբ կենտրոնական իշխանությունը երկրում համեմատաբար թուլացել էր և գլուխ էին բարձրացրել կենտրոնախույս ուժերը՝ Փեոդալականացող նախարարները: Այս փաստը կարելի է համարել հետևանքն այն բանի, որ մեր անդրանիկ մատենագիրները իրենց շարադրանքներում հիմնականում պատկերել են մ.թ. IV դարից հետո Հայաստանում ստեղծված քաղաքական և սոցիալ-տնտեսական իրավիճակը: Այսպես, Ագաթանգեղոսը պատմում է Տրդատ Գ-ի ժամանակաշրջանի Հայաստանի մասին, անդրադառնալով մասամբ նաև Տրդատի հոր՝ Խոսրովի թագավորության տարիներին կատարված դեպքերին, իսկ Փավստոս Բուզանդը՝ Տրդատ Գ-ի հաջորդ Խոսրով Կոտակից (330–338 թթ.) մինչև Հայաստանի առաջին բաժանումը Բյուզանդիայի և Սասանյան Պարսկաստանի միջև 387 թվականին: Հետևաբար, ուսումնասիրողն իզուր կփորձեր նրանց

(68) Նույն տեղում, Գ, խզ:

(69) Մովսես Խորենացի, Գ, խբ:

մատյաններում Արշակունիների թագավորության առաջին շրջանում կատարված հողային բռնագրավումներին վերաբերող որևէ վկայության հանգիպել էլ չենք խոսում Կորյունի, Եղիշեի և Ղազար Փարպեցու մասին, որոնք անդրադարձել են ավելի ուշ տարիների առանձին դեպքերին: Հարց է ծագում. իսկ Խորենացի⁶⁹: Չէ՞ որ նա իր դարակազմիկ մատյանում հայ ժողովրդի անցյալ պատմությունը շարադրելիս, միանգամայն հնարավորություն ուներ, նույնիսկ պարտավոր էր, արձանագրելու նման փաստերը: Բայց պատմահայրը ևս բացառություն չի կազմում: Հողային բռնագրավումների մասին նրա հաղորդած տեղեկությունները վերաբերում են մ.թ. IV դարից, այն է՝ Տրդատ Գ-ից այս կողմն ընկած ժամանակաշրջանին, եթե հաշվի չառնենք նրա այն եզակի վկայությունը, թե Տիգրան արքան «ցասուցեալ ընդ Վահուհիսն, ընկենու զնոսս ի քրմութենէն, և զգիւղն յարքունիս առնու ...»⁷⁰:

Նման հանգամանքներում թվում է, թե հնարավոր է անել այն ենթադրությունը, որ մեր վաղ միջնադարյան պատմիչները զրկված են եղել անցյալի այդօրինակ դեպքերի մասին տվյալներից և գրել են իրենց ապրած ժամանակաշրջանի դեպքերի թարմ տպավորությունների տակ: Սակայն Խորենացու վերոհիշյալ միակ վկայությունը Տիգրանի և Վահուհիների միջև տեղի ունեցած միջադեպի մասին մեզ թելադրում է ավելի շուտ կարծել, թե այդպիսի դեպքեր նախորդ դարերում չեն կատարվել, և եթե նույնիսկ տեղի են ունեցել, ապա շատ սահմանափակ չափերով: Հակառակ դեպքում, թագավորի և ազնվականության վերնախավի միջև գնացող երբեմն խուլ, հաճախ բացահայտ պայքարն ու դրա նշանակությունն ըմբռնող խորաթափանց պատմահայրը առիթը բաց չէր թողնի այդ մասին հիշատակելու:

Բռնագրավումների ճանապարհով հողային հարցերը լուծելու եղանակը, մեր կարծիքով, նոր երևույթ էր հայ Արշակունիների թագավորության վերջին հարյուրամյակի համար: Արդ, ինչո՞վ էր պայմանավորված վերջին Արշակունիների այդպիսի քաղաքականությունը: Դրա արմատներն, անկասկած, շատ ավելի խորն են, քան կարելի է ենթադրել սկզբնաղբյուրների նախնական ուսումնասիրությունից: Դրանք պիտի փնտրել հին Հայաս-

(70) Մովսես Խորենացի, Բ, Ժդ:

տանի սոցիալ-տնտեսական կյանքում իշխանության առաջին երկու դարերի ընթացքում տեղի ունեցած հական փոփոխությունների մեջ:

Այլ մի առնչությամբ մենք արդեն խոսել ենք այն մասին, թե Արևելքի հելլենիստական մյուս երկրների թագավորների նման, Արտաշեսյանները ևս, հատկապես Արտաշես Ա-ը և Տիգրան Բ-ը, Հայաստանն իրավամբ համարում էին իրենց նիզակով նվաճված երկիր (δορικητος χωρα), որը ամբողջապես պատկանում էր իրենց, իբրև սեփականություն: Իր համար Հայաստանի նկատմամբ տերունական նույնպիսի դեր վերապահելու բոլոր հիմքերն ուներ նաև Տրդատ Ա Արշակունին, որը Հայաստանի ամեն մի թիզ հողին տեր էր դարձել օտարերկրյա նվաճողների դեմ մղած դաժան ու երկարատև մարտերից հետո: Այս իրավիճակի արտահայտությունը պիտի համարել Փառնիի հունարեն արձանագրության մեջ Տրդատի իշխանության մասին տրված «ἀνάσσειν ὡς δεσπότης» (թագավորելով իբրև ղեսպոտ) բնորոշումը:

Հակառակը հաստատող փաստերի չգոյության պայմաններում, մենք հակված ենք ենթադրելու, որ հայոց առաջին Արշակունի թագավորի ժամանակ ամբողջ Հայաստանը, հելլենիստական թագավորությունների նման, համարվում էր արքունի երկիր (χωρα βασιλική), արքայի սեփականություն, ուստի և երկրի որևէ հատվածը մեկ ուրիշից բռնագրավելու անհրաժեշտություն չէր կարող ծագել: Եթե արքան ցանկանար իր մերձավորներից որևէ մեկին այս կամ այն առիթով հողային նվիրատվություն անել, ապա իր այդ ցանկությունը նա կարող էր իրագործել առանց ուրիշի շահերին դիպչելու. մի բան, որ արդեն հնարավոր չէր մ.թ. IV-V դարերում, երբ հայ նախարարների սիրույթները աստիճանաբար աճել էին ի հաշիվ արքունի երկրի, իսկ վերջինս անհամեմատ կրճատվել էր:

Հիրավի, եթե հաստատվի մեր այն տեսակետը, թե Ապարանի հունարեն արձանագրությունը վերաբերում է ոչ թե Տրդատ Գ-ին, այլ՝ Տրդատ Ա-ին⁷¹, ապա մենք կ'ունենանք անփխտելի ապացույցն այն բանի, որ Արշակունյաց հարստու-

(71) Ապարանի հունարեն արձանագրության առաջին հրատարակիչ Ս. Ի. Ռոստովցևը իրեն հատուկ բարեխղճությամբ ուսումնասիրել է այն (М.И. Ростовцев, Апаранская надпись царя Тирidata. Лийская

թյան հիմնադիրը Գնդունիների տոհմից Հուադամիստի (արձանագրության մեջ՝ Ῥοδομίστρου կամ Ῥοδομίθρου) որդուն, հավանաբար նրա մատուցած ինչ-որ ծառայության ղիմաց,

серия, N^o 6, СПб., 1911): նա իրավամբ նշում է որ արձանագրությունը պետք է վերաբերի Արշակունի երեք Տրդատներից մեկին, քանի որ դրանում կարգում ենք՝ Τιριδάτης ὁ μέγας Μεγάλης Ἀρμενίας βασιλεύς «Տրդատ Մեծ, Մեծ Հայքի թագավոր»: Մ. Ի. Ռոստովցևը ենթադրում էր, որ այն պետք է լինի Հայոց Տրդատ Գ թագավորը, քանի որ, նրա կարծիքով, արձանագրության վերջում պահպանվել են մի երկու տառի հետքեր, որոնք նշում են 305 թվականը: Այսպիսի թվագրման ավելի քան կասկածելի լինելը նշել է դեռևս Կ.Վ. Տրեվերը (К.В. Тревер, Очерки по истории культуры древней Армении, т. I, М.-Л., 1953, էջ 276-282): Մ. Ի. Ռոստովցևի առաջարկած թվագրմանը չի առարկում Հ. Մանանդյանը (Բնական տեսություն ..., հ. Բ, մաս Ա, էջ 122): Բ.Ն. Առաքելյանը գտնում է, որ արձանագրության մեջ հիշատակված Տրդատ թագավորը հավասարապես կարող է լինել և Ա-ը, և Գ-ը (Բ.Ն. Առաքելյան, «Կոչիկը» որպես սոցիալական տերմին, Արմֆանի Տեղեկագիր, 1940, Նո. 3, էջ 78): Կ.Վ. Տրեվերը, իր հերթին, մանրամասն հետազոտելով ավյալ արձանագրությունը և այն համեմատելով Գառնիի հուշարեն արձանագրության հետ (մի բան, որի հնարավորությունը չունեն Խ. Ռոստովցևը այն պարզ պատճառով, որ վերջինս հայտնաբերվել է միայն 1945 թ.), վճռականորեն մերժում է Ապարանի արձանագրությունը Տրդատ Գ-ին վերաբերելու տեսակետը և գտնում, որ այն վերաբերում է Տրդատ Բ-ին (217-227 թթ.): Մենք գտնում ենք, որ Գառնիի և Ապարանի հուշարեն արձանագրությունները նույն ժամանակին են վերաբերում և դրանցում հիշատակված Մեծ Հայքի թագավոր Տրդատը միևնույն անձնավորությունն է՝ Հայաստանի Արշակունյաց թագավորության հիմնադիրը: Ի՞նչն է մեզ հիմք տալիս այդպես ենթադրելու. 1) Երկու արձանագրություններում Տրդատի թագավորական տիտղոսաչարի նույնությունը: 2) Երկու արձանագրություններում սառածաձևերի համընկնումը. մինչդեռ այդ սառերը բոլորովին այլ ձևերով են փորագրված III դ. վերջին – IV դ. սկզբին վերաբերող Տիգրանակերտի հուշարեն արձանագրության մեջ, որտեղ սառերն ընդհանրապես պատկերված են ավելի համաչափ, երկարավուն, ուղիղ անկյուններով: Առավել սարբերիչն այն է, որ Տիգրանակերտի արձանագրության մեջ կիրառվել է կապիլը (լիգատուրա) և հապավումը (C.F. Lehmann-Haupt, Eine griechische Inschrift aus der Spätzeit Tigranokertas, "Klio", VIII, 1908, էջ 447; К.В. Тревер ..., նշվաչխ., տախտակ 88-90). մի բան, որ իսպառ բացակայում է Գառնիի և Ապարանի արձանագրություններում: 3) Ապարանի արձանագրության բովանդակության ընդհանուր իմաստը:

պարգևուժ է Նիգ քաղաքն իր գավառով (πῶλιν Νίγην)⁷²:

Այս հարցում ոչ պակաս նշանակութիւն պիտի ունենար նաև այն, որ Արտաշեսի և Տիգրան Բ-ի օրոք կատարված արտաքին նվաճումները հնարավորութիւն էին տալիս հայոց թագաւորին նոր գրաված երկրամասերի հաշիւին բավարարել աճող ազնվականութեան հողային պահանջները, առանց ներքին բռնագրավումների: Հիշենք, որ Տիգրան Բ-ի եղբայր Գուրասը ստացել էր Միգդոնիա երկրամասը Մծբին կենտրոնով⁷³, իսկ իր մերձավորներից Բագարատին Տիգրանը նշանակել էր նոր նվաճված Կիլիկիայի և Ասորիքի կառավարիչ⁷⁴: Մինչդեռ հայ Արշակունիները, ամբողջ ժամանակ պարտակված մնալով Հայկական լեռնաշխարհի բնական-աշխարհագրական սահմանների մեջ և այն բանից հետո, երբ թագաւորի նախարարներին արած հողային նվիրատուութիւնների հետևանքով, մեծ չափերով կրճատվել էր արքունի երկիրը, ստիպված էին ազնվականութեան մի խմբին բավարարելու համար շնորհագրել մեկ ուրիշ մասին⁷⁵:

Դասակարգային հասարակութեան մեջ պետութեան քաղաքական գործունեութիւնն ընթանում է երկու ուղղութեամբ՝ արտաքին և ներքին: Այս պայմաններում թագաւորի, որպէս գերագույն իշխանութեան կրողի, ֆունկցիաները պետք է դրսևորվեին թե՛ արտաքին և թե՛ ներքին քաղաքականութեան բնագավառներում: Արտաքին քաղաքականութեան բնագավառում թագաւորը վարում էր պատերազմ հայտարարելու, օտար դերպաններին ընդունելու, գինակցային դաշինք կնքելու հարցերը անձամբ կամ իր կողմից հատուկ հանձնարարութեամբ ուղարկված պատվիրակի միջոցով:

(72) М.И. Ростовцев, *н.ч. աշխ.*, էջ 8:

(73) Plutarchi Lucull., 32: Հ.Հ. Մաննդյան, Քննական տեսութիւն ..., հ. Ա, էջ 151, 158, 208, 221: Նույնի՝ Տիգրան Բ-ը և Հուսիք, էջ 49, 56, 137, 159:

(74) Appiani Syr., 48.

(75) Արտաքին նվաճումների հնարավորութիւն ունենալը կամ չունենալը իր որոշակի անդրադարձումն է դառնում հին Հայաստանի սոցիալ-տնտեսական կյանքի այլ երևույթների վրա ևս, ինչպիսիք օրինակ՝ քաղաքաշինութիւնը և սինոյկիսմոսի հետ կապված խնդիրները: Այս մասին տես՝ Ս.Մ. Կրկյաշարյան, Սինոյկիսմոսը հելլենիստական Փոքր Ասիայում և Հայաստանում, ՊԲՀ, 1964, Նո 1, էջ 107-118:

Դեռևս Արտաշեսյան հարստության շրջանում հայոց թագավորները ունեցել են միջազգային որոշ հեղինակություն և մասնակցել նույնիսկ այլ երկրների միջև ծագած միջադեպերը հարթելու կապակցութեամբ գումարված վեհաժողովներին: Դրա լավագույն վկայությունը գտնում ենք Պոլիբիոսի մոտ: Հույն պատմիչը, նկարագրելով մ.թ.ա. 180 թվականին Փառնակ Պոնտացու և նրա դաշնակից Փոքր Հայքի տիրակալ Միհրդատի պատերազմը Պերգամոնի, Կապպադոկիայի և Բյութանիայի թագավորների կազմած դաշնակցության դեմ, հիշատակում է երկու կողմերի միջև ստորագրված հաշտության պայմանագիրը, որի կնքմանը մասնակից էր դարձել նաև «Արտաշեսը՝ Հայաստանի մեծագույն մասի տիրակալը»⁷⁶, Արտաշեսյան թագավորների, հատկապես Արտաշեսի, Տիգրան Բ-ի և նրա որդի Արտավազդի արտաքին քաղաքական լայն կապերի մասին հայ և օտար մատենագիրները մի շարք վկայություններ են պահպանել, որոնք բազմիցս դարձել են ուսումնասիրողների ուշադրության առարկան. ուստի և մենք ավելորդ ենք համարում դարձյալ անդրադառնալ դրանց:

Այս առնչությամբ ինչ-որ առանձնահատուկ նշանակություն է ստանում Ստրաբոնի վկայությունը Հայաստանին հարևան Իբերիայի մասին: Խոսելով այդ երկրում մ.թ.ա. II դարում տիրող հարաբերությունների մասին, նա հավաստում է այն փաստը, թե Իբերիան բնակեցված է չորս դասի (τέτταρα γένη) մարդկանց կողմից, թե «երկրորդը քրմերի դասն է, որոնց հանձնված է հարևանների հետ հարաբերություններ վարելու գործը»⁷⁷:

Այս հաղորդման իմաստը, մեր կարծիքով, այն է, որ քրմերը արտաքին հարաբերությունների հարցում կարևոր դեր էին խաղում, սակայն, անկասկած, երկրի արտաքին քաղաքականության սանձերը, վերջին հաշվով, գտնվում էին թագավորի ձեռքին և քրմերը, լավագույն դեպքում, կարող էին հանդես գալ սոսկ իբրև թագավորի հանձնակատարներ կամ թե խորհրդատուներ:

Ստրաբոնի ժամանակ, հավանաբար, Հայաստանում ևս քրմերը նման իրավասություններ ունեցել են, ինչպես Իբերիա-

(76) Polyb., XXV, 2, 1-12.

(77) Strabo., XII, 3, 6.

յում: Սակայն բոլոր հիմքերն ունենք ենթադրելու, որ Արշակունի Տրդատ Ա-ի թագավորության ժամանակ երկրի արտաքին քաղաքականությունը ամբողջովին վարում էր ինքը՝ հայոց թագավորը, քանի որ, ինչպես այդ մասին բազմիցս նշել ենք, Տրդատը եղել էր միաժամանակ թագավոր և քրմապետ:

Այստեղ անհրաժեշտ ենք համարում անել մի վերապահություն: Եթե Արտաշեսյանների ժամանակ հայոց թագավորը իվիճակի էր առավել ինքնուրույն արտաքին քաղաքականություն վարելու (բացի վերջին շրջանից, երբ հայոց թագավորը հայտարարվեց, «Հռոմի բարեկամ» *φίλος Ῥώμαιοσ*), ապա Տրդատի գահակալությամբ և նրա հաջորդների օրոք, երբ Հայաստանի գահը բաժին ընկավ պարթև Արշակունիների տոհմի կրտսեր ճյուղին, հայոց թագավորն իր արտաքին քաղաքական հարաբերություններում պետք է հաշվի առներ Պարսկաստանում գահակալող Արշակունիների ավագ ճյուղի շահերը, որոնք, ի դեպ, ձեռնտու էին նաև Հայաստանի համար: Մեր սասժի լավագույն վկայությունը հայ-պարթևական ավագանու ուղեկցությամբ Տրդատի Հռոմ կատարած ճանապարհորդությունն էր և այնտեղ Ներոն կայսեր հետ վարած բանակցությունները, որի պերճախոս նկարագրությունը մեզ թողել են անտիկ հեղինակները⁷⁸:

Հայ Արշակունիների արտաքին քաղաքականությունը կարող էր համընթաց լինել պարսկական արքունիքի շահերին հավանաբար մինչև Պասկաստանում Սասանյան հարստության հաստատումը (226 թ.):

Գառնիի հռենարեն արձանագրություն մեջ Տրդատի տիրոջոսաշարի մասին խոսելիս մենք նկատեցինք, որ այնտեղ հանդիպող *ἄνασσαν ὡς δεσπότης* (տիրելով իբրև դեսպոտ) արտահայտությունը բնութագրում է Տրդատի թագավորական իշխանության ներքին էությունը: Այս փաստից, ինչպես նաև նախորդ էջերում մեր ամբողջ շարադրածից հետևում է, որ հայոց արքան ինքնիշխան էր նաև ներքին քաղաքականության ասպարեզում, որտեղ ինքն էր հանդիսանում ե՛լ օրենքը, ե՛լ իրավունքի սղբյուրը:

Հնագույն այս ժամանակաշրջանի Հայաստանում կիրառված գրավոր օրենքների մասին մենք որոշակի տվյալներ չու-

(78) Dio Cass., LXIII, 1-7; Taciti Annales, XVI, 24; C. Plinii Nat. Hist., XXX, 16; XXXIII, 54; Sueton., Nero, XIII.

նենք, բայց մեզ հասած մի քանի կողմնակի տեղեկություններ հավանական են դարձնում այդպիսի օրենքների գոյության մասին ենթադրությունը: Հայտնի է, որ Տիգրան Բ-ը իր արշավանքների ժամանակ տասներկու հելլենական քաղաքներու բնակչությունը տեղահանեց ու փոխադրեց Հայաստան⁷⁹: Այդ քաղաքների թվում էր նաև Կապադոկիայի մայրաքաղաք Մաթաքը, որտեղ ինչպես վկայում է Ստրաբոնը, գործադրվում էին հույն օրենսդիր Քարոնդասի օրենքները⁸⁰: Նման պայմաններում միանգամայն հնարավոր է, որ այդ օրենքները, թեկուզ և ժամանակավոր կերպով, հույն գաղթականների հետ մուտք գործած լինեին հայկական քաղաքները, որտեղ բնակեցվել էին Տիգրանի կողմից տեղահանված հույները⁸¹: Այդ ժամանակ իրենց օրենքները կարող էին բերած լինել ոչ միայն հելլենական քաղաքներից տեղահանված բնակիչները, այլև այն հրեաները, որոնց Հայաստան էր քշել Տիգրանը: Պիտի ենթադրել, որ այս հրեաների օրենքները ավելի երկար կյանք են ունեցել Հայաստանում, քան հույների օրենքները, քանի որ Հռոմի դեմ Տիգրանի մղած պատերազմների ոչ բարեհաջող ելքից հետո քաղաքների հելլենական բնակչությունը վերադարձավ իր երկիրը, մինչդեռ հրեաները դեռևս երկար ժամանակ մնացին Հայաստանում, պահպանելով իրենց համայնքները: Դրա լավագույն վկայությունները մենք գտնում ենք Փավստոս Բուզանդի և Մովսես Խորենացու մոտ⁸²:

Հայոց թագավորի սահմանած օրենքների մասին ինչ-որ ընդհանուր կարգի տեղեկությունների մենք հանդիպում ենք Մովսես Խորենացու մատյանում: Այսպես, պատմաագրը նշում է, որ Վաղարշակը իր եղբոր՝ Արշակի կողմից Հայաստանի թագավոր հաստատվելուց հետո «կարգս կենցաղականս, որչափ մարթէր, սահմանեաց աշխարհիս»⁸³: Շարունակելով իր պատմությունը, Խորենացին դարձյալ խոսում է թագավորության մեջ Վաղարշակի սահմանած կարգերի՝ «օրէն թագաւորութեան» մասին⁸⁴:

(79) Strabo, XI, 14, 15 (C. 532).

(80) Նույն տեղում, XII, 2, 9 (C. 539).

(81) Հմմտ. Գ.Մ. Саркисян, Тигранакерт, М., 1960, էջ 64.

(82) Փավստոս Բուզանդ, Դ, ծե, իր: Մովսես Խորենացի, Գ, լե:

(83) Մովսես Խորենացի, Բ, գ:

(84) Նույն տեղում, Բ, է:

Այս կապակցութեամբ հետաքրքիր է նկատել, որ Վաղարշակը ոչ միայն օրենքներ էր սահմանել, այլև հատուկ պաշտոնյաների էր նշանակել, որոնք պարտավոր էին իր սահմանած օրենքների կատարմանը հետևելու: Այսպես պիտի հասկանալ խորենացու այն վկայութիւնը, թե Վաղարշակը սահմանում է «իրաւարարս ի տանն արքունի, իրաւարարս և ի քաղաքս և յաւանս»⁸⁵:

Դեռևս հին Արևելքի ստրկատիրական երկրներում, այդ թվում նաև Ուրարտու պետութեան մեջ ստեղծված հանգամանքներում, երբ ամբողջ երկիրը, իր հարստութեամբ հանդերձ, համարվում էր թագավորի սեփականութիւնը, արքաներն ունեին նաև ոչ պակաս կարևոր մի իրավունք՝ նոր քաղաքներ ու բերդեր հիմնելու և կառուցելու Փունկցիա: Որպես իլլյուստրացիա մեր սասածին, բավարարվենք հիշատակելով սոսկ Ուրարտուի տարածքի վրա թագավորների կողմից հիմնված (նշենք, որ այդ ամենը վկայված են սեպագիր արձանագրութիւններում) մի շարք քաղաքների ու բերդերի անունները, Սենուախինիլի, Ռուսախինիլի, Արգիշտիխինիլի, էրբեունի, Թեյշերաինի և այլն: Ինչպես նկատելի է, նորակառուցյ այդ քաղաքներն ու բերդ-բնակավայրերը շատ դեպքերում կոչվում էին թագավորի անունով:

Այնուհետև հելլենիստական ժամանակաշրջանում քաղաքաշինութեան մեջ այդ երևույթն իր հետագա զարգացումն ապրեց: Ալեքսանդր Մակեդոնացու և նրա հաջորդների կողմից Արևելքում կառուցված մեզ հայտնի քաղաքների սոսկ թվարկումն իսկ մեր սասածն ապացուցող ամենապերճախոս փաստը կարող է համարվել: Պատմութեանը հայտնի են մի շարք Ալեքսանդրիաներ, Անտիոքներ, Սելևկիաներ, Լասոգիկեաներ, Աբամեաներ և այլ դինաստիական անուններ կրող քաղաքներ: Հետագայում հելլենիստական մանր տերութիւնների տարածքի վրա առաջացան թագավորների անունը կրող Ատտալիա, Նիկոմեդիա, Պրուսիա, Արիարաթիա, Փառնակիա, Արսամեա և այլ քաղաքներ:

Ուրարտական քաղաքաշինութեան ավանդները ժառանգած և աստիճանաբար հելլենիզմի ոլորտը ներգրավվող Հայաստանը չէր կարող ամբողջ Արևելքն ընդգրկած քաղաքաշինութեան այս հուժկու շարժումից հեռու մնալ: Եվ պատահական չէ, որ Երվան-

(85) Նույն տեղում, Բ, Ը:

դուռնիների և Արտաշեսյանների թագավորության ժամանակ, Հայաստանում ևս առաջացան մի շարք նոր քաղաքներ, որոնք կրել են իրենց հիմնադիր թագավորի անունը՝ օրինակ՝ Երվանդաշատը, Արտաշատը, Տիգրանակերտը և այլն⁸⁶։ Հայկական հնագույն ավանդույթյան համաձայն, Արմավիր քաղաքը ևս կրում է իր հիմնադրի՝ Արամայիսի անունը։ Այդ առնչությամբ պատմահայրը գրում է «Իսկ որդի նորա (Արամանեկայ — Ս.Կ.) Արամայիս շինէ իւր տուն բնակութեան ի վերայ ոստոյ միոյ առ եզերք գետոյն, և անուանէ զնա յիւր անուն Արմաւիր»⁸⁷։ Նույնը կրկնում է նաև Սեբեոսը՝ գրելով. «Ձկի Արամանեկայ որդի նորա Արամայիս շինէ իւր ի վերայ գետեզրն տուն բնակութեան, և անուանէ զանուն նորա ըստ անուն իւրոյ Արամայիր»⁸⁸։

Նույն սկզբունքներով քաղաքաշինության այս ընթացքը Հայաստանում շարունակվեց նաև հետագայում՝ Արշակունիների թագավորության ժամանակ։ Քաղաքաշինության ասպարեզում Հայաստանի Արշակունիների գործունեությունն, իհարկե, չունեի այն թափը, ինչ նկատելի էր Արտաշեսյան թագավորների, հասկապես Արտաշեսի և Տիգրան Բ-ի գահակալության տարիներին։ Այսուհանդերձ, սկզբնաղբյուրներում կան մի շարք տվյալներ, որոնք թույլ են տալիս ենթադրելու, որ Արշակունի թագավորները ևս, իրենց նախորդների նման, ամեն հնարավորությամբ ի գործ են դրել, Հայաստանում շինարարական աշխատանքներին

(86) Я.А. Манандян, О торговле и городах Армении в связи с мировой торговлей древних времён, 2րդ հրատ. Երևան, 1954; С.Т. Еремян, Развитие городов и городской жизни в древней Армении, ВДИ, 1953, № 3, էջ 11 և հաջ.; Г.Х. Саркисян, Тигранакерт, М., 1960, стр. 30 և հաջ.; Ս.Մ. Կրկյաշարյան, Հին Հայաստանի և Փոքր Ասիայի քաղաքների պատմության դրվագներ, էջ 79-127:

(87) Մովսես Խորենացի, Ա, Ժբ:

(88) Պատմութիւն Սեբեոսի ի Հերակլին, Ա, ա: Նշենք, որ մեր մատենագիրների այս վկայություններն ունեն առասպելական բնույթ: Արմավիրի, որպես քաղաքի, առաջացման ընդհանուր պրոցեսի պատկերը, հավանաբար, չէր տարբերվում Արևելքում հին քաղաքների առաջացման ընդհանուր պրոցեսից, որտեղ նրանք առաջանում էին «իբրև քաղաքներ, որոնք կառուցվում էին տաճարի շուրջը, սերտ կերպով կապված էին տաճարի տերիտորիայով, այդ տաճարի տնտեսության հետ» (Н.В. Пигулевская, Города Ир: на в раннем средневековье, М.-Л., 1956, էջ 17):

զարկ տալու համար: Մծուրն, Վաղարշապատ, Արշակավան քաղաքների կառուցումը, ինչպես նաև Խոսրով Կոտակի կողմից Տիկնունյաց անտառի տնկումը, դրա լավագույն վկայություններն են: Արշակունի թագավորներից քաղաքաշինություններ գրադվել է հատկապես այդ հարստության հիմնադիր Տրդատ Ա-ը, որի անունը կրող քաղաք, ճիշտ է, մեզ հայտնի է, սակայն աղբյուրներից հետևում է, որ նա վերակառուցել է հռոմայեցիների կողմից հիմնովին ավերված Արտաշատ և Տիգրանակերտ քաղաքները: Բացի այդ, Գառնիի ամրոցի վերակառուցումը և Գառնիի հեթանոսական հոյակերտ տաճարի կառուցումն իսկ մեզ իրավունք կտար Տրդատին դասելու հայոց շինարար արքաների շարքը:

Տարածքային առումով երկրի գերագույն տերը լինելու հանգամանքով էր պայմանավորված հայոց թագավորի նաև այն իրավասությունը, ըստ որի ազնվականության ներկայացուցիչներից իր մերձավորներին այս կամ այն ծառայություն դիմաց նա ընդարձակ տիրույթներ, նույնիսկ ամբողջ գավառներ էր պարգևում: Այդ մասին բազմաթիվ վկայություններ կան Ագաթանգեղոսի, Փավստոսի և Խորենացու մոտ: Այս երևույթի խտացրած արտահայտությունը պիտի համարել Փավստոսի այն վկայությունը, թե երբ հայոց նախարարները գալիս են Ներսես եպիսկոպոսապետի մոտ Արշակ թագավորի բռնությունների դեմ գանգատվելու, կաթողիկոսը պատասխանում է. «Ձի ամենեքեան դուք աւարիկ կայք և վկայէք. մանաւանդ զի ամենեքեան դուք կեցեալ էք յազգէդ Արշակունոյ. ոմանք ի ձէնջ գաւառաւորք լեալք ի նոցանէն. և ոմանք մեծամեծք աշխարհաց. ոմանք աւագ աւագ աւանաց գեղից և գանձուց տեարք լեալ էք, և պէսպէս դաստակերտացն: Ձի թէպէտ և առ արարիչն աստուած յանցաւոր իցեն պեղծ ազգն Արշակունեաց, սակայն զձեզ կեցուցեալ զամենեսեան և յաղբոյ թօթափեալ է, զոմն գործով, զոմն պատուով, զոմն իշխանութեամբ, զոմն գործակալութեամբ»⁸⁹:

Այն մասին, որ Արշակունի թագավորը իրեն մատուցված ծառայության դիմաց հողային տիրույթներ էր պարգևում իր այս կամ այն հպատակին, մեր տրամադրություն տակ ունենք այնպիսի անժխտելի վավերագիր, ինչպիսին է արդեն մեր հիշա-

(89) Փավստոս Բուզանդ, Դ, ծա:

տակած Ապարանի հունարեն արձանագրությունը, որում դրոշմը-
ված է այն փաստը, թե Մեծ Հայքի թագավոր Տրդատը Նիգ քա-
ղաքը իր շրջակայքով պարզեում է Գնթունիներից մեկին:

Հայոց թագավորի՝ իր մերձավորներին շնորհած նույնպիսի
պարգևների մասին բազմաթիվ վկայություններ կան նաև մեր
պատմիչների մոտ: Ահա մեկ օրինակ խորենացուց. «Բայց թագա-
ւորին Տրդատոյ մխիթարել զգլուխ որդւոյն Կամարայ զԱրշա-
վիր՝ զինքն փոխանակ ծնողին սահմանելով, ազգ զնա սերէ յա-
նուն հօրն, և կարգէ ի թիւ նախարարութեանց: Յաւելու և այլ
պարգևս — զքաղաքն Երուանդայ և զնորին գաւառն մինչև ցկա-
տար նորոյն մեծի»⁹⁰:

Արշակունի թագավորները, իրենց նախորդների՝ Արտաշես-
յանների նման, հողային տիրույթներ պարզեել են ոչ միայն աշ-
խարհիկ ազնվականության ներկայացուցիչներին, այլև տաճար-
ներին ու եկեղեցիներին, ինչպես նաև եկեղեցու առանձին սպա-
սավորներին: Բերենք մեր պատմիչներից մի քանի վկայություն:

Ագաթանգեղոսը գրում է, որ քրիստոնեությունն ընդունե-
լուց հետո Տրդատ թագավորը «յամենայն իշխանութեան իւրում
առ հասարակ՝ գրեաց չորս չորս հողս երդոյ՝ յամենայն ագարակ
տեղիս, իսկ յաւանսն եօթն եօթն հողս երգոյ՝ ի ծառայութիւն
սպասաւորութեան քահանայութեանն, նուէր պտղոյ Տեառն
մատուցանէր»⁹¹:

Այս տեսակետից ուշագրավ է նաև Փափսոտոսի հետևյալ
վկայությունը. «Եւ հատ ևս յարքունիս Պոսպ թագաւոր զհող
եկեղեցւոյն, զոր տուեալ էր թագաւորին Տրդատոյ առ մեծաւն
Գրիգորիւ քահանայապետիւ ի սպաս պաշտաման եկեղեցւոյն ընդ
ամենայն երկիրն Հայոց»⁹²: Նույն Փափսոտոսը հայտնում է, որ
երբ խոսքով Կոտակի թագավորության ժամանակ բնաջինջ ար-
վեցին Մանավազյանների և Որդունիների նախարարական տոհ-
մերը, սրանց կալվածքները տրվեցին Աղբիանոսին և Բասենի
եպիսկոպոսին. «Եւ ետ (խոսքով — Ս.Կ.) զաւանն և զբուն գահոյց
գեղն նահապետին Մանաւազենից եպիսկոպոսին Աղբիանոսի
յեկեղեցի՝ զՄանաւազակերտ ամենայն սահմանօքն և դաւառա-

(90) Մովսէս Խորենացի, Բ, գ: Հմմտ. նաև՝ Խորենացի, Բ, ձր և Փափսոտոս
Բուզանդ, Դ, ծա:

(91) Ագաթանգեղոս, ՃԺԹ

(92) Փափսոտոս Բուզանդ, Ե, լա:

կան հանդերձ, որ շուրջ զնովոք էր, որ կայ ի կողմանս գետոյն Եփրատայ: Եւ ետուն զբուն գեղն Որդունւոյ, որոյ անուն էր Որդուրու ուստի⁹³ եպիսկոպոս Բասանու ամենայն սահմանօքն հանդերձ, որ ինքն իսկ է յերկրին Բասանու»⁹⁴:

Հոգևորականներին տրված այս և նման նվիրատվությունների, ինչպես նաև հեթանոսական տաճարների ունեցվածքը քրիստոնեական եկեղեցուն ու նրա նորընծա սպասաւորներին անցնելու հետևանքով, արդեն IV դարի կեսերին Հայաստանում ստեղծվել էր այնպիսի դրուլթյուն, երբ երկրի զգալի մասերը կենտրոնացել էին կղերի ձեռքին: Անկասելի կերպով աճում էր եկեղեցապատկան հողատիրությունը ի հաշիվ արքունի և աշխարհիկ հողատիրության: Այս հանգամանքն էլ պայմանավորեց աշխարհիկ և հոգևոր հողատերերի սոցիալական լուրջ հետևանքներով հղի հակամարտությունը: Այդ հակամարտության առաջին արտահայտություններից մեկը պիտի համարել Փափսոսի մոտ պահպանված հետևյալ պատումը:

Հայր Մարդպետը⁹⁵ Աշտիշատի եկեղեցական կալվածքներում շրջելիս, տեսնում և հիանում է այդ ընդարձակ և գեղատեսիլ վայրերով և սկսում նախատինք թափել Տրդատի և առ հասարակ հայոց Արշակունի թագավորների վրա: «Զի ա՞րդ, ասէ, զայսպիսի տեղիս կանանցահանդերձ մարդկան տուեալ է, և ոչ արանց ... և ասէր՝ եթե զայստեղիս ի բաց քակեմք, զի սոստ պարտ է շինել զապարանս արքունի: Եւ թէ ես Հայր մարդպետ կենդանի իցեմ և առ թագաւորաւն հասից, ասէ, որ ինչ սոտ իցէ, զայն ի բաց փոխեցից. և որ սոտ իցեն, ասէ, զնոսա հանից, և գտեղիս՝ արքունի սենեակ կազմեցից»⁹⁶:

Արշակունի թագավորի կարևորագույն իրավունքներից էր նաև իր գերիշխանության տակ գտնվող երկրամասերի վրա կառավարիչներ, ինչպես նաև արքունի պաշտոնյաներ, գործակալներ նշանակելը: Այդ մասին մի շարք վկայություններ կան սփռված խորենացու և Փափսոսի մատույաններում: Այս հարցին վերաբերող ամենահայտնի աղբյուրը, սակայն, խորենացու «Հայոց պատմության» երկրորդ գրքի 7-րդ և 8-րդ գլուխներն են,

(93) Յ. Մարկվարտն «ուստի» բուն ուղղում է՝ «Եւստղի» (J. Markwart. Die Entstehung der armenischen Bistümer; Rom, 1932, էջ 165).

(94) Փափսոս Բուզանդ, Գ, գ:

(95) Այս պաշտոնի մասին կը խոսվի ստորև:

(96) Փափսոս Բուզանդ, Դ, Ժգ:

որոնցում պատմվում է Վաղարշակ թագավորի վարչական բարե-
նորոգումների մասին. դրանց բովանդակությունը այլ առիթ-
ներով մենք հատվածաբար կանդրադառնանք ստորև. ուստի և
հարկ չենք համարում այդ երկար գլուխներն այստեղ մեջ բերել:

Հին Հայաստանում թագավորական իշխանությունը Ար-
տաշեսյանների ժամանակ եղել է ժառանգական, անցել է հորից
որդի. արքայի անգավակ մահանալու դեպքում գահը ժառանգել
է նրա եղբայրը կամ ամենամոտիկ ազգականը: Այդ են վկայում
անտիկ հեղինակների մոտ Հայաստանի մասին պահպանված վկա-
յությունները: Գահակալման իրավունքները ժառանգական են
եղել նաև հելլենիստական մյուս պետություններում՝ Պտղոմեոս-
յան Եգիպտոսում, Սելևկյանների տերություն մեջ, Պերգամոնում,
Կապպադովկիայում, Պոնտոսում և այլն: Սակայն այդ նույնը չի
կարելի հաստատել Հայաստանում Արշակունիների թագավորու-
թյան սկզբնական շրջանի մասին: Ճիշտ է, մեր մատենագիրների
մոտ պահպանված վկայությունների համաձայն Հայաստանի
գահը ժառանգաբար անցնում է հորից որդի, սակայն այդ պատ-
միչները (նկատի չունենք Խորենացուն և Սեբեոսին) պատկերել
են Հայաստանում Արշակունյաց թագավորության երկրորդ կեսը,
այն էլ Պարսկաստանում Սասանյանների հարստության հաստա-
տումից հետո ընկած ժամանակահատվածը: Մեր կարծիքով,
Հայաստանում թագավորական իշխանություն ժառանգաբար հո-
րից որդուն անցնելու հարցում շատ կարևոր նշանակություն
ունեցել է Պարսկաստանում Արշակունիների տապալումը և Սա-
սանյանների իշխանության գլուխ անցնելը: Բանն այն է, որ
Հայաստանում Տրդատ Ա-ի թագավորությունը (66 թ.), ինչպես
նշել ենք, գահն անցավ Արշակունյաց տոհմի կրտսեր ճյուղին:

Մինչև Տրդատի թագավորելը, Հայաստանը, ինչպես ասվեց,
դարձել էր պարթևների և Հռոմի միջև պայքարի մրցասպարեզ:
Հռոմում պարթևների թեկնածու Տրդատի թագադրությունը,
ասես յուրատեսակ համաձայնություն հաստատվեց երկու մրցա-
կից տերությունների միջև, ըստ որի ամեն անգամ, երբ
Հայաստանի «թագավորական գահը թափուր էր լինում, պարթև
Արշակունիների թագավորական տոհմից ներկայացվելու էր հռո-
մեական կայսրությունի հաստատություն հարմար ու ընդունելի
թեկնածու»⁹⁷: Հասկանալի է, որ տվյալ պայմաններում խոսք

(97) Հ. Հ. Մանանդյան, Քննական տեսություն ..., հ. Բ, մաս Ա, էջ 19:

անգամ չի կարող լինել հայկական գահի ժառանգաբար հորից որդուն անցնելու մասին:

Այս նույն եզրակացության են հանգել նաև «Հայ ժողովրդի պատմության» բուհական դասագրքի հեղինակները, գրելով. «Չնայած Արշակունյաց դինաստիայի հաստատմանը, մինչև Ս դարի վերջը հայկական գահը ժառանգաբար չէր անցնում Հայաստանի Արշակունի թագավորների որդիներին: Հռանդեայի դաշնագրի հիման վրա՝ յուրաքանչյուր թագավորի մահից հետո պարթև Արշակունիները հայկական գահի համար իրենց տոհմից առաջարկում էին նոր թեկնածու, որը կարող էր թագավորել հռոմեական կայսրության հավանությունը և հաստատությունը ստանալուց հետո միայն»⁹⁸:

Ակներև է, որ Արշակունյաց Հայաստանում գահակալման ժառանգության կարգի վերաբերյալ այս նույն կարծիքին է նաև Ս.Տ. Երեմյանը, երբ վերջերս անդրադառնալով Սասանյան Շապուհ Ա-ի թողած եռակեզվյան արձանագրության տվյալներին, իմիջիայլուց գրում է. «Մովսես Խորենացու հիշյալ (Երկրորդ գրքի 71-79 — Ս.Կ.) գլուխները նվիրված են ՍԳ դարի պատմական դեպքերի նկարագրությանը, երբ Մեծ Հայքի գահի վրա իբրև ժառանգական գահակալներ նոր էին հաստատվել հայ Արշակունիները»⁹⁹:

Այս հարցը, ինչ խոսք, չի կարելի վերջնականապես լուծել, առանց հաստատապես վերականգնելու Արշակունյաց Հայաստանի քաղաքական պատմությունը մեզ հետաքրքրող ժամանակահատվածում. մի բան, որ դեռևս լիովին հնարավոր չէ սկզբնաղբյուրների արդի վիճակում: Այդ ուղղությամբ մինչև այժմ ամենահաջող փորձը պիտի համարել ակադ. Հ.Հ. Մանանդյանի «Քննական տեսություն հայ ժողովրդի պատմության» Բ հատորի և «Հայ ժողովրդի պատմության» ութհատորյակի 1 հատորի համապատասխան հատվածները¹⁰⁰: Հետևելով Հ.Հ. Մանանդյանի շարադրանքին, դարձյալ տեսնում ենք, որ նշված ժամանակահատվածում, այն է՝ Տրդատ Ա-ից մինչև Ս դարի վերջը, Հայաս-

(98) Հայ ժողովրդի պատմություն (բուհական ձեռնարկ), Կ. 1, Երևան, 1963, էջ 240:

(99) Ս.Տ. Երեմյան, Նախ-ի-Ռուստեմի «Քաաբա ի Զարդուշտ» հուշարձանի արձանագրության վկայությունները ..., էջ 60:

(100) Հ.Հ. Մանանդյան, Քննական տեսություն ..., Կ. Բ, մաս Ա, էջ 19-62: Հայ ժողովրդի պատմություն, Կ. 1, Երևան, 1971, էջ 765-795:

տանում չէր կարող գոյութիւն ունեցած լինել գահակալման ժառանգականութիւն: Համոզվելու համար համառոտակի շարադրենք Տրդատից հետո մինչև Սասանյաններն ընկած ժամանակահատվածում գահակալած Արշակունի թագավորների ընդհանուր տվյալները:

Տրդատ Ա-ից հետո Հայաստանի գահի վրա տեսնում ենք Սանատրուկին (75-110 թթ.), որի մասին մեզ սակավ տեղեկութիւններ են հասել: Նա ծագումով Արշակունի տոհմից էր, բայց նրա՝ Տրդատի որդին լինելու մասին ոչ մի տվյալ չունենք: այս էլ, հավանաբար, պատմական ճշմարտութեան արտացոլումն է: Սանատրուկին հաջորդում է պարթևական Բակուր Բ թագավորի որդի Աշխադարը (110-113 թթ.): Սա գահընկեց է արվում և պարսկական գահի վրա Բակուրին հաջորդած Խոսրով թագավորը նրա փոխարեն հայոց թագավոր է կարգում Բակուրի մյուս որդուն՝ Պարթամասիրին (113-114 թթ.): Այնուհետև երեք տարի, Տրայանոս կայսեր արևելյան արշավանքի հետևանքով, Հայաստանը ժամանակավորապես զրկվում է թագավորութիւնից և օկուպացվում հռոմեական լեգեոնների կողմից: Տրայանոսի մահից հետո վերականգնվում է հայկական թագավորութիւնը և գահին բազմում է վերոհիշյալ Սանատրուկի որդին՝ Վաղարշը (119-140-143 թթ.): Վաղարշին հաջորդում է Հռոմի դրածո՝ սենատոր Սոհեմոսը, որը սերում էր Եմեսայի (այժմ՝ Հոմո) իշխանական տոհմից և, ըստ երևույթին, Արշակունի էր մոր գծով: Սա գահ է բարձրացել երկու անգամ՝ 140/3-161 և 164-165 թթ., Հայաստանում սասանյով Տիգրան հավելյալ անունը: Սոհեմոս-Տիգրանի երկու գահակալումների միջև ընկած երկու թե երեք տարվա ժամանակահատվածում հայկական գահին նստել է պարթևների դրածո Բակուր Արշակունին: Սոհեմոս-Տիգրանին հաջորդում է Վաղարշ Բ-ը (պարթևական Վաղարշ Դ-ի եղբայրը⁶), մինչև 216 թ., երբ հայկական գահի վրա տեսնում ենք Վաղարշի որդի Խոսրով Ա թագավորին: Այսուհետև արդեն կարելի է խոսել Հայաստանում թագավորական իշխանութեան ժառանգական դառնալու մասին, համարյա մինչև հայկական Արշակունյաց թագավորութեան վերացումը:

Բոլորովին վերջերս հայտնաբերված մի վավերագրի տվյալների հիման վրա նույնպես կարելի է եզրակացնել, թե Արշակունյաց Հայաստանում թագավորական իշխանութիւնը դառնում է հորից որդի ժառանգական միայն II դարի վերջից III

դարի սկզբից հետո: Մեր խոսքը 1962 թ. Գառնիի ամրոցի պեղումների ժամանակ լույս աշխարհ հանված արամեերեն արձանագրության մասին է, որը հրատարակել է Ա.Գ. Փերիխանյանը: Այս արձանագրության մեկնաբանմանը նվիրված իր հոդվածում Ա.Գ. Փերիխանյանը ևս ընդունում է, որ «Հայաստանի Արշակունի թագավորների մեզ հայտնի ամբողջ ցուցակում խոսքով Ա-ը առաջին դեպքն էր հայկական գահի վրա այդպիսի հորից որդի ժառանգականության, իսկ նախորդ բոլոր դեպքերում թագավորները Հայաստանում հաստատվում էին Պարթևաստանի (կամ Հռոմի) կողմից, պարթևական տան արքայազուհիների թվից»¹⁰¹: Հայաստանում Արշակունի թագավորների իշխանությունը ժառանգական դառնալուն մեծապես պիտի խանգարեր այն հանգամանքը, որ հենց Պարսկաստանում, իրենց պարթև Արշակունիների իշխանությունը ևս, ինչպես նշել է Մ.Մ. Դյակոնովը, ժառանգաբար չի անցել, այլ թագավորն ամեն անգամ ընտրվել է տոհմի անդամների թվից¹⁰²:

Այսուհանդերձ, եղել են հայագետներ, որոնք կարծում են, թե Տրդատ Ա-ի մահից հետո հայկական թագավորությունը ժառանգաբար անցել է նրա որդիներին: Այսպես, Հ. Գաթրճյանը¹⁰³ կարծում է, թե Աշխաղարը Տրդատ Ա-ի որդին էր. իսկ Ա. Գարագաշյանը¹⁰⁴ այս նույն Աշխաղարին համարում է Տրդատ Ա-ի (Արտաշես Բ-ի) թոռը և ենթադրում է, որ նա թագավորել է Հայաստանում իր հոր՝ Արտավազդի մահից հետո: Այս ենթադրությունների սխալ լինելը դեռևս իր ժամանակ ցույց է տվել Հ.Հ. Մանանդյանը¹⁰⁵:

Դարձյալ անդրադառնալով այս նույն հարցին, Հ.Հ. Մանանդյանը գրում է. «Ինչպես հայտնի է, Տրդատ Ա-ի և նրա հարորդների ժամանակ հայոց թագավորությունը չգառավ ժառանգական նրանց շառավիղների գծով: Արշակունյաց հարստության հաստատումը Հայաստանում, այսինքն՝ նրանց թագավորումը որդեցորդի, ինչպես այդ մատնանշել է Գևորգ Ասլանը,

(101) А.Г. Периханян, Арамейская надпись из Гарни, ՊՐՀ, 1964, № 3, էջ 125:

(102) М.М. Дьяконов, Очерк истории древнего Ирана, М., 1961, էջ 195:

(103) Հ. Գաթրճեան, Տիեզերական պատմութիւն, հ. Բ, Վիեննա, 1852, էջ 152:

(104) Ա.Մ. Գարագաշյան, Քննական պատմություն հայոց, հ. Բ, էջ 253:

(105) Հ.Հ. Մանանդյան, Քննական տեսություն ..., հ. Բ, մ. Ա, էջ 19:

սկսվել էր միմիայն երկրորդ դարի վերջում, և հայ Արշակունիների դինաստիայի հիմնադիրն է Վաղարշ Բ-ը»¹⁰⁶:

Հ.Հ. Մանանդյանի վերջին հայտարարութեան իմաստն, ըստ երևույթին, պիտի հասկանալ այնպես, որ Տրդատից մինչև Վաղարշ Բ-ը Հայաստանում թագավորած Արշակունիները գեռևս մնում էին պարթևներ, կապիած պարսկական արքունիքի հետ. մինչդեռ Վաղարշ Բ-ից սկսած, հասկապես Պարսկաստանում իշխանութիւնը Մասանյաններին անցնելուց հետո, Հայաստանի Արշակունի թագավորները արդեն հայացել էին:

Նկատելի է, որ Արշակունյաց Հայաստանում գահակալման կարգը ժառանգական դառնալուց հետո ևս միշտ չէ, որ թագավորը մնում էր գահի վրա մինչև իր կյանքի վերջը: Այս երևույթը պիտի համարել հետեւանքը երկրում ծայր առած սոցիալական ցնցումների, երբ ստրկատիրական հասարակարգի ճգնաժամի պայմաններում ծնվում էին նոր, ֆեոդալական հարաբերութիւններ, երբ ավելի ու ավելի հզորացող ավագանին ձգտում էր առավել ինքնուրույնութեան, մինչդեռ հեռզհեռէ թուլացող կենտրոնական իշխանութիւնը, հանձին թագավորի, չէր կարողանում վերջնական հաշվեհարդար տեսնել նախարարական կենտրոնախույս ուժերի հետ:

Դեռևս կենդանութեան օրոք հայոց այս կամ այն թագավորի գահից զրկվելու հարցի մասին խոսելիս, մենք ամենևին էլ նկատի չունենք այն դեպքերը, երբ վճռական նշանակութիւն են ունեցել արտաքին գործոնները, ասենք՝ Հռոմի կամ Պարսկաստանի դեմ հայոց թագավորի մղած անհաջող պատերազմը, որի հետևանքով նա գահընկեց է եղել:

(106) Նույն տեղում, էջ 56:

ՔԼՈՒԽ ԻՆՆԵՐՈՐԴ

ՆԱԽԱՐԱՐՆԵՐՆ ՈՒ ՆԱԽԱՐԱՐՈՒԹԻՒՆՆԵՐԸ ԱՐՇԱԿՈՒՆՅԱՑ ՀԱՅԱՍՏԱՆՈՒՄ

Հին Հայաստանում նախարարական հաստատությունը սոցիալ-տնտեսական և քաղաքական կյանքի կազմակերպման կարևորագույն ձևն էր, իր որոշակի բովանդակությունով, որի զարգացումը համընթաց է եղել հայկական ամբողջ հասարակությունից զարգացմանը: Միանգամայն իրավացի է Հ.Հ. Մանանդյանը, երբ նշում է, թե «նախարարական կազմակերպությունը հին Հայաստանում հայոց պատմության այն ելակետային կարևորագույն խնդիրն է, որի ուսումնասիրությունը հիմք է ծառայելու Հայաստանի սոցիալական կյանքի և անգամ քաղաքական պատմության լուսաբանման»¹:

Հետևաբար, բոլորովին պատահական չէ, որ հին Հայաստանի պատմությունում զբաղվողները այս կամ այն չափով անդրադարձել են նախարարական կազմակերպության հարցերին: Բոլորի մեջ, սակայն, առանձնանում են երկու ուսումնասիրություն՝ Ն. Ադոնցի «Армения в эпоху Юстиняна» (1908) և Հ.Հ. Մանանդյանի «Ֆեոդալիզմը հին Հայաստանում» (1934) գրքերը:

Ն. Ադոնցը հիմնականում նպատակ ունենալով պարզել հայկական ֆեոդալիզմի ծագման հարցը, իր հիշյալ աշխատությունում մեջ ամենայն մանրամասնությամբ խորամուխ է եղել հայկական նախարարությունների քանակական և որակական վերլուծությունը: Ընդ որում, Ն. Ադոնցը ենթադրում է, որ ֆեոդալական հարաբերությունները Հայաստանում առաջացել են դեռևս Արտաշեսյանների ժամանակ, իսկ վերջնականապես ձևավորվել են Տրդատ Ա-ից հետո, Արշակունյաց թագավորության տարիներին:

(1) Հ.Հ. Մանանդյան, Ֆեոդալիզմը հին Հայաստանում, էջ 11:

Մեծ գիտնականը, սակայն, հանդիսանալով պատմագրության մեջ իրավաբանական ուղղության խոշորագույն ներկայացուցիչ, նախարարական կազմակերպությունը Հայաստանում դիտում է որպես իշխանության բաժանում, այսինքն՝ սոսկ իբրև վերնաշենքային երևույթ և ուրիշ ոչինչ:

Հ.Հ. Մանանդյանը, իր հերթին, շարունակելով Ն. Ադոնցի գործը այս ուղղությամբ, իր վերոհիշյալ ուսումնասիրության մեջ քննության առավ Հայաստանում նախարարական, հատկապես Արշակունցի շրջանի նախարարական, կազմակերպությունն իր ուրույն բովանդակությամբ և բոլոր էական առանձնահատկություններով: Հայաստանի Ֆեոդալականացման սկիզբը ակադ. Հ.Հ. Մանանդյանը, ի տարբերություն Ն. Ադոնցի, ենթադրում է Արտաշեսյան թագավորության հաստատումից էլ առաջ, բայց միաժամանակ նշում, որ «Ֆեոդալիզմի ծագման ամենահին շրջանի մասին մենք չունենք որոշ ու հաստատուն վկայություններ: Աղբյուրների տեղեկությունները վերաբերվում են, գլխավորապես, զսրգացած ու հարդարված նախարարական կարգերին, որ վերջնականապես ձևակերպվել էին Արշակունցի թագավորության հաստատման ժամանակ»²:

Նախարարների և նախարարական կազմակերպության մասին մեր գլխավոր աղբյուրները վաղ միջնադարյան հայ մատենագիրներն են՝ Ազաթանգեղոսը, Փավստոս Բուզանդը, Մովսես Խորենացին, Կորյունը, Եղիշեն, Ղազար Փարպեցին: Այս պատմիչներից վերջին երեքի վկայությունները գերազանցապես վերաբերվում են մարզպանական Հայաստանին, երբ արդեն վերացել էր հայ Արշակունիների թագավորությունը և երկիրը գտնվում էր պարսկական տիրապետության տակ. ուստի և մենք ընդհանրապես կանդրադառնանք առաջինների վկայություններին:

«Նախարար» բառի ստուգաբանական բացատրությամբ զբաղվել են մի շարք հայագետներ և արևելագետներ: Ղ. Ինճիճյանը այն մեկնել է որպես նախ և արար, համապատասխան համարելով լատիներեն praefectus բառին: Նա գրում է. ... անունս նախարար ինքնին յայտ առնէ ածանցեալ յանուանս նախ և արար՝ իբր նախկին յարարս, կամ նախակարգեալ իշխան, որպիսի էր և առ լատինս անունս praefectus, ցուցանելով գյառա-

(2) Նույն տեղում:

ջագահութիւն և գնախադատութիւն քան զայլս»³: Նույն բացատրութեանը հետեւել է նաև Մ. Էմինը Մովսէս Խորենացու պատմութեան ռուսերեն թարգմանութեան համապատասխան ծանոթագրութեանը կազմելիս⁴: «Նախարար» բառի այդպիսի մեկնութեանը մերժելով, Ն.Յ. Մառը նշում է, որ այդ բառի սկզբնական ձևը եղել է նախարար, որը նշանակում է երկրի, շրջանի տեր, գլխավոր⁵: Այս մեկնութեանը լիովին ընդունում է նաև Ի. Զավախովը⁶: Ն. Ադոնցը ևս, ոչ մեծ ուղղումով, ընդունելի է համարում Ն.Յ. Մառի այս տեսակետը, «նախարար» բառը համապատասխան համարելով հայկական «տանուտեր» բառին⁷: «Նախարար» բառին նույնպիսի բացատրութեան է տվել նաև Մեյեն, որի կարծիքով, հայերեն նախարար (սկզբնապես՝ նահարար) բառը ծագել է իրանական nahadara բառից, որ նշանակում է «ցեղապետ»: Նույն իմաստով սողդիկերենում պահպանվել է nâfdâr բառը⁸: Այս վերջին բացատրութեանն ընդունում են Ստ. Մալխասյանը⁹ և, ըստ երևույթին, Հ.Հ. Մանանդյանը¹⁰: Հենվելով Վ. Հեննինգի վերջին մի աշխատութեան վրա¹¹, որում նա ուսումնասիրել է հարավային Խորասանում մ.թ. III դ. վերաբերող վերջերս հայտնաբերված մի արձանագրութեան, որտեղ հանդիպում է nafdar բառը, Ա.Գ. Փերիխանյանը գտնում է, որ հայերեն նախարար տերմինը պարթևական փոխառութեան է և նշանակում է՝ «նա, ով ունի

-
- (3) Ղ. Ինճիճեան, Հնախօսութիւն աշխարհագրական Հայաստանեայց աշխարհի, Կ. Բ. Վենետիկ, 1835, էջ 77:
- (4) Н. Эмин, История Моисея Хоренского, М., 1893, էջ 298:
- (5) Н. Марр, Этимология двух терминов армянского феодального строя, Записки Вост. Имп. Рус. Арх. Общ., т. XI, 1898, стр. 170.
- (6) И. Джавахов, Государственный строй древней Грузии и древней Армении, С.П.б., 1905, էջ 133-135:
- (7) Н. Адонц, Армения в эпоху Юстиниана, СПб., 1905, էջ 451:
Ն. Ադոնց, Պատմական ուսումնասիրութեաններ, Փարիզ, 1948, էջ 159:
- (8) Հ. Աճառյան, Արմատական բառարան, Կ' է, Երևան, 1935, էջ 170:
- (9) Մովսէս Խորենացի, Հայոց պատմութեան, թարգմ. ներած. և ծանոթագր. Ստ. Մալխասյանի, 1940, Երևան, էջ 255, ծան. 3:
- (10) Հ.Հ. Մանանդյան, Քննական տեսութեան ..., Հ. Բ, մաս Ա, էջ 313-316:
- (11) W.B. Henning, A New Parthian Inscription, Journal of the Royal Asiatic Society, 1955, facs. 3-4, pp. 132-136.

իշխանություն, առաջին տեղը, պետ»¹²: Այս առնչութեամբ էլ նշվում է, որ նախարար տերմինն իր նշանակութեամբ նույնն է, ինչ «սատրապը» և որ «նախարարը» գործածական է եղել հյուսիսային Իրանում, իսկ «սատրապ»ը՝ հարավային:

Այս վերջին տեսակետը հաստատող մի հետաքրքիր հոդվածով նորերս հանդես եկավ Ս.Ս. Կոստանյանը, որը ուսումնասիրելով Աստուածաշնչի հայերեն թարգմանութեան մեջ հանդիպող «նախարար» բառի բոլոր դեպքերը և համապատասխան հատվածները համեմատելով Աստվածաշնչի հունարեն թարգմանութեան հետ, գտնում է, որ «նախարարը», Աստվածաշնչի հունարեն թարգմանութեան մեջ համապատասխանում է ΣΑΤ-ՉԱՄԻՏ-ին և ունի «կառավարիչի, նահանգապետի, իմաստ»¹³:

Նախարարական կազմակերպութեան պատմութեամբ զբաղված հայագետների միջև կան մի շարք տարակարծութիւններ, որոնք հնարավոր ենք համարում խմբավորել հետևյալ հարցերի շուրջ. նախարարական կարգերի առաջացման ժամանակն ու պատմական հանգամանքները, նախարարական կազմակերպութեան դերը և նշանակութիւնը երկրի սոցիալ-տնտեսական և քաղաքական կյանքում, նրա էութիւնը, նախարարութիւնների թիվը Հայաստանում: Բնական է, որ նախարարական կազմակերպութեան առաջացման ժամանակը որոշելը շատ բան կպարզի, կապված մյուս հարցերի հետ: Ուստի և մենք կսկսենք դրանից:

Հայկական նախարարութիւնների ծագման մասին խոսելիս հայագետներն, ընդհանրապես, հենվում են իտրենացու «Հայոց պատմութեան» երկրորդ գրքի 7-րդ և 8րդ գլուխների վրայ¹⁴:

Վերոհիշյալ գլուխներում պատմվում է այն մասին, թե Վաղարշակը, որն, ըստ իտրենացու, Հայաստանում Արշակունյաց հարստութեան հիմնադիրն է, երկրում հաստատում է կա-

(12) А.Г. Периханян, Древнеармянские востаники, ВДИ, 1956, №2, էջ 49-50: Հմմտ. Գ.Խ. Սարգսյան, Հին Հայաստանի սոցիալ-տնտեսական զարգացման ուղիների մասին, էջ 9, ծան. 1:

(13) Ս.Ս. Կոստանյան, «Նախարար» տերմինի մասին, ՊԲՀ, 1973, Նո 3, էջ 151-160:

(14) Մովսես իտրենացի, Բ, է:

ուսման շրջանի նոր կարգեր: Այստեղ պատմահայրը հականե-
հանվանե նշում է չորս տասնյակ նախարարների և նախարար-
ական սերունդների, որոնց, իբր, հաստատում է Վաղարշակ
թագավորը:

Վաղ հայկական մատենագրութեան մեջ հանդիպող նա-
խարարական հաստատութեան վերաբերյալ բազմաթիւ տվյալ-
ները հանրագումարելիս, ուրվագծվում է մի պատկեր, որի հա-
մաձայն հայկական թագավորութեան շուրջ 700-ամյա գոյու-
թեան ընթացքում այդ հաստատութեանը համարյա անփոփոխ
գոյութիւն է ունեցել իր ծագումից (Վաղարշակի ժամանակից)
մինչև վերջ, Արշակունյաց թագավորութեան վերացումը:

Անկասկած է, որ առաջին հայ մատենագիրները հարա-
գատորեն են պատկերել իրենց ժամանակակից՝ IV դարի վերջին
և V դարի առաջին կեսին Հայաստանում նախարարական հաս-
տատութեանը, որպէս ժողովրդական խոշոր հողատիրական հա-
մակարգ, որի պայմաններում խոշոր հողատերը միաժամանակ
ժառանգաբար վարում էր այս կամ այն պետական պաշտոնը¹⁵:

Արշակունյաց թագավորութեան վերջին շրջանում նա-
խարարական կազմակերպութեան մասին եղած այս, ընդհանուր
առմամբ ճիշտ, պատկերացումները, այլ նյութերի չգոյութեան
պայմաններում, ուսումնասիրողների կողմից մեխանիկորեն վե-
րագրվել են նաև առավել վաղ շրջանին, որը, սակայն, ինչպէս
այժմ հետզհետե պարզվում է, այնքան էլ չի համապատասխա-
նում պատմական իրականութեանը: Բոլոր դեպքերում, սակայն,
նախարարական կազմակերպութեան առկայութեանը Հայաստա-
նում հայտանշում է իշխանութեան որոշակի բաժանում թա-
գավորի և նրան շրջապատող տիրող վերնախավի միջև:

Հին Հայաստանում իշխանութեան բաժանման մասին
ինչ-որ ուրվագիծ նկատելի է դեռևս մ.թ.ա. VI դարի կեսերին:
Մեր խոսքը վերաբերում է Քսենոփոնի «Կյուրոպեդիայի»
տվյալներին, որոնց մասին խոսք է եղել սույն աշխատութեան
երկրորդ գլխում: Քսենոփոնի այդ երկում խոսվում է հայոց

(15) Ս.Ս. Կոստանյանը («Նախարար» տերմինի մասին, էջ 160), իրավասցիպրեն
նկատում է, որ «նախարար» սկզբնապէս նշանակելով միմիայն «կառա-
վարիչ, նահանգապետ», Քլևստրատի վարպետանը համընթաց հետըզ-
հետե ձեւք է բերել նաև «հողատեր իշխանի», «Ֆեոդալի» խմատ, որ
արդեն IV-V դարերում արձեւ է տիրապետող:

մեծամեծների մասին, որոնց դերը, սակայն, այնքան էլ պարզ չի երևում: Առավել պարզ է արքայորդի Տիգրանի դերը, որը կյուրոսի արշավանքներին մասնակցող հայկական զորամասերի հրամանատարն է: Իշխանության առավել որոշակի բաժանում նկատելի է սատրապական շրջանի Հայաստանում: «Անաբասիսի» տվյալներով, ինչպես տեսանք, սատրապ Օրոնտասի կողքին կան նաև հյուսիսարևոտ Տիրիբագոսը, զորապետ Արտուխասը և գեղջավագները:

Մեկ այլ առնչությամբ մենք փորձել ենք իշխանության ինչ-որ բաժանում տեսնել նաև Հայաստանում սատրապական իշխանության վերջին տարիներին Օրոնտասի և Միթրաոստեսի միջև, որոնք Գավգամելայի ճակատամարտի ընթացքում առաջնորդում էին հայկական զորամասերը, ընդ որում նշելով, որ նրանցից մեկը, հավանաբար, առաջնորդում էր հայկական հեծելազորը, մյուսը՝ հետևակը:

Հայաստանում իշխանության առավել որոշակի բաժանման հավաստի վկայություններ ունենք Երվանդունիների թագավորության տարիների համար: Դրանց մասին մենք արդեն քանիցս խոսել ենք սույն ուսումնասիրության նախորդ հատվածներում: Դրանցից են, օրինակ, Արմավիրի հունարեն արձանագրություններից այն մեկը, որում Արմավիրի տաճարի քրմապետ Միթրասը իրեն անվանելով արմավիրցիների բասիլևս (թագավոր), ողջունում է Եբրոնտես-Երվանդին. իսկ մյուսը, Խորենացու պատմածն է Երվանդ թագավորի և նրա եղբոր՝ քրմապետ Երվազի մասին: Սկզբնաղբյուրներում, դժբախտաբար, չկան առավել մանրամասն տվյալներ այդ տարիներին Հայաստանի վարչական ու պետական որևէ այլ ղեկավար մարմնի կամ պաշտոնյայի գոյության մասին: Մեզ թվում է, թե աղբյուրներում այդպիսի տեղեկություններ փնտրելն իսկ անհեռանկար կլիներ, քանի որ, ինչպես նշել ենք, Երվանդունիների հայկական նորաստեղծ թագավորությունը, հանգամանքների բերումով, սկսեց արագորեն թուլանալ և իր գոյության վերջին շրջանում (մ.թ.ա. III դարի վերջ) անդամահատվելով, արդեն աշխարհագրական բոլոր ուղղություններով կորցրել էր իր տարածքի զգալի մասերը, որոնք անցել էին հարևան իշխանությունների ձեռքը: Երվանդունիների թագավորության սահմաններում, ըստ երևույթի, մնացել էին Հայկական լեռնաշխարհի կենտրոնական գավառները միայն, առանց

վարչական ստորաբաժանումների, որոնց կառավարումը չէր թելադրում վարչական նոր մարմիններ ստեղծելու հրամայական պահանջ: Այդպիսի պահանջ պետք է ստեղծվեր միայն հետագայում, երբ, Ստրաբոնի հայտնի վկայություն համաձայն, Արտաշեսը և նրա գինակից Ջարեհը, Երվանդ վերջինին տապալելուց հետո, հաջողությամբ ավարտելու էին Երվանդյանների կորցրած երկրամասերը իրենց տերությանը վերամիավորելու գործը:

Արտաշեսի միավորիչ գործունեություն մասին Ստրաբոնի այս անփոխարինելի վկայությունից կարելի է հետևեցնել, թե հանձին Արտաշեսի, ոչ միայն հայկական գահն անցնում է նոր արքայատոհմի, այլև, հաստատված թագավորությունն իր էությունամբ նոր պետություն էր, շատ բանով տարբեր իր նախորդից՝ Երվանդունիների պետությունից: Այդ տարբերությունը գլխավորապես պայմանավորված պետք է լիներ հայկական թագավորության սահմանների աննախընթաց ընդարձակումով, երբ հայկական տարրերով բնակեցված հիմնական երկրամասերը, որոնք մեկ առ մեկ թվարկված են Ստրաբոնի կողմից, ընդգրկվեցին պետական մեկ միավորման մեջ¹⁶: Այս առնչությունամբ փոքր դեր պիտի չխաղար նաև այն, որ ինքը՝ Արտաշեսը, ինչպես նաև նրա գործի աջակից և բարեկամ Ջարեհը, նախկինում եղել էին Անտիոքոս Գ-ի նշանակած կառավարչատրատեգոսներ, այն է՝ բարձր պետական պաշտոնյաներ, դրանով իսկ որոշակի դեր են ունեցել Սելևկյան արքունիքում:

Ստրաբոնի ավյալ վկայություն մեջ, գուցե, հնարավոր է տեսնել նորաստեղծ թագավորության ինչ-որ վարչատերիտորիալ բաժանում, իրենց իսկ անվանումներով՝ Գոգարենե, Խորգենե, Կարենիախ, Դերքսենե, Ակիլիսենե և այլն: Կասկած չի կարող լինել, որ արդեն բավական լայնարձակ սահմաններ ունեցող այդ տերությունը, ելնելով կառավարման առավել կուռ կազմակերպական պահանջներից, բաժանված էր ենթաշրջանների, որոնք Սելևկյանների և հարևան Կոպպադոկիայի ու Պոնտոսի տերությունների ստորաբաժանումների նման և դրանց անմիջական ազդեցությունամբ, կարող էին կոչվել ստրատեգիաներ¹⁷:

(16) Strabo, XI, 14, 6.

(17) Strabo, XII, 1, 4. C. Plinii Nat. Hist., VI, 9.

Յավոք, օտար աղբյուրները, նույնիսկ Ստրաբոնը, ոչինչ չեն հաղորդում վարչական այդ միավորների կառավարիչների, ինչպես նաև Արտաշեսի պետություն մեջ եղած պաշտոնյաների մասին: Այդպիսի տեղեկությունների կարելի է հանդիպել իտրենացու մասյանի այն գլուխներում, որտեղ խոսվում է Երվանդի ու Արտաշեսի հակամարտությունից և Արտաշեսի թագավոր դառնալուց հետո վերջինիս ձեռնարկած վերափոխիչ միջոցառումների մասին¹⁸: Պատմահոր հաղորդած այդ վկայությունները, սակայն, դեռևս կարոտ են լուրջ ուսումնասիրությունից և համակարգման, քանի որ նրա «Հայոց Պատմություն» այս հատվածներում կան փամանակագրական վրիպումներ, ինչպես նաև դեռևս չհաստատված հաղորդումներ: Այսուհանդերձ, դրանց հիման վրա այժմ իսկ հնարավոր է որոշակի ենթադրություններ անել: Խորենացու պատմելով, Արտաշեսի կողքին և նրա արքունիքում ամենալայն գործունեություն է ծավալում Սմբատ Բագրատունին: Ըստ պատմահոր, Սմբատը Արտաշեսի դայակն է (Բ, 15 և Իգ), նրա թագադիրը (Բ, 15): Նույն տեղում իտրենացին հաղորդում է, թե Արտաշեսը Սմբատին վստահում է հայոց բոլոր զորքերը, երկրի բոլոր գործակալներին և ամբողջ արքունական տունը: Սա, անկասկած, նշանակում է, որ Սմբատ Բագրատունին եթե իսկ ամենաբարձր պաշտոնյան չէր, ապա բարձրագույն պաշտոնյաներից մեկն էր:

Առանձին ուշադրություն է արժանի իտրենացու այն հաղորդումը, թե Արտաշեսը թագավոր դառնալուց հետո «տայ և առն քաջի պատուականի Արգամայ գիսստացեալ գահի երկրորդական ...»¹⁹: Յավոք, պատմահայրը հետագայում չի անդրադառնում այս «երկրորդական գահին» և մեզ համար պարզ չէ, թե արդյո՞ք այդ պաշտոնն ունեցող հայ մեծատոհմիկի տեղը իշխանություն մեջ նույնն է, ինչ թագավորից հետո երկրորդ անձնավորություն հանդիսացող քրմսպետի (որի մասին խոսում է Ստրաբոնը) կամ ավագ բեյլիի գրաված դիրքը: Թագավորից հետո երկրորդ անձնավորություն հարցին մենք հանգամանորեն անդրադարձել ենք մեր սույն աշխատությունից 6-րդ գլխում, ուստի և ավելորդ ենք համարում այստեղ ծավալվել:

(18) Մովսես իտրենացի, Բ, 15:

(19) Նույն տեղում:

Արտաշեսի պետական միջոցառումներին, հատկապես Սմբատ Բագրատունուն տրված պաշտոններին վերաբերող խորենացու այս վկայություններից պարզ նկատելի է, որ դեռևս Հայաստանի պետական սպարապետ Բարձրագույն պաշտոնները խիստ տարբերակված էին: Դեռ ավելին. նույն անձնավորությունը կարող էր միաժամանակ զբաղեցնել մի շարք կարևորագույն պաշտոններ: Տվյալ դեպքում Սմբատ Բագրատունին թագավորի ե՛լ դայակն է, ե՛լ նրա թագադիրը, ե՛լ զորքերի հրամանատարը, ե՛լ, ըստ երևույթին, արքունի տան վերակացուն, ե՛լ տարբեր գործակալությունների աշխատանքներին հսկողը:

Նման երևույթը, մեր կարծիքով, աստիճանաբար վերանում է, քանի որ հետագայում, Արշակունյաց Հայաստանում, պետական պաշտոնները՝ գործակալությունները մեծապես տարբերակված էին և որոշակիորեն բաժանված տարբեր սոհմերի ներկայացուցիչների միջև: Այս հարցին մենք դեռ կանգրադառնանք: Այստեղ հարկ ենք համարում նշել, որ այլ հանգամանքներից բացի, այս մեկը ևս խոսում է այն տեսակետի օգտին, թե Արտաշեսի մասին խորենացու հաղորդած վկայությունները, ժամանակագրական առումով, իրենց տեղում չեն: Այս հատվածներում պատմվող դեպքերը պետք է որ կատարված լինեին ավելի վաղ, քան, ասենք, Վաղարշակի հաստատած Արշակունյաց արքայատոհմի թագավորությունը: Հայոց թագավորներն իրենց հատուկ ծառայություն մատուցած հավատարիմ անձնավորություններին վարձատրում էին, հանձնարարելով այս կամ այն պետական բարձր պաշտոնը: Արտաշեսի գործունեությունը նկարագրող գլուխներից մեկը խորենացին նույնիսկ վերնագրել է այսպես. «Թագաւորել Արտաշիսի և առնել բարի իւրոյ երախտաւորացն»²⁰: Այդ գլխում պատմվում է, թե Արտաշեսը Արգամին տալիս է նրան խոստացած երկրորդական գահը, ինչպես նաև այլ պատիվներ: Ոչ պակաս պատիվներ է տալիս Սմբատին, իսկ Ներսեսին, իր ծծմոր Գիտակ որդու որդուն նախարարական ցեղ դարձնելով, այն կոչում է Դիմաքսյան, նրա հոր քաջագործությունների անունով, որովհետև նրա դեմքի կեսը սրով կտրել էին, երբ նա Արտաշեսի համար կռվում էր:

(20) Նույն տեղում:

Այնուհետև Արտաշեսը նախարար է դարձնում Տուրի որդիներին այն բանի համար, որ վերջինս Երվանդին լրտեսելով, օգնել էր Սմբատին, որի համար էլ հատուցել էր իր կյանքով:

Հունա-լատինական աղբյուրները Արտաշեսի այսպիսի գործողությունների մասին ոչինչ չեն հաղորդում: Մեզ չի օգնում անգամ Սարաբոնի հայտնի հատվածը Արտաշեսի գործունեություն մասին, որում մանրամասն թվարկված են հայկական թագավորություն մեջ ներգրավված մարզերը, սակայն ոչինչ չի ասված, թե Արտաշեսն այդ երկրամասերում ինչպիսի՞ պաշտոնյաներ կարգեց: Կողմնակի տվյալների հիման վրա կարելի է միայն ենթադրել, որ Արտաշեսը, ինչպես արդեն նշել ենք, Սելևկյանների, ինչպես նաև հարևան Պոնտոսի և Կապպադովկիայի թագավորությունների օրինակով, իր երկիրը բաժանեց ստրատեգիաների՝ որտեղ կարգեց ստրատեգոս-կառավարիչների:

Այս առումով առավել բովանդակալից են օտար աղբյուրների՝ Տիգրան Մեծին վերաբերող հաղորդումները, որոնցից ուսումնասիրողը կարող է որոշակի տվյալներ կորզել հայոց թագավորին ենթակա պաշտոնյաների մասին: Դրանցում հիշատակվածներից բոլորն էլ, բացի Տիգրանի եղբայր Գուրասից, ներկայացված են որպես հայոց թագավորի գորահրամանատարներ: Թվենք նրանց:

1) Միթրասա և Բագոաս. Տիգրան Բ-ի գորավարներ, որոնք մ.թ.ա. 94 թ. գրավեցին Կապպադովկիան²¹: Այլ աղբյուրներից անհայտ: 2) Նեմանես, հայ գորավար (Νεμόνης ὁ Ἀρμένιος), որը մասնակցել է Միհրդատյան առաջին պատերազմին²²: Սա, Հ.Հ. Մանանդյանի կարծիքով, ոչ թե Տիգրանի գորսպետն էր, այլ Միհրդատ Պոնտացուն ենթակա Փոքր Հայքի զորքերի հրամանատարը²³: 3) Գուրաս. Տիգրան Բ-ի եղբայր, Միզդոնիայի կառավարիչ-կուսակալ, որի նստավայրը Մծբին (Νίσσιβις) քաղաքն էր: Պոլտարքոսի մի հետաքրքիր վկայությունից կարելի է եզրակացնել, թե Գուրասը Մծբինում քաղաքական իշխանություն ունեցող պաշտոնյա էր, մինչդեռ ռազմական ղեկա-

(21) Appiani Mithrid., 10.

(22) Նույն տեղում, 19:

(23) Հ.Հ. Մանանդյան, Տիգրան Երկրորդը և Հուսիս, էջ 39:

վարությունը հանձնված էր հելլեն կալլիմաքոսին²⁴: 4) Բագարատ (հուն. Μαγαδάτης – Βαγαδάτης = Մագալատես-Բագադատես): Տիգրանի գորավարներից, որին հայոց թագավորը Ասորիքն ու Կիլիկիայի մի մասը գրավելուց հետո, կարգել էր այդ երկրների կուսակալ-կառավարիչ: Ապպիանոսը նրան հիշատակում է իբրև *στρατηγός* – ստրատեգոս, պաշտոն, որը հատուկ էր Սելևկյանների թագավորության²⁵: Ուսումնասիրողները սրան համարում են Բագրատունյաց նախարարական տոհմի նախահայր²⁶: Այս ենթադրությունը ժխտող տվյալներ թեև չկան, բայց դեռևս նոր, առավել համոզիչ են պետք այն հաստատելու համար: 5) Մեհրուժան (հուն. Μιθροβαρζάνης – Միթրոբարզանես²⁷: Տիգրանը սրան երկու կամ երեք հազարանոց զորախմբով ուղարկել էր կասեցնելու Լուկուլլոսի առաջընթացը դեպի Տիգրանակերտ: Ընկնում է Լուկուլլոսի դեմ կռվելիս²⁸: Ուսումնասիրողները իրավացի կերպով սրան համարում են Ծովբի թագավորական տան Ջարեհյանների հետնորդ, որին, հավանաբար, Տիգրանը, Ծովբը իր տերությանը միացնելուց հետո, նշանակել էր այնտեղ սատրապ-կառավարիչ,²⁹ ստրատեգոս: Հասկանալի է, որ Պլուտարքոսի մոտ նա կոչված է *φίλος* – ընկեր: Այս վերջին տերմինին մենք անդրադարձել ենք բյուզանդականների մասին խոսելիս: 6) Մանկայոս (Μαγκαῖος), որին հայոց թագավորը, Տիգրանակերտից նահանջելիս, հանձնարարում է քաղաքի պաշտպանությունը Լուկուլլոսի դեմ³⁰: Ն. Ադոնցը Մանկայոս գորավարին համարում է Մամիկոնյան-

(24) – «Ταύτην (Νίσσιβιν) εἶχεν ἀξιωμασι μὲν ἀδελφὸς Τιγοράνου Γοῦρας, ἐμπειρίᾳ δὲ ... Καλλιμάχου» (Plut., Lucull., 32)

(25) Appiani Syr., 46.

(26) J. Markwart, Eranšahr, էջ 174: Н. Адонц, Армения ..., էջ 412-413: Հ. Հ. Մանանդյան, նշվ. աշխ., էջ 51:

(27) Բ. Մարկվարտը իր ուսումնասիրություններից մեկում (Untersuchungen zur Geschichte von Eran, Philologus, Bd., 55, 1896, էջ 68-69) առաջարկում է այդ անունը ուղղել և կարգալ *Μιθροβουζάνης* – Միթրոբուզանես: Նրա կարծիքը բաժանում են Ն. Ադոնցը (Н. Адонц, Армения ..., էջ 413), Հ. Հ. Մանանդյանը (Տիգրան Երկրորդը ..., էջ 101) և ուրիշներ:

(28) Plutarchi Lucull., 25; Appiani Mithrid., 84.

(29) Н. Адонц, նշվ. աշխ., էջ 413-414, Հայ ժողովրդի պատմություն, Կ. 1, Երևան, 1971, էջ 585-586:

(30) Appiani Mithrid., 84.

ների նախարարական տոհմի նախահայր³¹: Նշենք, սակայն, որ այս ենթադրությունն առավել անապացույց է, քան վերոհիշյալ Բագադատեսին Բագրատունիների նախահայր համարելու տեսակետը:

Հետագա տարիների մասին պատմող օտարալեզու աղբյուրներում դարձյալ կարելի է հանդիպել Հայաստանում պաշտոնատար անձերի մասին հատուկ կենտ վկայությունների: Այսպես, Տիգրան Բ-ի հաջորդ Արտավազդ Բ-ի ժամանակ (մ.թ.ա. 51 թ.), պարթևական թագաժառանգ Բակուրի առաջնորդությունամբ Ասորիք ներխուժած պարթևական-հայկական զորքերի կազմում հիշատակվում է Osaces – Օսակես (Վասակ) զորավարը, որը, թագաժառանգի փոքրահասակության պատճառով, արշավող զորքի իրական հրամանատարն էր: Սրան Գրիսյաթյանը և Հ. Մանանդյանը համարում են հայ³²: Ապպիանոսի վկայությունամբ, Հուլիոս Կեսարի և Պոմպեոսի միջև մղված քաղաքացիական կռիվների ժամանակ, մ.թ.ա. 49 թ., հայկական մի զորամաս գնում է օգնելու Պոմպեոսին Արտավազդ թագավորի կուսակալ Սեգաբատեսի առաջնորդությամբ և մասնակցում է Փարսալայի ճակատամարտին³³: Մ.թ. 2 թ. Հայաստանում հռոմայեցիների դեմ ծավալված շարժումը ճնշելու համար ժամանում է Կայոս Կեսարը: Սա Արտագերս (- Αρταγέρσης) ամրոցում մահացու վիրավորվում է բերդապահ Ադոնի (Αδων ό φρουρραρχος) ձեռքով: Այնուհետև այս Ադոնը գլխավորում է ապստամբած Արտագերսի պաշտպանությունը, ամրոցը պաշարած Կեսարի զորավարների դեմ³⁴: Մ.թ. 30-40-ական թվականներին, հայ ժողովրդի համար ճակատագրական այդ տարիներին, երբ ահեղագույն վտանգ էր կախվել հայկական պետության գլխին, ասպարեզ է գալիս պրեֆեկտ Դեմոնաքսը (Demonax praefectus)³⁵, որը գլխավորում է հայ ժո-

(31) Н. Адонц, *նշվ. աշխ.*, էջ 415:

(32) Г. Халатьянц, *Очерк истории Армении*, М., 1910, էջ 230: Հ.Հ. Մանանդյան, *Քննական տեսություն ...*, Կ. Ա., էջ 254:

(33) Appiani de Bellis civilibus, II, 71: Հ.Հ. Մանանդյան, *նշվ. աշխ.* էջ 255:

(34) Dio Cass., LX, 10: Strabo, XI, 14, 6: Հմմտ. Հ. Աստուրյան, *Քաղաքական վերադրություններ ընդ մեջ Հայաստանի և Հռովմա, Վենետիկ*, 1912, էջ 143: Հ.Հ. Մանանդյան, *նշվ. աշխ.*, էջ 299: Հայ ժողովրդի պատմություն, Կ. 1, *Երևան*, 1971, էջ 709:

(35) Taciti Annal., XI, 9.

դովրդի պայքարը իր անկախության համար: Զ.Զ. Մանանդ-
յանի կարծիքով, այս «Դեմոնաքսը, որի անունը ... Տակիտոսի
մոտ աղճատված է՝ հայ իշխան է և Հայաստանի սպարապե-
տը»³⁶: Մեծանուն հայագետը երկրորդ անգամ անդրադառ-
նալով այդ հարցին, նորից կրկնում է, որ «Demonax praefectus-
ը, որի անունը Տակիտոսի մոտ մի փոքր աղավաղված է, կարող
է լինել Դիմաքսյան հին տոհմի իշխաններից մեկը, որ նույն
այդ ժամանակաշրջանում հիշատակված է Խորենացու պատ-
մության մեջ»³⁷: Նոր փաստերով նույն այս կարծիքը հաստա-
տում է նաև ակադ. Ս.Տ. Երեմյանը³⁸: 63 թ. Հռանդեայի
հայտնի ճակատամարտում, երբ հայ-պարթևական զորական
ուժերը պաշարեցին հռոմեական լեգեոններին և ստիպեցին
նրանց կապիտուլյացվել և անցնել «լծի տակով», մեծ դեր է
խաղացել հեծելագործի հրամանատար վասակը (Vasaces)³⁹, որը,
Մանանդյանի կարծիքով, եղել է հայ⁴⁰: Անտիկ հեղինակների
վերոհիշյալ վկայություններին ծանօթանալիս, դժվար չէ
նկատել, որ նշված անձնավորությունները, առանց բացառու-
թյան, եղել են զորահրամանատարներ:

Այդ ժամանակաշրջանի պաշտոնատար անձանց ևս երկու
անուն հանդիպում է վիմական արձանագրություններում:
Գառնիի հռենարեն արձանագրության մեջ կարդում ենք Մեն-
նեաս (MENNEAS) անունը, որը, ինչպես իրավացիորեն նշում
են ուսումնասիրողները, կրել է նույն արձանագրության մեջ
հիշատակված լիտուրգոսը⁴¹: Լիտուրգոսի և լիտուրգիայի
մասին մենք արդեն խոսել ենք սույն աշխատության 6-րդ
գլխում: Գալով Մեննեաս անվան, ապա առավել ընդունելի
պիտի համարել այն տեսակետը, թե դա հայկական աղբյուր-
ներում հիշատակված և Ամատունյաց տոհմում ընդունված

(36) Զ.Զ. Մանանդյան, *նշվ. աշխ.*, էջ 318:

(37) Նույն տեղում, էջ 320:

(38) Հայ ժողովրդի պատմություն, հ. 1, Երևան, 1971, էջ 723-725:

(39) Taciti Annales, XV, 14.

(40) Զ.Զ. Մանանդյան, *նշվ. աշխ.*, էջ 345:

(41) К.В. Тревер, Очерки ..., էջ 183 և հետո: Գ.Խ. Սարգսյան, Գառնիի հռե-
նարեն արձանագրության շուրջը, Տեղ. ՀԳԱՀԳ, 1956, նո 3, էջ 45-46:
Հ.Մ. Բարթիկյան, Գառնիի հռենարեն արձանագրությունը և Մովսես
Խորենացին, ՊԲՀ, 1965, նո 3, էջ 233-234:

Մանուկամ Մանէն անվան հունականացված ձևն է⁴²:

Մեր ակնարկած երկրորդ անունը հասել է մեզ Ապարանի հունարեն արձանագրության միջոցով, որտեղ հիշատակված է ոմն Գնթունի՝ Ռոդոմիսրի (կամ Ռոդոմիթրի) որդի, որը Տրդատ թագավորից իբրև պարգև (հավանաբար մատուցած ինչ-որ ծառայության դիմաց) ստացել է Նիգ քաղաքը⁴³: Ո՞վ և ի՞նչ աստիճանի պաշտոն ունեցող անձնավորություն էր նա, դժվար է որոշակի ասել առնվազն երկու պատճառով: Նախ, որ տվյալ արձանագրությունը խիստ թերատ է և ապա, որ մեր սկզբնաղբյուրներում չկա այդպիսի անուն կրող անձնավորություն այդ դարերի հայ իրականության մեջ: Մեր կարծիքով, թեպետև այդ նույն անունը կրում էր Փարասաման Իբերացու որդին, որը կարճ ժամանակ (51-52 թթ.) տիրացավ Հայաստանի գահին, սակայն նրա՝ Հռադամիզի (Radamistus)⁴⁴ և Ապարանի արձանագրության Ռոդոմիթրի միջև անվան նմանությունից բացի որևէ այլ ընդհանուր բան փնտրելու փորձերը ապարդյուն կլինեն:

Տակիտոսը և Հովսեպոս Փլավիոսը, երբ խոսում են մ.թ. 1 դարի Հայաստանի մասին, հաճախ հիշատակում են հայոց ազնվականներին (nobiles)⁴⁵, մեծամեծներին (megistanes)⁴⁶, առաջիններին (primores armeniorum)⁴⁷: Նկատենք, որ անտիկ հեղինակների այս ընդհանուր բնույթ կրող բնորոշումները չեն կարող մեզ օգնել հիշատակված ազնվականների, մեծամեծների և առաջինների՝ հայկական հասարակության մեջ ունեցած դիրքի էություն մասին որոշակի դատողություններ անելու:

Այսուհանդերձ, անտիկ հեղինակների հիշատակած զորավարների անունները, որոնք նշվեցին վերևում, մեզ մղում են շատ կարևոր մի եզրահանգման: Պարզվում է, որ հայոց թագավորը տարբեր առիթներով և տարբեր ժամանակներում

(42) Հ.Մ. Բարթիկյան, նույն տեղում:

(43) М.И. Ростовцев, Апаранская греческая надпись царя Тиридата, СПб., 1911, стр. 8; К.В. Тревер, Очерки ..., стр. 273-276.

(44) Taciti annal., XII, 44-51; XIII, 6.

(45) Նույն տեղում, 56:

(46) Նույն տեղում, 27: Jos. Flav., Antiq. Jud., XVIII, 2 և 4: Հմմտ. նաև Strabo, XII, 3, 29 (C. 553):

(47) Taciti Annal., XII, 44.

տարբեր մարդկանց էր նշանակում զորահրամանատար: Դա նշանակում է, որ թագավորն ինքն էր հայոց զորքերի գլխավոր հրամանատարը և այդ ժամանակ դեռևս Հայաստանում սպարապետի պաշտոնը, եթե այն գոյություն ուներ, չէր պատկանում ժառանգաբար տոհմերից որևէ մեկին, այլ այդ պաշտոնում ամեն անգամ, անհրաժեշտության դեպքում, նշանակվում էր թագավորի հայեցողությունը որևէ մի զորահրամանատար: Մեր այս եզրահանգումը իր հաստատումն է գտնում նաև Մովսես Խորենացու պերճախոս վկայություններում: Դեռ ավելին՝ Խորենացին, նկարագրելով Վաղարշակի գործունեությունը հայկական պետական սպարապետի կազմավորման և տարբեր նախարարությունների հաստատման ուղղությունը, չի հիշատակում հայոց սպարապետին և զորքերի սպարապետությունը⁴⁸: Հավանաբար հայոց զորքի առաջնորդությունը այդ ժամանակ վստահված էր Բագրատունիներին, քանի որ իր պատմությունը շարունակելիս, Խորենացին հաղորդում է, որ Տիգրան Միջինը վերցնում է Բագրատունիներից զորքի իշխանությունը⁴⁹ և սպարապետ է կարգում Ռշտունյաց նախարարություն նահապետ Բարզափրանին⁵⁰: Արտաշեսը, հայոց թագավոր դառնալով, Սմբատ Բագրատունուն է վստահում հայոց բոլոր զորքերը⁵¹: Այնուհետև՝ երբ սպառամբել էր Կասպից երկիրը, Արտաշեսն սպառամբների դեմ ուղարկում է Սմբատին հայոց բոլոր զորքերով⁵²: Շուտով, երբ Սմբատը վշտացած թողնում է հայոց զորքի իշխանությունը, Արտաշեսն այն հանձնում է իր որդի Արտավազդին⁵³: Մ.թ. III դարի վերջում Տրդատ Գ-ը հայոց զորքերի սպարապետությունը հանձնում է իր դայեկորդի Արտավազդ Մանդակունուն, իբրև երախտագիտություն այն բանի համար, որ սա փրկել էր իրեն և հասցրել հայրենի իշխանություն⁵⁴: Քիչ անց, վերջինիս մահից հետո, Տրդատը իր

(48) Մովսես Խորենացի, Բ, գ-ը:

(49) Նույն տեղում, Բ, Ժգ:

(50) Նույն տեղում, Բ, ԺԺ:

(51) Նույն տեղում, Բ, խէ:

(52) Նույն տեղում, Բ, ձգ:

(53) Նույն տեղում:

(54) Նույն տեղում, Բ, ձր, ձէ:

մարդկանցից նշանակում է չորս գորավար,՝ վրաց առաջնորդ Միհրանին, Բագարատ ասպետին, Ռշտունյաց Մանաճիհր նահապետին և Ամատունյաց Վահան նահապետին⁵⁵:

Սպարապետի և սպարապետության մասին պատմահոր հաղորդած այս տվյալները լավագույնս իմաստավորելու համար անհրաժեշտ է վերացնել Արտաշեսին վերաբերող խորենացու հայանի անախրոնիզմը և այնտեղ նկարագրված դեպքերը տանել մ․թ․ա․ II դարի առաջին կեսը, այսինքն՝ այն տարիները, երբ դրանք իրոք կատարվել են: Այդ դեպքում հեշտ է նկատել, որ հայկական միասնական թագավորության հիմնադիր Արտաշես – Վաղարշակի⁵⁶ գահակալության շրջանում երկու կարևորագույն գործակալություններ՝ սպարապետությունը և թագադիր ասպետությունը գտնվում էին Բագրատունիների նահապետի Սմբատի ձեռքին: Եթե սրան ավելացնենք այն, որ Սմբատը միաժամանակ եղել էր Արտաշեսի ղայակը⁵⁷, մեզ համար պարզ կլինի, թե նա ինչպիսի՞ բարձր դիրք և հեղինակություն ուներ պետական գործերում:

Եթե մեզ համար այս կամ այն չափով պարզ է հայոց սպարապետի դերն ու ֆունկցիան (նա գործերի հրամանատարն էր պատերազմի ժամանակ), ապա նույնը չի կարելի ասել մեկ ուրիշ կարևոր պաշտոնյայի՝ հազարապետի ֆունկցիայի մասին Հայաստանում: Հայ մատենագրության մեջ հազարապետի մասին առաջին անգամ կարդում ենք Աստվածաշնչում, որտեղ, սակայն, այնքան էլ պարզ չէ նրա վարած պաշտոնի էությունը: Բանն այն է, որ «հազարապետ» բառով մեր անդրանիկ թարգմանիչները տարբեր դեպքերում թարգմանել են հունարենի տարբեր բառեր: Այսպես, Աստվածաշնչի հայերեն թարգմանության մեջ շուրջ 40 անգամ հանդիպում է «հազարապետ» բառը: 26 անգամ այն համապատասխանում է հունարեն ΧΙΛΙΑΡΧΟΣ – բառին, որը իրոք, բառացի նշանակում է հազարապետ, հազար հոգու վրա նշանակված հրամանատար: 6 անգամ այն համապատասխանում է հունարեն ΟΙΚΟΝΟΜΟΣ (բառացի նշանակում է՝ տան կառավարիչ, տնտես) բառին⁵⁸: 3 անգամ այն հա-

(55) Նույն տեղում, Բ, ձէ, Գ, Կ:

(56) Այս մասին տես վերևում՝ էջ 120-122:

(57) Մովսես Խորենացի, Բ, չէ:

(58) Նշենք, ΟΙΚΟΝΟΜΟΣ բառը մեկ անգամ թարգմանված է հրամանատար, իսկ մեկ անգամ գալուպետ:

մապատասխանում է *ἐπιτεροπος* (բառացի նշանակում է կառավարիչ, տեղապահ, խնամակալ, պահապան) բառին, երկու անգամ՝ *ὁ ἐπὶ τῆς οἰκίας* (բառացի նշանակում է՝ ի վերայ տանն) արտահայտություն, մեկ անգամ *ἐφροστικῶς ἐπὶ πόντων* արտահայտությունը թարգմանված է հազարապետ հաստատարիմ ի վերա ընչից, իսկ մեկ անգամ էլ հունարեն բնագրում մեր «հազարապետ» բառի դիմաց ոչինչ չկա:

Հունա-մակեդոնացիների մոտ հազարապետը պարզապես հազար հոգուց բաղկացած զորամասի հրամանատարն էր: Մինչդեռ Պարսկաստանում, հավանաբար, հազարապետն ուներ նաև արքունիքում ինչ-որ բարձրագույն պաշտոն: Պարսկաստանում հազարապետի ունեցած դերի և պաշտոնի մասին լավագույն պատկերացումը տալիս է Աքեմենյանների թագավորությունից վերջին շրջանին վերաբերող Դիոդորոս Սիկիլիացու հետևյալ հաղորդումը:

«Քանի որ նա (արքայից արքա Արտաքսերքեսն Օքոսը — Ս.Կ.) իր դաժան վարվեցողությունները ատելի էր դարձել, հազարապետ (*χιλιάρχος*) Բագոսը, որը թեպետև իր հատկություններով ներքինի էր, բայց իր հույսով խորամանկ ու ռազմասեր, ինչ-որ բժշկի օգնությամբ թունավորելու միջոցով սպանեց Օքոսին և թագավորությունը հանձնեց արքայի ամենակրտսեր որդուն՝ Արեսին: Նա միաժամանակ, ոչնչացրեց նաև (նոր) թագավորի եղբայրներին, որոնք բոլորովին երիտասարդ էին, որպեսզի պատանի (թագավորը) մեկուսացված լինելով, իրեն առավել ևս հպատակվի: Բայց պտտանին իր բացահայտ դժգոհությունը հայտնեց կատարված անօրենությունների մասին և արդեն ակնհայտ էր, որ պարտատուվում է պատժել ոճիրների հեղինակին. ուստի և Բագոսը, լսելով նրա մտադրությունը, սպանեց Արեսին և նրա որդիներին, երբ արդեն թագավորել էր երեք տարի: Այսպիսով, քանի որ արքունի տոհմը ոչնչացվել էր և ուղիղ գծով ոչ ոք չէր մնացել իշխանությունը ժառանգելու համար, Բագոսը գերադասեց արքունիքին մոտիկ մարդկանցինց մեկին, Դարեհ անունով և նրան դարձրեց թագավոր»⁵⁹: Սա որդին էր Արսանեսի և թողը

(59) Սա Դարեհ Գ կողմանուն է (մ.թ.ա. 336-330 թթ.), որը թագավոր դառնալուց առաջ, ինչպես հաղորդում է Յուստինոսը, եղել էր Արմենիայի ստորապ (M. Juniani Justini Epitoma historiarum Philippiarum Pompeii Trogi X, 3, 4-5).

Օստանեսի, որը պարսից Արտաքսերքսես արքայի եղբայրն էր: Իսկ Բագոասի հետ կատարվեց այսպիսի հիշարժան դեպք: Նա իր ոճրագործ սովորության համաձայն, փորձեց թունավորելով վերացնել Դարեհին: Բայց արքան, տեղեկանալով դավադրության մասին, Բագոասին հրավիրեց իր մոտ և խրախճանքի պահին բաժակը նրան սալով, ստիպեց խմել թունը»⁶⁰:

Հայտնի իրանագետ Ռիչարդ Ֆրայը նշում է, որ «վերջին Աքեմենյանների օրոք հազարապետը, բարձրագույն աստիճանավորներից մեկը, սկսեց կատարել վարչապետին մոտ պաշտոն: ... Բառի ստուգաբանությունից կարելի է դատել, որ հազարապետ ախողուր Աքեմենյանների օրոք կրում էր «հազարանամահների» արքայի թիկնազորի պետը, որը կանխավ դարձել էր արքունիքում կարևոր դեմք»⁶¹:

Հայկական իրականություն համար հազարապետի գոյությունը հաստատապես վկայված է Արշակունիների թագավորությունից վերջին հարյուրամյակի համար՝ մ.թ. IV դարի սկզբից մինչև թագավորության անկումը, ինչպես նաև հետագա՝ մարզպանական շրջանի համար: Ինչ վերաբերում է նախորդ դարերին, հատկապես Արտաշեսյանների թագավորության համար, ապա մեր միակ աղբյուրը Խորենացու մոտ պահպանված կցկտուր վկայությունների ուշագիշտ քննարկումը, այնուամենայնիվ, մեզ համոզում է, որ հազարապետի պաշտոնը Հայաստանում առկա է եղել նաև այդ ժամանակ:

Ճիշտ է, Խորենացին, նկարագրելով թագավորությունից հիմնադիր Վաղարշակի գործունեությունը, Հայաստանում նրա հաստատած նախարարությունները և պաշտոնները թվարկելիս, չի հիշատակում հազարապետին և հազարապետությունը: Այս փաստը գուցե հնարավոր լիներ մեկնաբանել այնպես, որ իբր Հայաստանում մ.թ.ա. II դարում դեռևս չէր հաստատված հազարապետությունը: Սակայն նույն Խորենացին, խոսելով Արտաշեսի գործունեությունից մասին, նշում է, որ «կարգ էր Արտաշեսի գլխի» հազարապետ, զայր իմաստուն և բանաստեղծ և հալասայ ի նա զամենայն գործս տանն արքունի»⁶²:

Այնուհետև հազարապետը Հայաստանում հիշատակվում

(60) Diodor., XVII, 5, 3-8.

(61) Р. Фрай, Наследие Ирана, М., 1972, էջ 139:

(62) Մովսես Խորենացի, Բ, ձգ:

է Արշակունիների ժամանակ, մ.թ. 1V դարի սկզբին: Այդ բանը մեզ հայտնի է դարձյալ Խորենացուց, որը հաղորդում է, թե «Տրդատ ի հազարապետութիւն Հայոց զՕտայն կայուցանէր»⁶³: Այստեղ խոսքը վերաբերում է Օտա Ամատունուն, որը մի քանի անգամ հիշատակվում է Ագաթանգեղոսի մոտ: Նկատելի է, սակայն, որ Տրդատ Գ-ի պատմության հեղինակը ամեն անգամ Օտային հիշատակում է որպես նախարար, բայց ոչ մի անգամ նրան չի անվանում հազարապետ⁶⁴: Թվում է, թե Օտա Ամատունուց հետո Հայաստանի հազարապետության պաշտոնը ժառանգաբար գտնվել է Ամատունյաց նահապետի ձեռքին: Այսպիսի եզրակացությունը բխում է Խորենացու մատյանի համապատասխան հատվածներից, որոնցում իբրև հայոց հազարապետ հիշատակվում է Վահան Ամատունին: Հայկական սղբյուրներից մեզ հայտնի միակ բացառությունը Փավստոսի հետևյալ վկայությունն է, որտեղ հայոց երկրի հազարապետը Գնունյաց ազգից է. «Եւ սկիզբն զործակալութեանն, աշխարհաշէն աշխարհատած ղեհկանութեան, շինականաշէն ազգն Գնունեաց՝ հազարապետն ամենայն երկրին»⁶⁵:

Ինչպիսի՞ն էր հայոց հազարապետի պաշտոնը: Այս հարցին պատասխանելուց առաջ մեջ բերենք Փավստոսի մեկ հետաքրքիր վկայությունը ևս, որտեղ հազարապետի մասին կարդում ենք. «Բայց գումարեաց ընդ նման թագաւորն Տիրան գմեծամեծ նախարարն, ըստ սովորության օրինակին, գմեծ հազարապետն ի հազարապետութեանն»⁶⁶: Ինչպես տեսնում ենք, պահպանված վկայություններից և ոչ մեկը հիմք չի տուլիս հայոց հազարապետին համարելու հազար հոգուց բաղկացած կամ մեկ այլ զորամասի հրամանատար:

Հազարապետի պաշտոնը Հայաստանում, անկասկած, բարձրագույններից մեկն էր և այն վարում էր արքայի ամենա-

(63) Նույն տեղում, Բ, ձր:

(64) Ագաթանգեղոս, Ի, 217:

(65) Փավստոս Բուզանդ, Դ, ր:

(66) Նույն տեղում, Գ, ժր: Մենք չենք անդրադառնում Կորյունի, Եղիշեի, Փարպեցու և Խորենացու՝ հայոց հազարապետին վերաբերող մյուս հաղորդումներին, քանի որ դրանք վերաբերում են արդեն մարզպանության շրջանին, երբ Հայաստանում վերացել էր Արշակունյաց թագավորությունը:

վստահելի անձնավորություններից մեկը: Ինչպես տեսանք, Արտաշեսի ժամանակ հազարապետ էր կարգվել արքայի որդի Վրույրը, որին և վստահված էին արքունական բոլոր գործերը: Հետագայում Տրդատ Գ-ը հազարապետ նշանակում է Օտային, որը, ինչպես Խորենացին է հաղորդում, Տրդատի բացակայության ժամանակ սնուցել էր արքայադուստր Խոսրովիդուխաին և հավատարմությամբ պահպանել ամրոցը: Ագաթանգեղոսը Օտային անվանում է ավագ նախարար⁶⁷ (հունարեն տարբերակում՝ ΤΙΜΩΤΑΤΟΝ ΣΑΤΡΑΠΗΝ – պատվավորագույն սատրապ)⁶⁸: Հետևաբար, միանգամայն իրավացի է Հ.Հ. Մանանդյանը, երբ գրում է. «Մեծ “գործակալություն” էր նաև “հազարապետություն”-ը, որին հանձնարարված է եղել, հավանորեն, արքունի երկրի տնտեսական բարեկարգման և գյուցիական ու ելամտական գործերի վարչությունը:

«Հազարապետ»-ի պարտականությունն էր, ըստ երևույթի, աջակցել երկրի շինարարական աշխատանքներին և շինական տնտեսության զարգացմանը: «Հազարապետության» այս պարտականությունները կապված էին հարկահանության գործի հետ: Հողի մշակությունը, ուռուցման գործը և, ընդհանրապես, երկրի շեն վիճակը նշանակություն ունեին՝ իբրև հիմք և աղբյուր պետական բարեկեցության և պետական եկամուտների»⁶⁹:

Իր այս տեսակետը փաստարկելու համար Հ.Հ. Մանանդյանը վկայաբերում է Փափսոսի հայտնի վկայությունը հազարապետության մասին, որն արդեն մեջ ենք բերել վերևում:

Խորենացու հաղորդումների համաձայն, ամենակարևոր արքունի գործակալությունը հին Հայաստանում պետք է եղած լիներ թագադիր ասպետությունը, որը ժառանգաբար հանձնարարված էր Բագրատունիներին: «Նախ և առաջին, – գրում է պատմահայրը, – փոխարէն բարեաց հատուցանելով (Վաղարշակ – Ս.Կ.) առնն զօրաւորի և իմաստնոյ, որ ի Հրէիցն՝ Շամբաստայ Բագարատ, տալով նմա իշխանութիւն ազգաւ թագադիր լինել

(67) Ագաթանգեղոս, նույն տեղում:

(68) Agathangelus und die Akten Gregors von Armenian, neu herausgegeben von Paul de Lagarde, Göttingen, 1887, էջ 46:

(69) Հ.Հ. Մանանդյան, Ֆեոդալիզմը հին Հայաստանում, էջ 69:

Արշակունեաց»⁷⁰: Երկրորդ անգամ իտրենացին գրում է. «Արդ՝ նախ և առաջին օրինադրէ թագաւորն. (Վաղարշակ — Ս.Կ.) զինքը և գտուն իւր, սկիզբն առնելով ի գլխոյ իւրմէ և ի թագէ: Եւ զկոչեցեալն Բագարատ, որ ի Հրէիցն, շնորհակալութիւն նմա վասն յառաջագոյն անձնատուր ձեռնափութեան առ թագաւորն և միամտութեանն և քաջութեանն, զյառաջասացեալ տանուտիրական պատիւն սպգին պարգևելով. և իշխել նմա թագ ի գլուխ դնել թագաւորին, և կոչել թագադիր, այլ և ասպետ»⁷¹: Երրորդ անգամ իտրենացին հավաստում է. «... Եւ աղերսեալ որ ի Հրէիցն Շամբատայ Բագարատ, որ և թագադիր և ասպետ»⁷²: Եվ դարձյալ՝ «ոչ ինչ ընդհատ յայլոց պատուոյ տայ (Արտաշէս — Ս.Կ.) դայեկին իւրում Սմբատայ, բայց միայն յերկուց գնդացն և ի կարմիր կօշկէ. Եւ սեւիլ քան զհայրենական զիւր թագակապ ասպետութիւնն և զիշխանութիւնն արեւմտեայ զօրուն, հաւատայ ի նա զամենայն զօրս Հայոց, և բոլոր աշխարհիս գործակալս և զհամօրէն տունն արքունի»⁷³:

Արժեքավոր են նաև Ագաթանգեղոսի և Փայստոսի հետևյալ վկայությունները. «Յայնժամ թագաւորն ... գումարեաց զգլխաւորս նախարարացն և զկուսակալս աշխարհացն. առաջին՝ իշխանն Անգեղ տան, երկրորդ՝ իշխանն Աղձնեաց, որ է բղեաշխն մեծ, երրորդ՝ իշխանն մարդպետութեան իշխանութեանն, չորրորդ՝ իշխանն թագակապ իշխանութեան ասպետութեանն ...»⁷⁴:

«Առնոյր ընդ իւր (Տրդատ — Ս.Կ.) և ի զինուորական կողմանեն զչորեցան իւրոյ տաճարին, որ բղեաշխքն կոչին. գառաջին սահմանակալն ի Նոր Շիրական կողմանէն, և զերկրորդ՝ սահմանակալն յԱսորեստանեայ կողմանէն, և զերրորդը՝ յԱրուսատան կողմանէն, զչորրորդն՝ ի Մաթթաց կողմանէն, զմեծ իշխանն Անգեղ տան, և զթագադիր ասպետն ...»⁷⁵:

Ագաթանգեղոսի հունարեն տարբերակում վերոհիշյալ վկայություններին՝ թագադիր ասպետին վերաբերող հատվածնե-

(70) Մովսէս իտրենացի, Բ, 4:

(71) Մովսէս իտրենացի, Բ, 5:

(72) Նույն տեղում, Բ, 11:

(73) Նույն տեղում, Բ, 16:

(74) Ագաթանգեղոս, ՃԺԲ, 795:

(75) Նույն տեղում, ՃԺԶ, 873:

րում համապատասխանաբար կարդում ենք. «... ὁ τέταρτος ἄρχων ὁ τὸ διαδήμια ἔξουσίαν ἔχων ἐπιδήσῃ τῷ βασιλεῖ, ὁ λεγόμενος Ἀσπέτων» (Չորրորդ՝ իշխանը որը թագավորի (գլխին) թագը կապելու իշխանութուն ուներ, որը կոչվում էր Ասպետ)⁷⁶: «Καί τὸν στέφοντα τὸν βασιλέα ἄρχοντα. Ἀσπέτ λεγόμενον» (և թագավորին թագադրող իշխանին, որը կոչվում էր Ասպետ)⁷⁷:

Փափստոսն իր հերթին վկայում է, որ «առնէր հարսանիս և եղբոր նորին վաղարշակայ, և տայր նմա զդուստր ասպետին Բագրատունոյ ի Սպեր գաւառէ, որ թագադիրքն (բնագրում՝ թագաւորքն) թագակապքն լեալ էին ի բնմէ ազգին թագաւորութեանն Արշակունոյ»⁷⁸:

Ագաթանգեղոսի հաղորդումներում հատկանշականն այն է, որ երկու դեպքում էլ թագադիր ասպետը հիշատակված է գահերեց բզեշխներից անմիջապես հետո, առաջին իշխանների թվում. մի բան, որը վկայում է այդ պաշտոնն ունեցող անձի բարձր դիրքի մասին: Սա համահնչուն է խորենացու հաղորդման, թե վաղարշակը բարենորոգումներ ձեռնարկելիս, նախ և առաջ Բագրատոսին իշխանութուն տվեց որդոց որդի թագադիր լինել Արշակունիներին. թե նախ և առաջ թագավորը կարգավորում է ինքն իրեն և իր տունը, սկսելով իր թագից և Բագրատոսին իրավունք է տալիս թագ դնել թագավորի գլխին և կոչվել թագադիր, այլև ասպետ:

Հայագետների համար եթե պարզ է եղել «թագադիր» տիտղոսի նշանակությունը, ապա Բագրատունուն տրված «ասպետ» տիտղոսի բացատրությունն շուրջ կան տարակարծիքներ: Բառի ստուգաբանական բացատրությունը (ասպետ-հեծյալ իշխանավոր) դեռևս չի կարող այդ տիտղոսի էությունը բացահայտել: Առավել ընդունելի պիտի համարել Ն. Բյուզանդացու տեսակետը, թե, «ասպետ նույնանշան է թագակապ և թագադիր բառերի»⁷⁹:

Այս հարցում մենք պետք է հենվենք բացառապես մեր

(76) Agathangelus..., էջ 68:

(77) Նույն տեղում, էջ 83:

(78) Փափստոս Բուզանդ, Ե, խդ:

(79) Նորայր Բիզանդացի, Կորիւն վարդապետ և նորին թարգմանութիւնք, Տփղիս, 1900, էջ 284:

պատմիչների՝ Ագաթանգեղոսի և Խորենացու վերոհիշյալ վկայությունների վրա, որոնցում, ինչպես տեսանք, Բագրատունու պաշտոնը բնորոշված է իբրև «թագակապ ասպետութիւն» և «իշխանութիւն թագակապ ասպետութեան», իսկ Բագրատունին կրում է «թագադիր և ասպետ» կամ «թագադիր ասպետ» տիտղոսները: Թագադիր ասպետ (Ασπῆτ) կոչված է նաև Ագաթանգեղոսի հոճնարեն տարբերակում: Եթե Խորենացու հաղորդումներում նկատելի է այդ երկու պաշտոնների տարբերությունը — կոչել թագադիր, այլև ասպետ» կամ «թագադիր և ասպետ» — ապա մյուս դեպքերում պաշտոնը կոչվում է «թագադիր ասպետութիւն»: Հետևաբար, ասպետութիւնը սերտորեն առնչվում էր թագադրի պաշտոնին և, հավանաբար, թագադիր և ասպետ բառերով բնորոշվում էր նույն պաշտոնատար անձը:

Այս կարծիքի օգտին կարելի է բերել նաև Խորենացու այն վկայությունը, թե Զիրավի ճակատամարտում կրած պարտությունից հետո, երբ Մեհրուժան Արծրունին ընկնում է Սմբատ Բագրատունու ձեռքը, սա շամփուրը տաքացնելով, այն բոլորում է պսակի ձևով և շիկացնելով, դրանով պսակում է Մեհրուժանին, ասելով.« ... ինձ ասպետիս պարտ է գքեզ պսակել ըստ սովորական իշխանութեան իմոյ հայրենեաց»⁸⁰: Մեկ այլ առիթով մենք նշել ենք, որ Բագրատունիները հավանաբար պատկանելիս են եղել քրմական դասին և հայոց թագավորին թագադրելու իրավունք ունեցող Բագրատունի ասպետը պետք է լիներ քրմապետ: Հնարավոր է նաև, որ թագադրի «ասպետ» մակդիրը բխում է քրմապետի առանձին գործեր ունենալու փաստից:

Հայագիտություն մեջ մարդպետությունը ևս համարվել է Հայաստանում խոշոր և կարևոր գործակալություններից մեկը: Մենք կուզենայինք ընդգծել, որ մարդպետությունը, հատկապես հայոց թագավորությունից առաջին շրջանում, եղել է ամենակարևոր գործակալությունը: Եւ ինչո՞ւ, այդ մասին ստորև:

Ն. Ադոնցի կարծիքով՝ մարդպետ նշանակել է սկզբում մարդերի պետ, այն ցեղի, որը բնակվում էր Մարդաստանում: Հետագայում մարդպետը դարձել է սոհմական տիտղոս, ինչ-

(80) Մովսես Խորենացի, Գ, 15:

պես ասպետը, մաղխազը և սպարապետը⁸¹: Սա միայն տիտղոսի անվանման բացատրությունն է և, մեր կարծիքով, ոչնչով չի պարզում այդ պաշտոնի բուն էությունը: Մարդպետության պաշտոնն ունեցողը մեր աղբյուրներում, ընդհանրապես, կոչվում է նաև «Հայր»: Ակադ. Ստ. Մալխասյանցը Փափսոսի «Հայոց Պատմության» իր կատարած աշխարհաբար թարգմանության համապատասխան հատվածին կցած ծանոթագրության մեջ այդ մասին գրում է. «— Հայր» հատուկ անուն չէ, այլ ամեն մի ներքինապետի հարգական կոչում (ինչպես տաճրկների մեջ էլ ներքինապետը կոչվում էր babai): Այնպես որ «Հայր մարդպետ» բառերից ոչ մեկը մի անձի հատուկ անուն չէ, այլ ներքինապետի պաշտոնի հարգական անունը, և անխտիր գործ է ածվում բոլոր ներքինապետների համար⁸²: Միայն մի ներքինապետի հատուկ անուն է պահպանել Փափսոսը, դա Դրաստամատն է, որին հիշում է նա Ե, է գլխում⁸³: Մեր կողմից ավելացնենք, որ Փափսոսը և Ամմիանոս Մարկելլինոսը պահպանել են մարդպետներից ևս մեկի անունը՝ Գղակ (Cylaces-Gylaces)⁸⁴:

Հայաստանում առաջին ներքինի Հայրի մասին հիշատակում է Խորենացին, Արշակունյաց հարստության հիմնադիր Վաղարշակի հաստատած նախարարությունների մասին խոսելիս: Նա գրում է. «Նա և ներքինիս հրամայէ (Վաղարշակ) ի նոյն ազգէ խզել. և նահապետ նոցա զՀայր իշխան մասին յԱտրպատականէ մինչև ցձուաշ և ցՆախաճաւան, և նահապետութեան ազգին սա մեծարոյ: Բայց թե որպէս կամ ուր սորա

(81) Н. Адонц, Армения в эпоху Юстиниана, էջ 319:

(82) Այն, որ «Հայր» և «մարդպետ» բառերը որևէ անձի հատուկ անուն չի եղել, լավագույնս երևում է Փափսոսի (Դ, Ժդ) օգտագործած «Հայր մարդպետներ» հոգնակի արտահայտությունից:

(83) Փափսոս Բուզանդ, Պատմություն Հայոց, թագմանությունը, ներածությունը և ծանոթագրություններն ակադ. Ս. Մալխասյանցի, Երևան, 1968, էջ 318:

(84) Ammiani Marcellini, XXVI, 12, 5: Փափսոս Բուզանդ, Ե,գ և Ե,զ: Փափսոսի մոտ այս անունը պահպանված է «Դգղակ» և «Դղակ» ձևով. մենք ուղղել ենք «Գղակ»՝ հիմնվելով Ամմիանոս Մարկելլինոսի մոտ պահպանված Cylaces-Gylaces (Գիլակես) ձևի վրա: Նույնպիսի ուղղում կատարել է նաև Հ.Հ. Մանանդյանը (Ֆեոդալիզմը հին Հայաստանում, էջ 66-67):

իրք անցին անյիշատակելի, ես ոչ գիտեմ»⁸⁵,

ինչպես տեսնում ենք, պատմահայրը, իր իսկ խոստովանությամբ, «ով գիտէ» թե սրա պատմությունը ինչպես և որտեղ պատահեց: Մարդպետության պաշտոնի առաջացման ժամանակի մասին հետաքրքիր մի վկայություն պահպանվել է նաև Փալստոսի մոտ, որի համաձայն «այս գործակալություն և մարդպետություն, որում Հայրն կոչէին, ներքինեաց գործ լեալ էր ի բնէ ժամանակաց թագաւորութեանն Արշակունոյ»⁸⁶:

Խորենացու և Փալստոսի վերոհիշյալ եզակի վկայությունները համերաշխվում են իրար հետ և հաստատում են այն ենթադրությունը, թե մարդպետություն պաշտոնը Հայաստանում գոյություն ունեւր Արշակունյաց թագաւորության ամենահին ժամանակներից իվեր, այսինքն՝ հետեւելով Խորենացու ժամանակագրության, մ.թ.ա. II դարից:

Մեր կարծիքով, մարդպետություն պաշտոնը Հայաստանում արդեն պիտի որ հաստատված լիներ ամենաուշը մ.թ.ա. II դարի սկզբին, Արտաշես Ա-ի թագաւորության ժամանակ, երբ հայոց թագաւորի գերիշխանության տակ գտնվող ամբողջ տարածքը համարվում էր ոῶῶ βασιλική — արքունի երկիր, ուստան: Ինչպես մեկ ուրիշ աւիթով նշել ենք, Արտաշեսը Հայաստանի ամեն մի թիզ հողին տիրացել էր իր ախոյանի՝ Երվանդի, ինչպես նաև սրա գահակալության ժամանակ հայաբնակ շրջաններին տիրացած սահմանակից թագաւորների դեմ մղած դաժան կռիվներից հետո: Հետևաբար, նա կարող էր Հայաստանը դիտել իբրև իր նիզակով նվաճված (δουκτικός) երկիր: Այդպիսին էր իրավիճակը նաև Սելևկյան թագաւորությունում և հելլենիստական մյուս երկրներում: Հետագայում, իհարկե, Հայաստանում նախարարական հողատիրության անման գուղընթաց, աստիճանաբար կրճատվում է արքունի տանը և այն հիմնականում սահմանափակվում է Այրարատյան աշխարհով:

Ուսումնասիրություններից պարզվում է, որ հայր մարդպետներին է հանձնարարված եղել հայոց թագաւորի կանանոցի, ինչպես նաև արքունիքի վերակացությունը, նրանց է վստահված եղել թագաւորական ամբողջությունների և բերդերի

(85) Մովսէս Խորենացի, Բ, է:

(86) Փալստոս Բուզանդ, Դ, է:

պահպանութիւնը, ինչպէս նաև արքունի գանձերի ու կալվածների վերահսկողութիւնը⁸⁷, թեև առանձին դեպքերում ուրիշներ ևս կարող էին նշանակվել բերդապահներ: Հիշենք, օրինակ, Արտագերսի պաշտպան բերդապահ Ադոնին⁸⁸: Նման հանգամանքներով էլ պայմանավորված էր մարդպետների հեղինակութիւնը երկրի պետական կյանքում, հատկապես հայկական թագավորութիւնի առավել վաղ շրջանում, երբ տերութիւնի ամբողջ տարածքը, ինչպէս նոր նշվեց, եղել էր արքունի երկիր, ոստան, իսկ վերահսկողութիւնն այդ ամբողջ երկրի վրա հանձնարարված էր մարդպետին: Արշակունիների թագավորութիւնի վերջին հայրուրամյակում, արքունի երկրի աստիճանական կրճատմանը զուգընթաց, բնական է, աստիճանաբար խախտւելով էր Հայր մարդպետի կշիռն ու հեղինակութիւնը: Այսուհանդերձ, նույնիսկ նման պայմաններում Փալստոսը, խոսելով Հայր մարդպետ Դրաստամատի մասին (մ.թ. IV դար), վկայում է, որ «բարձ նորա ի վեր քան զամենայն նախարարացն»⁸⁹: իսկ ինչպէս էր կրճատվում արքունի երկիրը:

Հայոց թագավորը, ամեն անգամ իր մերձավորներից որևէ մեկին պաշտոնի նշանակելիս կամ մի որևէ նոր գործակալութիւն հաստատելիս, նոր պաշտոնյային կամ գործակալին պարգևում էր, որպէս վարձատրութիւն, արքունի երկրից որևէ մաս: Հողային ընդարձակ տարածութիւններ թագավորները նվիրաբերում էին նաև տաճարներին և եկեղեցիներին ու նրանց սպասավորներին: Եվ ահա IV դարի կեսերին ստացվել էր այնպիսի վիճակ, երբ արքունի երկիրը չափազանց սահմանափակվել էր. հանգամանք, որը չէր կարող բացասաբար չանդրադառնալ նաև Հայր մարդպետի հեղինակութիւնի վրա և չզրկուէր նրա շահերին: Ուստի միանգամայն հասկանալի է, երբ Հայր մարդպետը նախատում է հայոց Արշակունի թագավորներին նման արարքի համար⁹⁰: Փալստոսի պատմածներից կարելի է հետևեցնել, թե IV դարի կեսերին, երբ սկսել էր երերվել հայ Արշակունիների գահը և արդեն հողատեր դարձած նախարարների մոտ սկսել էին ուժեղանալ կենտրոնախույս

(87) Հ.Հ. Մանանդյան, Ֆեոդալիզմը հին Հայաստանում, էջ 84:

(88) Strabo, XI, 14, 8:

(89) Փալստոս Բուզանդ, Ե, թ:

(90) Նույն տեղում, Դ, Ժդ:

ձգտումները, Հայր մարդպետն իր գործողություններով պարավիզ էր կանգնում արքայի կենտրոնածիզ իշխանության:

IV դարում, Հայաստանի պատմության այդ խուլվայուց տարիներին, մարդպետության ունեցած քաղաքական խոշոր դերը մատնանշել է դեռևս Յ. Մարկվարտը: Նրա կարծիքով, մարդպետները, իբրև արքունի գործակալներ, ձգտել են ամրապնդել հայ Արշակունիների հզորությունը և ստեղծել ուժեղ թագավորական իշխանություն. ուստի և, բնականաբար, նրանք ամեն կերպ աշխատել են հակահարված տալ և թուլացնել ինքնիշխանության հակված կենտրոնախույս նախարարությունները⁹¹: Թվում է, թե այս կարծիքի դեմ չի առարկում նաև Հ.Հ. Մանանդյանը⁹²:

Մարդպետական իշխանության հուլթյան մասին գաղափար կազմելու համար կարևոր են մեր պատմիչների հետևյալ վկայությունները:

«Արդ ելանէր սա շրջէր ընդ մարդպետութիւնն իւր. սպա եկն էր Հայր մարդպետ ի գաւառն Տարօնոյ ընդ իւր գեղոն տեսանել ... : Եկն էջ և Հայրն մարդպետ գիւրով իշխանութեամբն շրջեալ»⁹³:

«Ապա մինչդեռ մարդպետն Հայր գիւրով իշխանութեամբ շրջէր յերկրին Տարօնոյ, և Մուշեղ սպարապետն Հայոց էր ի նմին գաւառին յիւրում բերդին»⁹⁴:

«Իսկ Դրաստամատն ներքինի, որ յամս Տիրանայ թագաւորին Հայոց և Արշակայ որդւոյ նորա թագաւորին Հայոց լեալ էր իշխան տան գաւառին և հաւատարիմ գանձուց Անգեղ բերդին, և ամենայն բերդացն արքունի՝ որ ի կողմանս յայնս. սոյնպէս և յերկրին Մոփաց ի Բնաբեղ բերդին գանձքն լեալ էին ընդ նովաւ, և բարձ նորա ի վեր քան զամենայն նախարարացն»⁹⁵:

Ուսումնասիրողների հատուկ ուշադրությունն է գրավել վերոհիշյալ առաջին երկու վկայություններում հանդիպող «շրջէր ընդ մարդպետութիւնն իւր» և «գիւրով իշխանու-

(91) J. Markwart, Südarmenien und die Tigrisquellen, Wien, 1930, էջ 58-70:

(92) Հ.Հ. Մանանդյան, Ֆեոդալիզմը հին Հայաստանում, էջ 65:

(93) Փալատոս Բուզանդ, Դ, Ժդ:

(94) Նույն տեղում, Ե, գ:

(95) Նույն տեղում, Ե, է:

թեամբ շրջէր» արտահայտությունը: Ղ. Ինճիճյանը և Նորայր Բյուզանդացին այս վկայություններից հետևեցնում են, թե մարդպետների իշխանության տակ գտնված կալվածները Տարոնում մարդպետության սեփական երկիրն էին⁹⁶:

Հ.Հ. Մանանդյանն այս ենթադրությունը համարում է անհավանական և անընդունելի: Նա միանում է Ա.Մ. Գարագաշյանի կարծիքին, որը այս նույն հատվածների հիման վրա ենթադրում է, որ հիշյալ կալվածներն արքունի տան շրջաններ էին, որոնք գտնվել են մարդպետների տեսչության տակ⁹⁷: Հ.Հ. Մանանդյանը իրավացիորեն եզրակացնում է, որ «ընդ մարդպետութիւնն իւր» և «գիւրով իշխանութեամբ» խոսքերի տակ պիտի հասկանալ մարդպետների ոչ թե տանուտերական, այլ գործակալական իշխանությունը⁹⁸:

Հայաստանում կարևոր գործակալություններից է եղել նաև մաղխագությունը: Դեռևս պրոֆ. Ն. Ադոնցը ցույց է տվել, որ մաղխագ (ասոր. malxazā) նշանակում է «տեր, իշխան, թագավոր»⁹⁹:

Մաղխագության գործակալությունը վարողը պատասխանատու էր թագավորի անձի պաշտպանության համար և նա գլխավորում էր արքունի թիկնապահներին, որոնց թիվը, ինչպես այլ առիթով նշել ենք, եղել է շուրջ երկու հազար: Խորենացու այն հայտնի վկայությունից, թե Վաղարշակը իր թագավորությունը կարգավորելիս, հաստատում է «թիկնապահս իւր, զինու հանդերձ, ի զաւակացն Խոռայ Հայկազնոյ, արս ընտիրս և քաջս, նիզակաւորս և սուսերաւորս. և զգլուխ նահապետութեան նոցա զՄաղխագ ոմն այր բարի և սրտեայ»¹⁰⁰, կարելի է հետևեցնել թե մաղխագության առաջացումը կապվում է հայկական թագավորության հաստատման առաջին իսկ տարիների հետ և թե այդ գործակալությունը հանձնված է եղել Հայկագունի, այսինքն՝ հայկական հնագույն տոհմերից մեկի

(96) Ղ. Ինճիճեան, Հնախօսութիւն աշխարհագրական Հայաստանեայց աշխարհի, Կ. Բ, Վենետիկ, 1835, էջ 138: Նորայր Բիւզանդացի, Կորիւն վարդապետ և նորին թարգմանութիւնք, Տիփլիս, 1910, էջ 288:

(97) Ա.Մ. Գարագաշյան, Քննական պատմություն հայոց, Մ.Բ, էջ 7, 20:

(98) Հ.Հ. Մանանդյան, նշվ. աշխ., էջ 65:

(99) Н. Адонц, Армения в эпоху Юстиниана, стр. 400.

(100) Մովսես Խորենացի, Բ, է:

նահապետին: Մատենագրության մեջ մեզ հասած համապատասխան վկայություններից պարզ հետևում է, թե մաղխազության գործակալությունը վարել են խորխոռունյաց տոհմի նահապետները¹⁰¹:

Մենք այս հինգ գործակալությունների մասին խոսեցինք առանձին-առանձին, ելնելով նրանց նշանակությունից և կատարած դերից: Այս գործակալությունների առանձնակի դերը հայկական պետականության կյանքում երևում է մեր պատմիչների բազմաթիվ վկայություններից, ինչպես նաև առավել ուշ շրջանին վերաբերող երկու փաստաթղթի՝ «Գահնամակի» և «Զորանամակի» տվյալներից¹⁰²: Մեզ հետաքրքրող հարցի համար առանձնապես արժեքավոր են Ագաթանգեղոսի հետևյալ վկայությունները, որոնցում թվարկված են հայոց իշխանավորները: Այսպես, Ագաթանգեղոսը, պատմելով, թե Տրդատ թագավորը Գրիգորին ուղարկում է Կեսարիա եպիսկոպոս ձեռնադրելու, թվարկում է նաև նրան ուղեկցողներին: Նա գրում է. «Յայնժամ թագաւորն ... գումարեաց զգլխաւորս նախարարացն և զկուսակալս աշխարհացն. առաջին՝ իշխանն Անգեղտան, երկրորդ՝ իշխանն Աղձնեաց, որ է բղեաշխն մեծ, երրորդ՝ իշխանն մարդպետութեան իշխանութեանն, չորրորդ՝ իշխանն թագակապ իշխանութեան սապետութեանն, հինգերորդ՝ իշխանն սպարապետութեան, զօրավար Հայոց աշխարհին. վեցերորդ՝ իշխանն Կորդոտվաց աշխարհին, եօթներորդ՝ իշխանն Ծովաց աշխարհին. ութերորդ՝ իշխանն Գուգարաց աշխարհին, որ միւս անուանեալ բղեաշխն. իններորդ՝ իշխանն Ռշտունեաց աշխարհին. տասներորդ՝ իշխանն Մոկաց աշխարհին. մետասաներորդ՝ իշխանն Սիւնեաց աշխարհին. երկոսասաներորդ՝ իշխանն Ծաղից աշխարհին. երեքտասաներորդ՝ իշխանն Ուտիացոց աշխարհին. չորեքտասաներորդ՝ իշխանն շահապ Զարաւանդ և Հեր գաւառի. հնգետասաներորդ՝ իշխանն մաղխազութեան տանն. վեցտասաներորդ՝ իշխանն Արծրունեաց»¹⁰³:

(101) Մովսես Խորենացի, Գ, թ: Ագաթանգեղոս, ՃԻԶ: Փալատոս Բուզանդ, Գ, ժբ: Ե, ԼԼ և այլն:

(102) «Գահնամակի» և «Զորանամակի» տվյալները մանրամասն վերլուծել է Ն. Ադոնյը, (Армения в эпоху Юстиниана, էջ 236-297), ուստի և մենք չենք անդրադառնում այդ վավերաբերին:

(103) Ագաթանգեղոս, ՃԺԲ, 795:

Ու դարձյալ՝ «Եւ ի գինուորական կողմանէն՝ զչորեսին գահերէցսն իւրոյ տաճարին, որ բզեաշխքն կոչին. զառաջին սահմանակալն ի Նոր Շիրական կողմանէն, և զերկրորդ սահմանակալն յԱսորեստանեայց կողմանէն, և զերրորդն՝ յԱրուաստան կողմանէն, զչորրորդն՝ ի Մասքթաց կողմանէն. զմեծ իշխսանն Անգեղ տան, և զթագադիր ասպետն և զսպարապետն մեծ, և զիշխանն Մոկաց, և զիշխանն Սիւնեաց, և զիշխանն Ռշտունեաց, և զիշխանն Մաղխազութեան տանն, և զշահապն Շահապիւանի, և զիշխանն սպասկապետութեանն»¹⁰⁴:

Նկատելի է, որ այս հատվածներում թագադիր ասպետը, մարդպետը, սպարապետը և մաղխազը հիշատակվում են իրենց իշխանություններով, այն է՝ զբաղեցրած պաշտոններով, մինչդեռ մյուսները՝ իրենց իշխանության տակ գտնվող երկրամասերի՝ աշխարհների անուններով: Այստեղից կարելի է եզրակացնել, թե վերջիններս էին զբաղեցնում արքունիքում որոշակի պաշտոն գործակալություն, այլ հանդիսանում էին որոշակի տարածքի իշխան-կառավարիչներ:

Յուրաքանչյուր քիչ թե շատ զարգացած հասարակություն էի կարող գոյություն ունենալ և հարատևել առանց իրավական նորմաների՝ օրենքների և դրանց կիրառմանը հետևող մարմինների՝ դատական օրգանների: Ինչպես տեսանք, մեր սկզբնաղբյուրներում որոշակի ակնարկություններ կան հին Հայաստանում պետական օրենքների գոյության մասին: Այդ օրենքների կիրառման հսկողությունը գտնվում էր հեթանոսական Հայաստանում քրմական դասի ձեռքին, իսկ քրիստոնեության արմատավորումից հետո դատավարության գործերն սնցան եկեղեցուն, որը գլխավորում էր հայոց կաթողիկոսը: Վերջինիս էր վստահված «մեծն դատաւորութեան» գործակալությունը: Այդ մասին կա Փավստոսի հետևյալ ուշագրավ վկայությունը.

«Բայց յայնժամ դեռ ևս կենդանի էր ծերունի սուրբն մեծն քորեպիսկոպոսն Դանիել, այր սքանչելի: Աշակերտ եղեալ էր սա մեծին Գրիգորի, վերակացու և գլխաւոր եկեղեցեաց նահանգին Տարօնոյ, Գրիգորի ձեռական իշխանութեանն՝ կողման մասին գործակալութեանն մեծի դատաւորութեանն՝ ունէր զիշխանութիւն զայն առանձինն. այլ վերակացու և հրամանա-

(104) Ագաթանգեղոս, ՃԻԶ, 873:

տար տեսուչ և հոգաբարձու ամենայն եկեղեցեայն Հայոց Մեծաց ընդ ամենայն տեղիս»¹⁰⁵:

Այն, որ Հայաստանում դատավարական գործերը վստահվել էին կաթողիկոսին, հետևում է նաև Խորենացու հետևյալ հաղորդումից.

«Վասն որոյ հաւանեալ Վռամայ՝ զերկաքանչիւրոցն կատարեաց զինդիրս, տուեալ յաթոռ եպիսկոպոսութեանն զայլ ոմն ասորի Շամուէլ անուն, զի լիցի ընդդիմավառ մեծին Սահակայ և հակառակաթոռ. և գործ նմա զատուցանէ զընկերել մարգպանին, կալ ի վերայ բաշխից հարկաց խնդրելոց և դատաստանաց և այլ աշխարհական կարգաց»¹⁰⁶:

Խնդրո առարկա ժամանակաշրջանում, Հայաստանում, բացի վերոհիշյալ մի քանի կարևոր գործակալություններից, գոյություն ունեցել են նաև աղբյուրներում վկայված և չվկայված տարբեր աստիճանի և կարևորության մեծ թվով պաշտոններ: Այսպես, Խորենացին վկայում է, թե Վաղարշակը իրեն զգեստներ հագցնող նշանակեց Գնթունի Ձեռեսին, արքունական որսերի վրա՝ Դատին, որից սերվեցին Վարաժնունիները, ձիերի երամակների վրա՝ Գաբաղին, սեղանատան սպասների և գահերի վրա՝ Աբելին. սրանցից էլ առաջանում են Գաբեղյան և Աբեղյան տոհմերը. Սպանդունիներին նշանակում է սպանդանոցների վրա, Ձյունականներին՝ ամառանոցների պահապաններ և ձյունակիրներ. Գնունիներին՝ գինի մատակարարողներ՝ մատովակ-տակառապետներ, իսկ Արծրունիները թագավորի առաջ պետք է արծիվներ կրեին¹⁰⁷: Հաջորդ գլխում պատմահայրը նույն եղանակով պատմում է Մուրացանների, Աղվանից Առանի, Գուգարաց Բդեշխի, Անգեղյա Տորքի, Սլաք Սլկունու, Միանդակ Մանդակունու և այլոց այս կամ այն պաշտոնում նշանակված լինելու մասին: Նշենք, որ սրանով չի սպառվում Խորենացու հիշատակած անունների և պաշտոնների ցանկը:

Խորենացին, հետևելով անձնանունները ստուգաբանելու իր սկզբունքին, այս կամ այն տոհմի անուանումից բխեցնում

(105) Փաստոս Բուզանդ, Գ, Ժդ:

(106) Մովսես Խորենացի, Գ, կե:

(107) Նույն տեղում, Բ, է:

է ամբողջ պաշտոնին՝ այդ տոհմի ներկայացուցչի նշանակումը: Այս երևույթն ինքնին ուսումնասիրողի մեջ կասկած է հարուցում խորենացու այս հասկածի արժանահավատութեան մասին: Այսուհանդերձ, մի բան անկասկած է. թվարկված բոլոր պաշտոնները վստահված էին հայոց թագավորին շրջապատող մեծատոհմիկ ազնվականութեան ներկայացուցիչներին:

Նկատելի է, որ խորենացու պատմութեան այս գլուխներում թվարկված բոլոր պաշտոնները անմիջականորեն վերաբերում են հայոց թագավորի արքունիքին: Սակայն այդ դեռ չի նշանակում, որ Հայաստանում այդ ժամանակ չկային նաև այնպիսի պետական պաշտոնյաներ, որոնք իրենց վարած պաշտոնով առնչվում էին երկրի տարբեր շրջանների և ամբողջ տնտեսութեան այս կամ այն ճյուղի հետ: Այդ մասին, ցավոք, ազբյուրներում չկան որոշակի տվյալներ: Անկասկած է, սակայն, որ տեղերում եղել են արքունի հարկահավաքներ, աշխատանքային պարհակների կատարմանը հետևող գործակալներ և այլ բնույթի ստորին պաշտոնյաներ, որոնք անմիջականորեն պետք է որ ենթակա լինեին ստրատեգիա-պրեֆեկտուրաների (որոնց մասին արդեն խոսք եղել է նախորդ գլուխներում) կառավարիչներին: Մի բան հաստատ է, որ Հայաստանի քաղաքներում նշանակված են եղել վերակացուներ¹⁰⁸, իբրև թագավորական իշխանութեան ներկայացուցիչներ¹⁰⁹:

Հին Հայաստանում պետական ստորին պաշտոնները, հավանաբար, վստահված են եղել կրտսեր նախարարներին: Հայ մատենագրութեան մեջ հիշատակվում են ավագ և կրտսեր նախարարներ¹¹⁰: Հայագետների մոտ տարակարծություններ կան այն առթիվ, թե նախարարները ի՞նչ հատկանիշների հիման վրա բաժանվում էին ավագների և կրտսերների:

Ղ. Ինճիճյանի կարծիքով, «առագ թուլին կոչեցեայ նոքա՝ որոց մեծ էր կամ գործ կառավարութեան և կամ երկիր. իսկ

(108) Հմմտ. Մովսես Խորենացի, Գ, գ և Գ, իգ:

(109) Այդ մասին տես սույն աշխատութեան քաղաքներին վերաբերող գլխում:

(110) Մովսես Խորենացի, Բ, կդ: Գ, ծա: Եղիշե Վարդապետի վանն Վարդանայ և Հայոց պատերազմին, Վենետիկ, 1864, Ը, էջ 343 և 354: Ղազարայ Փարպեցույ Պատմութիւն Հայոց և թուրք առ վահան Մամիկոնեան, Տիպիս, 1904, ԻԶ, էջ 49:

կրտսեր նոքա՝ որոց փոքր էր պաշտօն և կամ երկիր»¹¹¹:

Կ. Կոստանդյանցը գտնում է, որ Հայաստանում «երկու կարգի նախարարներ կային՝ ավագ և կրտսեր. առաջին կարգից էին այն նախարարները, որոնք հայոց ամենահին ազնվական կամ նահապետական ցեղերից էին հառաջացել. իսկ երկրորդ կարգից էին նոքա, որոնց նախահայրերը հասարակ մարդիկ են եղել առանց ազնվական ծագումի և նախարարություն ստացել են թագավորներից իրենց մի նշանավոր ծառայության կամ հավատարմության համար»¹¹²: Մ. Էմինը ևս խորենացու ռուսներեն իր թարգմանության ծանոթագրությամբ տալիս է նույն այս բացատրությունը¹¹³: Կ. Կոստանյանցը երկրորդ անգամ անդրադառնալով այս հարցին, նշում է, թե «յուրաքանչյուր նախարարության մեջ կար ավագ նախարար՝ տանուտեր, և կրտսեր նախարար՝ սեպուհները»¹¹⁴: Նկատելի է, որ Կ. Կոստանյանի վերոբերյալ երկու տեսակետները համերաշխ չեն իրար:

Ն. Ադոնցի եզրակացությունն այն է, որ հին Հայաստանում նախարարները համարվել են ավագ կամ կրտսեր իրենց հզորության և կարևորության համեմատ¹¹⁵:

Պրոֆ. Խ. Սամվելյանը ևս անդրադառնալով ավագ և կրտսեր նախարարների հարցին, գտնում է, որ դրանց տարբերիչ հատկանիշը «տոհմային ծագման հնությունն է ու ազնվագարմությունը, նմանապես տերիտորիալ հզորությունը: Հետևապես, «ավագ» մակդիրը վերաբերում է ոչ թե առանձին անհատներին, այլ ամբողջական տոհմին՝ սոցիալական առումով: ... Կրտսեր նախարարներ պետք է համարվեին ... նրանք, ովքեր իրենց ազնվագարմ ծագումով և հողային հարստությամբ սոցիալական ու քաղաքական մեծ նշանակություն չէին ներկայացնում»¹¹⁶:

(111) Ղ. Ինճիճեան, Հնախօսութիւն աշխարհագրական Հայաստանյայց աշխարհի, Կ. Բ, Վենետիկ, 1835, էջ 90:

(112) Կ. Կոստանեանց, Հիւսուկածք, Գ, Վիեննա, 1877, էջ 28-29:

(113) Н. Эмин, История Моисея Хоренского, М., 1893, էջ 298:

(114) Կ. Կոստանեանց, նշվ. աշխ., էջ 36:

(115) Н. Адоци, Армения в эпоху Юстиниана, էջ 453:

(116) Խ. Սամուելյան, Հին հայ իրավունքի պատմություն, Կ. 1, Երևան, 1939, էջ 210-211:

Հ.Հ. Մանանդյանը վերոհիշյալ ենթագրություններից անհիմն և անհավանական է համարում «Կոստանյանի և էմինի կռահումը, որ իբր «կրտսեր» նախարարների կարգին պատկանել են «հասարակ մարդիկ առանց ազնվական ծագումի», որոնք նախարարություն էին ստացել իրենց ծառայության կամ հավատարմության համար»: Հ. Մանանդյանի կարծիքով, նախարարությունների բաժանումն «ավագ» և «կրտսեր» խմբերի, ինչպես մատնանիշ է արել Ջավախովը¹¹⁷, բավարար կերպով լուսաբանված է Ղազար Փարպեցու մի վկայության մեջ: Փարպեցու պատմելով, Վարդան Մամիկոնյանը Պարսից արքունիքում արտասանած իր ատենախոսության ժամանակ իմիջիպալոց ասում է՝ «բազումք են յայս երից աշխարհաց յազատորերոյ, որք են աւագ քան զիս և գահու և աւուրբք» (Տրդիս, 1905, գլ. ԻԶ, էջ 49): Այս վկայությունից դժվար չէ հետևեցնել, որ «աւագ» են համարվել նախարարները կամ «գահու» և կամ «ավուրբք»¹¹⁸:

Մեր կարծիքով, առավել ճիշտ է Հ. Մանանդյանի հաջորդ եզրակացությունը, թե «ավագների խմբին են պատկանել այն հզոր ու առաջնակարգ տոհմերի նախարարները, որոնք «գահերեց» էին, իսկ «կրտսեր»՝ նրանք, որոնց գահերը եղել են երկրորդական կարգի»¹¹⁹: Դժվար չէ նկատել, որ Հ. Մանանդյանը այս դեպքում համերաշխ է Ղ. Ինճիճյանի և Խ. Սամվելյանի տեսակետին:

Մեր հնագույն մատենագրական աղբյուրներում, որոնք, հիմնականում, պատկերում են IV-V դդ. Հայաստանի իրավիճակը, բազմաթիվ հաղորդումներ կան նախարարության գլուխ կանգնած անձնավորության մասին: Հետևում է, որ «իշխանությունն ամեն մի նախարարության մեջ, — ինչպես նկատում է Հ. Մանանդյանը, — պատկանում էր նախարարական տոհմի ներկայացուցչին, որ կոչվում էր «տանուտեր», «տեր» կամ «նահապետ»¹²⁰: Հ. Մանանդյանը իր ուսումնասիրության մեջ այդ առնչությամբ թվում է կարևորագույն մատենագրական

(117) И. Джавахов, Государственный строй древней Грузии и древней Армении, стр. 110.:

(118) Հ.Հ. Մանանդյան, Ֆեոդալիզմը հին Հայաստանում, էջ 42:

(119) Հ.Հ. Մանանդյան, նշվ. աշխ., էջ 43:

(120) Նույն տեղում, էջ 47:

վկայությունները¹²¹;

Մեր նպատակից դուրս է խոսել տանուտեր, տեր և նահապետ տերմինների ծագման և ստուգաբանության մասին: Մեզ, սովյալ դեպքում, հետաքրքրում է նրանց տեղը հին Հայաստանի պետական ապարատում, այսինքն՝ այդ տիտղոսը կրողների Ֆունկցիաները պետական իշխանության հանդեպ: Այս առթիվ տարբեր կարծիքներ են հայտնվել, բայց առավել ճիշտ պիտի համարել Ղ. Ինճիճյանի բացատրությունը, թե տեր, տանուտեր կամ նահապետ «կոչ էր նա՝ որ գլխաւոր էր իւրաքանչիւր տոհմի նախարարութեան, ... յորոյ ի ձեռին էր տէրութիւն երկրի նոյն տոհմին, ևս և տէրութիւն ի վերայ զօրաց այնր տոհմի»¹²²: Նույն այս բացատրությանը համամիտ են նաև Ի. Ջավախովը և Հ.Հ. Մանանդյանը¹²³: Իսկապես, նախարարը ոչ միայն իր տոհմի նահապետն էր, տանուտերը, այլև իրեն որպես տիրություն վստահված նախարարության իշխանը, կառավարիչը¹²⁴:

Մեր շարադրանքի ընթացքում տարբեր առիթներով արդեն ակնարկություններ եղել են Հայաստանում նախարարությունների առաջացման հարցի վերաբերյալ: Հայագիտության մեջ, ընդհանրապես, այն կարծիքն է հայտնվել, թե նախարարությունները առաջացել են շատ հին ժամանակներում, ստոհմային կարգերի հիման վրա, երբ այս կամ այն տոհմի առաջնորդը դարձել է սովյալ երկրամասի ժառանգական տերը և կառավարիչը¹²⁵: Մեր կարծիքով, նախարարությունները, որպես պետական իշխանության կարևորագույն օղակներ, Հայաստանում առաջացել են հիմնականում հայկական պետականության կազմավորման զուգընթաց, երբ պետության գլուխ կանգնած հայոց թագավորը իրեն մոտիկ կանգնած ավագանու այս կամ այն ներկայացուցչին հանձնարարում էր իր անունից

(121) Նույն տեղում, էջ 48-49:

(122) Ղ. Ինճիճյան, Հնախոսություն, Կ. Բ, էջ 78:

(123) Ի. Джавахов, Государственный строй ..., էջ 100-109: Հ.Հ. Մանանդյան, նշվ. աշխ., էջ 47-48:

(124) Փավստոս Բուզանդ, Գ, գ: Ծ, չէ: Ղազար Փարպեցի, Բ, Լ, էջ 18: Բ, իս, էջ 85:

(125) Ի. Джавахов, Государственный строй ..., стр. 111-115: Н. Адонц, Армения в эпоху Юстиниана, стр. 400-410; Հ.Հ. Մանանդյան, Ֆեոդալիզմը հին Հայաստանում, էջ 46-56:

որևէ երկրամասի կառավարումը: Հետագայում նկատվում է նախարարութիւնների առաջացման մի երկրորդ ուղի ևս: Թագավորը իրեն հատուկ ծառայութիւն մատուցած իր մերձավորներին հատուցելու նպատակով, ինչպես արդեն ասել ենք, նրանց դասում էր նախարարութիւնների շարքը:

Սկզբնաղբբյուրների համադրումից կարելի է եզրակացընել, թե իրենց պարտականութիւնների կատարման տեսակետից Հայաստանում նախարարները բաժանվել են երեք խմբի. 1) նախարարներ, որոնք պարտավոր էին հոգալու արքունի տընտեսութեան տարբեր ճյուղերի մատակարարումը. 2) նախարարներ, որոնք տարբեր պաշտոններ էին վարում արքունի դռանը. 3) նախարարներ, որոնք հայոց թագավորի հանձնարարութեամբ երկրի տարբեր մասերում վարում էին վարչա-պետական գանազան պաշտոններ¹²⁶: Նախարարների պարտականութիւնների մեջ, ընդհանրապես, կարևոր տեղ էր գրավում նաև այն, որ պատերազմի ժամանակ, թագավորի առաջին իսկ պահանջով, նրանք պետք է իրենց գումարած զորամասերով ներկայանային պետութեան սահմանների պաշտպանութեան համար:

Հայագետների միջև վեճեր է առաջացրել նաև հին Հայաստանում գոյութիւն ունեցած նախարարութիւնների թվաքանակի հարցը: Վեճերի առիթը դարձյալ սկզբնաղբբյուրների անորոշ հաղորդումներն են այդ մասին: Ծանոթանանք նախարարական իշխանութիւնների և գործակալների թվի մասին մեզ հասած մատենագրական վկայութիւններին, որոնք հիմք են ծառայել Հայագետներին այս կամ այն եզրակացութեան հանգելու:

«... Եւ այլ յայսմ ազգաց և ի խոնարհ, որ գործակալս անունն բարձիւք առաջի արքային պատիւ ի գլուխ բազմէին, թող զնահապետս մեծամեծս և զտանուտեարս, որք գործակալք միայն էին ինն հարիւր բարձ, որ մտանէր ի ժամ տաճարին ուրախութեանն բազմակալացն կարգելոց ...»¹²⁷: Այս վկայութիւնը, ինչպես հայտնի է, վերաբերում է Արշակ Բ-ի արքունիքին: Նույնի մասին հաղորդում է նաև Ներսէս Մեծ կաթողիկոսի վարքագիրը, որը, սակայն, 900-ի փոխարեն նշում

(126) Հմմտ. Խ. Սամուելյան, Հին Հայ իրավունքի պատմութիւն, հ. 1, Երևան, 1939, էջ 192:

(127) Փափստոս Բուզանդ, Գ, բ:

է 400 թիվը. «կարգէր ի ժամ ճաշոյն ի սեղան արքային Արշակայ բարձս չորեքհարիւր»¹²⁸:

Նույն այս 400 թիվը հաղորդում է նաև ավելի ուշ ժամանակի, XIII դարի պատմիչ Ստ. Օրբելյանը, գրելով՝ «Գրիգորիս (խոսքը Լուսավորչի մասին է — Ս.Կ.) հրամայէ մեծին Տրդատայ կարգել զթագաւորութիւն իւր ըստ սահմանի կայսերացն յունաց և տալ ըստ իւրաքանչիւր պատշաճի գահ և պատիւ իշխանացն յաջմէ և յահեկէ, որ և գեղեցկապէս յօրինեալ ի ժամ ճաշոյն նստել բարձս չորեքհարիւր իշխանաց»¹²⁹:

Ն. Ադոնցը մանրախուլզ քննարկելով վերոհիշյալ վկայությունները և դրանք համադրելով Եղիշեի ու Ղազար Փարպեցու մոտ պահպանված, ինչպես նաև Գահնամակի և Զորանամակի համապատասխան տվյալներին, հանգել է այն ընդունելի եզրակացության, թե հին Հայաստանում նախարարական տների թիվը կարելի է հաշվել մինչև հիսուն¹³⁰:

Այս նույն կարծիքին է հակված նաև Հ.Հ. Մանանդյանը:¹³¹

Նախարարական տների թվի վերաբերյալ Ն. Ադոնցի եզրակացությունը հավանական համարելով հանդերձ, մենք հակված ենք ենթադրելու, որ աղբյուրներում հիշատակված 900 կամ 400 թիվը զուրկ չէ հիմքից, սակայն մի վերապահությամբ. այդ թվի տակ պետք է հասկանալ ոչ թե հայ նախարարական տները միայն, այլև Արշակունյաց Հայաստանում գործակալություն վարող պաշտոնյաներին¹³²: Այստեղից էլ ակնհայտ է, որ Ն. Ադոնցը իրավացիորեն չի նույնացնում գործակալությունը նախարարության հետ, թեև, ինչպես տեսանք, շատ դեպքերում նախարարը կարող էր լինել միաժամանակ և գործակալ, վարելով պետական այս կամ այն պաշտոնը՝ գործակալությունը:

(128) Պատմութիւն սրբոյն Ներսիսի Պարթևի Հայոց հայրապետի, «Սոփերք հայկականք», 2, վենետիկ, 1863:

(129) Ստեփաննոսի Օրբելեան, Պատմութիւն նահանգին Սիսական, Թիֆլիս, 1911, գլխ. 2:

(130) Н. Адонц, Армения в эпоху Юстиниана, стр. 236-297.

(131) Հ.Հ. Մանանդյան, Ֆեոդալիզմը հին Հայաստանում, էջ 45-46:

(132) Հմմտ. Խ. Սամուելյան, Հին հայ իրավունքի պատմություն, հ. 1: Երևան, 1939, էջ 218-219:

ՎԵՐՉԱԲԱՆ

Հայկական լեռնաշխարհում Ուրարտական, նույն է թե՛ Վանի, թագավորության անկումից հետո անցած հազարամյակը որպես մեկ միասնություն կազմավորված հայ ժողովրդի պատմության ամենակարևոր փուլերից մեկն էր: Ճիշտ է, հազարամյա այդ ժամանակահատվածը եղել է պարբերական և դաժան վայրիվերումների մի շրջան, սակայն այդ ընթացքում հայ ժողովուրդը պատմության քառուղիներում հասել է ոչ միայն ինքնահաստատման, այլև ճանաչում գտնելով ամբողջ Արևելքում, դարձել է հին Արևելքի պատմության կարևորագույն գործոններից մեկը:

Մ.թ.ա. V ղարի առաջին կեսին Հայկական լեռնաշխարհի հասարակությունը արդեն գտնվում էր միասնական ինքնուրույն պետականություն կազմելու շեմին, սակայն արագ թափով բարձրացող մեղա-պարսկական թագավորությունը, իր գերիշխանությունը տարածելով ամբողջ Առաջավոր Ասիայի վրայ, իրեն հպատակեցրեց նաև Հայկական լեռնաշխարհը, դրանով իսկ ժամանակավորապես, շուրջ երկու դար, խանգարեց հայկական ինքնուրույն պետականության կազմավորմանը:

Հայկական պետականության առաջացումը և հետագա զարգացումը սերտորեն առնչված է եղել Հայաստանի բնականաշխարհագրական սահմաններում հայկական էթնիկական տարրերի համախմբման հիման վրա հայ ժողովրդի աստիճանական կազմավորման պատմական պրոցեսի հետ:

Սկզբնաղբյուրների (Հերոդոտոս-Քսենոփոն) վկայությունների մանրակրկիտ վերլուծությունը բերել է մեզ այն եզրակացության, որ դեռևս Աքեմենյան Պարսկաստանի գերիշխանության տակ գտնվող Հայաստանում արտաբնակական ուժերը գտնվում էին համեմատաբար զարգացած վիճակում և բոլոր նախադրյալները կային դրանց հետագա զարգացման համար: Սակայն Պարսկաստանը մ.թ.ա. V-IV դարերում ինքը սպլում էր քաղաքական ու տնտեսական լճացման ծանր վիճակ, որով և, բնականաբար, խոչընդոտում էր և արգելակում իր տիրապետու-

Թյան տակ գտնվող երկրների, այդ թվում նաև Հայկական լեռնաշխարհի, զարգացման բնականոն ընթացքը:

Սակայն նման դրուեթյունը չէր կարող երկար շարունակվել: Մ.թ.ա. IV դարի վերջին տասնամյակները Մերձավոր Արևելքի երկրների քաղաքական կյանքում մեծ փոփոխություններ առաջացրին: Ալեքսանդր Մակեդոնացու գլխավորած հունա-մակեդոնական առաջխաղացումը դեպի Արևելք խթանեց նոր՝ հելլենիստական տիպի միապետությունների առաջացմանը: Վերջիններիս և Հայաստանի միջև ստեղծված տնտեսական, քաղաքական և մշակութային կապերը վճռական նշանակություն ունեցան երկրի հետագա սոցիալ-տնտեսական ու քաղաքական զարգացման համար:

Ալեքսանդր Մակեդոնացու արշավանքների առաջին, մերձավորագույն հետևանքը Հայաստանի համար եղավ օտարերկրյա, Աքեմենյանների քաղաքական լծի տապալումը, որից հետո երկիրը, մեր ուսումնասիրած շուրջ յոթը դար տևած ժամանակահատվածում, պահպանեց իր անկախ քաղաքական գոյությունը: Արդեն որպես ժողովուրդ կազմավորված հայերը, ստեղծելով իրենց ինքնուրույն պետականությունը, այն հաջող կերպով պաշտպանեցին, սկզբում Սելևկյանների, հետագայում՝ Հռոմի և Պարսկաստանի, բոլոր տեսակի ոտնձգություններից:

Եթե մինչ այդ պետականությունից գուրկ Հայաստանը հնարավորություն չէր ունեցել դուրս գալու միջազգային քաղաքական ասպարեզ, ապա Աքեմենյանների լուծը թոթափելուց հետո Հայաստանում որպես թագավոր հաստատված Երվանդունիները, իսկ հետագայում՝ Արտաշեսյանները, հանդես են գալիս միջպետական հարաբերություններում իրավական կողմ, լուրջ դեր խաղալով ընդհանրապես Մերձավոր Արևելքի քաղաքական կյանքում: Հետագայում, Արշակունիների թագավորության ժամանակ, ստեղծվեց արդեն միջազգային այնպիսի իրավիճակ, երբ Հայաստանը ստիպված էր խուսանալու երկու հզորների՝ Հռոմի և Պարսկաստանի միջև:

Հայկական պետականությունը, անկասկած, առաջացել է տեղական միջավայրում, հայկական հասարակության սոցիալ-տնտեսական ներքին հետագա զարգացման հիման վրա: Այնուհետև, սակայն, այն ակներևաբար կրել է սատրապական տիրապետության ազդեցությունը, միաժամանակ և գերծ չի մնացել շրջապատի հելլենիստական միապետությունների, հատկապես

Մելեկյան թագավորության, ինչպես նաև պարթև Արշակունիներին, պետական կառուցվածքի այս կամ այն ձևերի ներթափանցումից:

Արտաշեսյանների և Արշակունիների ժամանակ Հայաստանում կազմավորվեցին պետական այնպիսի կայուն հաստատություններ, ինչպիսիք գործակալութուն-նախարարությունները, որոնք նույնիսկ Արշակունյաց թագավորության անկումից հետո իսկ, երկար ժամանակ, օտար՝ բյուզանդական, սասանյան և արաբական տիրապետությունների տակ, շարունակեցին իրենց գոյությունը. իսկ ավելի ուշ, Բագրատունյաց թագավորության, նույնիսկ Կիլիկիայում հայկական պետության մեջ այդ հաստատություններից շատերը վերականգնվեցին, դառնալով պետության կառավարման կարևորագույն լծակներ:

ՅԱՆԿ ՕԳՏԱԳՈՐԾՎԱԾ ԱՂԲՅՈՒՐՆԵՐԻ ԵՎ ԳՐԱԿԱՆՈՒԹՅԱՆ

1. ԱՂԲՅՈՒՐՆԵՐ

- Ազաթանգեղայ Պատմութիւն Հայոց, Տփղիս, 1909:*
Աստուածաշունչք հին և նոր կտակարանաց, Վենետիկ, 1660:
Եղիշէ վարդապետի վասն Վարդանայ և Հայոց պատերազմին, Վենետիկ, 1864:
Կորիւն, Պատմութիւն վարուց և մահուան Մեսրոպայ վարդապետի, Վենետիկ, 1894:
Ղազարայ Փարպեցւոյ Պատմութիւն Հայոց և թուղթ առ Վահան Մամիկոնեան, Տփղիս, 1904:
Մովսէս Խորենացի, Հայոց պատմութիւն, թարգմանութիւն, ներածութիւն և ծանոթագրութիւններ՝ Ստ. Մալխասյանի, Երևան, 1940:
Մովսիսի Խորենացւոյ Պատմութիւն Հայոց, Տփղիս, 1913:
Մովսեսի Կաղանկատուացւոյ Պատմութիւն Աղուանից աշխարհի, Մոսկվա, 1860:
Յովհան Մամիկոնեան, Պատմութիւն Տարօնոյ, Երևան, 1941:
Պատմութիւն սրբոյն Ներսիսի Պարթևի հայոց հայրապետի, «Սովետրք հայկականք», 2, Վենետիկ, 1853:
Սեբէոսի Եպիսկոպոսի Պատմութիւն, Երևան, 1939:
Ստեփանոս Օրբելեան, Պատմութիւն նահանգին Սիսական, Թիֆլիս, 1911:
Փավստոս Բուզանդ, Հայոց պատմութիւն, թարգմանութիւն, ներածութիւն և ծանոթագրութիւններ՝ Ստ. Մալխասյանի, Երևան, 1947: 2-րդ հրատ. Երևան, 1968:
Փաւստոսի Բիւզանդացւոյ Պատմութիւն Հայոց, Ս. Պետերբուրգ, 1883:
Քսենոփոն, Անաբասիս, բնագրից թարգմանեց՝ Սիմոն Կրկյաշարյան, Երևան, 1970:
Agathangelus und die Akten Gregors von Armenien, neu herausgegeben von Paul de Lagard, Göttingen, 1887.
Ammiani Marcellini Rerum gestarum libri qui supersunt, rec. v.Gardthausen, bibl. Teubneriana.

- Appiani Alexandrini *Historia Romana*, V.I-II, bibl. Teubneriana, Lipsiae, 1879.
- Arriani Flavii *De expeditione Alexandri*, rec. Robertus Geler, Lipsiae, 1873.
- Curtius Rufus, *Historiae Alexandri Magni*, Lipsiae, 1816.
- Diodori *Bibliotheca Historica*, v.I-V, Lipsiae, 1866-1868.
- Herodoti *Historiarum libri IX*, v. I-3, Cambridge, Mas. – London, 1946-1960 (Loeb Classical Library).
- Josephi Flavii *Opera omnia*, rec. E. Bekker, bibl. Teubneriana.
- Justini M. Juniani *Epitoma historiarum Philipicarum Pompeii Trogi*, Lipsiae 1915.
- Memnonis *Historiae Heracleae Ponti*, Lipsiae, 1816.
- Müller C., *Fragmenta historicorum graecorum*, v. I-IV, Paris, 1883.
- Plinii Secundi C., *Naturalis Historiae*, Paris, 1883).
- Plutarchi *Vitae parallelae*, v.I-IV, Lipsiae, 1914-1939.
- Polybii *Historiae*, v. I-VI, Cambridge, Mass.-London, 1960, (Loeb Classical Library).
- Polyaeni *Strategematon libri octo*, bibl. Teubneriana.
- Strabonis *Geographica*, rec. A. Meineke, v. I-III, Lipsiae, Lipsiae, 1907.
- Suetonii Tranquilli *De vita Caesarum libri VIII*, Lipsiae, 1907.
- Taciti *opera*, Lipsiae, 1829.
- Xenophontis *Cyropaedia*, rec. Arnoldus Hug, Lipsiae, 1878.
- Xenophontis *Expeditio Cyri*, rec. Arnoldus Hug, Lipsiae, 1878.
- Xenophontis *Oeconomicus*, Berlin, 1910.

2. ԳՐԱԿԱՆՈՒԹՅՈՒՆ

- Աբրահամյան Ա.Գ., Գառնիի հունարեն արձանագրությունը,
«Էջմիածին», 1947, մարտ-ապրիլ,
Ադոնց, Ն., Պատմական ուսումնասիրություններ, Փարիզ, 1948:
Աճառյան Հր., Հայերեն արմատական բառարան, Կ. 1, Երևան,
1971:
Աճառյան Հր., Հայերեն արմատական բառարան, Կ. Է, Երևան,
1935:
Աճառյան Հր., Օտար աղբյուրները հայերի մասին. Ստրաբոն.
Երևան, 1940:
Անասյան Հ., Հայկական մատենագիտություն, Հ. Ա, Երևան, 1959:
Առաքելյան Բ.Ն., Լատիներեն արձանագրություն Արտաշատից,
ՊԲՀ, 1967, Նո 4:
Առաքելյան Բ.Ն., «Կօշիկը» որպես սոցիալական տերմին,
Արմֆանի Տեղեկագիր, 1940, Նո 3:
Աստուրյան Հ., Քաղաքական վերաբերություններ ընդմեջ Հայաստանի և Հռոմի, Վենետիկ, 1912:
Բազմաձյան Կ., Իսկական պատմություն հայոց, Պոլիս, 1914:
Բարթիկյան Հ.Մ., Գառնիի հունարեն արձանագրությունը և Մովսես Խորենացին, ՊԲՀ, 1965, Նո 3:
Բիւզանդացի Նորայր, Կորիւն վարդապետ և նորին թարգմանութիւնք, Տիգրիս, 1910:
Գաթրըրճեանց Յ., Տիեզերական պատմութիւն, Վիեննա, Կ. Ա, 1849:
Հատ. Բ, Վիեննա, 1852:
Գամասխուրդիա Թ.Կ., Բզեչխությունների ինստիտուտի հարցի շուրջ, ՀՍՍՀ ԳԱ Հասարակական գիտությունների ինֆորմացիայի սեկտոր, Նո 5, 1971, Երևան:
Գարագաշյան Ա.Մ., Քննական պատմություն հայոց, մասն Ա, Թիֆլիս, 1895: Մասն Բ, Թիֆլիս, 1895:
Երեմյան Ս.Տ., Հայաստանը ըստ «Աշխարհացույց»-ի, Երևան, 1963:
Երեմյան Ս.Տ., Հայկական առաջին պետական կազմավորումները, ՊԲՀ, 1968, Նո 3:
Երեմյան Ս.Տ., Նախը-ի-Ռուստեմի «Քաաբա ի Չարդուշտ» հուշարձանի արձանագրության տվյալները Հայաստանի մասին, ՊԲՀ, 1966, Նո 2:
Էլչիբեկյան Ժ.Գ., Երվանդունիների ծագման հարցի շուրջը, ՊԲՀ, 1971, Նո 2:

- Ժամկետչյան Հ., Հայաստանը նախնադարյան-համայնական հասարակության և սորկատիրության շրջանում, Երևան, 1961:
- Ինճիճեան Ղ., Հնախօսութիւն աշխարհագրական Հայաստանեայց աշխարհի, Գ. Բ, Վենետիկ, 1835:
- Լեո, Երկեր 10 հատորով, Հ. 1, Երևան, 1966:
- Կարախանյան Գ.Հ., Արամեերեն երկու արձանագրություններ, ՊԲՀ, 1971, Նո 3:
- Կոստանյան Կ., Հիւսուածք, գիրք Գ, Վիեննա, 1877:
- Կոստանյան Ա.Ա., «Նախարար» տերմինի մասին, ՊԲՀ, 1973, Նո 3:
- Կրկյաշարյան Ս.Մ., Դիտողություններ հին հայկական տաճարային քաղաքների առաջացման մասին, Տեղ. ՀԳԱՀԳ, 1963, Նո 9:
- Կրկյաշարյան Ս.Մ., Սինոյկիսմոսը հելլենիստական Փոքր Ասիայում և Հայաստանում, ՊԲՀ, 1964, Նո 1:
- Կրկյաշարյան Ս.Մ., Եվս մի անգամ Գառնիի հունարեն արձանագրության մասին, ՊԲՀ, 1965, Նո 3:
- Կրկյաշարյան Ս.Մ., Բդեշխությունների առաջացումը Հայաստանում, ՊԲՀ, 1966, Նո 4:
- Կրկյաշարյան Ս.Մ., Հին Հայաստանի և Փոքր Ասիայի քաղաքների պատմության դրվագներ, Երևան, 1970:
- Կրկյաշարյան Ս.Մ., Տիգրան II-ին վերաբերող մի կարևոր ուղղում, ՊԲՀ, 1967, Նո 4:
- Հակոբյան Ս.Ե., Հայ ժողովրդի ֆեոդալական շրջանի պատմության պերիոդիզացիայի հարցի շուրջը, Տեղ. ՀԳԱՀԳ, 1951, Նո 3:
- Հակոբյան Ս.Ե., Հայ գյուղացիության պատմություն, Գ. 1, Երևան, 1957:
- Հայ ժողովրդի պատմություն (Ձեռնարկ միջնակարգ դպրոցների համար) Գ. 1, Երևան, 1956:
- Հայ ժողովրդի պատմություն (բուհական ձեռնարկ), Գ. 1, Երևան, 1964:
- Հայ ժողովրդի պատմություն, Գ. 1, Երևան, 1971:
- Հրանդ Արմեն, Մեծն Տիգրան, Կահիրե, 1957:
- Մանանդյան Հ.Հ., Դիտողություններ շինականների դրության մասին մարզպանության շրջանում, Երևան, 1925:
- Մանանդյան Հ.Հ., Ֆեոդալիզմը հին Հայաստանում (Արշակունիների և մարզպանության շրջան), Երևան, 1934:
- Մանանդյան Հ.Հ., Տիգրան Երկրորդը և Հռոմը, Երևան, 1940:

- Մանանդյան Հ.Հ., Քննական տեսությունն հայ ժողովրդի պատմության, ՀԱ, Երևան, 1944; Հ. Բ, մասն Ա, Երևան, 1957:
- Մանանդյան Հ.Հ., Գառնիի հունարեն արձանագրությունը և Գառնիի հեթանոսական տաճարի կառուցման ժամանակը, Երևան 1946:
- Մանանդյան Հ.Հ., Արմավիրի հունարեն արձանագրությունները նոր լուսաբանությունը, Երևան, 1946:
- Շահինյան Լ.Փ., Պարսիկ Արշակունիների հարստության հաստատման թվականը ըստ Խորենացու, ՊԲՀ, 1966, Նո 1:
- Շահինյան Լ.Փ., Ինչպիսի՞ն է Մովսես Խորենացու «Հայոց Պատմության» ժամանակագրական համակարգը, ԲՄ, Նո 8, 1967:
- Շահինյան Լ.Փ., Մովսես Խորենացու «Պատմության» մեջ հիշատակվող վասեի մասին, ՊԲՀ, 1973, Նո 4:
- Չամչեան Մ., Պատմութիւն Հայոց, հ. Ա, վեներտիկ, 1784:
- Սամուելյան Խ., Հին հայ իրավունքի պատմություն, հ. 1, Երևան, 1939:
- Սարգսյան Գ.Խ., Հին Հայաստանի սոցիալ-տնտեսական զարգացման ուղիների մասին, Երևան, 1963:
- Սարգսյան Գ.Խ., Գառնիի հունարեն արձանագրության շուրջը, Տեղ. ՀԳԱՀԳ, 1957, Նո 10:
- Տիրացյան Գ.Ա., Երվանդունիները Հայաստանում, Տեղ. ՀԳԱՀԳ, 1958, Նո 6:
- Տիրացյան Գ.Ա., Մովսես Խորենացու «Հայոց Պատմության» և Սարաբոնի «Աշխարհագրության» մի քանի տվյալներ Հայաստանի ն.մ.թ. 3-2րդ դարերի պատմության մասին, ԲՄ, 1962, Նո 6:
- Տիրացյան Գ.Ա., Հին հայկական պետության առաջացումը, ՊԲՀ, 1966, Նո 4:

- Адонц Н., Армения в эпоху Юстиниана, С.П.б., 1908.
- Аракелян Б.Н., Гарни I, Ереван, 1951; Гарни II, Ереван, 1957.
- Бокшанин А.Г., Парфия и Рим, ч. I, М., 1963.
- Болтунова А.И., Греческие надписи Армавира, «Известия АрмФана 1942, №1-2.
- Болтунова А.И., Возникновение классового общества и государственной власти в Иберии, ВДИ, 1956, № 2.
- Борисов А.Я., Надписи Артаксия (Арташеса), царя Армении, ВДИ, 1946, № 2.
- Джавахов И., Государственный строй древней Грузии и древней Армении, СПб., 1905.
- Дройзен И.Г., История эллинизма, т. I, М., 1890.
- Дьяконов И.М., Старкова К.Б., Надписи Артаксия (Арташеса), царя Армении, ВДИ, 1955, № 2.
- Дьяконов И.М., История Мидии от древнейших времён до конца IV века до н.э., М.-Л., 1956.
- Дьяконов М.М., Очерк истории древнего Ирана, М., 1961.
- Еремян С.Т., Основные черты общественного строя Армении в эллинистическую эпоху, *Стр.* 29029, 1948, № 11
- Еремян С.Т., О рабстве и рабовладении в древней Армении, ВДИ, 1950, № 1.
- Еремян С.Т., Развитие городов и городской жизни в древней Армении, М., 1953, № 3.
- Еремян С.Т., Рабовладельческое общество в древней Армении, 1953, (автореферат докт. дисс.).
- Капанцян Гр., Историко-лингвистические работы, Ереван, 1956.
- Капанцян Гр., Хаяса-колыбель армян, Ереван, 1948.
- Сарксян Г.Х., Тигранакерт. Из истории древнесармянских городских общин, М., 1960.
- Крякшарян С.М., Возникновение городов в Армении во II веке до н. э. - III в. н. э., «Научные доклады высшей школы. Исторические науки», 1961, № 4.
- Манандян Я.А., О торговле и городах Армении в связи с мировой торговлей древних времён (V в. до н.э. - XV в. н.э.), Ереван, 1930, 2ое изд. Ереван, 1954.
- Манандян Я.А., Актуальные вопросы историографии древней Армении, «Историк марксист», 1940, № 6.
- Манандян Я.А., Проблемы общественного строя доаршахской Армении, «Исторические записки», 1945, № 15.
- Манандян Я.А., Новые заметки о греческой надписи и языческом храме Гарни, Известия АН Арм. ССР, Общественные науки, 1951, № 4.

Марр Н., Этимология двух терминов армянского феодального строя, Записки Вост. Отд. Имп. Рус. Арх. Общ., т. XI, 1898.

Мартirosян А.А., Город Тейшебани, Ереван, 1961.

ханян А.Г., Храмовые объединения Малой Азии и Армении (IV в. до н.э. - III в. н.э.), М., 1959.

Очерки истории СССР, Первобытно-общинный строй и древнейшие государства на территории СССР, М., 1956.

Периханян А.Г., Древнеармянские восстания, ВДИ, 1956, №2.

Периханян А.Г., Храмовые объединения Малой Азии и Армении, М., 1959.

Периханян А.Г., Арамейская надпись из Гарни, ИФЖ, 1964, №3.

Периханян А.Г., Арамейская надпись из Зангезура, ИФЖ, 1965, №4.

Пигулевская Н.В., Города Ирана в раннем средневековье, М.-Л., 1956.

Пиотровский Б.Б., История и культура Урарту, Ереван, 1944.

Пиотровский Б.Б., Ванское царство, М., 1959.

Рапович А.Б., Эллинизм и его историческая роль, М.-Л., 1950.

Ростовцев М.И., Анаранская греческая надпись царя Тирилата. Анийская серия, №6, СПб., 1911

Саркисян Г.Х., Самоуправляющийся город Селевкидской Вавилонии, ВДИ, 1952, № 1.

Саркисян Г.Х., Тигранакерт. Из истории древнеармянских городских общин, М., 1960.

Струве В.В., Новые данные истории Армении, засвидетельствованные Бехистунской надписью, ИАНАОН, 1946, №8.

Тирациян Г.А., Страна Коммагена и Армения, ИАНАОН, 1956, №3.

Тирациян Г.А., Некоторые аспекты внутренней организации армянской сатрапии, ИФЖ, №2.

Тревер К.В., Очерки по истории культуры древней Армении, М.-Л., 1953.

Тревер К.В., Очерки по истории и культуры Кавказской Альбании, М.-Л., 1959.

Фрай Р., Наследие Ирана, М., 1972.

Халатяни Г., Армянские Аршакиды в «Истории Армении» Моисея Хоренского, ч. I, М., 1903.

Халатяни Г., «Истории Армении» Моисея Хоренского, М., 1893.

Церетели Г.В., Армазская билингва, Тбилиси., 1941.

Церетели Г.В., Эпиграфические находки в Мцхета - древней столице Грузии, ВДИ, 1948, №2.

Эмин Н., История Моисея Хоренского, М., 1893.

- Aslan K., *Études historique sur le peuple arménien*, Paris, 1909.
- Babelon I., *Les rois de Syrie, d'Arménie et de Commagène*, Paris, 1890.
- Beloch K.J., *Griechische Geschichte*, III Band, II Abteilung, Strassburg, 1904.
- Bengston H., *Die Strategie der hellenistischen Zeit*, II, München, 1944.
- Bickermann W., *Institutions des Seleucides*, Paris, 1938.
- Gary M., *A History of the Greek World from 323 to 146 B.C.*, London, 1932.
- Dittenberger W., *Orientalis Graeci Inscriptiones Selectae (OGIS)*, v, I-II, Lipsiae, 1903-1905.
- Dittenberger W., *Sylloge Inscriptionum Graecarum*, ed. 3, Lipsiae, 1915-1924.
- Dörner F.K. & Naumann R., *Forschung in Kommagene*, "Istanbuler Forschungen", Bd. 10, Berlin, 1939.
- Dörner K.F., Goell T., *Arsameia am Nyamphaies*, "Istanbuler Forschungen", Bd. 23, 1963.
- Henning W.B., *A New Parthian Inscription*, "Journal of the Royal Asiatic Society", 1955, Facs. 3-4.
- Honigmann Ernest et Maricq André, *Recherches sur le Res Gestae divi Saporis*, Bruxelles, 1953.
- Humann K., und Puchstein O., *Reisen in Kleinasien und Nordsyrien*, Berlin, 1890.
- König Fr., *Relief und Inschrift des Königs Dareics I*, Leiden, 1938.
- Langlois V., *Numismatique générale de l'Arménie*, Paris, 1859.
- Lehmann-Haupt C.F., *Eine griechische Inschrift aus der Spätzeit Tigranokertas*, "Klio", VIII (1908).
- Markwart J., *Untersuchungen zur Geschichte von Eran*, Heft I, Göttingen, 1896.
- Markwart J., *Eransahr nach der Geographie des Pa. Moses Chorenac'i*, Berlin, 1901.

- Markwart, J., Die Chronologie des Kambyses und der Lüdenkönige und der altpersische Kalender, "Philologus", Suppl. X, 1905.
- Markwart, J., Südarmenien und die Tigrosquellen nach den griechischen und arabischen Geographen, Wien, 1930.
- Markwart J., Die Entstehung der armenischen Bistümer, Rom, 1932.
- Perikhanian A., Les inscriptions araméennes du roi Artachés, REANS, t. VIII, 1971.
- Perikhanian A., Une inscription araméenne du roi Artasés trouvée à Zanguézour (Siwnik'), REANS, t. III, 1966.
- Ramsay W., The Social Basis of Roman power in Asia Minor, Aberdeen 1941.
- Reinach Th., Mithridate Eupator, Paris, 1890.
- Rostovtseff M.I., The Social and economic history of the hellenistic world, Oxford, 1941.
- Rostovtseff M.I. & Welles C.B., A Parchment contract of loan from Dura-Europos., Yale Classical Studies, II (1931).
- Sandalgian J., Histoire documentaire de l'Arménie, II, Rome, 1917.
- Seyrig H., Antiquités syriennes, 42, Sur les ères de queleques villes de Syrie, "Syria", 1940.
- Tomanoff C., Studies in Christian Caucasian history, Georgetown, 1963.
- Weissbach F.H., Zur neubabylonischen und achamenidischen Chronologie, "Zeitschrift der Deutschen Morgenländischen Gesellschaft", Bd. 62, 1908.
- Welles C.B., The Royal correspondence in the hellenistic period, New Haven, 1934.

ԲՈՎԱՆԴԱԿՈՒԹՅՈՒՆ

	Էջ
ՆԵՐԱԾՈՒԹՅՈՒՆ	5
ԳԼՈՒԽ ԱՌԱՋԻՆ.- Հայկական պետականության տարրերի առաջացումը Աքեմենյան տիրապետության ժամանակաշրջանում	25
ԳԼՈՒԽ ԵՐԿՐՈՐԴ.- Երվանդունի թագավորական հարստության մասին.....	47
ԳԼՈՒԽ ԵՐՐՈՐԴ.- Հայաստանը հունա-մակեդոնական էքսպանսիայի տարիներին.....	61
ԳԼՈՒԽ ՉՈՐՐՈՐԴ Թագավորական իշխանությունը հին Հայաստանում	93
ԳԼՈՒԽ ՀԻՆԳԵՐՈՐԴ.- Քրմական դասը Հայաստանում	129
ԳԼՈՒԽ ՎԵՅԵՐՈՐԴ.- Պետական ապարատի կազմավորումը նրա հետագա զարգացման փուլը Հայաստանում	153
ԳԼՈՒԽ ՅՈԹԵՐՈՐԴ Զաղաքը հելլենիստական պետության կազմում	201
ԳԼՈՒԽ ՈՒԹԵՐՈՐԴ.- Թագավորական իշխանությունը Արշակունյաց Հայաստանում	217
ԳԼՈՒԽ ԻՆՆԵՐՈՐԴ.- Նախարարներն ու նախարարությունները Արշակունյաց Հայաստանում	259
ՎԵՐՋԱԲԱՆ	296
ՅԱՆԿ ՕԳՏԱԳՈՐԾՎԱԾ ԱՂԲՅՈՒՐՆԵՐԻ ԵՎ ԳՐԱԿԱՆՈՒԹՅԱՆ	299

ՀԵՂԻՆԱԿԻ ՄԱՍԻՆ

Միմոն Միսակի Կրկյաշարյանը ծնվել է 1923 դեկտ. 7-ին, Աթենքի Կոկիմիա արվարձանում, ուր կենտրոնացել էին Թուրքիայից մազապուրծ հազարավոր գաղթականներ:

1936 թ. Ս. Կրկյաշարյանն ավարտել է յոթնամյա հայկական դպրոցը և ուսումը շարունակել է հունական գիմնազիայում, որն ավարտել է 1943 թ.:

Գիմնազիայում սովորած տարիներին մասնակցել է խաչագերման զավթիչների դեմ սկսած դիմադրական շարժմանը:

Անդամակցել է տեղի գրական խմբակին, ինչը վճռորոշ նշանակություն է ունեցել պատանի Կրկյաշարյանի գրական հետագա գործունեության համար: Այդ ժամանակ լույս է տեսել նրա անդրանիկ գործը՝ ΛΥΚΑΥΤΕΣ (Ցայգալույս) հունարեն բանաստեղծությունների ժողովածուն:

1944 թ. ընդունվել է Աթենքի համալսարան, ուր սովորել է մինչև հաշտեճադարձվելը (1947 թ.): Հաշտեճադարձվելը շրջադարձային փուլ եղավ Կրկյաշարյանի կյանքում: 1950 թ. ընդունվել է Երևանի Խաչատուր Աբովյանի անվան Հայկական մանկավարժական ինստիտուտի պատմության ֆակուլտետ, որն ավարտել է 1954 թ.:

Ինստիտուտն ավարտելուց հետո որոշ ժամանակ որպես պատմության դասատու պաշտոնավարել է հանրապետության դպրոցներում, միաժամանակ զբաղվելով գրական-գեղարվեստական թարգմանությամբ:

1959 թ. ընդունվել է Հայաստանի Գիտությունների Ակադեմիայի Պատմության ինստիտուտի ասպիրանտուրա և ուսումնառության համար գործուղվել Լենինգրադ (Սանկտ-Պետերբուրգ), ուր աշակերտել է Հ. Օրբելուն, Վ. Ստրուվեին, Բ. Պիոտրովսկուն, Ի. Դյակոնովին:

1962 թ. աշխատանքի է անցել ԳԱ Պատմության ինստիտուտի Հին և Միջին դարերի պատմության բաժնում, ուր անվանի հայագետներ Ս. Երեմյանի, Հ. Անասյանի, Գ. Սարգսյանի, Հ. Բարթիկյանի, Մ. Զուլալյանի միջավայրում ձևավորվել է որպես հայագետ-աղբյուրագետ:

1963 թ. «Հելլենիստական թագավորների փոխհարաբերությունները Փոքր Ասիայի և Հայաստանի քաղաքների հետ»

ատենախոսության համար ստացել է պատմական գիտությունների թեկնածուի գիտական աստիճան:

Առ այսօր աշխատելով Պատմության ինստիտուտում անցել է գիտական բոլոր աստիճաններով, մինչև բաժնի վարիչի պաշտոնը:

1968 թ. համատեղության կարգով հրավիրվել է Երևանի Պետական համալսարան, 1975 թ. Ս. Էջմիածնի Հոգևոր ճեմարան որպես պատմության, աղբյուրագիտության, անտիկ գրականության և հին հունարենի դասախոս, իսկ 1995 թ. Պետական համալսարանի Աստվածաբանական ֆակուլտետ, որտեղ առ այսօր դասավանդում է հին հունարեն:

1980 թ. «Հին Հայաստանի պետական կառուցվածքը» ատենախոսության համար նրան շնորհվել է պատմական գիտությունների դոկտորի գիտական աստիճան: Ս. Կրկյաշարյանի ուսումնասիրությունների շրջանակը ներառել է հելլենիստական քաղաքների, Հին Հայաստանի պետական կառուցվածքի, քաղաքական պատմության ոլորտները (հազարամյա կտրվածքով), սկսած մ.թ.ա. VI դարից մինչև հայ Արշակունյաց թագավորության անկման շրջանը:

Ս. Կրկյաշարյանի գիտական գործունեության մեկ ուրիշ ասպարեզ էլ անտիկ հույն հեղինակների (Հոմերոս, Հերոդոտոս, Քսենոփոն, Դիոդորոս, Հովսեպոս Փլավիոս, Դիոն Կասիոս, Պլուտարքոս) գործերի հայերեն թարգմանություններն են, առաջաբաններով և ծանոթագրություններով հանդերձ, որով հիմք դրվեց «Օտար աղբյուրները Հայաստանի և հայերի մասին» մատենաշարի «Հին հունական աղբյուրներ» շարքի: Այս և հին ու նոր հույն գրականությունից (Սուիոկլես, Եվրիպիդես, Արիստոփանես, Վառնալիս) նրա կատարած մեծարժեք թարգմանությունների համար, 1977 թ. նա ընտրվել է Հայաստանի գրողների միության անդամ, 1986 թ. Հոմերի գրականության և արվեստի «Տիբերիան» ակադեմիայի անդամ, 1987 թ. գրողների միությունը նրան շնորհել է Եղիշե Չարենցի անվան գրական մրցանակը, իսկ 2003 թ. թարգմանչաց «Կանթեղ» մրցանակը:

2004 թ. գիտա-մանկավարժական երկարամյա վաստակի համար պատմական գիտությունների դոկտոր Ս. Կրկյաշարյանն արժանացավ Մաշր Աթոռ Ս. Էջմիածնի «Ս. Սահակ – Ս. Մեսրոպ» շքանշանին:

Ս. Կրկյաշարյանը 2000 թ. ընտրվել է ՀՀԳԱԱ թղթակից անդամ:

2600 4ր.

Ս.Մ. ԿՐԿՅԱՇԱՐՅԱՆ

**ՀԻՆ ՀԱՅԱՍՏԱՆԻ
ՊԵՏԱԿԱՆ ԿԱՌՈՒՑՎԱԾՔԸ**

(Մ.Թ.Ա. VI - Մ.Թ. IV ԳԴ.)

Ստորագրված է տպագրության՝ 12.05.2005:
Չափսը՝ 70X100 ¹/₃₂: Թուղթ օֆսեթ №1:
Տպագրությունը՝ օֆսեթ: 39 տպ. մամուլ:

«ԳԵՎՈՐԳ - ՅՐԱՅՐ» ՍՊԸ



Հրատարակչություն
Երևան, Գրիգոր Լուսավորիչ 6:
Հեռ.՝ 52.79.74, 52.79.47
Էլ. փոստ lusakn@rambler.ru

ԳԱԱ Հիմնարար Գիտ. Գրադ.



220090350

A $\bar{11}$
90350